

國學基  
本叢書  
蜀中名勝記

上



H915.074

6022

C1

上

復興製本社樣書

憑號 02200

樣號

頁數 121

26年5月12日

108  
K287071  
2  
1

書叢本基學國

記勝名中蜀

(上)

著倅學曹

行發館書印務商



3 2173 5916 9

71109

蜀中名勝記目錄

卷之一

川西道

成都府一

成都縣附郭

華陽縣附郭

卷之二

成都府二

成都縣

華陽縣

卷之三

成都府三

成都縣

華陽縣

蜀中名勝記

目錄

74  
2

蜀中名勝記 目錄

卷之四

成都府四

成都縣

華陽縣

卷之五

成都府五

新都縣

雙流縣

郫縣

新繁縣

溫江縣

彭縣

崇寧縣

卷之六

成都府六

灌縣

卷之七

成都府七

崇慶州

新津縣 屬嘉定州

茂州

汶川縣 屬茂州

威州

保縣 屬威州

卷之八

成都府八

金堂縣

簡州

仁壽縣

井研縣

蜀中名勝記 目錄

14  
-2

蜀中名勝記 目錄

資陽縣

資縣

內江縣

卷之九

成都府九

漢州

什邡縣

德陽縣

綿竹縣 俱屬漢州

綿州

羅江縣

彭明縣 俱屬綿州

安縣

卷之十

川西道



龍安府

平武縣附郭

江油縣

石泉縣

卷之十一

上川南道

嘉定州直隸

峨眉縣

夾江縣

洪雅縣

犍爲縣

威遠縣

榮縣

卷之十二

上川南道

蜀中名勝記 目錄

74  
2

蜀中名勝記 目錄

眉州直隸

青神縣

彭山縣

丹稜縣

卷之十三

上川南道

邛州直隸

蒲江縣

大邑縣

卷之十四

上川南道

雅州直隸

名山縣

榮經縣

盧山縣

卷之十五

下川南道

敘州府

宜賓縣附郭

南溪縣

長寧縣

富順縣

慶符縣

筠連縣

高縣

珙縣

興文縣

隆昌縣

下川南道

瀘州直隸

蜀中名勝記

目錄

74  
2

蜀中名勝記 目錄

江安縣

納溪縣

合江縣

卷之十七。

上川東道

重慶府一

巴縣 附郭

江津縣

璧山縣

永川縣

榮昌縣

大足縣

卷之十八

重慶府二

合州

銅梁縣

定遠縣 俱屬合州

安居縣

綦江縣

南川縣

長壽縣

卷之十九

重慶府三

涪州

武隆縣

彭水縣 俱屬涪州

黔江縣

忠州

鄧都縣

墊江縣 俱屬忠州

蜀中名勝記 目錄

74

2

蜀中名勝記 目錄

卷之二十

遵義道

遵義府

遵義縣 附郭

桐梓縣

仁懷縣

眞安州

綏陽縣 屬眞安州

卷之二十一

下川東道

夔州府一

奉節縣 附郭

卷之二十二

夔州府二

巫山縣

卷之二十三

夔州府三

達州

東鄉縣

太平縣 俱屬達州

新寧縣

梁山縣

萬縣

雲陽縣

開縣

大寧縣

大昌縣

建始縣

卷之二十四

川北道

蜀中名勝記 目錄

74  
2

蜀中名勝記 目錄

保寧府一

閬中縣附郭

蒼溪縣

南部縣

廣元縣

昭化縣

卷之二十五

保寧府二

巴州

通江縣

南江縣 俱屬巴州

卷之二十六

保寧府三

劍州

梓潼縣 屬劍州



卷之二十七

川北道

順慶府一

南充縣 附郭

西充縣

卷之二十八

順慶府二

廣安州

岳池縣

渠縣

鄰水縣

大竹縣 俱屬廣安州

蓬州

營山縣

儀隴縣 俱屬蓬州

蜀中名勝記 目錄

74  
2

蜀中名勝記 目錄

卷之二十九

川北道

潼川州一 直隸

射洪縣

卷之三十

潼川州二

蓬溪縣

中江縣

遂寧縣

監亭縣

安岳縣

樂至縣

# 蜀中名勝記卷之一

閩中曹學佺能始著

## 川西道

成都府一成都華陽二縣附郭

華陽國志蜀之爲國肇於人皇與巴同囿至黃帝爲其子昌意娶蜀山氏之女生子高陽是爲帝嚳封其支庶於蜀世爲侯伯歷夏商周武王伐紂蜀人與焉尙書牧誓庸蜀羌髳是也有周之世限以秦巴雖奉王職不得與春秋盟會君長莫同書軌周失綱紀蜀先稱王有蜀侯蠶叢其目縱始稱王次王曰柏灌次王曰魚臯又次後有王曰杜宇始稱帝號曰望帝更名蒲卑治郫邑或治瞿上後傳位于其相開明開明位號曰叢帝叢帝生盧帝盧帝生保子帝九世始傳開明尙焉開明尙自夢郭移乃徙治成都揚雄蜀本紀云蜀王據有巴蜀之地本治廣都樊鄉徙居成都者也巴與蜀讎求救于秦秦惠王二十七年遣張儀與司馬錯等滅蜀遂置蜀郡儀築成都以象咸陽修整里閭市張列肆規制廣備故左思蜀都賦云金城石郭兼而中區旣麗且崇實號成都矣其地東接于巴南接于越北接于秦西奄峨眉地稱天府原曰華陽漢武帝元朔二年以新啓犍爲牂柯越巂三郡疆壤益廣始稱益州初治廣漢之雒縣後乃徙此李固與弟固書曰固今年五十七鬢髮已白所謂容身而遊滿腹而去周觀天下獨未見益州耳昔嚴夫子常

74  
2

言經有五涉其四州有九遊其八欲類此子矣。王莽篡盜改天下郡守爲卒正。又改蜀郡爲導江。遷公孫述爲導江卒正。治臨邛。後據成都稱帝。具置百官。造十層赤樓。東觀漢記曰。公孫述造十層赤樓也。于是改益州爲司隸。蜀郡爲成都尹矣。建武光復二百餘載。迄于孝靈。王室多故。劉焉求益州牧。以避世難。始治綿竹。後徙成都。先主代劉璋而有之。卽位于武擔之南。典略曰。元德于是起館舍。築亭障。從成都至白水關。四百餘區也。後主建興二年。以丞相亮開府領益州牧。亮卒。拜尙書令蔣琬爲大將軍。領益州刺史。蜀亡。晉太康初。乃屬王國。號曰成都內史。永嘉之難。沒于夷獠。成都記云。府治北三里許。有李特所築赤塗城。十六國春秋曰。李雄定成都。以嚴糧爲蜀郡太守。及卽位。遷糧益州刺史是矣。桓溫西伐。李勢出降。劉義慶世說云。宣武平蜀。集參僚置酒于李勢殿。巴蜀縉紳莫不來萃。桓旣素有雄情爽氣。加爾日音調英發。敍古今成敗由人。存亡繫才。其狀磊落。一坐歎賞焉。永和之際。周撫爲蜀郡太守。四十餘年。境土粗安。王逸少與周益州書云。省足下別疏。具彼土山川諸奇。揚雄蜀都。左太沖三都。殊爲不備。悉彼故爲多奇。益令其遊目意足也。可得果當。告卿求迎。少人足耳。至時示意。遲此期。眞以日爲歲。但言此心。已馳于彼矣。又云。吾有七兒。惟一小者未婚。過此。便得至。彼得果此緣。一段奇事也。梁武陵王始封入蜀。元帝與之書云。蜀中斗絕。易動難安。弟可鎮之。吾自當滅賊。又別紙云。地擬孫劉。各安境界。情深魯衛。書信常通。良所託重也。蕭紀反戈東下。以地降于西魏。再折入周。至隋開皇始定之。封其子秀作鎮于茲。營修宮室。成都記曰。隋蜀王秀嘗造一殿。飛鳥不止其上。此其凡耳。後竟被徵。唐初開國。太宗以秦王建益州臺臺。

領之而已。貞觀十年，分成都縣之東，置蜀縣在郭下。明皇西幸，駐蹕成都，始改蜀縣爲華陽，而成都華陽二縣從此分矣。○按今成華二縣，與蜀郡護衛尺籍繡錯，不能細爲分析。大較西門者屬成都，東門者屬華陽，而南北門則成都有三分之二。華陽居其一焉。予觀揚子雲答劉子駿書，有少時所作成都城四隅銘，則今之東南西北四門，頗爲近古。西門者古之宣明門也，南門者古之江橋門也，東門者古陽城門，北門者古咸陽門也，李膺益州記云：最東曰陽城門，次西曰宣明門，蜀時張儀樓，卽宣明門樓也。重閣複道，跨陽城門，故太沖賦云：結陽城之延閣，飛觀榭乎雲中矣。江橋者大江水所經也，稍西爲市橋，曰市橋門，以漢舊州市在此橋南，橋下卽石犀所潛淵，亦曰石牛門，故曰少城。南面有三門焉，咸陽門者，秦惠王二十五年，蜀侯惲賜死，封其子綰爲蜀侯，初蜀人葬惲郭外，綰聞惲無罪，乃使迎喪入葬之郭內，喪車至城，北門忽陷入地中，蜀人因名北門曰咸陽門矣。○成都縣本治赤里街，秦守張若徙入少城內，少城者子城也，惟西南北三壁，東卽大城之西墉，故蜀都賦云：亞以少城接于其西矣。周地圖記云：初張儀築城，城屢壞不能立，忽有大龜出于江，周行旋走，巫言依龜行處築之，城乃得立，所掘處成大池，龜乃伏于中，龜每出，則州境有賊，刺史或病，卽此城也。漢元鼎二年，大城立九門，少城立九門，故有十八郭之稱，而郡縣多城觀矣。○太城者今南門城也，李石詩序云：張儀司馬錯所築太城，自秦惠王乙巳歲至紹興壬午一千四百七十八年，雖頽圯，所存如斷壁峭立，亦學舍一奇觀云。學舍在南，則太城可知矣。○少城者西南之間，今之錦江樓也，古今集記：錦樓在龜城上，前臨大江，下瞰井邑，西眺雪嶺，東望長松，白敏中嘗

賦詩于其上。舊記謂路巖所建。非也。巖在敏中之後矣。范成大詩註云。少城張儀所築。子城也。土甚堅。橫木皆朽。有穿眼土相著不解散。予按王右軍法帖。往在都見諸葛顯。曾見問蜀中事云。成都城門屋樓觀。皆是秦時司馬錯所修。令人遠想慨然。具示爲廣異聞。○華陽國志。張儀。張若。城成都。周迴十二里。高一尺。造作下倉。上皆有屋。而置樓觀射闕。又營廣府舍。置鹽鐵市官。并長丞。皆與咸陽同制。更于夷里橋南立錦官。錦官者。猶合浦之有珠官也。西又有車官城。其城東西南北皆有軍營壘城焉。按此皆從西南隅論耳。蜀漢昭烈卽位于武擔之南。當在城之正中。今蜀藩是也。隋之摩訶池。僞蜀之宣華苑。皆在其內。昔諸葛武侯以丞相開府領益州牧。故晉益州刺史治太城。其制因之。亦唐節度使。宋制置使所稱。建牙交戟地矣。蜀太守治少城。故昔之郡治因焉。西門直街鼓樓。卽宋銅壺閣也。陸游記云。閣南直西川門。西北距府五十步。乃蔣堂知益州伐江濱廟材所創。吳棫。范成大相繼而修張之。爲成都巨觀。書於史。又吳師孟修西樓記云。西樓直府寢之北。每春花時。大帥置酒。高會參佐於其下。五日復縱民遊觀宴嬉。西園以爲歲事。然止得造其廡序而已。合此二說。則府治爲西門無疑。相沿蜀郡太守之故址也。今乃益遜而北。蓋不敢與藩邸抗。于是斥北城之地以居。故武擔山昔在城外。而今在城內。陸務觀有游武擔村落詩。可證矣。轉運使今之藩司也。鈐轄使今之闔司也。運司昔在城東。有玉溪堂。卽僞蜀權臣故宅。今藩司在城北。闔司相沿如故。若提刑漕使。卽今之守巡使者。散在諸路。是其職居位置。皆有不同如此。○南門之勝。如石室。石犀。殿真觀。江濱池。七星橋。昭烈武侯祠。其最著者。○華陽國志云。始文翁立文學精舍講堂。

作石室。一作玉室。在城南。永初後堂遇火。太守陳留。高暎更修立。又增造二石室。李知幾云。西爲文翁。稍南爲高暎。此文翁石室。差大。皆有石像矣。樂史寰宇記云。文翁學堂。一名周公禮殿。方輿勝覽云。前代以周公爲先聖。至唐貞觀始從房元齡等議。更祀孔子。開元冊諡文宣。王位南嚮。自是號文宣王殿。而周公之祀遂廢。然公舊像猶存。帥袁說友乃爲殿祀之。按上南志以武侯征西南夷。而夢見周公。故敕所在祀周公也。任豫益州記云。禮殿其欂櫨節制。猶古建南基高六尺。廈屋三間。通皆圖畫古人之像。及禮器瑞物。堂西有二石室。繫年錄云。紹興六年。成都教授范仲芑奏疏言。本府學殿建于東漢之初。平漢人以大隸記其修築歲月。刻于東楹。至今九百四十三年。蓋天下棟宇之古。無過于此者。按歐陽修集古錄。以周公禮殿記。蔡邕所書也。范鎮云。其柱鍾會隸書刻其上。李知幾十詠詩。說會與鄧艾同入蜀。在咸熙元年甲申。距漢獻興平元年甲戌。凡七十一年矣。會蓋追文翁高君之美而書也。趙明誠金石錄跋云。右漢周公禮殿記者。今成都府學有漢時所建。舊屋柱皆正方。上狹下闊。此記刻在柱上。靈帝初平五年立。距今蓋千年矣。其字畫完好可讀。當時石刻。在者往往磨滅。此記託于廡楹。乃與金石爭壽亦異矣。記有云。甲午年故府梓潼文君。增造吏舍二百餘間。按華陽國志有文參字子奇。梓潼人。平帝用爲益州太守。不從王莽。公孫述。光武嘉之。疑此記所載。即其人也。蓋光武建武十年歲次甲午云。○唐盧照鄰文翁講堂詩。錦里淹中館。岷山稷下亭。空梁無燕雀。古壁有丹青。柳落猶疑市。苔深不辨銘。良哉二千石。江漢表遺靈。岑參詩。文公不可見。空使蜀人傳。講席何時散。高臺豈復全。豐碑文字滅。冥漠不知年。裴鏘詩。文翁石室。

有儀刑。庠序千秋播德馨。古柏尙留今日翠。高岷猶藹舊時青。人心未肯拋羶蟻。弟子依前學聚螢。更歎  
施江無限水。爭流祇願到滄溟。宋李石詩。來爲人所愛。去爲人所思。君看文與高。慈惠蜀之師。至今室中  
像。凜凜建立時。知非伯有石。定是桐鄉祠。蜀人愛二公。遠與千載期。宋京蜀事補亡詩。君不見西漢文翁  
爲蜀守。蜀學不居齊魯後。諸生競欲保翁名。石室鑄磨貴難朽。東漢高公又幾時。爲作石室還如茲。至今  
二室堅且久。文公高公名不衰。噲汝礪謁文公堂。詩。綠荻負幽隱。高槐泛輕涼。各誇一時好。披風互低昂。  
詎知五月中。微陰忽催黃。我行魯侯宮。獨謁文翁堂。若人骨已朽。道在斯不亡。遂令蜀文章。照耀日月傍。  
世事俱腐臭。斯文真久長。靡顏能幾時。蕭條翳墟荒。富貴豈不好。千載同一傷。三歎爲何人。撫己涕自滂。  
○寰宇記云。石室。司馬相如教授于此。從者數千人。按秦宓引地里志。文翁倡其教。相如爲之師。漢家得  
士。盛于其世矣。金石錄云。石室又有左右生題名碑。或云。江陽。寧蜀。遂寧。晉原。以晉志攷之。江陽。蜀漢置  
此郡。寧蜀。遂寧。晉原。皆是宣武平蜀後置。范蜀公云。西漢時諸生姓名。文學祭酒。典學從事各一人。司儀  
主事各一人。左生七十三人。右生三十人。可攷者僅百許人。按集古錄。謂爲晉宋間碑矣。王象之輿地碑  
目云。大周總管太學碑。益州刺史齊國公宇文憲立。益州州學廟堂頌。唐神龍二年。史燾撰。益州館學廟  
堂記。永徽元年。賀公亮撰。益州孔子廟堂碑。開元中。周灝撰。唐明皇追諡孔子册文。宋太平興國五年。府  
尹辛仲甫立石。又云。石室。寶大曆十年。維州刺史鄭藏休撰。殿中侍御史李樞篆。益州文宣王廟碣。會昌  
五年。裴儂撰。趙明誠唐益州學館廟堂記跋云。成都縣令顏有意書。撰人題法。曹陳王文學太子詹事侍



詔宏文館陵州長史而姓名殘缺不可辨。集古錄直以爲有意撰非也。碑陰載當時官僚姓名。後人題云。此記賀遂亮撰。未知果否。繫年錄云。宋高宗皇帝御書大成殿榜。紹興六年賜成都府學。從教授范仲淹所請也。成都記云。僞蜀孟彙有國其相毋昭裔刻孝經論語爾雅周易尚書周禮毛詩禮記儀禮左傳凡十經于石。其書丹則張德釗楊鈞張紹文孫逢吉朋吉周德貞也。石凡千數。盡依大和舊本。歷八年乃成。公穀則有宋田元均時刻古文尙書。則晁公武所補也。胡元質宗愈作堂以貯之。名石經堂。在府學。按已上諸刻。今皆不存。所存者孔門七十二子像。又近時摹宋本而刻者。人物衣褶。差有古意。石經禮記數段。流落在合州賓館中。李陽冰篆書之碑陰。予友范洸見而爲予言之。○石犀寺一名石牛寺。華陽國志。周顯王之世。蜀王有竄漢之地。因獵谷中。與秦惠王遇。惠王以金二笰遺蜀王。王報以珍玩之物。物化爲土。惠王怒。羣臣賀曰。天奉我矣。王將得蜀土地。惠王喜。乃作石牛五頭。朝瀉金其後。曰。牛便金。有養卒百人。蜀人悅之。使使請石牛。惠王許之。乃遣五丁迎石牛。旣不便金。怒遣還之。乃嘲秦人曰。東方牧犢兒。秦人笑之曰。吾雖牧犢。當得蜀也。與地志云。鄧艾南有石牛。卽秦惠王遺蜀王者。水經注。西南石牛門曰市橋。吳漢入蜀。自廣都令輕騎先往。焚之。橋下謂之石犀淵。李冰昔作石犀五頭。以厭水精。穿石犀渠于南江。命之曰犀牛里。後轉犀牛二頭在府中。一頭在市橋。一頭沈之于淵也。今寺正殿階左。有石蹲處。狀若犀然。額曰聖壽寺。古之龍淵寺也。迺晉王羽宅。後捨爲寺。改名龍淵。佛殿有水眼如井。云與海通。高僧傳。晉惠持到蜀。止金淵精舍。是矣。其後改名空慧。隋賜蜀王秀竹園六十頃。此地屬焉。唐儀鳳二年。赦天下。

七寺建塔立石柱。二度僧嘗七百人。此其一也。會昌中廢。至大中元年。李回重建。募萬里橋南元和聖壽寺額暨此。故曰聖壽寺。字則僖宗御書也。寺有尊勝咒石幢。高七尺。圍四尺。太和中馬季武行書。我明嘉靖中掘地得之。○唐岑參石犀詩。江水初蕩瀾。蜀人幾爲魚。向無爾石犀。安得有邑居。始知李太守。伯禹亦不如。杜甫石犀行。君不見秦時蜀太守。刻石立作三犀牛。自古雖有厭勝法。天生江水向東流。蜀人矜誇一千載。泛溢不近張儀樓。今年灌口損戶口。此事或恐爲神羞。終藉隄防出衆力。高擁木石當清秋。○益州記曰。雁橋東有嚴君平卜處。土臺高數丈。祝穆方輿勝覽云。龜城水中出金雁。因謂之雁橋也。錦里耆舊傳曰。嚴君平宅卜肆之井猶存。今爲嚴真觀。道教靈驗記云。成都卜肆支機石。卽海客攜來。自天河所得。織女令問嚴君平者也。太尉燉煌公好奇尙異。命工人鑄取支機一片。欲爲器用。椎琢之際。忽若風聲。墜于石側。如此者三。公知其靈物。乃已之。至今所刻之迹在焉。復令穿掘其下。則風雷震驚。咫尺昏曉。遂不敢犯。唐張九齡送姚許專入蜀賦。得卜肆詩云。蜀嚴化已久。沈冥空所思。嘗聞賣卜處。猶憶下簾時。驅傳應經此。懷賢儻問之。歸來說往事。歷歷偶心期。岑參卜肆詩。君平曾賣卜。卜肆蕪已久。至今杖頭錢。時時地上有。不知支機石。還在人間否。鄭世翼君平古井詩。嚴平本高尙。遠蹈古人風。賣卜成都市。流名大漢中。舊井改人世。寒泉久不通。年多旣罷汲。無禽乃遂空。如何屬秋氣。惟見落雙桐。宋呂光弼詩。卜肆垂簾地。依然門徑開。沈冥時已往。思慕客猶來。鳥啄虛簷壞。狐穿古井摧。空餘舊機石。歲歲長春苔。噲汝礪游嚴真觀。見壁上有記古鼎丹砂事。因述以詩云。古木共幽意。長廊亦肅如。於焉步逍遙。且復散衣裾。

塵慮飄已空。道心頗闕舒。不知度世人。去此歲幾徂。云何有丹砂。尙爾留庭隅。支機亦悠哉。誰復訂有無。我知此公意。慨彼元鼎初。繼之五鳳間。斯民斲刀鐸。聊欲謝世網。歛以道自娛。抱獨理自會。曠懷遺所拘。初匪逃世人。而世自我疎。含默念斯理。起我憂患餘。宋京補亡詩云。君不見莊遵賣卜成都市。市中仙隱無人值。百錢度日復何求。猶有沈冥見文字。不因問著牛女星。下世安能知姓名。雲中雞犬拔家去。舊宅寂寞秋蕪平。搗機石在年年長。藥鼎空留閉黃壤。前時發掘篆籀新。明水神丹光滉灑。金雁橋邊臺觀存。神仙遺事渺難論。安得先生爲我卜。俗骨庶可窺天關。○括地志云。江濱祠在成都縣南上四里。漢郊祀志云。秦并天下立江水祠於蜀。至今歲祀之。按廣雅。江神謂之奇相。江記云。帝女也。卒爲江神矣。漢舊儀云。祭四瀆用三牲圭沈。有車馬紺蓋。以夏之日觴焉。按陸游江濱廟碑云。成都自唐有江濱廟。其南臨江。及後節度使高駢大城成都。廟與江始隔。馮浩設廳記云。廟前臨清池。有島嶼竹木之勝。紅葉夏發。水碧四照。爲一州之觀。田況成都遊樂詩。伏日宴江濱祠避暑。因遊江濱池。此會起于文潞公也。宋祁集江濱池詩云。五月追涼地。滄江剝素漣。林煙昏岸日。樓影壓池天。篠密工迷徑。荷欹巧避船。機忘更何事。魚鳥亦留連。又飛檻枕溪光。歡言客徧觴。暫雲銷樹影。驟雨發荷香。辛白橙蠶熟。庖刀鱸縷長。蘋風如有意。盈柱借浮涼。又溪淺容篙短。舟移疊岸長。烟稠麥荷葉。霞熟荔支房。技疊三搗鼓。杯寒十饋漿。便成逃暑躡。官事底相妨。又九月十日宴江濱亭。節去歡猶在。賓來賞更延。悠揚非短日。淒緊乍寒天。霽沼元非漲。秋花自少妍。蟻留新獻耐。蕙續不殘烟。戲鱣銜餘藻。游龜避折蓮。流芳真可惜。從此遂凋年。○華陽國志

云蜀江衆多作橋。故蜀立里多以橋爲名。西南兩江有七橋。直西門郭江中冲治橋。西南石牛門曰市橋。城南曰江橋。南渡流曰萬里橋。西上曰夷里橋。上里笮橋。橋從冲治橋西出。折曰長昇橋。揚雄蜀記云。星橋上應七星也。李冰所造。按七星橋者。一長星橋。今名萬里。二員星橋。今名安樂。三璣星橋。今名建昌。四夷星橋。今名笮橋。五尾星橋。今名禪尼。六冲星橋。今名永平。七曲星橋。今名昇仙。此李膺所記矣。今南門江洲中有金沙寺。其處俗呼爲七星灘也。後漢書世祖謂吳漢曰。安軍宜在七橋連星間。按漢自廣都乘勝進逼成都。與其副劉尚南北相望。夾江爲營。浮橋相對。公孫述使謝豐揚軍市橋。出漢後。襲破。漢遂馬落水。緣馬尾得出。入壁。命將夜潛渡江。就尙擊豐。斬之。於是水之陰焉。今正南門外者。乃江橋耳。水經注云。南江橋亦曰安樂橋。在城南二十五步。宋孝武以橋爲安樂寺。改名安樂橋。十六國春秋李特將起。童謠云。江頭橋闕下。李成都北門十八子。卽此橋也。南上爲萬里橋。亦名篤泉橋。橋之南有篤泉矣。蜀使費禕聘吳。丞相亮祖之。歎曰。萬里之行。始于今日。故曰萬里橋。唐岑參萬里橋詩。成都與維揚。相去萬里地。滄江東流疾。帆去如鳥翅。楚客過此橋。東看盡垂淚。江都陸肱賦云。萬里兮蜀郡。陪都二橋兮地角天隅。東土爲揚。西邦曰益。架長虹于兩地。客思迢迢。浩積水於千秋。江流脈脈。結構應似。途程甚偏。飾丹牒以。雖同。彼臨淮海。度軒車而旣易。此對銅梁。正用揚益相望事也。○寰宇記云。惠陵。蜀先主陵也。今有祠存。號曰惠陵祠。周地圖云。先主祠在府西南八里。惠陵東七十步。齊高帝夢益州有天子鹵簿。詔刺史傅覃。修立。而規制卑小。至唐相國李回在鎮。更改置守陵戶。四時祭祀。岑參先主廟詩。先主與武侯。相逢雲雷。

際。感通君臣分。義激魚水契。遺廟空蕭然。英靈貫千歲。張儼詩。雄名垂竹帛。荒陵壓阡陌。終古更何聞。悲風入松柏。劉夢得詩。天下英雄氣。千秋尚凜然。勢分三足鼎。業復五銖錢。得相能開國。生兒不象賢。淒涼蜀故妓。來舞魏宮前。宋晁迥詩。天地收霸氣。丘原餘闕宮。野人相指似。旁有若唐封。當時大耳兒。甚似隆準公。夫豈忘故都。崎嶇巴蜀中。割然成三分。正爾扼兩雄。武侯抱遺恨。秦隴竟莫通。獨憐晉昌明。千載時始逢。坐看五胡亂。蕭條河洛空。碑目云。先主廟碑。貞元四年蘇端撰。又云昭烈廟有裴中立。武侯碑。柳公綽書。今存。又有段尹石。爲樵者敲斷。陳薦作詩紀之。又有臨淮公武元衡碑。楊嗣復祠。祭畢。觀碑感舊。有作寄楊汝士和焉。按元和初元。衡鎮蜀。中立爲節度推官。汝士先亦曾作文昌掌管也。酉陽雜俎。成都有唐平南蠻碑。開元十九年。劍南節度副大使張敬忠所立。時南蠻大會長樂。浪州刺史楊盛。頗爲邊患。明皇遣內常侍高守信爲南道招慰處置使。以討之。拔其九城。此事新舊唐書及野史皆不載。按碑目。以此爲蕭晉用撰。在昭烈廟中矣。○能改齋漫錄。蜀先主祠在成都錦官門外。西挾卽武侯祠。東挾卽後主祠。蔣公堂帥蜀。以禪不能保有土宇。因去之。大慈寺有蜀後主。王衍銅像。程公堂繼帥。毀以鑄鐘。蜀語曰。任是兩王。難當二堂。樂史云。關羽。張飛。祠俱在惠陵左右。宋廬陵王立。按今昭烈祠左右侍側者。後主。北地王。譙。諸葛丞相。亮。亮子瞻。及關張兩侯。俱合爲一祠也。蜀志。國降之日。北地王譙率其官屬。哭于先主廟。以妻子自焚是矣。酉陽雜俎云。近有羣盜。發蜀先主墓。入穴。見兩人張燈對弈。侍衛十餘。盜驚懼拜謝。一人顧曰。爾飲乎。乃各飲以一杯。兼乞與玉腰帶數條。命速出。盜至外。口已漆矣。帶乃巨蛇也。視其穴已如

舊成都記云。蜀先主祠旁有孫村。其民皆鬻髮事浮屠。而畜妻子自如。及李德裕下令嚴禁。乃肅如也。○方輿勝覽云。武侯廟在府西南二里。今爲乘煙觀。孔明表云。薄田十頃。桑八百株。卽此地。孔明初亡。百姓遇節朔。各私祭於道上。李雄稱王。始爲廟於少城內。桓溫平蜀夷。少城獨存。孔明廟後封武興王廟。至今祠祀不絕。寰宇記云。諸葛亮相蜀。築臺以集諸儒。兼待四方賢士。號曰讀書臺。在草城門路西。今爲乘煙觀。杜光庭錄異記云。成都書臺坊。武侯宅南。乘煙觀內有古井。井內有魚長六七寸。往往游于井上。水必騰涌。相傳其井有龍矣。杜甫詩。丞相祠堂何處尋。錦官城外柏森森。映階碧草自春色。隔葉黃鸝空好音。三顧頻煩天下計。兩朝開濟老臣心。出師未捷身先死。長使英雄淚滿襟。武少儀詩。執簡焚香入廟門。武侯神像儼如存。因機定蜀延衰漢。以計連吳振弱孫。欲盡智能傾僭盜。善持忠節輔庸昏。宣王請戰貽巾幗。始見才吞亦氣吞。楊汝士詩。古柏森然地。修嚴蜀相祠。一過榮異代。三顧盛當時。功德流何遠。馨香薦未衰。敬名探國志。飾像慰毗思。昔謁從征蓋。今聞擁信旗。固宜光籠下。有淚刻前碑。陳薦詩。建安綱紀如綫微。高光基業春冰危。姦豪拔劍將羣盜。驅龍控虎爭雄雌。武侯當日臥南陽。韜稜晦角陰營爲。高吟梁甫比管樂。胸中造化無人知。東吳北魏至強大。不肯逆德爲其師。先主欲聞元直語。三往咨求當世宜。勸陳說扶漢室。慷慨感義許驅馳。一說孫權敗曹操。劉氏遂肇中興基。申明號令鼓雷電。勸勵士卒蟻蛟螭。分留猛將控荆渚。翼戴昭烈來坤維。獻皇避害首勸進。應天嗣位開羣疑。本謀憑藉蜀富庶。養威用作并吞資。大勳未集昭烈崩。遵守願命如周姬。均平賞罰重恩信。比屋道路皆熙熙。七擒孟獲除後患。至今

南詔崇靈祠。東征直據五丈原。欲復咸鎬綏華夷。上成先帝創業意。下副四海蒼生思。推忠仗順氣百倍。俯視敵衆真嬰兒。流星落帳芒角惡。暴然不起軍如癡。仲達雖走禪終虜。人謀不可違天時。精魂埋沒已千歲。奈無英傑齊高規。朔方男子過廟下。秋天寥落霜風悲。林梢脫葉響颯颯。煙頭暮雨寒絲絲。妖狐怪兔穴壞壁。飢鴟餓鵲啼枯枝。樵兒敲斷段尹石。苔蘚爛斑裴相碑。手植勁柏尙蒼翠。疑有神靈潛護持。辟容昏剝堂廡陋。龍祠神廟窮珍奇。吾心切切慕風概。灑淚踟躕成此詩。宋京詩云。君不見孔明書臺遺廟旁。古書不見臺荒涼。臥龍未起蜀天遠。茅廬日。日空南陽。赤符光寒白水澗。秣陵王氣猶能作。璋若嬰兒操虎狼。脫去荊州殊不惡。十倍奇才安用書。此臺昔時知有無。蜀人思君識故處。未若江水存兵圖。黃冠所居門第改。祇有坊名今尙在。安得臺邊見古人。秋草重生類書帶。蜀古蹟記云。宋曹彬建隆二年爲都監伐蜀。謁武侯祠。視宇第雄觀。頗有不平。謂左右曰。孔明雖忠于漢。然疲竭蜀之軍民。不能復中原萬一。何得爲武。當因其頽敗者拆去之。止留其中以祀香火。左右皆諫不可。俄報中殿摧塌。有石碑出土尺許。彬逕視之。其刻字宛若新書。題云。測吾心腹事。惟有宋曹彬讀訖下拜曰。公神人也。小子安能窺測哉。遂令蜀守新其祠宇。爲文祀之而去。按此古昔武侯祠也。天社任淵記云。昭烈廟西偏少南。又有別廟。忠武侯在焉。老柏參天。氣象甚古。詩人嘗爲賦之。是矣。今武侯祠在百花潭。與草堂並列者。不知何代增設。

74

2



## 蜀中名勝記卷之二

### 成都府二

西門之勝。張儀樓、石筍街、笮橋、琴臺、浣花溪、青羊宮、淨衆寺、少陵草堂。其最著者。○任豫益州記曰。諸樓年代既久。椽棟非昔。惟西門一樓。雖有補葺。張儀時舊跡猶存。古今集記云。張儀樓高百尺。初。張儀築城。雖因神龜。然亦順江山之形。以城勢稍偏。故作樓以定南北。李膺記曰。成都有百尺樓。後名爲白菟樓也。晉張載登成都白菟樓詩。重城結曲阿。飛宇起層樓。累棟出雲表。曉辭臨太虛。高軒啓朱扉。迴望暢八隅。西瞻岷山嶺。嗟峨似荆巫。躑躅蔽地生。原隰殖嘉蔬。雖遇堯湯世。民食恆有餘。鬱鬱少城中。岌岌百族居。街術紛綺錯。高臺夾長衢。借問揚子宅。想見長卿廬。程卓累千金。駢奢擬五侯。門有連騎客。翠帶腰吳鉤。鼎食隨時進。百和妙且殊。披林採秋橘。臨江釣春魚。黑子過龍醢。果饌隄蟹胥。芳茶冠六清。溢味播九區。人生苟安樂。茲土聊可娛。唐岑參張儀樓詩。傳是秦時樓。巍巍至今在。樓南兩江水。千古長不改。曾聞昔時人。歲月不相待。杜甫和嚴中丞西城晚眺詩云。汲黯匡君切。廉頗出將頻。直辭才不世。雄略動如神。政簡移風速。詩清立意新。層城臨暇景。絕域望餘春。旗尾蛟龍會。樓頭燕雀馴。地平江動蜀。天闊樹浮秦。帝念深分閫。軍須遠算緡。花羅封蛟蠃。瑞錦送麒麟。辭第輸高義。觀圖憶古人。征南多與緒。專業暗相親。段文昌晚夏登張儀樓。呈院中諸公詩。重樓窗戶開。四望斂煙埃。遠岫林端出。清波城下迴。乍疑蟬韻促。稍

74  
2

鸞雪風來併起鄉關思。銷憂在酒盃。姚向和云。秦相架羣材。登臨契上台。查從銀漢落。江自雪山來。僂曲親流火。凌風洽小杯。帝鄉如在目。欲下盡徘徊。溫會和云。危軒重疊開。訪古上徘徊。有舌嗟秦策。飛梁認楚材。雲霄隨鳳到。物象爲詩來。欲和關山意。巴歌調更哀。楊汝士和云。從公城上來。秋近絕纖埃。樓古秦規在。江分蜀望開。遠山標宿雪。末席接寒灰。陪賞今爲忝。臨歡敢訴杯。李敬伯和云。層屋架城隈。賓筵此日開。文鋒擢八韻。星分應三台。望雪煩襟釋。當歡遠思來。披雲霄近漢。覽覺出塵埃。姚康和云。登覽值晴閣。詩從野思來。蜀川新草木。秦日舊樓臺。池影搖中座。山光接上台。近秋宜晚景。極目斷浮埃。○石經始末云。錦官西樓有胡元質所鑿石經數板。蓋公得五代時墜。刻于一二故家。殘圭裂璧。亦可寶也。凡蔡中郎石經四千二百七十字。有奇。及古文篆隸三體石經遺字八百一十九。黃山谷跋。張載熙書。卷尾云。蘭亭禊飲詩。敍二本。前一本是都下人家用定武舊石刻摹入木板者。一本以門下蘇侍郎所藏唐人臨寫墨跡刻之。成都西樓中有數字極瘦勁不凡。東坡謂此本乃絕倫也。陸游跋東坡書髓帖云。成都西樓下石刻東坡法帖十卷。擇其尤奇逸者爲一編。號東坡書髓。三十年間未嘗釋手。去歲都下脫敗甚。乃再裝緝之。嘉泰三年歲在癸亥九月三日。老學菴北窗手記。○常璩云。蜀有五丁力士。能移山。舉萬鈞。每王薨輒立大石長三丈。重千鈞。爲墓志。今石筍是也。號曰筍里。寰宇記云。武擔石。俗曰石筍。在州城西門大街中。益部耆舊傳云。公孫述時。武擔石折。任文公歎曰。西方智士死。吾當應之。歲中卒。庾信演連珠云。竹杖扶危。不能正武擔之石矣。通志云。雙石筍在興義門內。卽真珠樓基也。按西門王建武成。謂之興義門矣。

李膺記云。開明氏造七寶樓。以珍珠爲簾。其後蜀郡火。民家數千與七寶樓俱燬。趙清獻記曰。真珠樓基在石筍街。一說有大秦胡于其地起寺門樓十間。皆飾以真珠翠碧。貫之如簾。寺卽大秦寺也。老杜石筍行。君不見益州城西門。陌上石筍雙高障。古來相傳是海眼。苔蘚蝕盡波濤痕。雨多往往得瑟瑟。此事恍惚難明論。註云。成都子城西。金容坊有石二株。挺然聳峭。高丈餘。耆舊傳云。其名有六。曰石筍。曰蜀妃闕。曰沈犀石。曰魚鳧仙壇。曰四海之眼。曰五丁石門。皆非也。圖經云。乃前寺之遺址。諸葛亮掘之。方驗。有篆字曰蠶叢氏啓國誓蜀之碑。以二石柱橫理連接。鐵其中。一南一北。無所偏邪。上有濁歇燭觸獨五字。時人莫曉。蜀相范賢議曰。亥子歲濁字。可記主水災。寅卯歲歇字。可記主饑饉。巳午歲燭字。可記主火災。辰戌歲觸字。可記主兵災。申酉歲獨字。可記主稼穡富贍。悉以年事推應符響矣。○徐康晉記。桓溫伐蜀。戰于笮橋。參軍襲護戰沒。衆欲退。而鼓吏誤鳴進鼓。於是乘之。遂入少城。寰宇記云。笮橋去州西四里。名夷里橋。以竹索爲之。因名笮橋。李膺笮橋贊云。複引一索。飛絙杖闕。其名曰笮。人懸半空。度彼絕壑也。益州記曰。市橋。笮橋。今各有一鐵椎。大十許圍。長六七十尺。云初營橋。引機運此椎。以擊橋柱。本有三。今餘二。南史宋大始初。益州笮橋忽生一洲。道士柳石見之曰。當有貴王臨州。必有王勝喜也。及齊永明二年。武帝遣始興王爲益州。勝喜者。卽始興反語。蜀古蹟記曰。笮橋邊有二石闕。乃漢趙典墓矣。○玉褒益州記曰。司馬相如宅。在州笮橋北百許步。李膺云。市橋西二百步。得相如舊宅。今海安寺南有琴臺故墟。方輿勝覽云。琴臺後爲金花寺。城內者。非其舊也。金花寺以晉胡僧持金花玉像住。此故名。按卽今之金泉鋪。

矣。梁簡文登琴臺詩。蕪階踐昔徑。復想鳴琴遊。音容萬春罷。高名千載留。弱枝生古樹。舊石染新流。由來  
 遞相歎。逝川終不收。唐盧照鄰相如琴臺詩。聞有雍容地。千年無四鄰。園院風煙古。池臺松檟春。雲疑作  
 賦客。月似聽琴人。寂寂啼鴛處。空傷遊子神。杜甫詩。茂陵多病後。尚愛卓文君。酒肆人間世。琴臺日暮雲。  
 野花留寶曆。蔓草見羅裙。歸風求風意。寥寥不復聞。高適同羣公秋登琴臺詩。古跡使人感。琴臺空寂寥。  
 靜然願遺塵。千載如昨朝。臨眺自茲始。羣賢久相邀。德與形神高。孰知天地遙。四時何倏忽。六月鳴秋蜩。  
 萬象歸白帝。平川橫赤霄。猶是對夏伏。幾時有涼颺。燕雀滿檐楹。鴻鵠搏扶搖。物性各自得。我心在漁樵。  
 兀然還復醉。尚握樽中瓢。岑參詩。相如琴臺古。人去臺亦空。臺上寒蕭條。至今多悲風。荒臺漢時月色與  
 舊時同。宋呂公弼詩。煙樹重城側。琴臺千古餘。早為梁苑客。晚向茂陵居。賦給尚書筆。歸乘使者車。清風  
 颯舊隱。長日聳鄉閭。宋祁詩。故臺千故恨。猶對舊家山。半夜鸞風去。它年駟馬還。死憂封禪晚。生愛茂陵  
 閒。惟有飄飄氣。仍存天地間。○歲華紀麗云。正月念八日出笮橋門。即拜保壽侯祠。次詣淨衆寺。拜杜那  
 公祠。按杜那公。唐元和間帥蜀者。又蘇明允集有張文定方平公祠碑記。亦在淨衆寺矣。高僧傳云。僧  
 無相。新羅國人。開元十六年。至成都。募化檀越。造淨衆寺。影堂在焉。寺有一巨鐘。重千鈞。會昌例毀。此鐘  
 乃移入大慈。大中復還。寺乘以其鐘。大隔江。計功兩日始到。方欲為齋。辰去已集。乃知神力所拽也。相有  
 塔號東海大師。塔云。唐鄒谷西蜀淨衆寺松溪八韻兼寄小華崔處士詩。松因溪得名。溪吹答松聲。繚繞  
 能穿寺。幽奇不在城。寒烟齋後散。春雨夜中平。染岸蒼苔古。翹沙白鳥明。澄分僧影瘦。光徹客心清。帶梵

侵雲響。和鐘擊石鳴。淡烹新茗爽。暖泛落花輕。此景吟難盡。憑君畫入京。又淨衆寺雜題水詩。竹院松廊分數派。不空清泚亦逶迤。落花相逐去何處。幽鷺獨來無限時。洗鉢老僧臨岸久。釣魚閑客卷綸遲。晚晴一片連莎綠。悔與滄浪有舊期。七祖院小山詩。小巧功成雨薜斑。軒車日日扣松關。峨眉咫尺無人去。却向僧窗看假山。忍公小軒詩。松溪水色綠于松。每到松溪聽暮鐘。閑得心源祇如此。問禪何必向雙峯。傳經院壁畫松詩。危根瘦蓋聳孤叢。珍重江僧好筆蹤。得向游人多處畫。却勝澗底作眞松。李洞宿成都松溪院詩。松持節操溪澄澈。一炷風煙壓寺隅。翡翠鳥飛人不見。琉璃瓶貯水疑無。夜聞子落眞山雨。曉汲波圓入畫圖。塵拂蜀城抽鎖後。此中猶夢在江湖。宋范鎮淨衆寺新禪院詩。金地西郊外。一來煩念摠。但逢是仙境。鮮不屬僧居。岸綠見翹鷺。溪清無隱魚。殘陽已周覽。欲去幾躊躇。田況正月二十八日謁生祿祠遊淨衆寺詩。千騎出重圍。嚴祠淨宇鄰。映林沽酒旆。迎馬獻花人。豔日披江霧。香塵起路塵。留華特明媚。不似遠方春。按淨衆寺宋改爲淨因寺。今謂之萬佛寺也。○蜀本記云。老子爲關令尹。喜著道德經。臨別曰。子行道千日後。于成都郡青羊肆尋吾。今爲青羊觀也。古今集記云。老子乘青羊降。其地有臺存。觀中有白玉蟾書碑。字徑半尺。宋何耕詩云。一再官錦城。咫尺望琳宮。未始得得來。正墮役役中。今朝弄晴雨。策蹇隨春風。頗愛意象古。停驂少從容。縹緲百尺臺。突起凌半空。憑欄俯修竹。決背明孤鴻。信哉神隱宅。不受塵垢蒙。稽首五千言。衆妙一以通。靜觀萬物復。豈假九轉功。區區立訓詁。亦晒河上公。癡人慕羽化。心外求鴻濛。要騎白鶴背。往訪青羊蹤。此詩刻石于臺前缺數字。○方輿勝覽云。浣花溪在城西五里。

74  
2

一名百花潭。按吳中復冀國夫人任氏碑記云。夫人微時。以四月十九日見一僧墜汚渠。爲濯其衣。頃刻百花滿潭。因名曰百花潭。按蜀志補遺。浣花溪有石刻浣花夫人像。三月三日爲夫人生辰。傾城出遊。成都記云。夫人姓任氏。崔寧之妾。按通鑿成都節度使崔旰入朝。楊子琳乘虛突入成都。旰妾任氏出家財募兵。得數千人。自帥以擊之。子琳敗走。朝廷加旰尚書。賜名寧。任氏封夫人也。蜀構乾德五年四月十九日。王衍出遊浣花溪。龍舟綵舫。十里綿互。自百花潭至于萬里橋。遊人士女。珠翠夾岸。日方午。暴風起。須臾雷電晦冥。有白魚自江心躍起。騰空而去。或云變爲蛟。牛嶠李珣有浣花詞云。昨日西溪遊賞。芳樹奇花千樣。鎖春光。金樽滿。聽絃管。嬌妓舞衫香暖。不覺到斜暉。馬馱歸。又云。訪舊傷離欲斷魂。無因重見玉樓人。六街微雨。雙香塵。早爲不逢巫峽夢。那堪虛度錦江春。遇花傾酒莫辭頻。前調西溪子。而後浣溪沙也。宋祁浣花泛舟詩。早夏清和在。晴江沿汭時。岸風搖鼓吹。波日亂旌旗。醉樂牽綉蔓。游鬢撲絳蕤。樹來驚浦進。山失悟舟移。雅俗西南盛。歸輶東北馳。此歡那復得。拋恨寄天涯。又春日出浣花云。側蓋天長蕩曉暉。暖風才滿使君旗。水通江渚容魚樂。草徧山梁報雉時。場雨滅塵盤馬疾。樓雲礙曲進簷遲。少陵宅畔吟聲歇。柳碧梅青欲向誰。田況四月十九汎浣花溪詩。浣花溪上春風後。節物正宜行樂時。十里綺羅青蓋密。萬家歌吹綠楊垂。畫船疊鼓臨芳渌。綵閣凌波汎羽卮。霞景漸曛歸櫂促。滿城懽醉待旌旗。馬嵬浣花溪詩。浣花溪邊濯錦裳。百花滿潭溪水香。寶奩散盡買霜戟。草林匹馬不可當。當時濯衣只偶爾。豈似取履張子房。烈烈遠能蔽此蜀。喪亂懷甯徒悲傷。年年春風媚楊柳。綵纜掩媚雲霞張。溪邊遊冶紅

粉娘了不識字空悠颺。採花蕩漿不歸去。暮隔煙水眠幽芳。黃魯直澆花溪圖引云。拾遺流落錦官城。故人作尹眼爲青。碧雞坊西結茅屋。百花潭水潔冠纓。故衣未補新衣綻。空蟠胸中書萬卷。探道欲度羲皇前。論詩未覺國風遠。干戈嶒嶸暗寓縣。杜陵章曲無雞犬。老妻稚子宜眼前。弟妹飄零不相見。此心樂易真可人。園翁溪友肯卜鄰。鄰家有酒邀皆去。得意魚鳥來相親。澆花酒船散車騎。野牆無主看桃李。宗文守家宗武扶。落日蹇蹇馱醉起。厭聞解鞍脫兜鍪。老儒不用千戶侯。中原未得平安報。醉裏眉攢萬國愁。生綃鋪牆粉墨落。平生忠義公寂寞。兒孫不蘇驢失脚。猶恐醒來有新作。常使詩人拜書圖。煎膠續絃千古無。○杜甫卜居詩云。澆花溪水水西頭。主人爲卜林塘幽。已知出郭少塵事。更有澄江銷客愁。無數蜻蜓齊上下。一雙鸂鶒對沈浮。東行萬里堪乘興。須向山陰上小舟。此卽草堂也。楊慎引文選注云。蕭齊周顒昔經在蜀。以蜀草堂林壑可懷。迺於鍾山雷次宗學館立寺。因名草堂寺。又云蜀人語草爲茨。成都令周顒旣歸金陵。乃做蜀草堂寺遺意。於鍾山之麓築草堂。亦曰山茨。不忘蜀也。可知蜀之草堂寺著名久矣。子美依其地而卜築。題詠日多。不具錄。其時軒蓋過從。有嚴中丞仲夏枉駕草堂。兼攜酒饌。得寒字作。有王十七侍御掄許攜酒至草堂奉寄詩。便請邀高三十五使君同到作。有王十五司馬弟出郭相訪。兼造營茅屋費作。雖稍爲是以破岑寂。而要之非其好也。當時有南鄰北鄰者。其人皆不俗。子美南鄰詩云。錦里先生烏角巾。園收芋栗不全貧。慣看賓客兒童喜。得食階除鳥雀馴。秋水纔深四五尺。野艇恰受兩三人。白沙翠竹江村暮。相對柴門月色新。北鄰詩云。明府豈辭滿。藏身方告勞。青錢買野竹。白幘對江皋。

愛酒晉山簡。能詩何水曹。時來訪老疾。步履到蓬蒿。又過南鄰朱山人。水亭詩云。相近竹參差。相過人不  
知。幽花欲滿樹。小水細通池。歸客村非遠。殘罇席更移。看君多道氣。從此數追隨。斯蓋遺世之士。忘機之  
侶矣。岑參草堂村。尋人不遇詩。數株垂柳色。依依深巷斜。陽暮鳥飛門。前雪滿無行跡。應是先生出未歸。  
范鎮題曹山人聖居詩。溪接澆花饒勝致。山人高隱在其中。一江絲竹噴天沸。爭及松篁半日風。亦皆仿  
佛其幽致也。喻汝礪晚泛澆花。遂宿草堂詩。拍楫泛澄虛。溜流躡幽芳。晚霽襯奇樹。夕霏媚疎篁。歸鳥亦  
慙閑。夜魄動初涼。忽焉衆星徹。天高月舒光。昔也杜陵子。澹然此茅堂。客至酒自斟。句得意已忘。云何常  
念飢。零落在道旁。古來技入神。一飽豈屑望。吾輩天所窮。慨歌淚霑裳。邵博同楊元澈遊草堂詩。萬里橋  
西路。幽居今尚存。共來披草徑。遠去問江村。冉冉花扶屋。蕭蕭竹映門。斯人隔今古。此意與誰論。劉望之  
草堂詩。風月藏詩骨。流離賦病骸。不禁一飽死。空遺百生懷。樹秀天通隔。山嬌客語淮。壁間無半偈。無乃  
望君厓。捫膝先生又有草堂詩。六首。栩栩詩翁錦里西。只緣詩好合窮棲。竹鋪冷色雲連寺。柳漾輕絲鳥  
過溪。凝望不禁關樹暗。駐情應恨蜀山低。離人苦怕春歸盡。可忍紅英半著泥。又云。從教日日敞窗扉。嫌  
怕風花入眼遲。剝買芒鞋供看竹。趁乘春雨去栽橙。若無賓客僧來後。薄有生涯鶴下時。聞道鄰翁酒初  
熟。新篘一酌莫相違。又云。遠嶼曲洲縱復橫。沙邊繁鳥弄簫笙。一軒簷冷松陰合。十里林香藥草生。路轉  
斷橙逢石坐。風移深竹見僧行。晚來沖抱更清曠。時有幽人帶月耕。又云。亂後飄零歇此身。風光無賴更  
新清。客懷易感酒添病。詩思苦慳花減春。南枝北枝鶯舌巧。前村後村雨脚勻。暫借溪邊老爲客。花心柳



眼莫撩人。又云翠木搖盪溪之灣。遊子失氣生愁酸。誇力搏虎筋骨絕。雙流迸瀾道路難。布衾多年窳夜雨。土釜無火啼夕餐。一生忠義老寂寞。旋燒竹葉供春寒。又云竹外清疎浸碧溪。溪邊竹淡煙雨霏。閒看雪嶺題詩罷。醉向西郊信馬歸。霄漢直愁雙闕迴。夢魂長著五陵飛。故園秀木又春色。只恐歸去池臺非。宋京補亡詩云君不見少陵草堂背西郭。浣花溪水流堂脚。竹寒沙白自淒涼。莫問四松霜草薄。入門好在烏皮几。公去不歸換鄰里。西嶺千秋雪未消。舍北泥融飛燕子。祇今椳木平橋路。籠竹和烟雜江霧。野僧作屋衆草堂。不是柴門舊時處。碑目云益州草堂寺。列畫前長史一十四人。代稱絕迹。李文饒跋云余嘗於數公子孫之家。獲見圖狀。乃知草堂繪事。靡不造真者。○方輿勝覽云。梵安寺在成都縣南。與杜甫草堂相接。每歲四月中。前一日。太守宴集于此。呂大防建草堂。繪少陵像。張濂蓋取少陵詩。勒石刻置焉。何宇度益部談資云。武侯工部二祠之中。有寺一名草堂。一名中寺。前代爲尼居。名桃花寺。隋文帝時始易以僧。唐大歷中。崔寧鎮蜀。以冀國夫人任氏。本浣花女。遂重修之。繪夫人真于中。會昌亦在毀例。夜聞女子啼泣之聲而止。宋朝禱雨有驗。乃賜名梵安寺也。按高僧傳。唐僧旭上居草堂寺。惟以禪誦爲業。蜀士猶尙二月八及四月八日。每至二時。四方大集。馳騁遊遨。旭公獨端坐竹林。泊然寂想。四衆觀之。如朝日初出。因目之爲旭上云。

東門之勝。禹廟。大慈寺。散花樓。合江亭。薛濤井。海雲寺。其最著者。○張俞上蜀帥書。俞再拜奉書。密諫明公。閣下世言古之大聖人。必曰三皇氏五帝氏。犧農在上古。其道不可復行。故後世唯以堯舜爲法。歷百

聖人莫之能易。而學者遂傳禹尚不及堯舜。俞謂堯舜承四聖至治之業。在位七十載。故能道德行於天地。萬物陶乎無爲。其後洪水暴九州。十有餘年。生民流宕。彝倫壞斃。堯視天下之溺如已溺焉。乃博咨衆工。若皋陶之倫。咸不克其事。然後舉舜。舜亦不能治。然後舉禹。禹果能治之。遂成大功。舜有天下。乃美禹曰。地平天成。六府三事允治。萬世永賴。時乃功。是知滔天之害。雖堯舜之聖。必待禹而治之。苟當時不得禹也。生民其如何。後世其如何。愚恐君臣父子不爲魚鼈。則九州萬國淪于海矣。安有今日之治哉。故謂開關已來。羣聖之功。唯禹爲大也。百川之長。有四瀆。而江河爲大。大江出蜀之西。微禹迺生于西羌。石紐其地也。今淫鬼無名。號蜀民之祀者。迨將千百郡縣。猶能存之神。禹爲蜀人。江漢爲蜀望。大功格天地。利澤施萬世。曾不得享蜀之祀。若一淫鬼。斯闕禮之甚者。俞嘗恨焉。伏惟明公治蜀。滔滔江漢。盡在土宇。宜作禹廟。用康斯民。昔尹吉甫作詩。美申伯則曰。王命申伯。式是南邦。因是謝人。以作爾庸。又美仲山甫則曰。德輶如毛。民鮮克舉之。維仲山甫舉之。言政事甚易。而人不能行。維仲山甫獨能舉而行之。明公有申伯法度。南邦之德。有仲山甫賦政于外之功。蜀人愛戴。期乎無窮。若禹廟之作。乃政之易者。衆不能舉。明公若能舉之。可謂存乎聖而順乎民也。豈挾太山超北海之爲力哉。俞近述南賓郡修禹廟碑文一首。其道備其事直。文雖浮濫。理或庶幾。方刻石以示後世。謹錄一通。上獻。謂狂夫之言而棄之。不敢逃戾。若謂斯言可采。斯廟可成。宜載事于金石。則江漢無盡。明公之德亦無盡。按此禹廟立于成都之始也。今在城東北之馬務街。歲久傾圮。予以萬曆辛亥始克修復。仍以蠶叢李冰二神配于東西廡。按方輿勝覽。蜀王

蠶叢氏祠。今呼爲青衣神。在聖壽寺。昔蠶叢氏教人養蠶。作金蠶數十家。給一蠶。後聚而弗給。瘞之江上。爲蠶墓。南史齊永明間。始興王蕭鑿爲益州刺史。於州園得古冢。有金爲蠶數斗。鑿一無取。復爲起家立祠。又按寰宇記。秦李冰爲蜀郡守。有功於民。舊祠在府西南三里。及唐節帥李德裕重修。今蠶叢祠已不存。李冰祇李觀察家作宗祠耳。會誦時勢。不能特舉。乃告于神附庸之。且以紹禹之績焉。○通志云。大慈寺。唐至德年建。舊有肅宗書大聖慈寺四字。蓋勅賜也。故會昌不在除毀之例。碑目云。唐僧大辯修功德碑。元和十五年立。在寺之文殊閣。唐韋南康碑二。並在寺之資福殿中。集古錄云。大慈資福院記。唐李德裕撰。長慶二年立石。成都記云。大慈極樂院有至和丙申季春二十八日眉陽蘇軾與弟蘇轍來觀盧楞伽筆迹。留題。陸游跋中和院東坡帖云。此一卷皆蘇仲虎尙書所藏。鑒定精審。無一帖可疑者。刻石在成都大聖慈寺中和勝相院。淳熙六年六月十七日也。成都太守田況三月十四日大慈寺建乾元節道場詩。亦精流景鑠。朱夏向清。和紺宇修祠。盛華封祝。慶多簪裳。千載遇鐘梵。五天歌遠俗。尤熙泰。皇猷信不頗。又七月六日晚登大慈寺閣。觀夜市詩。萬里銀潢貫紫虛。橋邊蟬響待星姝。年年巧若從人乞。未省靈恩徧得無。又七月十八日大慈寺觀施孟蘭盆詩。飛閣穹隆軼翠煙。孟蘭盛會衆喧闐。且欣酷暑從茲減。漸有涼風快夕眠。又冬至朝拜天慶觀會大慈寺詩。景至履佳辰。朝祝著國令。黃宮啓潛萌。紫宇晨蔭映。陽德比君子。吾道實可慶。矧丁皇運亨。遇主堯舜聖。坤維最遠方。拙者此尸政。雅俗舊儒文。民牒少訟爭。幸足宣上恩。惟恐蠶物性。良時不易得。行樂未爲併。高會縱嬉遊。豐歲愈繁盛。與衆助驩欣。寄情於俚詠。

范成大會慶節大慈寺茶酒詩。霜輝催曉五雲鮮。萬國懽呼共一天。淡淡暖紅旗轉日。浮浮寒碧瓦收煙。銜杯樂聖千秋節。擊鼓迎冬大有年。忽憶捧觴供玉座。不知身在雪山邊。○方輿勝覽云。雪錦樓在大慈寺門。元宵守帥遊賞于此。李淑十五日同登大慈寺樓得遠字詩。重樓得雲氣深穩。戶牖誰能發關鍵。樓下輪蹄渙散馳。行人一顧不容返。好遊獨是我輩閒。褰衣直上相推挽。層軒危檻倚欲通。更假胡牀同息偃。西南繁會惟此都。昔號富饒今已損。填城華屋故依然。孰爲君王愛基本。茫茫八表聊縱目。情知日近長安遠。白雲浩蕩飛鳥沒。玉笙淒涼紅粉晚。梁王吹臺得李杜。黃公酒壚醉嵇阮。高風千載凜莫扳。與世相濁徒混混。荷衣薰帶芙蓉裳。野服猶堪敵華袞。去梯孰復共君謀。殺馬毀車從此遁。勝覽云成都古蠶叢之國。其民重蠶事。故一歲之中。二月望日。鬻花木蠶器。號蠶市。五月鬻香藥。號藥市。冬月鬻器用者。號七寶市。俱在大慈寺前。宋祁大慈寺前蠶市詩。蜀雖云樂土。民勤過四方。寸壤不容隙。僅能充歲糧。間或容墮嫗。曷能備凶瘡。所以農桑具。市易時相望。野氓集廣鄺。衆賈趨寶坊。惇本誠急務。戒其靡恣常。茲會良足喜。後賢無忽忘。田況大慈寺前蠶市詩。高閣長廊門四開。新晴市井絕纖埃。老農肯信愛民意。又見笙歌入寺來。○蜀橋枕云。孟知祥明德元年六月。幸大慈寺避暑。觀明皇僖宗御容。已宴羣臣於華嚴閣下。孟昶廣政元年。上已遊大慈。宴從官于玉溪院。賦詩。通志云。解玉溪在華陽大慈寺南。韋南康所鑿也。溪中細沙可以解玉。蘇子瞻集成都玉溪之上。有清風閣。文獻大師應符所建。因爲之記矣。○方輿勝覽云。諸葛井在大慈寺西里許。自上窺之。祇見其三邊。更一邊不知其際涯也。昔孔明鑿此。以通井絡王氣。

俗傳有人入井，聞其中有雞聲。又云：興福寺卽昭覺院，相對有天涯石。按卽今之寶光寺矣。天涯石，詳見詩話中。○東城樓卽散花樓也。李白登錦城散花樓詩：日照錦城頭，朝光散花樓。金窗夾繡戶，珠箔懸瓊鉤。飛梯綠雲中，極目散我憂。暮雨向三峽，春江繞雙流。今來一登望，如上九天遊。按輿地紀勝：散花樓，隋開皇建，乃天女散花之處。蜀檮杌云：孟昶有國宮苑，城上盡種芙蓉，謂左右曰：眞錦城也。唐武元衡中秋夜，秋樓望月分韻詩：得東字。玉輪初滿空，迴出錦城東。相向秦樓鏡，分飛碣石鴻。桂香隨窈窕，珠綴隔玲瓏。不及前秋見，團圓鳳沼中。王良會得清字。德星搖此夜，珥月滿重城。香靄煙嵐色，飄飄颺杵聲。令行秋氣爽，樂感素風輕。共賞千年聖，長歌四海清。柳公綽得濃字。此夜年年月，偏宜此地逢。近看江水淺，遙辨雪山重。萬井金花肅，千林玉露濃。不唯樓上思，飛蓋亦陪從。張正一得蒼字。高秋今夜月，皓皓正蒼蒼。遠水澄如練，孤鴻迴帶霜。旅人方積思，繁宿稍沈光。朱檻叨陪賞，尤宜清漏長。徐放得來字。玉露中秋夜，金波碧落開。雀驚初泛濫，鴻思共徘徊。遠日清光徧，高空爽氣來。此時陪永望，更得上燕臺。崔備得前字。清景同千里，寒光盡一年。竟天多雁過，通夕少人眠。照別江樓上，添愁野帳前。隋侯恩未報，猶有夜珠圓。又得秋字。四時皆有月，一夜獨當秋。照耀初含露，徘徊正滿樓。遙連雪山淨，迴入錦江流。願以清光末，年年許從遊。溫庭筠錦城曲。蜀山攢黛留晴雪，蒼筤芽榮九折江。風吹巧翦霞綃，花上千枝杜鵑血。杜鵑飛入巖下窠，夜叫思歸山月中。巴水漾情情不盡，文君織得春機紅。怨魄未歸芳草死，江頭學種相思子。樹成寄與望鄉人，白帝荒城五千里。張承吉錦城詩。錦江城外錦城頭，回望秦川上軫憂。正值血魂來夢

裏杜鵑聲在散花樓。高駢錦城春望詩。蜀江波影碧悠悠。四望煙花市郡樓。不會人家多少錦。春來盡挂樹梢頭。卓英英錦城春望詩。和風妝點錦城春。細雨如絲壓玉塵。漫把詩情訪奇景。豔花濃酒屬閑人。眉娘和云。蠶市初開處處春。九衢明豔起香塵。世間總有浮華事。爭及仙山出世人。斯二作皆女郎也。又顧雲有濯錦江秋澄倒碧。散花樓晚掛殘紅之句。並稱警美矣。○括地志云。大江一名汶江。西南自溫江縣來。郫江一名永平江。西北自新繁縣來。昔李冰穿二江。城中皆可行舟。合於城之東南岸。曲有合江亭。唐符載云。一郡之奇勝也。是亭鴻盤如山。橫架亦霄。廣場在下。砥平雲截。而東南西北。復然矣。宋呂大防合江亭記云。沱江自岷而別。張若李冰之守蜀。始作邛以撻水。而關溝以醜之。大溉蜀郡。廣漢之田。用以富饒。今成都二水。此江沱支流。來自西北。而匯于府之東南。乃所謂二江雙流者也。沱舊循南隄。與江並流以東。唐高駢斥廣其穢。遂塞廢棗故瀆。始鑿新渠。繚出府城之北。然猶合於舊渚。舊渚者合江故亭。唐人宴餞之地。名士題詩。往往在焉。久弗不治。余始命葺之。以爲船官治事之所。俯而觀之。滄波修闊。渺然數里之遠。東山翠麓。與煙林篁竹。列峙于其前。鳴瀨抑揚。鷗鳥上下。商舟漁艇。錯落游衍。春朝秋夕。置酒其上。亦一府之佳觀也。按即今之錦官驛矣。宋周濂合江亭詩云。共思赤脚踏層冰。聊適江皋與自清。昨夜雨聲驅濁暑。曉來煙水快新晴。山疑九疊張雲勢。灘激千巖落布聲。巾屨從來在邱壑。願陪閒日此閒行。其二。卻暑追隨水上亭。東郊乘曉戴殘星。餘歌咽管來幽浦。薄霧疎煙入畫舲。興發江湖馳象魏。情鍾原隰詠飛鶴。故溪何日垂綸去。天末遙岑寸寸青。和者爲田望。吳棫孫埃諸君子。惟埃有舊聞蜀地四時雨。

今快岷山千里晴之句。可謂得驪珠矣。楊甲合江泛舟詩云。莫踏街頭塵。寧飲城東水。江頭放船去。葦間問漁子。岸深魚有家。鳧雁在中沚。得酒可以歌。得樹可以驪。年年舟中客。顏色不相似。風波無前期。遊者亦如此。短篙醉時策。遠山醉時几。我老不奈醒。日落西風起。晁公遡合江舟中詩云。雲氣昏江樹。春流沒釣磯。何如連夜漲。似欲送人歸。亂石水聲急。片帆風力微。舟師且停櫓。白鷺畏人飛。白麟合江探梅詩云。艇子飄搖喚不回。半溪清影漾疎梅。有人隔岸頻招手。和月和霜翦取來。何耕自合江亭過渡。觀趙穆仲園亭詩。喚舟芳草渡。繫馬綠楊陰。步入莓苔徑。門開花竹林。王孫隨蝶遠。婺女隱雲深。想見西南望。悠悠空賞心。陸務觀有遊東郭趙氏園詩。清晨呼馬出。馭吏請所之。錦城浩如海。我亦無與期。有花即入門。莫問主人誰。下馬據胡牀。傲睨忘訶譏。人言白頭翁。胡爲尙兒癡。老翁故不癡。借花發吾詩。詩句帶花香。東風不敢吹。徘徊雙蝶蝶。許汝鼻端知。此二園者。亦與錦江相左右也。○薛濤井。舊名玉女津。在錦江南岸。水極清冽。濤詩序云。濤字洪度。本長安良家女。父郾。因官寓蜀而卒。母孀居。濤及笄。以詩聞外。又能掃眉塗粉。與士族不侔。客有竊與之燕語。時章中令皋鎮蜀。召令侍酒賦詩。僚佐多士。爲之改觀。暮歲。中令議以校書郎奏請之。護軍曰。不可。遂止。濤出入幕府。自皋至李德裕。凡歷事十一鎮。皆以詩受知。其間與濤倡和者。元稹。白居易。牛僧孺。令狐楚。裴度。嚴綬。張籍。杜牧。劉禹錫。吳武陵。張祐。餘皆名士。記載凡二十八。濤有酬和。濤僑止百花潭。躬撰深紅小彩牋。裁書供吟。獻酬賢傑。時謂之薛濤牋。晚歲居碧雞坊。剏吟詩樓。偃息于上。後段文昌再鎮成都。太和歲濤卒。年七十五。文昌爲撰墓誌。題曰西川校書薛洪度之墓。按

游錦江春望詞云。花開不同賞。花開不同悲。欲問相思處。花開花落時。其二。檻草結同心。將以遺知音。春愁正斷絕。春鳥復哀吟。其三。風花日將老。佳期猶渺渺。不結同心人。空結同心草。其四。那堪花滿枝。翻作兩相思。玉箸垂朝鏡。春風知不知。王建寄之詩云。萬里橋邊女校書。枇杷花裏寄閒居。掃眉才子無多少。管領春風總不如。○海雲山在錦江下流十里。有海雲寺。鴻慶院。諸勝。吳中復遊海雲寺唱和詩。王霽序云。成都風俗。歲以三月二十一日。遊城東海雲寺。摸石於池中。以爲求子之祥。太守出郊。建高旗。鳴笳鼓。作馳騎之戲。大謔資從。以主民樂。觀者夾道。百重飛蓋。蔽山野。譁謳嬉笑之聲。雖田野間如市井。其盛如此。渤海吳公下車。朞月。簡肅無事。從俗。高會于海雲。酒既中。願謂寮屬曰。一觴一詠。古人之樂事也。首作七言詩。以寫勝事。席客亦有以詩獻者。更相酬和。得一十三篇。迺命幕下吏會稽王霽爲之序。霽斐薄不能文。恐愧勉從。公命夫俳倡。絲竹其樂外也。吟詠情性。其樂內也。充諸內。則能遺外之樂。流於外。則內有所喪。今公旣推內之樂。以樂賓。又盡外之樂。以樂民。可謂得其樂矣。中復詩云。錦里風光勝別州。海雲寺枕碧江頭。連郊瑞麥青黃秀。遶路鳴泉深淺流。彩石池邊成故事。茂林坡上憶前遊。綠樽好伴衰翁醉。十日殘春不少留。范純仁和云。東郊行樂冠西州。古寺岩峴翠嶺頭。化俗文翁傳愷悌。尋山謝傅繼風流。天涯樽酒欣相遇。劍外三春得共遊。雅興直須窮勝賞。年光難使隙駒留。韓宗道和云。茂林修竹翠煙收。寺枕清江江上頭。好鳥啼春知客恨。落花浮水近人流。政閑不廢登臨賞。意適真成汗漫遊。紫陌紅塵歸路遠。夕陽回首重遲留。勾士良和云。佛土依山福遠州。春行繡騎上雲頭。補天彩石盈池在。朝海清江繞寺



流。四海仰煩。郇伯勞。羣山翹望。謝安遊。早知爲礪。爲霖意。惟有西民欲暫留。辭鱗和云。寺上靈峯更近州。  
噴。閩。騁。從。錦。纒。頭。歌。鐘。乍。奏。晴。雷。殷。戈。甲。急。趨。春。水。流。幾。處。醉。眠。方。枕。藉。一。城。謠。俗。重。嬉。遊。賢。侯。惠。意。民。  
知。否。幾。刻。嚴。闔。爲。爾。留。宋。祁。集。海。雲。鴻。慶。院。詩。地。勝。祠。仍。古。春。餘。物。徧。華。山。雲。時。抱。石。佛。雨。不。萎。花。嶺。挾。  
樓。梯。峻。巖。牽。殿。城。斜。淙。谿。雜。環。珮。怪。蔓。走。龍。蛇。供。座。僧。飛。鉢。香。園。客。戲。沙。吾。遊。真。草。草。深。意。寄。煙。霞。趙。抃。  
遊。海。雲。山。詩。縹。緲。齊。雲。閣。喧。闐。摸。石。池。物。華。春。已。盛。人。意。樂。無。涯。羅。綺。一。山。徧。旌。旗。十。里。隨。遨。棚。夾。歸。陌。  
驍。騎。看。星。馳。蘇。棻。和。云。笙。歌。揭。虛。閣。帷。幕。雨。春。池。且。與。民。同。樂。都。忘。天。一。涯。舊。遊。嗟。倏。忽。故。步。喜。追。隨。陌。  
上。人。如。堵。歸。鞍。莫。載。馳。邢。夢。臣。和。云。使。旌。驅。近。郭。民。宴。列。芳。池。洩。洩。春。臺。上。沉。沉。暮。海。涯。鴻。驚。人。苑。轉。電。  
激。騎。追。隨。此。會。經。年。至。須。防。日。似。馳。霍。交。和。云。山。深。藏。古。寺。傍。枕。舊。芳。池。鼓。響。揭。雲。外。石。探。從。水。涯。使。旌。  
遊。不。倦。瑞。麥。獻。相。隨。事。簡。民。公。樂。歸。心。莫。競。馳。韓。絳。遊。鴻。慶。寺。詩。久。旱。雨。初。足。樂。遊。春。正。深。喧。闐。觀。士。女。  
清。曠。入。山。林。佛。界。雲。成。寶。僧。園。地。布。金。方。塘。探。子。石。高。閣。會。賓。簪。沙。水。通。溪。白。松。筠。逐。徑。陰。紛。華。從。滿。目。  
幽。寂。自。虛。心。印。紐。端。爲。累。巖。肩。得。暫。尋。晚。風。吹。綠。野。歸。騎。已。駸。駸。吳。師。孟。和。云。十。里。東。郊。道。茲。遊。歲。月。深。  
參。僚。從。行。府。高。會。適。叢。林。釋。子。喧。沾。玉。春。姬。笑。子。金。咳。珠。僧。獲。寶。醉。弁。客。遺。簪。天。賜。連。宵。澤。民。歡。畢。晝。陰。  
分。明。造。物。手。自。在。出。塵。心。非。相。離。無。住。殘。芳。尚。可。尋。都。人。望。旋。旆。車。馬。又。駸。駸。范。成。大。十。一。月。海。雲。賞。山。  
茶。詩。門。戶。權。呼。十。里。村。臘。前。風。物。已。知。春。兩。年。池。上。經。行。處。萬。里。天。邊。未。去。人。客。鬢。花。身。俱。歲。晚。妝。光。酒。  
色。且。時。新。海。雲。橋。下。溪。如。鏡。休。把。冠。巾。照。路。塵。十。二。月。海。雲。賞。山。茶。詩。追。趁。新。晴。管。物。華。馬。蹄。鬆。快。帽。簷。

斜。天南臘盡風晞雪。冰下春來水漱沙。已報主林催市柳。仍從掌故問山茶。豐年自是驢聲沸。更著衙前  
空鼓搗。噓汝礪遊海雲山詩。渺渺天宇初。便復有此山。清晨及茲游。遐想百代前。來者幾何人。當時各爲  
歡。淑質揚妙舞。哀絲遞清彈。樂事坐如昨。芳歲已屢殫。向來所游人。落葉不復還。迴然散遠目。感之爲長  
歎。竹逕非舊所。鵠巢豈昔眠。念誰當久存。而不住所緣。破涕聊一怡。山川卻萋妍。未知後世士。誰復當來  
旋。

## 蜀中名勝記卷之三

### 成都府三

北門之勝。武擔山、子雲宅、金馬祠、太元城、玉局觀、昇仙橋、萬歲池、學射山。其最著者。○寰宇記云。武擔山在府城西北一百二十步。一名武都山。蜀記云。武都山精化爲女子。美而豔。蜀王納爲妃。不習水土。欲去。王必留之。作東平之歌。以悅之。無幾物故。王乃遣五丁于武都。擔土爲冢。蓋地數畝。高七尺。上有一石。厚五寸。徑五尺。鑿澈。號曰石鏡。王見悲悼。遂作與邪之歌。龍歸之曲。路史曰。開明妃墓。今武擔山也。有二石。闕石鏡。武陵王蕭紀掘之。得玉石。棺中美女。容貌如生。體如冰。掩之。而寺其上。鏡周三丈五尺。杜甫題石鏡詩。蜀王將此鏡。送死置空山。冥漠憐香骨。提攜近玉顏。衆妃無復歎。千騎亦虛還。獨有傷心石。埋輪月宇間。按武擔山。今在藩司門右。守西道設焉。祇一坯土耳。揚子雲賦。所謂武擔鎮都。刻削成劍。玉基旣夷。蜀侯尙叢也。昔有咒土。寺東西二臺。西臺有暑雪軒。諸勝。唐王勃游武擔山序云。若夫武邱仙鎮。吳王殉效之墟。驪嶠崇基。秦帝升遐之宅。雖珠衣玉匣。下賁窮泉。而廣岫長林。終成勝境。亦有霍將軍之大隧。迴寫邠連。樽里子之孤墳。竟開長樂。豈如武擔靈嶽。開明故地。蜀夫人之葬迹。任文公之死所。岡巒隱隱。化爲閭岫之峰。松柏蒼蒼。卽入祇園之樹。引星垣於杏嶂。下布金沙。棲日觀于長崖。傍臨石鏡。瑤臺玉甃。尙控霞宮。寶刹香壇。猶分仙闕。瑠櫺接映。臺疑夢渚之雲。璧題相輝。殿寫長門之月。美人虹影。下綴虬籀。少

女風吟遙喧風鐸。羣公以玉津豐暇。僚林壑而延情。錦署多閒。想巖泉而結興。于是披桂幌。歷松扉。梵筵霞閣。禪扇煙微。雞林俊賞。蕭蕭鸞嶺之居。鹿苑仙談。臺壘龍宮之偈。于時金方啓序。玉律驚秋。朔風四面。寒雲千里。層軒迴雪。齊萬物于三體。綺席乘雲。窮九垓于一息。碧雞靈宇。山川極望。石兕長江。汀湖在目。龍鱗翠轄。駢闐上路之遊。列樹崇闔。磊落名都之氣。眇眇焉。洋洋焉。信二蜀之奇觀也。昔者升高能賦。勝事長存。登嶽長謠。清標未遠。敢扳盛組。下揆幽襟。庶旌西土之遊。遠嗣東平之唱。云爾。蘇頲武擔山寺詩。武擔獨蒼然。墳山下玉泉。龍令時共靈。龍女事同遷。松柏銜哀處。幡花種福田。詎知留鏡石。長與法輪圓。段文昌題武擔寺西臺詩。秋天如鏡空。樓閣化玲瓏。水暗餘霞外。山明落照中。鳥行看漸遠。松韻聽難窮。今日登臨意。多歡語笑同。姚向和云。開閣錦城中。餘閒訪梵宮。九層連畫景。萬象寫秋空。天半將身到。江長與海通。提攜出塵土。曾是穆清風。溫和和云。桑門煙樹中。臺榭造雲空。眺聽逢秋興。篇辭變國風。坐愁高鳥起。笑指遠人同。始愧才情薄。躋扳繼韻窮。楊汝土和云。清淨此禪宮。層臺復倚空。偶時三伏外。列席九霄中。平視雲端路。高臨樹杪風。自憐榮未座。前日別池籠。李敬伯和云。臺上起涼風。乘閑覽歲功。自隨台席貴。盡許羽觴同。樓殿斜暉照。江山極望通。賦詩思共樂。俱得詠時豐。姚康和云。松逕引清風。登臺古寺中。江平沙岸白。日下錦川紅。疎樹山根淨。深雲鳥跡窮。自慚陪末席。便與九霄通。薛濤有段相國遊武擔寺病不能從。題寄云。消瘦翻堪見。令公落花無那恨。東風儂心猶道青春在。羞看飛蓬石鏡中。宋蒲瀛游呪土寺西臺詩。偶到城西寺。人言呪土墳。夕陽臺半出。秋草徑纔分。地下無紅粉。天邊有碧雲。徘徊追

往事風急葉紛紛。又東臺詩。城郭層臺迴。祇園細路通。小亭虛白日。老樹足秋風。閱世年年改。傷心處處同。黃泉魂在否。紅粉亦成空。喻汝礪游西臺院。暑軒觀石鏡詩。城中苦伊鬱。茲軒獨高寒。連臺動參差。錯畦橫阡眠。雪囂政孤峙。若與我周旋。遠翠浮蕩漾。輕鷗下聯軒。密竹宵幽逕。新蒲澹清漣。初游愜餘懷。既久幽念撥。慨彼泉下人。灼灼夸令顏。忽然墮榛莽。窈窕不可援。一鏡空復情。況乃塊石頑。哀哉彼愚子。婉孌情可牽。差勝茂陵公。更就方士言。吳棫題暑雪軒詩。呪土臺頭寺。披襟笑語閒。千年雲抱石。六月雪彌山。酒熟筍簪外。茶新礪試間。要須時點筆。來此賦躋扳。周燾和云。崇臺窮石照。氣味樂偷閒。南陸朱明馭。西闌白雪山。茶甌回舌本。麈尾落談間。欲綴風煙句。彌高不可扳。田望和云。聖福軒重敞。偶來心地閒。因談丁士冢。知是武擔山。人在冰壺裏。天垂玉壘間。賡歌白雪句。巴客強追扳。孫埃和云。地僻宜逃暑。官曹幸頗閒。虛傳力士擔。始信蜀妃山。嶺雪青霄畔。城煙密樹間。清談容款接。妙句獨難扳。王澧和云。望處疑蓬島。天長碧海閒。雲霞收玉宇。煙浪湧銀山。茶入清談裏。風生兩腋間。詩成似西嶺。高嶮不容扳。宋京補亡詩云。君不見蜀王妃子墓。突兀城中若山積。墓頭寒鏡澁無光。妒月欺煙化爲石。鴻荒無根憑野史。直謂山妖化妃子。臨終未免懷首丘。運土山中葬于此。山名武擔。錦江邊。用是得名。千萬年。如今佛閣倚空翠。老木盤鬱摩蒼天。晴雲入穴西山出。捲簾坐見嵐光滴。安得文如汲冢書。免使後人疑往昔。按唐明皇幸蜀。從行妃子亦有葬此山者。古今集記云。望妃樓在子城北隅。明皇以妃墓在武擔山。爲此樓以望之矣。陸游行武擔西南村落有感詩。騎馬悠悠欲斷魂。春愁滿眼與誰論。市朝遷變歸蕪沒。欄谷鉛鈿

互吐吞。一徑松楠遙見寺。數家雞犬自成村。最憐高冢臨官道。細細煙莎遍燒痕。注云。有大冢高數丈。旁又一家差小。莫知何代人也。俗號太子墓。成都文類云。武擔山循城而西。有前蜀王光圖墓。墓前有永甯佛宮。王氏拜掃之所。按華陽國志云。成都四出大道。道實二十里。有甯。今言十八里者。昔蜀王女未嫁。年二十七。王哀悼不忍言。二十。故言十八也。王女墓在城北。今王女陌是也。○寰宇記云。子雲宅在少城西。西南角。一名草元堂。何涉讀易堂記云。揚雄有宅一區。在錦官西郭隘巷。著書墨池在焉。按今在藩司西南隅。屬城之北。與郡縣俱移來者。墨池二字。舊是米顛書扁刻于石矣。古今詩話。唐馮涓字信之。信都人。大。中初舉進士。登宏詞科。時危隱商山十年。昭宗以爲眉州刺史。陳田拒命。涓棄郡。於成都墨池灌園。自給焉。王勃詩。亂竹開三徑。飛花滿四鄰。從來揚子宅。別有尙元人。岑參詩。吾悲子雲居。寂寥人已去。涓涓西。江月。猶照草元處。精怪意無人。睢盱藏老樹。宋祁詩。宅廢經池在。人亡墨溜乾。蟾蜍兼滴破。科斗共書殘。蓋罷芸猶翠。蒸餘竹自寒。宅揚無可問。撫物費長歎。蒲瀛詩。寂寞一區宅。沈冥千載豪。但輕執戟賤。誰識草元高。蝌蚪猶翻墨。提壺欲載醪。著書端有意。不必反離騷。邵博詩。自負天人學。甘居寂寞濱。却憐載酒客。似識草元人。三世官應拙。一區宅更貧。千年尋故里。感涕獨沾巾。喻汝礪詩。讀書豈不好。憂憤還自茲。書中見古人。隱閔惻餘思。遇險理有激。尋分意多隨。娟娟感綉容。戚戚念幽棲。曾是無閒然。孰爲愜所宜。覽之不自聊。悵焉起遙悲。宋京補亡詩云。君不見子雲草元西郭門。一逕秋草開朝昏。何須筆冢高百尺。池墨黯黯今猶存。董鳥侯芭竟流落。元學無人終寂寞。漢家執戟知幾年。垂老自投天祿閣。俗兒紛紛重

劉向思苦言艱動嘲謗。漢已中天雄亦亡。不較空文從覆醬。如今却作給孤園。吐鳳亭前池水寒。安得斯人尙可作。會有奇字令君看。按野客叢談。劉棻嘗從揚雄學作奇字。所謂奇字者。古文之變體也。自秦壞古文有八體。一曰大篆。二曰小篆。三曰刻符。四曰蟲書。五曰摹印。六曰署書。七曰殳書。八曰隸書。王莽時使甄豐改定古文。復有六書。一曰古文。孔氏壁中書也。二曰奇字。即古文而異者。三曰篆書。秦篆書也。四曰佐書。即隸書也。五曰繆篆。所以摹印也。六曰鳥書。所以書旛信也。袁說友成都文類云。益州中興寺內有墨池。揚子雲讀書處。畫像存焉。圖經云。中興寺有子雲載酒亭是矣。成都記云。唐高僧智浩嘗於中興寺誦法華經。鄰有龍女。龍每夜聽之。一夕施一寶珠。浩曰。僧家無用此。龍以神力化大圓石榴而去。今以水澆之。則龍宮石室四字隱隱可見。岑參詩。龍女何處來。來時乘風雨。祠堂青林下。宛宛如相語。蜀人競所恩。捧酒仍擊鼓。○輿地紀勝云。銀馬碧雞祠在金馬坊前。漢宣帝開益州有金馬碧雞之神。遣諫議大夫王褒持節醮祭而致之。宋朝賜爲昭應廟。封其神爲靈光侯。漢祭金馬碧雞文曰。持節使者王褒。敬移南崖。金精神馬。縹縹碧雞。處南之荒。深溪迴谷。非土之鄉。歸來歸來。漢德無疆。廣于唐虞。澤配三皇。黃龍見兮。白虎仁。歸來歸來。可以爲倫。歸兮翔兮。何事南荒也。按今北門內石馬巷。有石馬足陷入地。金馬祠在巷內。碧雞坊則在城之西南。杜甫詩云。時出碧雞坊。西郊向草堂是矣。○古今集記云。高駢以成都土惡。城葺壞。易以磚甃。凡負城丘陵悉平之。以便農桑。訖功。筮得大畜之象。曰。畜者養也。濟以剛健。篤實。耀光日新。吉孰大焉。文爲以下存上。因名太元城。詩話總龜載五五復五五。五五逾重數。浮世若浮雲。金

石一如故。與君相見時。杳杳非今土。右詩見於成都羅城北門壞石上。有乾符三年高駢名銜餘字斷缺。莫知其爲何詩也。成都記高駢展築羅城。下令縱民游觀。有孕婦至城北樓。免一女。駢聞之曰。此城他日代代客人爲主。其後收守。果皆京師所命。碑目云。高駢築城記。唐中和四年。翰林王徽作。在城中信相院。宋祁題信相院默菴詩。對言方有默。因默乃名菴。菴留默不遣。一物遂爲三。龜埽泥中痕。正恐力弗堪。自問呵默者。了然成妄談。景文又題北樓詩云。少城西北之高樓。此地蒼茫天意秋。驚風白日忽已晚。落葉長年相與愁。極塞雲物自慘澹。趨林鳥雀時啁啾。纓上朔塵久不洗。安得手弄滄江流。按今北門謂之大安門。亦王建武成所命也。○華陽國志。城北十里昇仙橋。有送客觀。司馬相如初入長安。題市門曰。不乘赤車駟馬。不過汝下也。唐咸通中。雲安進士李遠。駟馬橋賦。所謂題記數行。寂寥千載者矣。按李膺記云。昇仙水起自始昌堰。有兩叉中流。卽昇仙。成都記云。城北有昇仙山。昇仙水出焉。相傳三月三日。張伯子道成。得上帝詔。駕赤文於菟。于此上昇也。岑參昇仙橋詩。長橋題柱去。猶是未達時。及乘駟馬車。却從橋上歸。名共東流水。滔滔無盡期。羅隱詩。危梁枕路歧。駐馬門前時。價自友朋得。名因婦女知。直須論運命。不得違文詞。流戟君鄉里。榮華竟若爲。江遵詩。漢朝卿相盡風雲。司馬題橋衆又聞。何事不如楊得意。解搜賢哲薦明君。元虞集歸蜀詩云。我到成都住五日。駟馬橋下春水生。過江相送荷子意。還鄉不留非我情。鷓鴣輕篋下溪足。鸚鵡小窗呼客名。賴得郫筒酒易醉。夜深衝雨漢州城。○益州記云。昇仙亭夾路有二臺。一名望鄉臺。在縣北九里。成都記曰。望鄉臺。蜀王秀所作。杜甫詩。神交作賦客。力盡望鄉臺。蓋指此。



也。昇仙橋北，長林蒼翠，曲澗潺湲，大非人世間境。乃昭覺禪寺。高僧傳云：圓悟禪師宏振法席，于此臨終。嘗偈有萬緣遷變，渾閑事。五月山房冷似冰之句矣。李旼昭覺寺紀略：唐僖宗幸蜀，放隨駕進士三勝題名記。陳太師塑六祖像，蕭相國建造寺碑，俱在寺內。又有孫位張南本畫壁，長安頌來昭覺寺額。經亂而毀。范鎮遊昭覺寺詩：炎蒸無處避，此地忽知寒。松砌行無際，石房禪自安。鴛鴦秋沼漲，蝙蝠晚庭寬。登眺見田舍，衡茅半不完。陸游飯昭覺寺，暮歸作云：自墮黃塵每慨然，攜兒蕭散亦前緣。聊憑方外巾盂淨，一洗人間匕箸羶。靜院春風傳浴鼓，畫廊晚雨溼茶煙。潛光寮裏明窗下，借我逍遙過十年。○方輿勝覽：萬歲池在府北十里。華陽國志：張儀築城取土處。去城十里，因以養魚，謂之萬歲池。郡國志云：龍壇在萬歲池。唐開元中有僧誦法華經，感老叟來聽。僧問之曰：我池中龍也。僧曰：今方旱，何不降雨？叟曰：凡雨須天符，不爾天誅之。今當爲師降雨。師其葬我，是夕大雨。質明見池邊大蛇，斬而雨。僧取焚之，爲立塔，呼龍壇。錄異記云：成都至真觀道士黎元興，龍朔中於學射山創造觀宇。夜夢神人引昇高山，大殿之中，謁見黃老君，身長數丈，髭鬚皎白，戴鳳冠，著雲霞衣，侍衛十餘人。願謂元興曰：吾近有材木，可構此觀，無煩憂也。如此數日，有人於萬歲池中乘舟取魚，忽見水色清澈，池底大木極多，以告元興。元興令人取之，得烏楊木千餘段，至有長百尺者，用以起觀。作黃老君殿，依夢像塑之。又制三尊殿下及講堂、齋壇、房廊、門宇，皆足用焉。盧照鄰集云：至真觀者，隋開元二年所立。有天尊真人石像，大小萬餘軀，石壇三級，週迴百步。銅鐘一口，重七十斤，按至真觀後周所立。觀側小蠻橋下，掘得古碑云：始青之下月，與日兩半同。升合爲一。

大如彈丸甘如蜜。出彼玉堂入金石。子若得之慎勿失。此度世古元歌也。隋辛德源記略云。前臨逸陌。却負長瀛。蕙樓接登景之房。瓊臺帶蕩真之室矣。今此觀尚存。○通志云。成都萬歲池。廣袤十里。溉三鄉田。歲久淤澱。王剛中知府日集三鄉夫共疏之。累土為防。上植榆柳。表以石柱。州人指曰。王公之甘棠也。歲華紀麗稱三月三日。張伯子于學射山上升。巫覡賣符于道。遊者佩之。以宜蠶辟災。太守出遊。日晚宴于萬歲池。唐司空曙晦日。益州北池陪宴詩云。臨泛從公日。仙舟翠幕張。七橋通碧水。雙樹按花塘。玉燭收寒氣。金波隱夕光。野閒歌管思。水靜綺羅香。遊騎繁林遠。飛檣截岸長。郊原懷灑滌。陂澗寫江黃。常侍傳花詔。偏裨伺羽觴。豈令南峴首。千載播餘芳。宋范成大上巳日。萬歲池坐上呈提刑程詠之云。降春酒暖絳煙霏。漲水天平雪浪遲。綠岸鸕鷀如北渚。紅塵躍馬似西池。麥苗翦翦嘗新麩。梅子雙雙帶折枝。試比長安水邊景。祇無飢客為題詩。○寰宇記云。學射山一名斛石山。在縣北十五里。李膺益州記。斛石山有雨女冢矣。田況三月三日登學射山詩。麗日照芳春。良會重元巳。陽濱脩祓除。華林程射技。所向或不同。茲俗亦足喜。門外盛車徒。山半列鄜市。彩棚飛鏑遠。醉席歌聲起。回頭望城郭。煙靄相表裏。秀色滿郊原。遙景落川浚。目倦意猶遠。思餘情未巳。登高貴能賦。感物暢幽旨。宜哉賢大夫。由斯見材美。趙抃次蘇案。游學射山詩。錦川風俗喜時平。上巳家家出郡城。射圃人稠喧畫鼓。龍湫波淨照紅旌。迎真昔詫登天虎。命侶今聞出谷鶯。勉為遠民同樂事。使臺仍是得賢明。楊甲寒食游學射山詩。疾風吹沙天茫茫。日落未落原野黃。山空無人不碌碌。路長馬健石溜足。荒臺古林翳雲族。何人剝岳縛層屋。當時萬騎填山谷。至

今拾寶多遺鏃。故岡山川愁遠目。人世悲歡風雨速。凌高舉酒天爲壺。手攀巖岫扣雲木。何人唱我淒涼曲。興亡一眼冥冥綠。野水平蕪飛雁鶩。范鎮有仲遠龍圖。見遊學射詩。幾年魂夢寄西州。春晚歸逢學射遊。十里香風塵不動。半山晴日雨初收。指麾武弁呈飛騎。次第紅粧數勝籌。夾道綺羅瞻望處。管絃旌旆擁遨頭。自註云。故事往來皆呈馬騎。設射棚。衆賓皆射。遣官妓記籌。按學射山者。以劉主禮於此學射。故名。蜀檣机云。王衍乾德二年秋北巡。后妃出餞於昇仙橋。於時旌旗戈甲。百里不絕。判六軍諸衛事者。宰相王鐸也。後主戎裝披金甲。珠帽錦袖。執弓挾矢。百姓望之。謂如灌口神焉。是從來講武備於斯矣。今爲蜀府墳墓。此遊遂絕。通志云。府北三十里有天回山。揚雄蜀記。以杜宇自天而降。號曰天墮。及玄宗幸蜀。返蹕之後。士人呼曰天回。今謂之天回鎮也。○寰宇記云。玉局壇在城北柳堤玉局觀內。按今往新繁路。自堤上行十二里。有賽雲臺。足以當之。其側仍有一小觀存。方輿勝覽道經二十四化。上應二十四氣。六十甲子分隸之玉局化。其一也。彭乘玉局記云。後漢永壽元年。李老君與張道陵至此。有局脚玉牀。自地而出。老君昇座。爲道陵說北斗經。既去。而座隱地中。因成洞穴。故以玉局名之。雲笈七籤。成都玉局化洞門石室。昔老君降現之時。玉座局脚從地而湧。老君昇座傳道。既去之後。座隱地中。陷而成穴。遂爲深洞。與青城第五洞天相連。天師以爲玉局上應鬼宿。恐開穴通氣。不利分野。乃刻石以閉之。因爲石室。高六七尺。廣一步。中鏤玄元之像焉。節度使長史章仇兼瓊開元中。徧修觀宇。崇顯靈迹。欲開洞門。使人究其深淺。發掘之際。晴景雷震。大風拔木。因不敢犯。按續博物志。玉局觀洞高。駢帥蜀時。取罪人以繩絆。

74  
2

其屢令探淺溪。繩兩月方絕。出青城山洞天觀門矣。靈驗記云。天寶歲。玉局觀前江內。往往夜中有光從水而出。高七八尺。上赤下白。其末如煙。明皇幸蜀。有人於光處得玉像老君。以進。高餘一尺。天姿瑩潔。寶相圓明。殆非人工所製。駕回留鎮太清宮。今聖容。現是其處也。亦名玉女垠。與金沙泉古跡連接矣。宋史祥符七年六月十八日申時。玉局化老君。洞中忽有五色光出。見高三尺。以來移時方散。太守凌策畫圖具表以聞。趙抃贈玉局李垂應太師詩云。坐觀山水地幽清。恬淡冲虛樂性情。跡混光塵宗老氏。術通仙俗似君平。欣逢真侶論根本。恥向權門叩利名。濟世金丹得傳授。先生高隱在青城。司馬光送羅郎中登管勾玉局觀詩。官名爲玉局。已與俗塵疎。鐘出寒松迥。香凝古殿虛。鄉閭非甚遠。俸祿豈無餘。誰道神仙樂。神仙恐不如。范鎮送羅勝卿同年提舉玉局觀詩。匹馬西歸去。知君得意偏。人情重鄉里。官職更神仙。曉後無銜喏。旬頭有俸錢。何須駕白鶴。辛苦上青天。宋京補亡詩云。君不見青陽老人飛下天。口宣至道朝羣仙。地中神仙捧玉局。異事祕怪于今傳。龜城坤隅地有穴。俗說西與岷山連。嗟峨古觀森偉像。松柏慘澹合風煙。令威已去城郭在。人物自改名依然。亳州宮庭煥星斗。眞皇行幸祥符年。所託得地近京邑。此獨隱晦遐方偏。安得老人洗此心。還我澹泊同古先。蘇軾送戴蒙赴成都玉局觀詩。拾遺被酒行歌處。野梅官柳西郊路。聞道華陽版籍中。至今尙有城南杜。我欲歸尋萬里橋。水花風葉暮蕭蕭。羊魁徑尺誰能盡。檉木三年已足燒。百歲風光定何有。羨君今作峨眉叟。縱未家生執戟郎。也應世出埋輪守。莫欺老病未歸身。玉局他年第幾人。會待子猷清興發。還須雪夜去尋君。按子瞻自昌化軍貶所。移廉州。又移舒

州。乃敕提舉成都玉局觀。他年老焉之讖。竟驗。然有謝表未赴。

74

2

# 蜀中名勝記卷之四

成都府四

張詠創設記云。按圖經秦惠王遣張儀陳軫伐蜀。滅開明氏。卜築蜀郡。城方廣十里。從周制也。分築南北二少城。以處商賈。少城之跡。今并湮沒。隋文封子秀爲蜀王。因附張儀舊城。增築南。西二隅。通廣十里。今之官署。即蜀王秀所築之城東北也。方輿勝覽云。隋蜀王秀取土築廣子城。因爲池。有胡僧見之曰。摩訶宮毗羅。蓋梵語呼摩訶爲大宮。毗羅爲龍。謂此池廣大有龍耳。又云。摩訶池一名汗池。陳人蕭摩訶所開也。蜀橋杭王建武成元年。改摩訶池爲龍躍池。王氏開國記云。建將薨。前兩月。摩訶池有鸚鵡來集。衍卽位。仍改龍躍池爲宣華池。渭南集云。摩訶池入王蜀宮中。舊時泛舟入此池。曲折十餘里。至宋世蜀宮後門。已爲平陸。然猶呼爲水門也。按今此池填爲蜀藩正殿。西南尙有一曲。水光漣漪。隔岸林木蒼翳。遊者寄古思焉。唐杜甫晚秋陪嚴鄭公摩訶池泛舟得溪字詩云。湍駛風醒酒。船迴霧起隄。高城秋自落。雜樹晚相迷。坐觸鴛鴦起。巢傾翡翠低。莫教驚白鷺。爲伴宿青溪。暢甫偶宴摩訶池詩云。珍木鬱清池。風荷左右披。淺觴宵及醉。慢舸不知移。蔭篔簹林光冷。照流簪影欹。胡爲獨羈者。雪涕向漣漪。薛濤摩訶池贈蕭中丞詩。昔以多能佐碧油。今朝同泛舊仙舟。淒涼逝水頽波遠。惟有碑前咽不流。高駢殘春遣興云。畫舸輕橈。柳色新。摩訶池上醉青春。不辭不爲青春醉。只恐爲花也怪人。孟昶避暑摩訶池玉樓春詞。冰肌玉骨

清無汗。水殿風來暗香滿。簾開明月獨窺人。欹枕釵橫雲鬢亂。起來瓊戶啓無聲。時見疎星渡河漢。屈指西風幾時來。只恐流年暗中換。宋祁過摩訶池詩。十頃隋家舊鑿池。池平樹盡但迴隄。清塵滿道君知否。半是當年濁水泥。又池邊不見帛蘭船。麥隴連雲樹繞天。百歲興衰已如此。爭教東海不為田。陸游摩訶池詩。摩訶古池苑。一過一消魂。春水生新漲。煙蕪沒舊痕。年光走車鼓。人事轉萍根。猶有宮梁燕。銜泥入水門。○天寶逸事云。明皇幸南京。多以宮人自隨。乃令成都畫手。畫為十眉以賜之。一曰鴛鴦眉。又名八字眉。二曰小山眉。又名遠山眉。三曰五岳眉。四曰三峰眉。五曰垂珠眉。又名卻月眉。七曰分梢眉。八曰斷煙眉。九曰排雲眉。又名橫煙眉。十曰倒暈眉也。李白上皇西巡南京歌云。胡塵輕拂建章臺。聖主西巡蜀道來。劍壁門高五千仞。石為樓閣九天開。其二。九天開出一成都。萬戶千門入畫圖。草樹雲山如錦繡。秦川得及此間無。其三。德陽春樹似新豐。行入成都若舊宮。柳色未饒秦地綠。花光不減上陽紅。其四。誰道君王行路難。六宮西幸萬人歡。地轉錦江成渭水。天迴玉壘作長安。其五。萬國同風共一時。錦江何謝曲江池。石鏡更明天。上月後宮親得照蛾眉。其六。濯錦清江萬里流。雲帆龍舸下揚州。北地雖誇上林苑。南京還有散花樓。其七。錦水東流繞錦城。星橋北挂象天星。四海此中朝聖主。義眉山下列仙庭。其八。秦開蜀道置金牛。漢水元通星漢流。天子一行遺聖跡。錦城長作帝王州。其九。水綠天青不起塵。風光和暖勝三秦。萬國煙花隨玉輦。西來添作錦江春。其十。劍閣重關蜀北門。上皇歸馬若雲屯。少帝長安開紫極。雙懸日月照乾坤。○古今集記云。王建初克蜀。造有紅樓。綵繪華侈。初潁川人華洪隨之入蜀。賜姓王。與諸



子運名曰宗。至是造紅樓。建以爲應華洪之讖。乃誅之。王氏開國記云。乾德四年秋。紅樓肥遺見後。蜀辛寅遜曰。肥遺。旱魃也。張唐英引山經外傳。肥遺有角蛇。角上有火。見則大旱。非魃鬼也。按魃鬼。目生頂上矣。○橋杭云。王衍卽位之日。卽治宣華苑。乾德三年苑成。延袤十里。有重光。太清。延昌。會真之殿。清和。迎仙之宮。降真。蓬萊。丹霞之亭。土木之功。窮極奢巧。衍數於其中。爲長夜之飲。嬪御雜坐。鳥履交錯焉。衍宴宣華苑宮詞云。輝輝赫赫浮玉雲。宣華池上月華春。月華如水浸宮殿。有酒不醉真癡人。乃命宮人李玉簫歌之。勸王宗壽酒也。成都文類云。李珣梓州人。其妹爲蜀王衍昭儀。有詞藻。卽所稱李舜宏夫人矣。洪邁絕句。載舜宏蜀宮應制詩。濃樹禁花開後庭。飲筵中散酒微醒。灑灑雨草瑤階溼。鐘曉吟愁獨倚屏。又釣魚不得詩云。盡日池邊釣錦鱗。菱荷香裏暗消魂。依稀縱有尋香餌。知是金鉤不肯吞。又隨駕游青城詩云。因隨八馬上仙山。頓隔埃塵物象閑。只恐西追王母宴。卻憂難得到人間。此與徐太后太妃同作者。后妃作。詳見詩話中。絕句又載羣仙降蜀宮六首。其一。后土夫人云。偶引羣仙到世間。薰風殿裏醉華筵。等閑食貨不歸去。愁殺章郎一覺眠。其二。王母云。滄海成塵幾萬秋。碧桃花發長春愁。不來便是數千載。周穆漢皇何處遊。其三。麻姑云。世間何事不澹然。得失人情命不延。適向蔡京廳上飲。回頭已是一千年。其四。上元夫人云。思量往事一愁客。阿母曾邀到漢宮。城闕不存人不見。茂林芳草恨無窮。其五。弄玉云。彩鳳飛來到禁闈。便隨王母駐瑤池。如今記得秦樓上。偷見蕭郎惱妾時。其六。太真云。春夢悠揚生下界。一堪成笑一堪悲。馬嵬不是無情地。自遇蓬萊睡覺時。蓋亦附會杜光庭。王氏男女仙傳而然矣。○蜀橋

14  
2

杭初王氏宮殿。皆題匠人孟得姓名。及知祥入蜀居之。人以爲先兆云。長興五年正月。白龜遊宣華苑。苑卽王氏所建。孟氏呼爲仙花苑。蓋晉之詛。或指仙人所進旌節花而名也。明年七夕。知祥宴丹霞樓。觀宮人乞巧。因寢疾而終。孟昶廣政三年。上元觀燈。于露臺舞媚李豔娘有姿容。召入宮。賜其家錢十萬。六年春。昶大選良家子以備後宮。限年十五以上。二十以下。於是後宮有昭儀、昭容、昭華、保芳、保香、保衣、安宸、安躍、安情、修容、修媛、修媚十四號。秩比公卿大夫士焉。花藥夫人者。本青城費氏女。以才色嬖于後宮。吳曾漫錄以爲徐匡璋所納。女拜貴妃。別號花藥夫人。以其色似花藥。黜輕也。又陞號慧妃。喻其性也。夫人嘗效王建作宮詞百首。其一云。五雲樓閣鳳城間。花木長新日月閒。三十六宮連內苑。太平天子住崑山。其二。會真廣殿約宮牆。樓閣相扶倚太陽。淨甃玉階橫水岸。御爐香氣撲龍牀。其三。龍池九曲遠相通。楊柳牽絲兩岸風。長似江南好風景。畫船來往碧波中。其四。東內斜將紫氣通。龍池鳳苑夾城中。曉鐘聲斷殿妝罷。院院紗窗海日紅。其五。殿庭新立號重光。島嶼亭臺盡改張。但是人行從處。黃金閣子鎖牙牀。其六。安排諸院接行廊。水檻周迴十里強。青錦地衣紅線毯。盡鋪蘭麝鬱金香。其七。夾城門與內門通。朝罷巡遊到苑中。每日日高祇候處。滿隄紅豔立春風。其八。廚船進食簇時新。侍坐無非列近臣。日午殿頭宣索繪隔花。催喚打魚人。其九。立春日進內園花。紅藥輕輕漱淺霞。跪到玉階猶帶露。一時分賜與宮娃。其十三。面宮城盡夾牆。苑中池水自茫茫。直從獅子門前入。旋見亭臺繞岸傍。其十一。離宮別院達宮城。金板輕敲合鳳笙。夜夜月明花樹底。傍池長有按歌聲。其十二。御製新翻曲子成。六宮纔唱未知名。盡將

霓裳來抄譜。先按君王玉笛聲。其十三。旋移紅樹斷青苔。宣使龍池吏盤開。展得綵波寬似海。水心樓殿勝蓬萊。其十四。修儀承寵住龍池。掃地焚香日午時。等候大家來院裏。看教鸚鵡念新詩。其十五。六宮官職總新除。宮女安排入畫圖。二十四司分六局。御前相見錯相呼。其十六。才人出入每參隨。筆研相從遶曲池。能向綵箋書大字。忽防御製寫新詩。其十七。春風一面曉妝成。偷折花枝傍水行。卻被內監遙覷見。故將紅豆打黃鸝。其十八。小毬場近曲城頭。宣喚勳臣試打毬。先向畫廊排玉幄。管絃聲動立浮油。其十九。梨園弟子簇池頭。小樂攜來候宴遊。試炙銀笙先按拍。海棠花下合梁州。其二十。殿前排宴賞花開。宮女侵晨探幾回。斜望苑門遙舉袖。傳聲先喚近臣來。其二十一。供奉頭簪不敢爭。上前專喚近臣名。內人酌酒總宣賜。馬上齊呼萬歲聲。其二十二。殿前宮女總纖腰。初學乘騎怯又嬌。上得馬來纔似走。幾回拋鞚抱鞍韜。其二十三。自教宮娥學打毬。玉鞍初跨柳腰柔。上棚知是官家認。遍遍長羸第一籌。其二十四。翔鸞閣外夕陽天。樹影花光遠接連。望見內家來往處。水門斜過罽樓船。其二十五。內人追逐採蓮時。驚起鳧鷖兩岸飛。蘭棹把來齊拍水。並船相鬪溼羅衣。其二十六。新秋女伴各相逢。罽畫船飛別浦中。旋折荷花伴歌舞。夕陽斜照滿衣紅。其二十七。少年相逐採蓮回。羅帽羅衣巧製裁。每到岸頭長拍水。競提纖手船來出。其二十八。早春楊柳引長條。倚岸綠牆一面高。稱與畫船牽錦纜。暖風搓出綠絲條。其二十九。婕妤生長帝王家。常近龍顏逐翠華。楊柳岸長春日暮。傍池行困倚桃花。其三十。月頭支給買花錢。滿殿宮人近數千。遇著唱名多不語。含羞急過御牀前。其三十一。太虛高閣凌波殿。背倚宮牆面枕池。諸院各

分娘子位。羊車到處不教知。其三十二。寒食清明小殿傍。綵樓雙夾鬪雞場。內人對御分明看。先睹紅羅滿擔牀。其三十三。水車踏水上宮城。寢殿簷頭滴滴鳴。助得聖人高枕興。夜深長作遠灘聲。其三十四。平頭船子小龍牀。多少神仙立御傍。旋刺篙竿令過岸。滿池春水蘸紅妝。其三十五。苑東天子愛巡遊。柳岸花堤枕碧流。新教內人工射鴨。長將弓箭繞池頭。其三十六。羅衫玉帶最風流。斜插銀篋慢褰頭。閒向殿前騎御馬。掉鞭舉過小紅樓。其三十七。沈香亭子傍池斜。夏日巡遊歇翠華。簾畔越盤盛淨水。內人手裏割銀瓜。其三十八。薄羅衫子透肌膚。夏日初長板閣虛。獨自憑欄無一事。水風涼處讀文書。其三十九。金畫香奩出露盤。黃龍雕刻遶朱欄。焚修每遇三元日。天子親簪白玉冠。其四十。六宮一例羅冠子。新樣交鑄白玉花。欲試淡粧兼道服。面前宜與睡孟家。其四十一。二月櫻桃乍熟時。內人相引看紅枝。回頭索取黃金彈。遶樹藏身打雀兒。其四十二。小小宮娥到內園。未梳雲鬢臉如蓮。自從配與夫人後。不使尋花亂入船。其四十三。錦城上起凝煙閣。擲殿遮樓一向高。認得聖人遙望見。碧闌干映赭黃袍。其四十四。大臣承寵賜新莊。梳子園東柳岸傍。每日聖恩親幸到。板橋頭是讀書堂。其四十五。舞頭皆著畫羅衣。唱得新翻御製詞。每日內庭聞教隊。樂聲飛出躍龍池。其四十六。春早尋花入內園。競傳宣旨欲黃昏。明朝隨駕遊蠶市。暗使留車就苑門。其四十七。半夜船遊載內家。水門紅蠟一行斜。聖人止在宮中飲。宣使池頭旋折花。其四十八。春日龍池小宴開。岸邊亭子號流杯。沈檀刻作神仙女。對捧金尊水上來。其四十九。慢梳盤髻著輕紅。春早爭求芍藥叢。近日承恩移住處。夾城裏面占新宮。其五十。別色宮司御蓋家。黃衫束帶

臉如花。深宮內苑參承慣。常從金輿到日斜。其五十一。日高房裏學圍碁。等候官家未出時。爲賭金錢等  
路數。專憂女伴怪來遲。其五十二。擣菹冷淡學投壘。箭倚腰身約畫圖。盡對君王稱妙手。一人來謝一人  
輸。其五十三。慢揎羅袖指纖纖。學釣魚池傍水簾。忍冷不禁還自去。釣竿長被別人拈。其五十四。宣徽院  
約池南畔粉壁紅妝畫不成。總是一人行幸處。徹長聞奏管絃聲。其五十五。丹霞亭浸池心冷。曲沼門含  
水脚清。傍岸鴛鴦皆有對。時時出向淺沙行。其五十六。楊柳陰中引御溝。碧梧桐樹擁朱樓。金陵城共滕  
王閣。畫向丹青也合羞。其五十七。晚來隨駕上城遊。行到東西百尺樓。回望苑中花柳色。綠陰紅豔滿池  
頭。其五十八。牡丹移向苑中栽。盡是藩方進入來。未到末春綠地暖。數般顏色一時開。其五十九。明朝臘  
日官家出。隨駕先須點內人。回鶻衣裝回鶻馬。就中偏稱小腰身。其六十。盤風鞍韉鬪色裝。黃金腰勝紫  
遊韉。自從揀得真龍種。別置東頭小馬坊。其六十一。翠輦每隨城畔出。內人相次簇池隈。嫩荷花裏搖船  
去。一陣香風送水來。其六十二。高燒紅蠟點銀燈。秋晚花池景色澄。今夜聖人新殿宿。後宮相近覓祇承。  
其六十三。苑中排比宴秋宵。絃管掙樞各自調。日晚關門傳聖旨。明朝盡放紫宸朝。其六十四。夜深飲散  
月初斜。無限宮嬪插亂花。近侍婕妤先過水。遙聞隔岸喚船家。其六十五。宮娥小小豔紅妝。唱得歌聲遠  
畫梁。綠是太妃新進入。坐前頒賜小羅箱。其六十六。池心小樣釣魚船。入甌偏宜向晚天。掛得綵帆教便  
放。急風吹過水門邊。其六十七。傍池居住有漁家。收網搖船到淺沙。預進活魚供日料。滿筐跳躍白銀花。  
其六十八。秋晚紅妝傍水行。競將衣袖撲蜻蜓。回頭瞥見宮中喚。幾度癡身入畫屏。其六十九。御溝春水

碧於天。宮女尋花入內園。汗溼紅妝行漸困。岸頭相喚洗花鈿。其七十。昭儀侍宴足精神。玉燭抽看記飲。巡倚賴。識書爲錄事。燈前時復錯瞞人。其七十一。後宮阿監裹羅巾。出入經過苑囿頻。承奉聖顏憂誤失。就中常怕內夫人。其七十二。管絃聲急滿龍池。宮女藏鉤夜宴時。好是聖人親捉得。便將濃墨掃雙眉。其七十三。密室紅泥地。火爐內人冬日晚相呼。今宵駕幸池頭宿。排比椒房得暖無。其七十四。三清臺近苑。牆東樓檻層層映。水紅盡日綺羅人。度曲管絃聲在半天中。其七十五。高亭百尺立春風。引得君王到此。中牀上翠屏開六扇。折枝花綻牡丹紅。其七十六。內人承寵賜新房。紅紙泥窗透畫廊。種得海柑才結子。乞求自過與君王。其七十七。翡翠簾前日影斜。御溝春水浸成霞。侍臣向晚隨天步。共看池頭滿樹花。其七十八。金碧闌干倚岸邊。卷簾初聽一聲蟬。殿頭日午搖紈扇。宮女爭來玉座前。其七十九。嫩荷香撲釣魚亭。水面文魚作隊行。宮女競來池畔立。倚簾呼喚勿高聲。其八十。新翻酒令著詞章。侍宴初開意卻忙。宣使近臣傳賜本。總教諸院遍抄將。其八十一。畫船花舫總新妝。進入池心近島傍。松柏鏤窗楠木板。暖風吹過四圍香。其八十二。西毬場裏打毬回。御宴先從苑內開。宣索教坊諸伎樂。傍池催喚入船來。其八十三年初十五。最風流。新賜雲鬟使上頭。按罷霓裳歸院裏。畫樓雲閣總重修。其八十四。春來睡起曉妝成。隨侍君王嬾處行。畫得自家梳洗樣。相憑女伴把來呈。其八十五。寢殿門前曉色開。紅泥藥樹閒花栽。君王未起珠簾卷。宮女更番上直來。其八十六。海棠花發盛春天。遊賞無時列御筵。遠岸結成紅錦帳。暖枝低拂畫樓船。其八十七。日晚宮人外接回。自牽驄馬出城隈。御前接得高叉手。射得山雞喜進來。其八

十八。朱雀門高苑外開。毬場空闊淨塵埃。預排白兔兼蒼狗。等候君王按鵝來。其八十九。會仙觀裏玉清壇。新點宮人作女冠。每度駕來羞不出。羽衣初著怕人看。其九十。老大初教作道人。鹿皮冠子淡黃裙。後宮歌舞全拋擲。每日焚香事老君。其九十一。法雲寺裏中元節。又是官家降誕辰。滿殿香花爭供養。內園先占得鋪陳。其九十二。酒庫新修近水傍。潑醅初熟五雲漿。殿前供御頻宣索。進入花間一陣香。其九十三。白藤籠擗白銀花。閣子門前寢殿斜。近被宮中知了事。每來隨駕使煎茶。其九十四。金章紫綬選高班。每每東頭近聖顏。材藝足當恩寵別。只堪供奉一場閒。其九十五。安排竹柵與笆籬。養得新生鶉鴉兒。宣受內家教餽飼。花毛閒著總皆知。其九十六。內人深夜學迷藏。遍繞花叢水岸傍。乘興忽來山洞裏。大家尋覓一時忙。其九十七。小院珠簾著地垂。院中排比不能知。羨他鷓鴣能言語。窗裏偷教鷓鴣兒。其九十八。島樹花低約浪痕。苑中斜日已黃昏。樹頭未刻雙飛鶴。颺起晴空映水門。其九十九。小雨霏微潤綠苔。石楠紅杏傍池開。一枝插向金餅裏。捧進君王玉殿來。其一百。錦鱗躍水出浮萍。荇草牽風翠帶橫。恰似金梭攢碧沼。好題幽恨寫閨情。劉希夷蜀城懷古詩云。蜀土饒水竹。吳天積風霜。窮覽通表裏。氣色何蒼蒼。舊國有年代。青樓思豔妝。古人無歲月。白骨宜丘荒。寂歷彈琴地。幽流讀書堂。元龜埋卜室。采鳳滅詞場。陣圖一在。柏樹雙雙行。鬼神清漢廟。鳥雀參秦倉。歎世已多感。懷心益自傷。賴蒙靈石境。時當明月光。宋祁覽蜀宮故城有作云。國破江山老。人亡岸谷摧。鴛鴦飛今日。瓦鹿聚向時。臺故苑猶霏雪。荒池但劫灰。賴遺湖處壤。圖記數殘枚。恨月窺林下。悲風覓隴來。依城狐獨速。失廈燕徘徊。廢社纏存樹。陰垣自上

苦有情惟杜宇。長為故王哀。○唐盧求成都記序略云。蜀郡太守自秦惠王滅蜀始。而李冰。文翁其最著者。益州刺史自漢武帝開疆始。而王遵。王襄其最著者。始時實一官也。而與廢異焉。劉先主于益州置牧。蜀郡置守。而官始分矣。晉太康以刺史治太城。郡守治少城。而地亦分矣。改益州為劍南節度使。自唐天后始。改蜀郡為成都尹。自明皇西巡始。其後州郡亦得相兼焉。宋知成都府事者。往往以密直使相稱。簡貴尊重。淳化初。雖降為州。而體自若。乃中興小歷所載。則以蜀有都轉運使。遂罷制置之設。而張燾且得以成都行四川民事矣。其公署邸閣留題碑記問者。班班可考焉。○轉運司園亦稱西園。園中有西樓。有趙清獻再入蜀所建。文同與可記之於前。李石知幾記之於後矣。○轉運司園亦稱西園。園中有西樓。有錦亭。一名翠錦亭。章綬詩序云。轉運西園。是偽蜀權臣故宅。爽塏清曠。隨處足樂。于是作為十詠。羣公咸和之。備錄以志其盛云爾。西園詩云。古木鬱參天。蒼苔下封路。幽花無時歇。醜石終朝踞。水竹散清潤。煙雲變晨暮。何必憶山林。直有山林趣。玉溪堂詩云。堂因水得名。方沼當其後。漪瀾蕩棖窗。戶挹花柳。蟲魚不避人。鷗鷺若相友。午枕夏簟涼。此樂亦奚有。雪峯樓詩云。層構壓池塘。不僭亦不偪。影浮江水靜。寒逗雪山色。撫檻接修竹。連筇引蒼柏。注目望長安。無那濃雲隔。海棠軒詩云。珍葩寄幽島。正對孤山植。優游自俯仰。紅綠若組織。春酣晴日熏。坐久濃香逼。池面淨可鑒。朝霞罩澄碧。月臺詩云。蜀地饒夜雨。輕陰多蔽天。見月月無幾。築臺待嬋娟。高疑桂影近。俯視雲屋連。願盼已塵外。欲挹瑤宮仙。翠錦亭詩云。榭楠百尺餘。排列拱筵際。畏日自成陰。隆冬寧減翠。虛曠得敷理。懶辦資濃睡。誰知官府中。獲此沖漠味。潺玉亭



詩云。傍砌醜小渠。迴環是流水。石屨吐珠涎。清響醒人耳。風微竹影碎。月皎波光起。颯爽無塵囂。靜適心所喜。茅菴詩云。竹間構圓菴。所向自蕭灑。珍禽弄巧舌。宛是居山野。暝坐見真心。萬緣盡虛假。勿陋尋尺地。茲焉息意馬。水閣詩云。架木浮水中。略約通孤島。扶疎花影斜。鱖刺跳魚小。風月所得多。經營信云巧。隱几寂無人。朱欄萃幽鳥。小亭詩云。花邊二小亭。雙跨清渠上。規摹雖甚隘。幽僻良可賞。幸依嘉木陰。未羨大廈廣。不足延賞朋。攜筇常獨往。吳師孟和云。十紀權臣第。修城外臺宅。喬木不知秋。名花數逾百。遠如山林幽。近與塵埃隔。惠政裕一方。民猶以爲窄。又華構枕方塘。使臺寂佳致。二色真楠材。輪奐極精緻。花木四面圍。如立復如待。一道仰澄清。此是澄清地。又西北有高樓。梁棟雲常起。簷牙挂連蜷。欄影搖清泚。爽氣雪山來。一瞬極千里。但欲摠遠懷。無憂可消弭。又花瀨對高軒。如用丹青影。錦水一匳紅。玉臺千面笑。松篁雨翠壺。常護東西照。子細看韶妍。方知化工妙。又雅意待蟾光。煩襟期爽快。無雲點太清。遠覽周色界。天宇淨琉璃。露下真沆瀣。勤渠諗後人。宜葺不宜壞。又東閣治臺政。西堂備燕飲。介于二堂間。華構饒花品。紅紫鎮長春。四時如活錦。公暇一繩牀。上有通中枕。又至人泉石心。俚耳便絲竹。醜渠逗清冷。朝夕淙寒玉。試聽自然聲。不減雲璈曲。卻返倒聞機。五音常自足。又結茅爲圓屋。環堵不開牖。齋居如雁堂。廣長纔六肘。深藏子猷竹。不植陶潛柳。勿起滅定心。冥坐空諸有。又形制似方橋。島岸相連屬。春和逗涼颺。晝影浮淨綠。佳人羅幃輕。花時相步續。澄澗忽生暈。下有雙鳧浴。又尺水走庭除。花木皆周市。雙亭正相值。僅能容一榻。公餘時獨來。隱几聊噓哈。典謁或通名。東榮有賓閣。許將和云。高牙負北郭。芳園路

西轉。鳥鳴戀故木。蘭苗歸新畝。坐延花景深。行倚筇杖穩。翳然想林水。會心不在遠。又朱堂俯玉谿。玉谿清且幽。從公躋息偃。撫景空夷猶。浮雲冠圓島。白日回方流。祇此有光碧。何必崑崙洲。又重樓起城陰。乘高望西極。列峯橫青天。飛雪千里積。疑是空素山。冬夏海中白。莫怪頻東向。上有思歸客。又海棠冠蜀花。此軒花尤冠。紅雲簇葉細。紅水照葉嫩。倚妝宮粉聚。疊綺霞光散。雨淚點春風。應懷上林怨。又蜀地山四維。益州平如掌。累臺鬱臨風。坐看月背上。稍出叢木末。始發衆巔爽。茲焉暨遊目。一覽天地廣。又閣下資溜長。綺襜空埃靜。修林密窻翠。盡得錦城錦。雲舒青青色。風散搖搖影。未爲夜行人。共此晝遊永。又引泉注清渠。潺湲漱寒玉。側出闔風遲。驟驚江雨速。飛瀨乍颺白。樛木細涵綠。晝夜流不止。肯效楚人哭。又茨茅以爲菴。環顧蕭然虛。內藥苟自足。容膝亦有餘。旁依修竹密。上翳青松疎。勿言此中陋。中有君子居。又飛閣出方池。修曲見空莽。旁臨花塢近。平覺春波長。反景澄餘暉。夕陰帶浮爽。從容觀魚樂。不減遊濠上。又翩然薄上亭。左右相映帶。修柵列翠幃。長松偃高蓋。地褊景逾寬。處約志彌泰。誰知坐嘯間。心遊萬物外。豐稷和云。仙化二十四。境遠難遍探。錦城使君園。雅與雲洞參。回光試一覽。紫翠絕西南。池映金波淨。花沾玉露甘。又一水從何來。應是崑山頂。醞成綠玉池。虛堂逗清影。公退冷然賞。了非心外境。魚泳陽光動。鳥啼春晝永。又雪峯在何許。樓倚青霄端。每來注心目。不覺生羽翰。終藉好風力。雲散銀闕攢。隻履西歸客。應笑空倚欄。又文錦初動機。晨雲欲敷照。香傳雪樓濃。影落玉溪倒。子美不能賦。春工一何妙。惟有賞心人。相逢祇微笑。又石印魚在屏。犀透星入角。迺知明月光。日用人不覺。陟此百尺臺。餘念坐消剝。洞

曉弦望機。仙丹茲可學。又簷外列脩木。凜凜正人氣。有德必有文。爛兮五色備。豈同天韶花。弄春張繡被。須信輪囷材。堪爲萬乘器。又養源在西山。如玉抱精白。引之落錦渠。歷耳不可擇。風雨雜鳴球。球璣瀉雲液。恰似假谿聲。醒悟迷途客。又覆以潔白茅。環以琅玕竹。天籟傍鼓笙。月沼對鋪玉。借問清坐翁。此外更何欲。笑指博山鑪。香飛柏子綠。又長虹臥松江。一葦航大河。豈如此安穩。無復畏風波。幽香翠花鳥。魚藻旨且多。徙倚小欄曲。月色透藤蘿。又東西對孤鶩。杖屨可休歇。容光日月來。矧此明四徹。鱗木張幄翠。屢泉飛玉潔。往往得意時。宛在廣寒闕。楊怡和云。池臺密相望。曾是故侯宅。賞心知幾人。喬木已百尺。低花拂烏帽。古薜駭蒼石。欲問昔豪華。秋風掃無迹。又虛堂已深窈。那復要營室。使君寂無事。閉閣臥終日。臨池狎清泚。養竹聽蕭瑟。不爲省春耕。輶車肯輕出。又脩脩樓下竹。灑灑竹間水。樓高雖不見。清響長在耳。晨光露星矐。積玉照窗紙。崑園亦何人。當從跨金鯉。又花如窈窕人。宛在水中沚。當軒有餘好。終日玩芳蘩。池清藻壓枝。波動魚爭菜。錦帳想含春。歸心浩然起。又嘉木密交陰。月夕苦蒼翳。高臺出林杪。遠目望天際。不厭清露寒。祇恐輕雲蔽。可但少陵翁。能思斫仙桂。又峨峨碧油幢。蠹蟲羽葆蓋。燕居不廢嚴。環棟布亭外。澗陰至晝寒。微吹發天籟。隱几對凝香。衣冠嗒如蛻。又使君漱流心。官府未始忘。亭下玉溪水。撲碎白玉瑤。清耳不待洗。高懷自滄浪。安得援瑤琴。寫此聲琅琅。又緝茅如蝸廬。容膝纔一丈。規圓無四隅。空廊含萬象。繩牀每冥坐。不與物俯仰。惟許歲寒君。虛心環几杖。又小閣平池陽。危橋屬花嶼。杖屨樂幽閒。龜魚陰深阻。刻柱記新漲。弄水滌煩暑。物我久相忘。珍禽近人語。又方亭惟四柱。對峙花竹間。下有雪

嶽水淙流日潺湲。宛如雙綵綉。纔向春波灣。欲起江湖心。而奈風濤艱。杜敏求和云。潭潭刺史府。宛在城中。誰知園亭勝。似與山林同。幽鳥語晴晝。好花嬌春風。物情如有待。賦詠屬詩翁。又堂前對花柳。堂後歐沼沚。賸有堂中人。虛心湛如水。煩暑當風窗。中宵隱月几。作詩紀勝概。詩與水清泚。又西山最高峯。積雪連四季。登樓試寓目。八國有故地。烽燧雖久息。武經思豫備。文饒昔籌邊。公意今無媿。又東風開百花。獨有海棠勝。猩血染珠璣。點綴枝頭賸。日暖錦段新。雨餘燕脂凝。何時東閣梅。方能動詩興。又月從海上來。皎皎入我牖。何如登高臺。對月把尊酒。問月月無言。浩歌詩千首。幾人知此樂。此樂公所有。又材大難爲用。管誇古柏篇。亭前老榿楠。黛色亦參天。夏暑借清陰。秋籟得自然。有如愛庭楸。朝暮東西偏。又林亭幽且深。砌下玉溪水。淙琤環佩聲。曉夕清心耳。使君性所樂。愛玩不少已。方持利物心。默坐窮至理。又深竹林下。圓菴最幽僻。高懷本恬曠。野趣助閒適。衆人奔名徒。浮世榮物役。豈知菴中樂。道勝心自逸。又方池導流水。橫閣上尋丈。晨曦夜月光。罩影相滉漾。遊魚時出沒。飛鷗亦下上。終朝倚欄干。不見有風浪。又二亭雖云小。好在泉石間。白石自齒齒。清泉亦潺潺。公府無留事。曾來寄餘閒。筇杖烏角巾。一日幾往還。○宋李良臣東園記云。益州路兵馬鈴轄神湘。治其後圃爲池亭臺樹。植桂華蓂。莖美木。館宇星陳。欄籬翼翼。舊有池焉。泉竇湮塞。涸爲枯泥。偶新泉破地而出。從而導之。則故泉繼發。霽沸衍溢。種公樂堂其北。命之曰鑾泉。挾以二軒。一曰錦屏。以海棠名。一曰武陵。以桃溪名。梁池而南爲亭。曰寒香。以梅名。後爲茅亭。曰幽芳。以蘭蕙名。池東爲大亭。曰三雨。以桃杏梨名。池南兩亭。東西對峙。曰綠淨。曰連碧。雙亭之北。有

老柏數十株。巨幹屹立。爲亭其中。曰翠陰。復樓其東。曰朝爽。西因垣而山。曰五峯。下曰五峯洞。前爲山館。水繞環之。宛如山間。文同丹淵集云。成都鈐轄東園有梅樹。樹下有素芳亭。慶歷中。四方館使太原王公。府尹程公賦詩。刻石存焉。後二十年。太原之子道恭及趙閱道。又飲于亭上。賞梅賦詩。俾與可序之。詩詳見方物記中。○張詠。擢設記曰。王建。孟知祥。迭稱僞號。乾德初。王師弔伐。申命參知政事呂餘慶。知軍府事。取僞冊。勳府爲治所。淳化甲午。降府爲州。至道丁酉歲。詠始議改作。東因孟氏文明廳爲設廳。廊有兩樓。中門立戟。因王氏西樓爲後樓。樓前有堂。堂有掖室。室前迴廊。南爲暖廳。廳屏有黃筌畫雙鶴。花竹。怪石在焉。名曰雙鶴廳。次南爲涼廳。廳壁有黃氏畫湖灘山水。雙鷺在焉。名曰畫廳。涼暖二廳。使寒暑也。涼廳。廳西有都廳。在使院六十間之中。所以便議公也。院北有節堂堂。堂北有正堂。與後樓前爲次。西位也。節堂。西通兵甲庫。所以示積藏也。涼都二廳。南列四署。同寮以居。前門通衢。後門通廳。所以便行事也。公庫直室。客位。食廳之列。馬廐。酒庫。園果。疏流之次。四面稱宜。無不周盡。疎篁奇樹。香草名花。所在有之。不可殫記。東挾戍兵一營。南有軍資大庫。改朝西門爲衙西門。去三門爲一門。凡得僭僞之迹。屋大小七百四十間。二營不在數。○張俞。府衙新書堂詩引云。號略楊保臣。由將作屬官。隨侍于益府。新闢書堂。延儒者講文藝。俞作新書堂詩以贈之云。志士營道日。築室養賢名。鋤荒出幽邃。掃室迴虛明。山嶽凌牆壁。谿塘瀉窗檻。蘭荷露景晚。松桂秋風生。琴瑟閑古奏。樽壘湛露清。默意馳萬象。遊心覽八紘。羣經互粲粲。百氏紛營營。禮樂立制作。文章懸準程。唐虞化已遠。周禮道尙行。師友得正士。講論無俗聲。邪侈不可入。紛華

固難傾。修辭力工巧。厲學逾農耕。天爵既自後。人文取其榮。元侯作鎮。烈士爭獻成。學校溢都市。謳吟洽黎氓。寧同稷下談。飽食談縱橫。○銅壺閣亦稱郡樓。乖崖公鎮蜀時。通夕宴坐郡樓上。鼓番漏水。歷歷分明。一刻差誤。必詰之。守鏡者服為神明。公謂鼓角為中軍號令。不可不謹爾。京鐘帥成都。首訪茲閣。屹然自若。銅壺漸失實矣。因詢其漏法。則寅申巳亥陟降。其水者凡四。既無所依據。且其箭以七。日半為等。日升一刻。必驟進之。前卻頻數。不無差忒。知成都縣事臨邛宋朝英於是始更其法。測午中之晷。為升箭之初。畢百刻而後。身仍以歷象考七十二末初。候昏明晝夜長短之數。日異旬殊。差布于箭。乃為亭其下。圓刻漏製。鑿諸石。且名以借陰。建安吳棫記云。府門稍東垂五十步。慶歷四年知府事蔣公堂作漏閣。以直午門。以八分大字題額曰。銅壺歸然南向。一府之冠也。崇寧初關災。政和元年。棫承乏尹事。始至府視閣故處。累土如臺然。問吏曰。前尹蔣即臺為門。治材略具。朝廷亦嘗賜度牒。售錢六百萬。有奇。尹去弗克成。問錢與材今安在。曰。材為他所繕修。屢用之錢。則帑官專輒。免費矣。棫曰。午門既臺門也。茲唯閣之宜。奚臺之有。即日便撤累土。圍閣如慶歷時。通閣上下一十有四間。其高一丈六尺。有五寸。廣十丈。深五丈。有六尺。審曲面勢。丹堊是飾。瓴覆甍。甍厥有瘳度。中設關鍵。關閫惟謹。閣成。初置天聖中燕梓州。蕭所制蓮花漏於其下。關災漏毀。閱十載。更六尹於茲。而閣成。漏悉如燕製。置一壺一泉。一箭四十有八。銅鳥逗水而下。金蓮浮箭而上。氣二十四。候七十二。百刻十二辰。率是箭而定云。○歲華紀麗。天禧初。趙稹為守。三月三日開西樓亭榭。俾士庶遊觀。自是每歲寒食。關園張樂。酒爐花市。茶房食肆。過于蠶市。士女縱

觀宋田況寒食開西園詩云春風寒食節夜雨晝晴天日氣熏花色韶光徧錦川臨流飛鑿落倚樹立鞦韆檻外遊人滿林間飲帳餽衆音方雜遝餘景更留連座客無辭醉芳菲又一年宋祁衆熙亭曉矚詩云長夏宜高明緩帶散煩寤憑軒一超然目與天俱盡山從雲端現日就林外隱風來草樹披煙生井間近自公況多暇冲慮無留蘊卽此可宴居何須事遊軫西樓詩云炎氣隨日入岑寂坐遙帷卷鶯昏投浦驚蟬夜去枝桂華兼月破槎影帶星移珍重窗風好羲人卽此時吳中復西園十詠詩序云成都西園樓榭亭池菴洞最勝者凡十所又於其間勝絕者西樓賞皓月眺岷山衆熙臨清池濯錦水志殊土之產有方物快蔭榭之風有竹洞雜花異卉四時遞開翠幹茂林蔽映軒戶足以會賓僚資燕息因題十詠以見登覽之勝也西樓詩云信美他鄉地登臨有故樓清風破大暑明月轉高秋朝暮岷山秀東西錦水流賓朋逢好景把酒爲遲留衆熙堂詩云亭枕方塘上軒開四照新花涵清露曉風卷綠波春日暖眠江鷺何翻躍錦鱗衆熙遊宴地行樂慰西人竹洞詩云陰森過百步屈曲鎖莓苔翠色寒無改清風時自來葉籠蒼玉幹路入碧雲堆吏散無公事支筇到幾回方物亭詩云草木蟲魚部披尋自古無飛沈天產異生植土風殊物色隨心匠形容記續圖虛亭玩真意浩思滿紅湖翠柏亭詩云衆木墜黃葉皴皮抱翠枝自然根性在不爲雪霜移靈潤承多露清陰貫四時婆娑歲寒意每到坐遲遲圓通菴詩云對此圓通境陶然勝靜齋觀空無物我扣寂外形骸燕坐埋遺照虛名莫疚懷人間憂樂地所喪甚山崖琴壇詩云瀟灑琴壇上賢侯表道情無今亦無古求意不求聲林邃風初靜雲收月乍明拂絃成一弄塵思浩然清流杯亭詩

4  
2

云。結客乘公暇。流觴逐浩歌。亂峯晴倒影。曲水宛迴波。小海逢元巳。蘭亭記永和。西州行樂事。應比晉賢多。喬枌亭詩云。木占西園勝。亭延上客過。色無花卉妒。豎爲雪霜多。幹有千年秀。根含一氣和。明堂求厚棟。可得老巖阿。錦亭詩云。簾幕臨彫檻。窗疎照爛霞。園林初過雨。風日猛催花。香入遊人袖。紅堆刺史家。四時俱好景。終不似春華。○唐書李德裕建籌邊樓于成都府治之西。四壁圖蠻夷險要。日與習邊事者籌畫其上。女校書薛濤上籌邊樓詩云。平臨雲鳥八窗秋。壯壓西川四十州。諸將莫貪羌族馬。最高層處見邊頭。宋陸遊曰。籌邊樓故基莫考。淳熙三年。制置使知府范公成大重建。卜地在子城西南隅。樓旣成。公自作水調歌頭云。萬里籌邊處。形勝壓坤維。恍然舊觀。重見鴛瓦拂參旗。夜夜東山銜月。日日西山橫雪。白羽弄空暉。人語半霄碧。驚倒路傍兒。分弓了。看劍罷。倚欄時。蒼茫平楚。無際千古鎖煙霏。野曠岷嶓江動。天闊隋函雲擁。太白暝中低。老矣漢都護。卻望玉關歸。按今籌邊樓在都院之東掖。隨使節而遷者。○李虛云。華陽縣主簿廳有會昌中壁記。乾符中柱刻。會昌迄今三百年。成都千門萬戶。時遭焚裂。求往日之破甃斷楹。殆尺寸莫獲。而此廳事獨存。圯壞未墨。不改其舊。是豈偶然耶。爲之記而刻諸梁上。



# 蜀中名勝記卷之五

## 成都府五

### 新都縣

華陽國志蜀以成都、廣都、新都爲三都。號名城。古語云：廣漢有二雒，新都爲上雒，建寧、中江爲下雒也。○寰宇記云：新都縣本漢舊縣，屬廣漢郡。後置新都郡，故城在今縣東。太康中又爲縣。隋移理於此。按晉史武帝咸寧二年，封子該爲新都王，以新都郡爲新都國矣。○唐張說新都南亭送郭元振盧崇道詩：竹徑女蘿蹊，蓮洲文石隄。靜深人俗斷，尋玩往還迷。碧潭秀初月，素林驚夕棲。褰幌納蟾影，理琴聽猿啼。佳辰改宿昔，勝寄坐睽攜。長懷賞心愛，如玉復如珪。歐陽詹新都行云：縹緲空中絲，蒙籠道傍樹。翻茲葉間吹，惹彼花上露。悠揚絲意去，苒弱花枝住。何計脫纏綿，天長春日暮。宋陸游早發新都驛詩：喔喔江村雞，迢迢縣門漏。河漢縱復橫，繁星明如晝。愛涼趣上馬，未曉闕兩環。高林起宿鳥，絕澗落驚犬。寺樓插蒼煙，沙泉瀉幽竇。我行忽萬里，坐歎關河富。官如廣文冷，面作拾遺瘦。今年盍歸哉，勿落春歸後。新都驛有遠平軒，劉望之題云：霜晴木落送歸鞍，袖手微吟此慰顏。曠欲憑欄招百鳥，更煩翦樹出青山。晚悲薄祿非三釜，賴許清詩見一斑。看到遠平纔得恨，我寧歸臥尺椽間。自注云：軒有外氏周次元帥蜀詩也。○本志云：治北半里寶光寺後有柱礎，圍丈二尺，圓徑四尺，高尺八寸。唐僖宗避黃巢至蜀，遣御史賈璽書召知元

關師憩息其處。掘地得石函。中有如來舍利。尋建浮圖以瘞之。仍剏精藍曰寶光。○寰宇記云。麗元山在縣北八里。平地特起。四絕高三丈。有雙石鏡。廣五尺。嘗掘其下至水。而未臻其極。○本志云。縣北十五里。二石闕各高丈三尺。一題云。漢故兖州刺史雒陽令王君稚子之闕。一云。漢故先靈侍御史河內縣令王君稚子之闕。闕兩角有斗。又作重屋。四壁刻神像。人物牛馬之類。今已漫滅。詳畫苑中。○寰宇記云。八陣圖在縣北三十里。彌牟鎮。蜀志。亮推演兵法。作八陣圖。咸得其要。李膺益州記云。稚子闕北五里。有武侯八陣圖。土城四門。中起六十四魁。八八為一行。魁方一丈。高三尺。緯略曰。八陣圖在新都者。峙土為魁。植以江石。四門二首。六十四魁。八八成行。兩陣並峙。周凡四百七十二步。魁百有三十也。○陸游九月十日如漢州。小獵於新都彌牟之間。投宿民家。詩云。適從邛州歸。又作漢州去。天低慘欲雪。遊子悲歲暮。十年辭京國。匹馬厭道路。野火炎高岡。江雲暗空戍。角弓寒始勁。霜鶻飢更怒。邂逅成小獵。尺箠聊指呼。北連武侯祠。南並稚子墓。合圍蹙窮鹿。設伏截狡兔。壯哉帶箭雉。耿介死不顧。吾寧暴天物。戰法因得寓。黃昏過民家。休馬燎裘袴。割鮮盛燔炙。毛血灑庭戶。老嫖亦復奇。汎掃邀我駐。丈夫倘未死。千金酬此遇。○古今集記云。新都南十七里。有宋興戍山。高百四十丈。週三十餘里。山色赤岸。邊若有火光。又名赤岸。益州記云。赤岸山頂有湧泉。週迴數丈。深八九尺。澄澈不竭。○龍門山在縣南二十里。趙抃次孫直言。九日登龍門山詩。皇祐二年秋九月九日。龍門遇佳節。新都大夫孫隱之。報政優游共民悅。升山高會賓主俱。滿頭黃菊泛茱萸。遙開醉眼極千里。身高氣爽胸懷舒。遲時感物以次發。詩成落落傾瓊珠。初言府政好太守。

化行歲稔民力蘇。喜聲協氣遊以狂。稚子負老老者扶。又言登臨風景異。澄川秀野如披圖。殊方眞賞到奇處。未來空只誇江湖。得之獨善不在已。遠道遺我開煩紆。嗟我江原亦民長。周遭百里平如掌。簿書役役甚囚拘。聞有岷峨無計上。及聞治邑茲山奇。腳力不到神魂馳。誰知我亦好山者。篋中時復觀君詩。○西南十五里有繁陽山。與新繁接。錄異記云。繁陽山麻姑洞。卽二十四化之第一陽平之別名也。在繁水之陽。因以爲名。本際經云。天師張道陵所遊太上說經之處。在成都府新都縣南。渡江十五里。衆山連接。孤峯特起是也。神武皇帝潛龍之時。光化二年己未五月四日丙申。山土摧落。洞門自開。縣吏時康。道士張守眞等。以事申府云。自洞門開後。每日有百姓往來者。府差縣典楊澤。畫工任從。與守眞同往檢。覆畫圖申上。縉。把燈燭入洞看檢。其第一門對北高二尺。闊三尺五寸。入至第二門約五尺已來。第二洞門方一尺六寸。入內並是黑處。長一丈二尺。闊六尺。有石窟兩處。在東畔。并西南有洞門兩路。南畔一路。圓闊一尺六寸。入內長一丈二尺。闊一丈高四尺。南畔有石窟三處。西畔兩路。入內通遠門。圓闊一丈七尺。內各闊五尺。高六尺已來。門相去一丈。門屋一所。高五尺。闊四尺。從內往來。有刻料棋甌瓦。約山。作石日月。兼作日月字。隔子房一所。闊二尺五寸。高一尺五寸。刻料棋甌瓦。石竈一所。高一尺。闊一尺五寸。門闊五寸。石窟三處。各闊七尺。又西入洞門。圓闊一尺七寸。灣曲入。向南門屋一所。高六尺。闊四尺。從內往來。有石料棋甌瓦。又有竈模兩所。共一牀。高一尺。闊二尺三寸。門闊八寸。有石料棋。西北角又有一門。方一尺六寸。內方二丈已來。南畔。西畔。北畔。各窟一所。南角又有一洞。圓闊一尺六寸已來。將燈燭近前。有黑

氣出燈火即滅更入不得其洞連接繁陽本山相去三里已來據諸生張贊等狀稱繁陽是古迹山每準勒祭祀其洞亦是元有往往閉塞元和中南康王章臬蒞蜀洞忽開時人咸云洞開卽年豐物賤尋又閉塞至是復開其後果遠近豐稔洞本名麻姑山側有麻姑宅墓蓋修道之所也

雙流縣

華陽國志云廣都縣在蜀郡西三十里漢元朔二年置有漁田鹽井之饒江有魚漕梁山有鐵鑛江西有安稻田穿山崖過水二十里○唐司空曙送柳震還蜀詩白日雙流靜西看蜀國春桐花能乳鳥竹節繞祠神蹇步徒相望先鞭不可親知從江僕射登榻更何人宋李新廣都道中詩萬花織羅凡幾曲繡屏處處圍茆屋家貧張日無羅幕東風吹開莫吹落居人應笑行客癡春去春歸殊不知予以庚戌暮冬過此作詩云萬里橋方度雙流徑卽存薄寒成翠色疎雨點黃昏竹柏密他樹水雲平過村林鳥棲欲盡纔到縣西門○古跡有盤古祠徐整三五歷記云天地渾沌如雞子盤古生其中八萬四千歲天地開闢清陽爲天濁陰爲地盤古在其中一日九變神於天聖於地天日高一丈地日厚一丈盤古日長一丈如此滿八萬四千歲天極高地極深盤古極長後乃有三皇數起於一立於三成於五盛於七處於九故天去地九萬里也此寰宇記所引羅泌路史亦云于廣都得盤古之祀矣○有大塔山陰弘道益州山川圖云阿育王使鬼兵造八萬四千塔廣都有其一○有商瞿里本志云治東十里瞿上鄉有孔子弟子商瞿上墓時有錦雞白鵬見焉文明之德未艾也○有宜城山寰宇記云宜城山在縣東南十里李膺益州記云宜

城在牛飲水南。今按紫草山岡阜相屬。高百餘步。連入陵州貴平縣界是矣。周地圖云。清水在縣北十里。改名牛飲水。李膺記云。水名客舍。昔程鄭家於此。每羣牛飲江爲之竭。故名。按蜀漢尙書蔣琬。宋布衣李甲宅。俱在宜城山下。茂林清泉。致可喜也。○有公孫述墓。寰宇記云。在西四十里。高三丈。墓內銅作網結。雖遭亂世。莫能侵毀。有葛陂。本志云。治北十里。龍池。舊名葛陂道。漢費長房至此。以杖擲陂中。化龍去。○有天師觀。紀勝云。在廣都縣北。張道陵祠也。壇下有井。名伏鬼井。趙閱道記。華陽縣衡山有井。妖怪藏其中。道陵運石以鎮之。鬼妖乃絕。邑人爲立祠。植杖井旁。今爲喬木。曰戒鬼木矣。○有朱辰墓。華陽國志云。漢時縣民朱辰。字元燕。爲巴郡太守。甚著德惠。辰卒。官郡。壤民北送及墓。壤。鼉鼓刀。擗。踊。感動路人。於是葬所。草木頃許。皆傲其曲折。迄今蜀人莫不歎辰之德。靈爲之感。應。今朱氏爲首族也。○有牧馬川。寰宇記云。在陵州北一百二十五里。蜀先主于此置藉田。牧馬在江中。俗因名牧馬川。今割屬廣都縣。本志云。在縣東南八里。○有龍華山。唐詩紀事。段文昌字墨卿。別業在廣都縣之南龍華山。嘗杜門力學于此。俗謂之段公讀書堂。長慶初。朝議文昌。少在西蜀。諳詳利病。詔授劍南節度使。有邑人贈詩曰。昔日騎驢學忍飢。今朝忽著錦衣歸。等閑畫虎驅紅旆。可畏登龍入紫微。富貴不由翁祖致。文章生得羽毛飛。廣都再去應惆悵。猶有江邊舊釣磯。○文昌還別業。有尋龍華山寺。廣宣上人詩云。十里惟聞松桂風。江山忽轉見龍宮。正與休師方話舊。風煙幾度入樓中。郭震題龍華山詩云。昔年曾到此山回。百鳥聲中酒一杯。最好寺邊開眼處。段文昌有讀書臺。何耕題文昌讀書臺詩云。段公會此讀書臺。讀破應須萬卷餘。家禮一

傳爲雜俎。稗官教採附虞初。按方輿勝覽。文昌讀書堂在廣都縣順聖寺南。碑目云。龍華院山門路記後。唐天復七年立。今爲觀音院矣。○何耕題龍華佛閣詩云。西川鑿山三大像。突兀皆在江之涓。修覺九頂見路盡。獨此恨未瞻容儀。竭來勝地了。疇昔輕軒瘦馬相。追隨百尺金軀信。雄傑三乘寶閣何。瑰奇然犀不用照幽鬼。擊鼓自合趨馮夷。前人開創願力廣。下與舟楫扶傾危。六月灘濤劇奔吼。一分性命爭毫釐。篙工落膽行者泣。彈指乞活天人師。人心狎水水多禍。佛力在人人不知。年來蜀產坐。腰削夜半有力真。能移軻峨大鵬去不絕。綵鶴破浪風揚旗。佛慈只作布施想。江神雖怒將何爲。又題龍華山寺云。傑閣山爲佛。精廬地布金。水涵空闊淨。路繞翠微深。鳥下窺齋鉢。龍歸識梵音。城中塵眯目。那得此幽尋。又龍華大像。蓋翼國夫人所作。因成絕句云。慧性元從戒定薰。百花潭水洗僧鉛。箇中力量真超絕。故老尙傳娘子軍。○有郭信可隱居。卽郭印也。何耕題其雲溪詩云。幽居定何如。頗恨未見之。主人向我言。喜色融雙眉。修篁流翠陰。寒溪漾清漪。領略非一狀。幽研發餘姿。主人信妙士。得此固所宜。又題浮翠橋詩云。隔溪蒼翠各西東。架竹爲梁路始通。缺月罅林凝淨綠。斷霞明水抹殘紅。芒鞋步步幽深處。藜杖聲聲屈曲中。回首忽驚橋已遠。冷然身御圃田風。寒碧亭詩云。憑欄日日俯清湍。洗竹年年斬惡竿。十頃琉璃秋色淨。一林竿籟曉聲寒。涼風有意生天末。明月無邊照水端。誰謂過清難久處。愚溪元自不相安。遠色閣詩云。小小樓居著散仙。淵明真趣本悠然。招呼雲月闌干曲。顧揖江山拄杖前。獨鳥倦歸翻落日。誰家晨爨起疎煙。根塵應接無留礙。笑殺胡僧面壁禪。假山詩云。空庭幻出小嶙峋。假外應須別有真。只恐話頭成兩

擬若爲融攝主和賓。蓮塘詩云。色香無比出西方。何物妖狐號六郎。手折一枝聊供佛。前身定是老柴桑。  
蘭坡詩云。蘭與高人臭味同。含薰聊復待清風。紛紛蕭艾母相笑。爾輩敷榮轉眼空。龍淵詩云。門前大江  
何渺漫。昔人飲牛水爲乾。水乾龍逝亦其理。近在咫尺聊泥蟠。魚蝦玩侮獮獮笑。縱有靈怪誰當看。德人  
問舍壓吾境。使爾築室相遮欄。坐令異類皆屏伏。恃有此耳差少安。卻紆朱紱去監郡。遣我守舍良獨難。  
昨來過門恍如夢。龍致此語催歸鞍。先生不信反大笑。謂我饒舌狂豐干。虛舟詩云。君不見江皋車馬紛  
相送。巨編義艤船載重。西南使者解官歸。水淺著沙牽不動。如君材具豈多得。合侍明光參法從。胡爲淺  
瀨著虛舟。頗肖胸中太虛洞。問君此意竟安在。欲說向人誰與共。山林鐘鼎本同轍。繫岸截江隨所用。八  
窗皆皆淨無塵。一水泠泠清可弄。何嘗抱被過君眠。分破江天幽夜夢。忘機臺詩云。太虛生微雲。機事日  
夕繁。兼忘豈不佳。尙有忘者存。稽首老龐翁。妙處希一言。請觀堂上月。萬古無昭昏。和光亭詩云。口口倚  
寒巖。三春無暖氣。達人定汝笑。胸中太涇渭。不妨聲色海。徑造佛祖地。所以亦樂翁。花前時一醉。

鄂縣

華陽國志。張儀城鄂。周回七里。高六丈。上置樓觀射闌。與成都同制。晉元康三年。民謠曰。鄂城堅。蓋底穿。  
鄂中細子李特細。蓋李特自稱益州牧。治此城也。○寰宇記云。犀浦縣。周垂拱二年。割成都之西部置。蓋  
因李冰所造石犀以名。杜甫詩。南京犀浦道。指此。在縣東二十里。本志云。縣治儀門下穿洞。直通犀浦。極  
深。敞高可七尺許。每夜月中天。洞中曙光如晝。古謂之明月洞。又云。治內東土臺墳。起下有池。其底有井。

謂之郛筒井。芥畔產巨竹，剝爲筒，汲水而釀，包以蕉葉，纏以藕絲，信宿香達于外。或云山濤治郛，以筠釀醪，酒旬日香聞百步。今池井俱存，竹則不產。一云：池中土臺突起，列方圓二井，名鴛鴦井也。○成都文類，諫議司馬池，尉郛之明年，生子光於官廨，字之曰岷，以山稱也。於是諫議公手植柑樹一本于庭，及溫公歿後若干年，郛邑李丞作堂祀公，且以護樹，張行成記之。○揚雄蜀紀云：杜宇，一名杜主，代魚臯王蜀，徙都于郛，卽杜鵑城也。後傳其位于籠靈，宋陳臯記云：杜宇籠靈墓，在郛縣南一里，二塚對峙，若丘山，俱隸淨林寺。○方輿勝覽云：郛縣有子雲讀書堂，本志云：縣南二十里外子雲亭，卽葬所也。亭北半里有拜臺，相傳爲拜子雲墓而築。○寰宇記云：郛縣有漢司空何武宅，武之弟攀，從刺史王濬伐吳，有功歸家，闔門治疾，不預世事。武之後，隨有養竹園，人盜其筍，隨遇見之，恐盜者怖走，或傷其手足，因挈履徐步而歸矣。○紀勝云：郛縣有張白雲先生故居，范鎮留題張少愚屋壁詩云：高隱郛城下，平時仍往還。門開值冠蓋，簾卷爲江山。沛雨人間待，片雲天外閑。泥封詔不起，朝夕奉慈顏。文同題張少愚書院詩云：澗水浸斷橋，車馬不得通。飛嵐積庭礎，秋蕪垂紫茸。窗紙爛溪雨，簾衣折林風。主人殊未歸，使我煙景空。○水經註云：江水又東北，逕郛縣下，縣民有姚精者，爲叛夷所殺，掠其二女，二女見夢於兄，曰：當以明日自沈江中，喪後日當至，可伺候之。果如所夢，得二屍於水。郡縣表異焉。○古語云：郛縣七十寺，分布四郊內，其最著者法定寺。高僧傳云：法定寺是漢永平年，佛法初入中國時建，後晉惠遠寓居著神異，至隋始改爲法定焉。寺有彌勒聖像，乃江流枯查所製，唐貞觀長史高士廉蓋殿以安之，有僧汎愛者，樹其浮圖，獲巨蟹身。



長二尺餘。此塔嘗被霆擊而復合。爲釋惟忠所禱云。

新繁縣

水經註云。成都江北則左對繁田。文翁又穿滄浪以溉灌之。凡一千七百頃。蜀漢延熙十年。涼州胡率衆降。增戶于此。俗間謂之新繁也。○禹貢曰。岷出導江。東別爲沱。孔安國註云。江東南流。沱東行。鄭註云。此沱尾入江。不於江出。晉太康地記云。江沱在繁縣。蕭廣濟註江賦云。觸玉壘山。東迴爲沱。據漢書溝洫志。此江即秦守李冰所鑿。非禹貢之江沱明矣。本志云。李冰導水。見水勢橫突。乃鑿九井。象九宮以厭之。元末井壘塞。新建石橋存。○志云。衛湖。蜀漢縣令衛常所開。在學宮後。又有東湖。李德裕爲宰日。將開此湖。夜夢一老父曰。某潛形其下。幸庇之。明府富貴。今鼎來。七九之年。當相見於萬里外也。明日於土中得一蟻徑尺餘。乃投之水。後德裕果至宰相。六十有三卒於朱崖。應其夢焉。按宋僧衛公堂記。略繁江令舍之西。有文饒堂者。舊矣。前植巨楠。枝幹奇怪。父老言。唐李衛公爲令時。鑿湖于東。植楠于西。堂之所爲得名也。○志又曰。宋蘇實治平間爲繁令。有異政。嘗厭衛湖蛙鳴。令人取一大者。以硃點之。戒曰。毋再喧囂。已果不鳴。及湖中澗。翠蛙結聚成團。啓視之。則硃點者居。中羣蛙若擁翼焉。蘇令悉放于江。終其任。湖蛙無一鳴者。○唐初隱士朱桃椎。茅茨賦云。若夫虛寂之士。不以世務爲榮。隱遁之流。乃以閑居爲樂。故孔子達士。仍遭桀溺之譏。叔夜高人。尙被孫登之笑。況復尋山玩水。散志娛神。隱臥茅茨之閒。志想青雲之外。逸世上之無爲。亦處物之高致。若乃觀余庵室。終諸陋質。野外孤標。山旁迴出。壁則崩剝。而通風簷則摧。

頽而瀉。日是時。閑居。晚思。景媚。青春。逃斯澗谷。委此心神。削野藜而作杖。卷竹葉而爲巾。不以聲名爲貴。不以珠玉爲珍。風前引嘯。月下高眠。庭惟二逕。琴置一絃。散誕池臺之上。逍遙巖谷之間。逍遙兮無所託。志意兮遠自樂。枕明月而彈琴。對清風而緩酌。望嶺上之青松。聽雲間之白鶴。用山水而爲心。翫琴書而取樂。谷幽。偏覺鳥聲嬌。聲高。韻細。盡相調。見許毛衣。真亂錦。聽渠聲韻。宛如歌。調絃乍緩急。向我茅茨集。時逢雙燕來。屢值遊蜂入。冰開綠水更應流。草長階前還復溼。吾意不欲世人交。我意不欲功名立。名立也不須高。總知世事盡徒勞。未會昔時三箇士。無故將身殞二桃。贊曰。先生知足。離居盤桓。口無二價。日惟一餐。築土爲室。卷葉爲冠。斲輪之妙。齊扁同觀。文苑云。新繁朱桃椎。茅茨。薛稷爲賦。序略云。穩臥茅茨之間。屬想青雲之外。逸世上之煩襟。遂明時之高志而已矣。宋楊甲謁朱真人祠詩云。一濯巖下溪。再拜巖中庭。清風蕭然來。吹我衣上腥。仙人芙蓉冠。乘月下雲耕。山空雜佩響。靜夜朝百靈。似聞客欲去。小語猶丁寧。肅肅上松柏。急以兩耳聽。寂寥古壇外。但掛斗與星。天明恐是夢。恍惚遺心形。去飲石上水。再讀幽人銘。青山無行跡。霧雨空冥冥。○又有勾氏者。隱於盤溪。成都文類。勾景泰詩云。黃塵沒車轂。平地得林丘。花木風光早。陂地煙雨秋。不彈長劍缺。甘賦大刀頭。九軌利名瘡。逢君應少瘳。又從俗鮮所得。九牛中一毛。強牽麕鹿性。要學豹龍韜。野服顏常好。晴窓首自搔。回來誤應聘。塵土汙吾袍。又客至輒命酌。爲言花已開。青山長委髻。白骨舊生苔。不飲固癡絕。能詩宜數來。頗愛明日雨。紅紫落成堆。又勝簪不肯黑。浮頰故能紅。心寄塵埃外。春歸杖屨中。徑松青護謾。庭草碧茸茸。無術繫白日。年光如轉蓬。按盤溪主

人勾友于字信卿李石記云有樓以藏書堂以教子亭以賦詩樹以置酒自誓曰俗子污我不我門凡士  
浼我不我室清風肅戶明月贊席抱琴之童挾卷之子照映几杖之側徜徉筆硯之間

### 溫江縣

華陽國志魚臯王田於湍山忽得仙道蜀人思之爲立祠成都文類孫松壽觀古魚臯城詩野寺依修竹  
魚臯迹半存高城歸野壠故國鶴荒村古意憑誰問行人謾苦論眼前興廢事煙水又黃昏註云在溫江  
縣北十里有小院存按漢文苑資中王子淵以宣帝神爵三年有事湍上作僮約文卽此縣也○寰宇記  
云卓水在溫江縣李膺記相林寺前清卓二水是矣任懌渠堰志云九昇口堰其源出於卓江至郫之柵  
頭別流爲溫江口而九昇口者實兩江之匯也杜甫陪李七司馬昂江上觀造竹橋詩伐竹爲橋結構同  
寒裳不涉往來通天寒白鶴歸華表日落蒼龍見水中願我老非題柱客知君才是濟川功合歡卻笑當  
年事驅石何時到海東趙抃早離溫江夜泊白沙步詩曉與諸孫別依然頗動懷去乘蘭棹穩行得綵衣  
僧漁父遙連市村扉半掩柴夜來溪上宿夢已在高齋○宋史哲宗紹聖四年夏四月八日有芝生於溫  
江縣觀音院齋廳之楹一本而數結煙縷氤氳闔月不散邑令孫漸扁其處曰芝堂而爲之頌云西母薦  
祉金精効奇是生神草雲英瓊蕤給園之中湍水之涓地其幽矣芳而孰知陟彼岷宮真人頎頎夜授祕  
訣謂余舉之沃之醴泉濯之天池羞以石髓茹而忘飢黃綺爲侶喬松可期盍獻天子以薦神祇○古今  
集記治西三里之金烏池唐高宗曾夢金烏集于益州巨木上遣使訪至此見烏三足而金色浴於此池

志云。今有金烏觀存。○筆記。溫江治西三十五步有女郎祠。張天師孫靈真之女。名玉蘭者。幼不茹葷。十七夢吞赤光感孕。爲母所責。一夕無疾而卒。有一物如蓮花自腹中出。開視之。乃本際經十卷。葬百餘日。雷雨晦冥。失經所在。墳壙自開而飛昇。棺蓋掛於巨木之上。此三月九日事。鄉人至今如期齋祭之。按郡國志。梁州女郎山。張魯女浣衣石上。感赤光之祥而懷孕。生二龍。及女死。將殯。柩車忽騰。躍升此山。遂葬焉。其浣衣石猶在。因謂之女郎山。其說略同。

彭縣

志云。縣西北三里。有劉宋時晉壽郡城。梁東益州。西魏天水郡。後周九隴郡。唐武德之濠州。垂拱之彭州。皆理此。○寰宇記云。濠陽縣。唐儀鳳年於濠江之北置。故曰濠陽。蓋彌濠水。源出九隴縣。來經營縣南二百五十步。本志云。東二十里之濠陽鎮。有故縣址。○志又云。北三十里之二郎鎮。乃九隴縣址。以九隴山爲名。寰宇記云。九隴山自永昌縣連。互至縣界。屈曲而九折也。方與云。九隴者。古彭州之西山。一伏隴。二豆隴。三秋隴。四龍奔隴。五走馬隴。六駱駝隴。七千秋隴。八較車隴。九橫擔隴。故有九隴之名。○陸放翁云。天彭號小西京。以其俗好植牡丹。有京洛之遺風。古今雜記。孟氏以牡丹名苑。于時彭門爲輔郡。興州者多其戚里。得之上苑。此彭門花之始也。天彭亦謂之花州。而牛心山下。謂之花村云。○治內有東湖。元符中。袁駕記云。九峯高峙。濠水潏發。樓閣亭軒。隱映于茂林修竹間。又有西湖。元和中。守王潛齋。祐創進士鄧袞記云。二公陶奇撰幽。不乏心匠。于西湖臺島。花竹布置。罔不宛妙也。○勝覽云。南樓在郡圃中。范百

祿有記文同彭州南樓詩云。百尺壓城端。飛簷欲上搏。湖光搖埤堦。山影轉欄干。秀野含春煦。喬林擁暮寒。回頭大岷雪。千仞正巉岏。○勝覽又云。望雪樓在子城上。唐彭州守建。以望雪山。太和進士鄧袞銘曰。維蜀之鄙。截如巨砥。厥郡維彭。西北天屏。危碧峭青。夏霄摩冥。鯨跳虬奔。限巒隔番。上排雪峯。延壘萬重。鶴整瑤駢。月積綃緋。振古不泐。四節一色。皎皎披飄。寒洄陰膠。光涵二水。冷射千里。往哲所嘉。名之玉壘也。○高適爲州刺史。彭州山行詩云。峭壁連崆峒。巒峯疊翠微。鳥聲堪駐馬。林色可忘飢。怪石時侵徑。輕羅乍拂衣。路長愁作客。年老更思歸。且悅巖巒勝。寧嗟意緒違。山行應未盡。誰與玩芳菲。蘇頌贈彭州權別駕詩。雙流脈脈錦城開。追餞年年往復迴。祇道歌謠迎半刺。徒聞禮數揖中臺。黃鶯急囀春風盡。班馬長嘶落景催。莫愴分飛歧路別。還當奏最掖垣求。○集古錄載。秦李冰爲蜀守。鑿山導江。以去水患。其神怒化爲牛。出沒波上。君操刀入水殺之。因刻石以爲五犀。立之水旁。與江誓曰。後世淺無至足。深無至肩。謂之誓水碑。立在彭州馬端臨云。彭州掘地得絳帖舊本。字畫清勁。頗類舊武岡而差優也。○寰宇記云。九隴縣灌口鎮之城。西有玉女祠。祠西有蜀守李冰祠存。○五代史補。蜀王衍與其太妃遊青城山。遂至彭州陽平化。志云。今金城山之仙居觀。是其駐蹕所也。金城山形如城。上應角宿。卽二十四化之陽平治矣。○志又云。治北五十里白石溝。卽漓沅治也。上應房宿。治有鴻都觀。下觀名曰響石。寰宇記以漓沅作麗元云。范蠡學道於此。又云。五龍山有神溪水。仙人李伯陽登山嗽之。今爲溪源。山高數百丈。延袤二十餘里。山麓有洞。旱時祈雨。巫者初入。握火燭之行。少頃。跛足而望。懸崖中有斧鑿痕如井。深數十百丈。屬

一線之明。而煙焰巖然上衝。謂之天生眼。至此少偃息。復入第三四五六洞。洞下重淵。深不可測。盛夏水冷如冰。以編竹篾懸其上。遂巡蟻附而入。抵第七洞。龍所穴也。始用符呪取水。盛竹筒而出。離洞口卽有風雷隨之。而雨作焉。間值洞中水壑。巫者多不得出。○勝覽云。葛仙山有崇真觀。在濠陽北四十里。二十四化之第五化也。葛仙翁瓊。楊仙翁昇賢。於此得道。大同中蒲仙翁高遠。復於此白日上昇。梁武錫名上清觀。劉孝先作碑。以紀其事。按成都記。韋皋夢神人謂曰。異日富貴。無忘葛瓊也。後尹戒都再夢。乃復新觀。宇皋自爲記。雲笈七籤云。葛瓊化。迴迴巖巒。左右嵌穴。地靈境秀。迴絕諸山。故有二十四峯。八十一洞。觀下有礮泉。深在谷底。汲之非便。此宮之西。過崖磴十五步。巨石下有丁東水。出於崖腹。滴入窪石竅中。中和年刺史安金山。準詔投龍郡縣。參從者三百餘人。忽有汚觸其水者。頃刻乃竭。安公與道流頗懷憂懼。夜至泉所。拜手焚香。叩祈良久。涓涓而滴。雖從騎之衆。食之充足。每年三月三日。蠶市之辰。衆逾萬人。宿止山內。飲食之外。水常有餘矣。○勝覽云。至德山在郡西三十里。上有廣明院。蜀王衍專事遊幸。嘗登是山。患其高險。令於福唐寺東。別開一徑。凡數里。廣可二丈。栽松砌石。以達於寺。從官悉騎。以從。松枯石怪。尚有存者。本志云。至德山有三昧泉。自石竇噴洩。方大如斗。不竭不溢。俗傳卽知元國師洗人面瘡之處。至今疾者澆之多效。按高僧傳。釋羅僧者。蜀聖寺中得果位人也。嘗寢疾於五臺山。同會僧衆俱不之測。悟達國師獨善視之。將及九旬。病愈。別去云。所苦今遂平復。由師之力。我住在劍外九隴郡之茶籠山。爾異日遊方。無忘相訪也。悟達暮歲。至蜀。屢訪羣峯。訊老樵輩。皆以未嘗聞茲山名。乃歎曰。噫。病禪之妄。

也。將回。遇一山童曰。某是彼巖之聚沙者。前導而去。俄覩殿塔儼空。房廊環肅。果值昔之病僧。迎門敘故。日將暮矣。而謂之曰。茲寺非得漏盡。通不能至。爾以宿緣。一諧遘止。言寄寓乎。斯爲未可。爾其克勤修證。詣果胡難。乃命僮童。送師歸去。迴望之頃。但見巖壁峭峻。杉檜莽蒼而已。則開成中事也。時知元著傳之。次得僧可思。尤閑地理。爲元作塋。兆於丹景前峯。其山若雉堞狀。雖高低起伏。而中砥平。俄有里人耆老曰。古相傳云。茶籠山矣。○志云。縣北三十里。丹景山。舊志以爲山葑。牡丹春時紅豔照人。故名。其前爲彭門山。兩山對峙。懸崖絕壁。相去數百步如門。卽天彭門也。或曰彭祖徧遊洞府。以窺聖迹。嘗往來於其中。五代史補。僞蜀太后徐氏。題丹景山金華宮詩云。碧煙紅露漾人衣。宿露蒼苔石徑危。風巧解吹松上曲。蝶嬌頻採臉邊脂。同尋僻境思攜手。暗指遙山學畫眉。好把身心清淨處。角冠霞帔事希夷。太妃徐氏和云。丹景山頭宿梵宮。玉輪金輅駐遙空。軍持無水注寒碧。蘭若有花開晚紅。武士盡排青嶂下。內人皆在講筵中。我家帝子傳王業。積善終期四海同。○寰宇記云。白鹿山在九隴縣北五十里。周地圖記云。宋元嘉九年。有樵人於山左見羣鹿。引弓將射之。有一麋所趣。險絕。進入石穴。行數十步。則豁然平博。邑屋連接。阡陌周通。問是何所。有人答曰。小成都。後更往尋之。不知所在。○勝覽云。白鹿山有大乘金覺禪寺。本晉佛圖澄所建。上有洗腸池。按大同志。晉永寧二年。羅尙殺隱士劉敞。敞故州牧劉璋曾孫也。隱居白鹿山。高尙。皓首未嘗屈志。尙信妖言而殺之矣。○輿地紀勝云。彭縣大隋山之景德寺。大業中神照禪師投錫之所有。木禪菴。白龍井。山生竹。若龍頭。俗呼龍頭竹。勝覽云。大隋去壩口鎮三十五里。神照所居。有瀑

布張天覺記云。西山之勝。在彭門者。大隋爲甲。郭印詩云。我聞大隋名。夢寐猶記錄。得檄天彭道。喜氣知可掬。出城六十里。嶠嶺轉江曲。山門忽斗上。危步依筇竹。崩石帶煙雲。異草羅澗谷。寂鳥下窺人。巖猿時掛木。路窮纔見寺。金碧煥雙目。祖師古定光。燈冷無人續。開公生異世。大事如付囑。僧言山長陰。朝暮雲容盛。茲辰爲我晴。臺岫堆濃綠。虛閣倚秋風。一洗塵土俗。舉手揖丹景。橫身跨白鹿。十年勞問訊。親到心始足。坐久燭漸微。借榻雲間宿。山寒寐不成。窗外泉鳴玉。○高僧傳。彭州土溪。智陀子言菴主。綿州人也。初至大隋。聞舉石頭和尚示衆偈。倏然領旨。歸隱土溪。懸崖絕壑。間有石若蹲異獸。師鑿以爲室。中發異泉。了無涸溢。四衆訝之。居三十年。化風盛播。初室成日。作偈曰。一擊石菴全。縱橫得自然。清涼無暑氣。涓潔有甘泉。寬廊含沙界。寂寥絕衆緣。箇中無限意。風月一牀眠。○勝覽云。中隋山在大隋之後。上山三十里。至光相閣。三月半間。掃去積雪。下視葛仙白鹿。大隋眞培塿也。○碑目云。九隴縣龍懷寺碑。唐王勃撰。略云。龍懷山者。井絡之所交會。岷隅之所控帶。攢峯北走。吐香幃於元霄。巨壑南馳。歎洪濤於赤岸。香城寶地。左右林泉。碧岫丹岑。往來煙樹。隋開皇五年。始賜額爲龍懷寺。因障爲壁。憑崖列戶。地鄰縣左。遂均縣上之恩。山似龍盤。卽建龍懷之刹矣。○按彭州寺觀特盛。故予隨類而詮次之。則山川亦可見焉。

崇寧縣

唐之唐昌縣。宋初之永昌縣也。熙寧間。狄道李子忠來牧是邑。構堂於其所居之西北隅。而命之曰治已。修筠珍幹。羅立環擁。寒溜淩淩。渠行沼畜。公事旣休。卽來其間。此文與可記之矣。○唐咸通中。御史中丞



吳行魯出知彭州。於州之唐昌縣心置草市歇馬亭。及靈巖報恩院。陳谿爲之作記立碑建德鄉。其詞曰。聖上以南夷不虔。邊塵空起。候旦授執政意。俾擇要郡。以良能而牧之。遂命御史中丞渤海吳公行魯持節出刺雅安。公松筠植心。金石勵志。雅安實邊之衝。東入險隘。應援由此。公至止一顧。屹如巨防。當危疑之秋。瞬息無事。郡人以考秩將滿。預懷去思。接武陳誠。願借綏撫。丞相隴西公以公功業昭著。飛章上聞。請充節度參謀。兼諸軍行營副都知兵馬使。東路行營都知兵馬使。仍兼知黎州巡邊制置。公遂於大渡河。置一橋。互五百尺。自干戈未寧。士馬旁午。饋運往復。商旅經過。曾無覆溺之憂。永絕滯留之患。至今行者見必歸息。異跡奇謀。繁難具紀。由是復昇於健爲雅之南。千里縣道。烽堡相躡。早夕軍食。跋俟於健爲。公智出事先。機生料外。風波助意。舟楫如飛。是得閩境無虞。諸軍飫飽。實公之功也。由是天子以彭門名郡。而償其重勤。公朝車之日。卽究風俗。民之憂苦。已明其重輕。事之興廢。已熟其利病。從使革弊。幽顯愜心。郡內旣肅。施及支邑。以唐昌縣中界接導江郛城。東西縣遠。不啻兩舍。雖有村落。僻在荒塘。昔置郵亭。廢毀將久。行役者野食而泉飲。貿易者星往而燭歸。激數公行。投告無所。深溝雨漲。古陌橋摧。跬步難踰。艱苦寧述。況輸役責限。徵斂有程。而欲罪其稽遲者乎。公惻然凝想。卽日計成。遂陳於連帥。於縣心置草市。因其鄉名。便以建德爲號。自此四來者。旋踵而迓迎。中望者。舉目而知歸。老幼攜挈。倏忽而至。萬家歡笑。共事修營。不旬日而告就。今則百貨咸集。蠢蠢莫遺。旗亭旅舍。翼張鱗次。榆楊相接。桑麻漸繁。如此牧人。可謂移風易俗矣。昔武侯以蜀勝脆。故令鄰邑翊日而市。意在習其筋力。而俟之征徭。又每及上春。

以盜爲名。因定日而有知所往。公亦約之以期而候之。其日商旅輦貨至者數萬。珍織之玩悉有。受用之具畢陳。想人之心。豈待詢問而知其歡悅也。復以路由諸部。疊跡輪蹄。徘徊一息。無稅駕之所。遂出俸錢。建長亭。崇軒邃室。外廡內廚。帷薄精新。器物充足。則往來者非止晝食。而卜夜可矣。人旣繁會。俗已豐饒。又置一鎮。抽武士三十人而禦之。創立廨署。早暮巡警。盜將竄跡。人遂高眠。不感晨雞。無聞夜犬。皆云康泰。不可比倚。又茲地會昌之前。有佛寺數所。因廢而未興。鄉閭求福。無處禮敬。像設之儀。莫識。鐘磬之聲。不聞。僻野深郊。轉爲蕪俗。復置靈巖報恩院。修北方天王及侍從。奇工妙飾。相好無雙。高壙環合。門廡揭立。又度僧住持行道。無有虛日。斯人也。非只豐足而永逃天札之患。得不紀其盛跡。而垂於無窮者哉。

# 蜀中名勝記卷之六

## 成都府六

灌縣

成都記云。江水出羊膊山。北連甘松。至于灌口。永康軍志。漢文翁爲守。穿湔江水。堰流以灌平陸。春耕之際。盡之如金。號曰金灌口也。○李膺益州記曰。湔水路西七里灌口山。古所謂天彭關也。華陽國志。望帝之時。會有水災。其相開明決玉壘以除水害。遂委以政事。已而禪位於開明之西山隱焉。按今灌口鎮有望帝祠存。○道將又云。秦李冰爲蜀守。知天文地理。謂汶山爲天彭門。乃至湔。及縣。見兩山相對如闕。彷彿若有神見。遂於水上立祠三所。祭用三牲。珪璧沉漬。漢興數使使者祭之。按揚雄蜀記。李冰以亡者過天彭關。精靈見焉。○元和志。灌口鎮在導江縣西二十六里。後魏置。自灌口坂迄千頃山五百里。間兩崖壁立。有瀑布飛流十里。而九。昔人以爲井陘之地。寰宇記云。唐貞觀於灌口鎮立鎮靜軍。宋改爲永康軍矣。杜甫野望。因過常少仙詩。野橋齊度馬。秋望轉悠哉。竹覆青城合。江從灌口來。入村樵徑引。嘗果栗園開。落盡高天日。幽人未遣回。岑參開崔十二侍御灌口。夜宿報恩寺詩。聞君尋野寺。使宿支公房。谿月冷深殿。江雲擁迴廊。燃燈松林靜。煮茗柴門香。勝事不可接。相思幽興長。蘇軾送鮮于都曹歸蜀灌口舊居詩。蘂盡霜鬚照碧銅。依然春雪在長松。朝行犀浦催收芋。夜渡繩橋看伏龍。莫歎倦游無駟馬。要將老健

敵千鍾。子雲三世惟身在。爲向西南說洞容。○水經註曰。江水又歷都安縣。卽汝山郡治。劉備之所置也。有桃關及漢武帝祠。李冰作大堰於此。立碑六字。曰深淘潭淺包隄。隄者於江作壩。壩有左右口。謂之瀾壩江。○古今集記曰。李冰使其子二郎作三石人以鎮瀾江。五石犀以厭水怪。鑿離堆山以避沫水之害。穿三十六江。灌漑川西南十數州縣稻田。自禹治水之後。冰能因其舊跡而疏廣之。今縣西三十三里。雙尾堰。索橋有李冰祠。按卽崇德廟也。宋扈仲榮仕爲監永康軍。崇德廟卽此。○范石湖離堆詩序云。沿江兩崖中斷。相傳秦李冰鑿此以分江水。上有伏龍觀。是冰鎖孽龍處。蜀漢水涸。則遣官致祭。壅都江水以自足。謂之攝水。民祭賽者。率以羊歲。殺羊四五萬計。其詩云。殘山狼石雙虎臥。斧跡鱗皴中鑿破。潭淵油油無敢唾。下有猛龍拴鐵鎖。自從分流注石門。西州秬稻如黃雲。剗羊五萬大作社。春作伐鼓蒼煙根。我昔官稱勸農使。年年來激西江水。成都水米不論錢。絲管相隨看蠶市。○水經註曰。江水由瀾壩江入郫江。檢江以行舟。益州記曰。江至都安。堰其右。檢其左。其正流遂東。郫江之右也。因山頽水。坐致竹木。以溉諸郡。又羊摩江。灌江西於玉女房下。作三石人於白沙郵。郵在堰官上。立水中。刻要江神。水竭不至。盛不沒腰。是以蜀人旱則藉以爲溉。雨則不遏其流。故記曰。水旱從人。不知饑饉。沃野千里。世號陸海。謂之天府也。俗謂都安之堰。亦曰瀾堰。又謂之金堤。左思蜀都賦云。西躡金堤者也。諸葛亮北征。以此堰農大國之所資。以征丁千二百人主護之。有堰官。李膺記云。玉女房鑿山爲穴。深數十丈。中有廊廡堂室。屈曲殆若神功。非人力矣。○蜀志後主登觀坂看汶江。旬日始還。成都華陽國志。益州刺史皇甫晏至都安屯。

兵觀坂從事何旅曰。今所安營地名觀坂。上反在下。其徵不祥。不從。果爲牙門張和所殺。○隄堰志曰。粵自神禹導江正源。至石紐。出汶川而南。其北無水。秦昭襄王時。蜀守李冰鑿離堆虎頭於江中。設象鼻七十餘丈。首闊一丈。中闊一十五丈。後一十三丈。指水一十二座。大小釣魚護岸一百八十餘丈。橫瀦洪流。故曰都江堰。以分岷江之水。北折而東。灌溉蜀郡田疇。以億萬計。蜀用富饒。號稱陸海。於所逼處。又設護岸。蓋籠石附岸。水不蠹土。而渠可堅久。指水數十餘處。如象鼻狀。以扞之。皆冰之所作也。都江口舊有石馬埋灘下。凡穿洶必以離堆石記爲準。號曰水則。其下洶深二丈二尺。而水則下亦深七八尺。石渠水口。橫一丈五尺。從一百二十丈。深六尺。石洞水分爲三。曰灌田水口。橫一丈。從一百二十丈。深六尺。曰彭州水口。橫三丈。又分爲二。其一從十有五丈。深五尺。其一從四十丈。深三尺。曰將軍橋水口。橫二丈三尺。從四十丈。深三尺。外應水口。橫四丈。從一百四十丈。而中分之。上流深六尺。下流二尺。保堂水口。橫一丈五尺。從一百三十丈。深四尺。倉門水口。橫八尺。從五十丈。深二尺。馬騎水口。橫六丈。從二百九十丈。深二尺。鼓兜石趾水口。橫二丈五尺。從六十丈。深二尺。東穴水口。橫三尺。從一百五丈。深五尺。投龍水口。橫五丈。從八十丈。深三尺。北水口。橫四丈。從一百八十丈。深三尺。鐵溪水口。橫一丈。從六十丈。深三尺。擗下水口。橫五丈。從一百二十丈。深三尺。五徙水口。橫三丈。從六十丈。深一尺。歲以爲度。過與不足。其害立見。由漢以來。數千百年。或因舊葺治。或因時疏築。而功實原於秦守冰。故歷代廟祀之。所謂馬騎水口者。東南六七里。間有堤名上馬騎。下馬騎。各長二百餘步。世傳冰駐馬於此。督工。後訛以騎爲隄也。○宋史曰。沫水出

蜀西徼外。今陽山江。大阜江皆爲沫水。入西川嘉眉蜀益間。夏潦洋溢。必有衝決。可畏之患。自秦李冰鑿離堆以分其勢。一派南流于成都。以合岷江。一派由永康至瀘州。以合大江。一派入東川。而後西川沫水之害減。耕桑之利溥矣。阜江支流迤北。曰都江口。置大堰。疏北流爲三。曰外應。溉永康之導江。成都之新繁。而達於懷安之金堂。東北曰三石洞。溉導江與彭之九隴。崇甯濛陽。而達于漢之雒。東南曰馬騎。溉導江與彭之崇甯。成都之郫溫。新都。新繁。成都。華陽。三流而下。派別支分。不可悉紀。其大者十有四。自外應而分曰保堂。曰倉門。自三石洞而分曰將軍橋。曰灌田。曰雒源。自馬騎而分曰石趾。曰鼓兜。曰道溪。曰東穴。曰投龍。曰北。曰樽下。曰五徙。而石渠之水。則自離堆別而東。與上下馬騎乾溪合。凡爲堰九。曰李光。曰膺村。曰百丈。曰石門。曰廣濟。曰顏上。曰弱水。曰濟。曰導。皆以隄攝北流注之東。而防其決。離堆之南。實支流。故導以竹籠石爲大隄。凡七壘。如象鼻狀。以扞之。離堆之趾。舊鑿石爲水則則盈一尺。至十而止。水及六則。流始足用。過則從侍郎堰減水。河泄而歸諸江。歲作侍郎堰。必以竹爲繩。自北引而南。準水則第四以爲高下之度。江道旣分。水復湍暴。沙石填委。多成灘磧。歲暮水落。築堤壅水上流。春正月役工濬治。謂之穿洶。有碑刻。熙甯制書云。凡創水磧。有妨灌漑民田者。以違制論。○元史曰。蜀堰舊爲李冰作。歷數千百年。所過衝崩蕩嚙。又大爲民患。有可以故事。歲至隄防。一百三十有三。所役兵民多者萬餘人。少者千人。其下充數百人。役凡七十日。不及七十日。雖事治不得休息。不役者日出三緡爲庸錢。由是富者屈於貧。貧者屈於力。上下交病。會其費。歲不下筮萬緡。大抵出於民者。什九藏於吏。而利之所及。不足以償

其費元統二年僉四川肅政廉訪司事吉當普巡行周視得要害三十有二處餘悉罷之召灌州判官張弘計曰若甃以石歲役可罷民力可蘇弘遂出私錢爲小堰堰成暴漲不動乃具白行省及蒙古軍七翼之長郡縣守宰下及鄉里之老各陳利害咸以爲便於是徵工發徒卽都江舊蹟而治之鹽井關限其西北水面闊據其西南分江導水因勢濬堰以鐵六千斤鑄大龜貫以鐵柱鎮其江源然後諸堰皆甃以石範鐵以關其中以桐油石灰雜麻絲搗熟密苴罅漏岸善崩者築江石以護之上植楊柳旁種蔓荊櫛比鱗次賴以爲固所至或疏舊渠以導其流或鑿新渠以殺其勢遇水會則有石門泄蓄自是水利省臺上其功詔揭奚斯記之是役石工金工皆七百人木工二百五十役徒三千九百蒙古居二千糧千石有奇石材萬餘灰六萬餘斤油半之鐵六萬五千斤麻五千斤共四萬九千有奇緡工畢官積餘二十萬一千八百緡責灌守以貸于民歲取其息以備祭祀洵灘修堰之費仍免灌之兵民常役俾專力堰事焉○舊經云太初蜀王征西番野人以壺漿爲獻王使投之江中三軍飲之皆醉因名味江寰宇記云味江水出青城長樂山下江中有大石高數丈號大坎又有小石在其下亦高數丈爲小坎水激其上洶湧聞于數里古老傳云味江水甘美人爭飲之因名青城外史云卽今漩口江也江口石有名大險小險或卽坎之轉音大坎石磴逶迤其傍深林老樹猿猴壘壘掛樹間春夏水至則沒路矣○水經註云都安縣渡江有笮橋按所謂索橋溜笮皆其遺制也唐獨孤及笮橋贊曰相引一索人綴其上如猿之縛轉帖入淵如鷲之落尋槿而上如魚之躍頃刻不戒實無底壑志云縣西二里有橋曰珠浦卽索橋也其制兩岸塹石爲

穴。斲石爲籠，夾植巨木，屹砥湍流，縹竹繩跨江，橫闊一丈，離水面五尺，長百二十丈，方輿勝覽云：繩橋前  
有翠園山，山上道院古，王仙柯燒丹之處，在永康縣西八里，范成大過青城題索橋詩：織篋勻鋪面，排繩  
懸架空，染人高躡帛，獵戶遠張罾，薄薄難承雨，翻翻不受風，何時將蜀客，東下看垂虹，志云：溜箛橋在縣  
西六十里，兩岸石柱以竹繩橫牽，斲木爲箛，狀似瓦覆，繫繩上渡者，以麻繩縛懸箛下，仰面緣繩而過，南  
通滋茂鄉，與汝川界，今易爲繩橋，古今集記云：縣西十餘里有虛閣棧道，二十五里有石筍閣道，三十  
里龍洞閣道，○碑目云：距紫屏山二里許，道旁有漢石刻三，皆治道記也，其一曰：建平五年孝哀時刻也，  
其二曰：永平元年孝明時刻也，在范公平磨崖之西，○成都記云：古魚鳧國，治導江縣，寰宇記曰：導江縣  
本都安縣地，太康地志云：都安劉先主置，屬汶山郡，周武帝併入益州之郫，別於灌口，置汶山縣，唐武德  
元年改爲盤龍縣，尋改爲導江，李膺記云：山土色黃，盤迴有龍形，故曰盤龍，外史云：盤龍山不言所在，今  
學宮之右有金龜山，壤黃而形蜿蜒者是也，○志云：導江廢縣在東二十里，導江舖元爲巡檢司時，土城  
尙在，今悉平爲田，初孟蜀改導江爲灌州，宋改永康軍，尋廢，熙寧七年，趙抃知成都，乞復永康軍，嘉定二  
年，知軍虞剛簡上五事，曰：本軍近接威茂，并青城一帶山，不五七十里，卽是夷界，唐吐蕃入寇，自此途出，  
又距成都百二十里而近，其爲緊切，甚于雅黎，○方輿勝覽云：玉壘堂，致爽軒，俱在軍治，范至能詩：夕陽  
塵外漲郊墟，六六峯頭夢覺餘，竹色喚人來下馬，亂蹕深處有圖書，陸務觀和云：黃塵赤日汗沾襟，竹裏  
煎茶喜有餘，堪笑放翁窮意巧，就君池館讀君書，子焯和云：闐闐竹色遶郊居，勾引清風百畝餘，憶昔敵



門蘇內翰。而今下馬范中書。○紀勝云。廣莫亭在軍北朝天門。太守呂汲公建。李壁記曰。危簷飛檻。負城四出。觀覽之勝。甲于東南。出金馬門。過朝天寺。登廣莫亭。憑欄下視。一目千里矣。又有花洲在軍城南百步。王子俊爲賦。魏華父說。○碑目云。唐貞觀十三年。韋作觀魚記在軍城五里北山朝天寺。又云。唐人徐浩書金剛在經導江天宮院。今刻之石。又云。導江縣北迎祥寺鐘樓內有刻字。不記年月。觀其有節度押衙字。卽爲唐末五代間刻也。寺有老泉爲記。東坡書碑刻俱存。○志云。縣西二里崇德廟。李文饒鎮蜀時重建。段全暉爲記。廟內有八分書聖水池碣。近年掘地得之。移入成都墨池。按方輿勝覽。聖水池在永康縣西一舍妙真觀。觀昔有女子上昇仙洞。藥爐尙存。不知碣何以在崇德廟。○碑目云。唐吳行魯碑在導江縣北。闔雞臺有古碑刻。字畫磨滅。蓋唐大中十一年治隸彭州時。吳爲長史所建。又云。僞蜀王建宗子嘉王宗壽與館一院僧卯往來。書劄二十餘簡。存于龍門院。墨迹宛然如新。按張商英龍門院本末記。院在永康縣六里。青城大面三十六峯。嵯峨萬仞。盡在軒檻間。其詩云。四時積雪瞻岷嶺。三派飛泉出洞天。卽此地。○寰宇記云。司馬相如墓在導江縣東十里。又有楊妃池。今爲唐氏之居。按太真外傳。楊元琰爲蜀州司戶。生貴妃於此。妃兒時嘗誤墮此池。志云。在縣東二十里。今爲丘。洪二姓宅。○陳後山云。王蜀花叢。天人姓費氏。青城人也。圖經相傳。有花叢舊宅。不知其處。費氏尙有裔存。詳見詩話。○方輿勝覽云。蠶崖關在導江縣五十里。以振西山之走集。外史云。關去縣二十里。實汶川地。有巨石高丈餘。峙山之麓。土人云。此蠶崖石也。關以此得名。志云。關當縣西岷江之北。松茂驛路之衝。周武天和二年。剋立石路。巉稜

如簇蠶。因名。杜少陵詩。蠶叢鐵馬瘦。灌口米船稀。卽此。宋熙甯五年重建。元末燬於兵火。今置巡司。關外有市。謂之蠶崖市。宋史韓忠憲公子緡繼知成都日所遷。以爲夏夷互易之地。蓋絕西羌窺伺之端云。金部格日勅。松當悉維翼等州。熟羌每年十月已後。卽來彭州互市。法司差上佐一人於蠶崖關外依市法。至市場交易。勿令百姓與往還。○志云。玉壘山去縣三百里。衆峯叢擁。遠望無形。惟雲表崔嵬稍露。山石瑩潔。可爲器。亦碇硠之類。唐貞觀。關於其下。名玉壘關。亦曰七盤關。乃番夷往來之衝也。○碑曰云。玉壘關。碑唐大中十年。白敏中帥蜀日建。關旁有大碑。卽幕府陳可度頌功德之碑。岑參酬崔十三侍御登玉壘山思故園見寄詩。玉壘天晴望。諸峯盡覺低。故園江樹北。斜日嶺雲西。曠野看人小。長空共鳥齊。高山徒仰止。不得日攀躋。崔信明送金敬陵入蜀詩。金門去蜀道。玉壘望長安。豈言千里足。方尋九折難。西上君飛蓋。東歸我挂冠。猿聲出峽斷。月影落江寒。從今與君別。花月幾新殘。○李膺益州記云。齊永明初。置齊基縣於青城山東。築土城。週五里。周地圖記云。武帝改齊基爲青城縣。因山名也。志云。廢青城在今縣西四十里。散入大樂。其亭二鄉。○名山記曰。益州西南青城山一名青城郡。山形似城。其上有崖舍赤壁。張天師所治處。南連峨眉。亦有洞天。諸靈書所藏。不知當是第幾洞天也。○玉匱經曰。青城山爲第五大洞。寶仙九室之天。一名赤城山。對蜀郡之西北。在岷山之南。杜光庭記云。岷山連峯接岫。千里不絕。青城乃其第一峯耳。高三千六百丈。周匝五千里。靈仙所宅。祥異則多。於是有瑤林琪樹。金沙玉田。甘露芝草。天池醴泉之異焉。瀛地記。中國名山以青城。峨眉爲西嶽。佐理。又三佐命山及十大洞天。皆有青城之

名。○楊用修蜀志補鱗云。青城山有一百八景。風日佳時。登儲福宮望之。歷歷可數。曰彭祖峯。曰石鑿峯。曰龍牙峯。曰野雲溪。曰藏雲塢。曰齊雲榭。曰垂虹亭。曰捎雲閣。曰觸石軒。曰臥雲庵。曰青溪。曰碧桃溪。曰芙蓉溪。曰躑躅溪。曰海棠溪。曰溪光亭。曰過溪橋。曰乳泉。曰滴珠泉。曰檻泉。曰清風湖。曰鑿湖。曰荻花洲。曰蓼嶼。曰碧霞洞。曰斜川。曰曲水。曰紫霞洞。曰鑿橋。曰藥圃。曰紫薇洞。曰醴醴洞。曰清陰橋。曰綠篠橋。曰玉微亭。曰紅霞塢。曰爛柯亭。曰灌稻泉。曰翠光亭。曰茅堂。曰紫陽洞。曰桃源。曰暗香亭。曰金華堂。曰舸齋。曰蕙谷。曰黃梅嶺。曰煎茶溪。曰芹浦。曰鸚鵡林。曰葦廬。曰野人澗。曰柘坪。曰寶遂社。曰妙高峯。曰娑羅坪。曰木蘭岫。曰桂香亭。曰石寶。曰白蘋洲。曰漢壑。曰望岷嶺。曰豹谷。曰百花潭。曰鹿關。曰瑞香嶺。曰芝畦。曰瑞荷塘。曰蒹葭渚。曰黃浦。曰菱灣。曰芭蕉谷。曰直釣亭。曰和芳隴。曰金根徑。曰橘徑。曰鑿雉泓。曰芙蓉島。曰歲寒洞。曰葦杭。曰樓真洞。曰望仙坡。曰黃葵坡。曰鳳簫樓。曰跨鳳亭。曰牛關。曰馭鶴峯。曰化城洞。曰望闕臺。曰凝碧溪。曰玉女潭。曰寶陀巖。曰尊坡。曰藏春島。曰桂子谷。曰九曲池。曰華海。曰江梅島。曰水仙匯。曰荇荷岡。曰丹臺。曰浴丹池。曰曝藥臺。曰芳草渡。曰采薇汀。曰金絲堤。曰菖蒲谷。曰種茶巖。凡一百有八也。○唐歌漳送崔明府赴青城縣詩。清冬賓御出。蜀道翠微間。遠霧開羣壑。初陽照近關。霜潭浮紫菜。雪棧繞青山。當似遺民去。柴桑政自閒。錢起賦。得青城山送楊杜二郎中赴蜀軍歌。蜀山西南千萬重。仙經最說青城峯。青城嶽鑿倚空碧。遠壓峨眉吞劍壁。錦屏雲起易成霞。玉洞花明不知夕。星臺二妙逐王師。阮瑀軍書王粲詩。日落猿聲連玉笛。晴來山翠傍旌旗。綠羅春月營門近。知君對酒遙相思。岑參寄青城

龍谿免道人詩。五嶽之丈人。西望青霄。雲開露崖巖。百里見石稜。龍谿盤中峯。上有蓮花僧。絕頂小蘭若。四時嵐氣凝。身同雲虛無。心與谿清澄。誦戒龍每聽。賦詩人則稱。杉風吹袈裟。石壁懸孤燈。久欲謝微祿。誓將歸大乘。願聞開士說。庶以心相應。崔塗寄青城山顯禪師詩。懷師不可攀。師往杳冥間。林下誰聞法。塵中只見山。終年人不到。盡日鳥空還。曾聽無生說。應憐獨未閒。賈島送靈應上人詩。遍參尊宿遊方久。名嶽奇峯間。此公五月半。間看瀑布青城山。裏白雲中。宋紫微孫處士送青城丈人詩。深羨青城好洞天。白龍一覺幾千年。鋪雲枕石長松下。朝退看書盡日眠。趙抃入蜀先寄青城張遨先生詩。躡年青社得徘徊。一日皇華下詔催。蜀道五千馳驛去。秦關百二拂雲開。不同參政初時入。也似尙書兩度來。到日先生應笑我。白頭猶自走塵埃。又遊青城詩。三十六峯峻維岷。在蜀奇方行刺史部。重款丈人祠。凍雪諸蕃隔。晴雲大而披。訪仙窮寶洞。勅鬼覘豐碑。泉落寒崖響。蘿依古木垂。良工存舊筆。老叟琢新詩。陟險齊雙屐。逢幽鼓七絲。盤桓不忍去。還作更來期。范成大青城山詩。萬里清遊不暇慵。雙旌換得一枝筇。來從井絡直西路。上到江源第一峯。海內閑身輸我佚。山中佳氣爲人濃。題詩試刻巖前石。付與它年辭輩重。○李膺記云。入山七里。至赤石城。有羊馬臺三師壇。上五里。至瀑布水澗。二百步。有二石梯。有一石筓。高三丈。過二石門。絕崖數百丈。下起常道觀。高峯下有水。六時灑落。東北有二石室。名龍宮。可容百餘人。從龍宮過石室。至石梯。名龍橋。又有一石梯。洞穴深邃。莫知所極。西北有石室。宛然見存。又有黃帝壇。石法天地。上圓下方。闊一丈二尺。有十二角。觀東石刻日月。各闊五尺。厚一尺二寸。相對。柱上烏兔輝燦。方圓磅

壺可觀。○五岳真形圖云。洞天所在之處。其下別有日月分精以照其中。龍橋處二山相去百餘步。峯巒危竦相對。橋在峯首。橋之半漸漸促。小可六七寸。長一丈五尺。兩邊懸崖俯臨不測。山傍有誓石。天師張道陵與鬼兵爲誓。朱筆畫山。青崖中絕。今驗斷處石並丹色。闊二十丈。深六七丈。望之絕然也。○青城甲記。黃帝封青城山爲五嶽丈人。乃嶽瀆之上司。真仙之崇秩。一月之內。羣嶽再朝焉。續博物志。青城縣歲春秋以蔬饌享丈人山。令躬行禮。蓋蜀之望山也。有丈人觀在青城北二十里。碑曰云。丈人觀四碑。大殿右功德碑。鄭敖書。殿上祝文。碣。進士任璠文。三門下置觀碑。徐大亨文。三門右紀符瑞碣。甘遺榮八分書。杜甫詩云。自爲青城客。不唾青城地。爲愛丈人山。丹梯近幽意。丈人祠西佳氣濃。綠雲凝住最高峯。掃除白髮黃精在。君看他時冰雪容。李真六言詩。春凍曉躡露重。夜寒幽枕雲生。豈是與山無素。丈人著帽相迎。眞蓋唐末仙人也。陸游謁丈人觀詩。黃金篆書榜朱門。夾道巨竹屯蒼雲。巖巔劃若天地分。千柱眈眈壓其根。纓冠笑謁丈人君。廣殿空庭吹寶薰。摩挲畫牆手爲皺。異哉山藥與土贖。物怪醫醫冠丘墳。僊人佩玉雜悅怱。手整貂冠最不羣。欲去不忍恨日曛。道翁採藥晝夜勤。松根茯苓獲兼斤。人芝植立強骨筋。狗杞羣吠聲猶狺。山爐小甌炊幽芬。朱顏不飲常自醺。我亦宿誦五千元。一念之差墮世紛。逝將從翁走如塵。隱書祕訣何由聞。又題丈人觀道院詩。斷雲浮月磬聲殘。木影如龍布石盤。偶駕青鸞塵世窄。閑吹玉笛洞天寒。奇香滿院晨炊藥。異氣穿巖夜浴丹。却笑飛仙未忘俗。金貂猶帶侍中冠。按務觀二作多詠。范長生事。其劍南詩藁云。青城山有孫太古畫。碧落侍中范長生。舉手整貂蟬像。特妙其詩。又有浮世深。

沉何足計。丹成碧落瑤蟬之句。○方輿勝覽云。碧落觀卽長生觀。在青城縣北二十里。昔有范寂字無爲。劉先主時。棲止青城山中。以修煉爲事。先主徵之不起。就封爲道遙公。得長生久視之道。劉禪易其宅爲長生觀。觀有古耜。高數十尋。圍三十尺。世傳長生手植。胡叔豹詩。更斷盤根藏大藥。也。令嘉樹得長生。卽此。觀有赤城閣。臨眺甚遠。外史云。唐明皇登青城。於長生觀駐輦。故志謂長生是元宗別殿。雖就傾圮。遺砌儼然。唐求長生觀詩。數里綠山不厭難。爲尋真訣問黃冠。苔鋪翠點仙橋滑。松織香梢古道寒。晝傍綠畦薜嫩玉。夜聞紅竈燃新丹。鐘聲已斷泉聲在。風動茅花月滿壇。○乙記云。上清宮。上皇殿。延慶宮。皆明皇幸蜀時造。吳船錄云。上清宮在最高峯之頂。以板閣插石作堂殿。下視丈人峯。直牆堵耳。岷山數百峯。悉在欄檻下。如翠浪起伏。勢皆東傾。孫知微詩。臺殿壓平青。嶂頂松杉插破白。雲根者此也。勝覽云。朝起天宮於高臺山。丈人祠側。號曰上清宮。其東北麓卽天師種粟之處。上有天池。夜則神燈飛行。遍空。或謂草木之精所爲。王叔瞻詩。神燈點點光可燭。星斗熒熒低欲捫。卽此。宮庭又出瑞聖花。見方物記。○晉時又於丈人峯前。建上皇觀。蜀志補罇云。亦名元真觀。神芝異草。嘉樹名花。皆生於此。芝草如稻苗。食之可仙。唐章孝標上皇觀詩。煙霞星蓋七星壇。想像先朝駐禁鑾。輦路已平栽藥地。皇風猶在步虛壇。樓臺瑞氣晴蕭索。杉檜龍身老屈蟠。翻感惠休并李郭。劍門空處望長安。○延慶宮卽常道觀也。勝覽云。自會慶宮西行一二里。有常道觀。乃古黃帝祠址。隋建。甲記云。大業七年。太常博士陰道碑在常道觀。軒轅石龕下。軒轅臺獨秀。霞表下望衆山。若蟻垤連抱之樹。若薺志云。石龕今呼天師洞。有張天師像及唐碑。

字畫完好可揭。碑文曰：勅益州長史張敬忠。頃者西南阻化，僭役殷繁，山川既接於夷戎，縣道有勞於轉輸。自卿鎮撫，百姓咸安，革弊遷訛，良多熨沃。歲陰寒極，比安好。今賜卿衣一副，至領之。蜀州青城先有常道觀，其觀所置元在青城山中，間有飛赴寺僧奪以爲寺。州既在卿節度檢校，勿令相侵。觀還道家，寺依山外舊所，使道俗兩所，各有區分。今使內品官王懷景、道士王仙卿往蜀川等州，故此遺書指不多及。右勅明皇行書開元十二年歲次甲子閏十二月十五日下午，十三年正月一日至益州，二日至蜀州專檢校移寺官節度使判官彭州司倉參軍楊壽蜀州刺史平嗣先青城縣令沈從簡常道觀主白遺榮勒字右款八分書。碑目云：延慶移觀手詔碑在觀後絕峯之上。石龕中韓擇木八分書。記銘在延慶靈寶真人五符幢下。俱開元十二年立。志云：延慶觀亦名昭慶，文與可昭慶觀詩：琳崖盤玉霄，彩翠接步武，雲霞不可畫，泉石固難譜。神幢逾百尋，帝輶歷萬古。靈瀑誰與窮，長飛六時雨。所謂神幢卽五符幢也。○碑曰：唐元宗眞容碑在六時巖下。按志：明皇像亦在天師洞，或以爲孟景像也。錄異記云：六時水在宗元觀南二里，對觀有峭厓高百餘尺，五厓上授道壇，昔甯眞君與軒轅帝傳道之所。每日六時有自然水從厓上灑入澗底，有石甕刻元宗皇帝御容，勝覽云：常道觀南有六時水云：六時灑水以代晷漏，陰時卽飄然而灑，陽時則無。呂汲公詩：巖輝萬古照泉漏，六時飛京鏡詩：八千里隔東西境，十二時分晝夜泉。卽此。又有石日月，日在延慶觀東北，月在溪西崖中，並徑五尺六寸半，一曰石天地，天形有十二角，地形正方，闊六七尺，或云卽誓鬼壇也。○方輿云：鬼城山在丈人觀西北，又云：常道觀北有張天師誓鬼壇，志云：漢時龍穴出。

水暴害禾稼。張道陵立石臺以鎮之。名誓鬼臺。甲記曰。壬子七月十三日。鬼城山崩。瀑水大至。山高百餘丈。丈人觀居其下。將憂摧壞。俄有大石墜下。堰水向東。竟免漂陷。初觀中資溪水日用。負汲爲勞。自瀑水之後。流泉直注。廚下甘美不竭。碑曰云。昔天師自鬼城山驅鬼於絕域。有鬼界古碑。字畫磨滅。不知年代。又云。天師戒鬼筆迹在大龍橋側。深一十三丈。闊十三丈。○輿地紀勝云。清都觀在延慶上二三里。一名洞天觀。唐道士薛昌浴丹井。杜光庭墓。俱在觀後。薛昌卽飲昌陸酒得道者。文潞公鎮蜀日。市觀側隙地。以贈張翥。所謂白雲隱居也。其下白雲溪出焉。任宗易詩。懶隨六詔上。丹闕高臥一峯藏。白雲少愚自題云。欲作外臣誰是友。白雲孤鶴在巖扉。○杜廣成曰。延慶觀南天倉山。神仙以爲帑庫。有三十六峯。前十八曰陽峯。後十八曰陰峯。河圖括地象。白沙一百八景。青城二十六峯。謂此也。晁公遡詩。天峯夜半翦冰花。三十六峯如玉立。趙雄詩。三十六峯如不到。青城還似不曾遊。○勝覽云。天倉下儲福宮。有唐睿宗女玉真公主像。宮有天峯閣。望三十六峯如列屏。沈少南詩。割盡齊封奉魯元。更開泌水占名園。何如帝子空山外。落日騎驢芳草原。胡叔豹詩。弄形如遺但養神。阿兄爛醉梨園春。人百撼之耳不聞。何物女子乃獨醒。徑來空山臥白雲。不見漁陽胡馬塵。文同天倉山威儀觀詩。羣峯削瓊瑤。老薜抹古綠。應朝大岷去。簪笏儼相逐。珠宮祕仙仗。錦笈藏寶錄。上帝此爲倉。其田堪種玉。○蜀構机咸康元年九月。王衍與其母太后太妃同禱青城宮。人卑從皆衣雲霞之衣。衍自製甘州詞。令宮人歌之。住山中旬日。設醮祈福。太后太妃又謁王先主鑄像已幸丈人。元都二觀及金華宮。夫人李舜絃隨駕詩曰。因隨八馬上仙山。頓隔埃



塵物象間。只恐西追王母宴。却憂難得到人間。○志云。金華在丹景。玉華在青城。陸游青城山夜登玉華樓木蘭花慢詞云。闕邯鄲夢境。歎綠鬢。早霜侵。奈華岳燒丹。青谿看鶴。尙負初心。年來向濁世裏。悟真詮。祕訣絕幽深。養就金芝九碗。種成琪樹。千林星壇。夜學步虛吟。露冷透瑤簪。對翠鳳披雲。青鸞遡月。宮闕蕭森。琅函一封奏罷。自鈞天帝所有知音。却過蓬壺笑傲。世閒歲月駸駸。○乙記云。青城有天國寺。玉匱經云。青城一名青城都。一名天谷山。谷音近國。即天國也。方輿勝覽。天國山在永康縣。左連大面。右連鶴鳴。前臨獅子。後枕大隋。上有龍池及融照寺。按即天國寺也。云是黃帝築壇封甯。封處未詳。唐真人張令問隱居於此。號天國山人。以詩寄杜光庭曰。試問朝中爲宰相。何如林下作神仙。一壺美酒一爐藥。飽聽松風清晝眠。山有玉女洞。亦曰素女碑。目隋刺史薛道衡磨崖碑在玉如洞後矣。五嶽圖曰。青城山七十二小洞。應七十二候。八大洞應八節。玉女其一也。元中記曰。青城洞穴分三孔。西北通崑崙。外史言有李氏好道。嘗率丁夫持炬賣糧入山下古洞。行三日至一大溪。不得涉而止。比出洞口石自合。迷不知處。○寰宇記云。聖母山高二千餘丈。週三十餘里。其南有深洞。在八大洞之數。傍便山高下。與青城相接。當吐蕃之界。谿谷深邃。夏積冰雪。所以限夷夏也。大面山在三溪北。杜光庭曰。前號青城。後曰大面。其實一耳。按此溪水色黑。又名黑水溪。雲笈七籤。隋褚聖母黑水溪人。悟達國師。題其居爲聖母院。山亦從而名之。宋時山中有二隱士。一曰譙先生。定字天授。建炎初召至揚州。留入講筵。不可。拜通直郎致仕。百三十餘歲。猶存。巢徑險絕。人不能到。先生數年。輒一出山前。人亦罕有見之者。一曰姚太尉平仲。字希晏。靖康初

在園城中。夜率將士攻賊營。不利。騎駿逸去。建炎初。所在揭榜。以觀察使召之。不出。淳熙間。有于丈人。觀道院見之。年近九十。紫鬚長委地。蓋皆得道於山中也。○錄異記。青城縣西北二里有老君觀。門東上有一泉。號馬跑泉。水味甘美。四時不絕。春夏如冰。秋冬反溫。昔老君與天真真人會真之所。其泉是老君所乘馬跑成。卽冲妙觀也。碑曰。冲妙觀記。杜光庭撰。○勝覽云。飛赴寺在青城縣飛赴山下。舊名昌聖院。乃唐左軍容使嚴君美捨宅。有四望亭。呂汲公詩。最勝西峯下。林梢四望亭。江山觀掌握。梁益布丹青。文陵州詩。平林露層巖。上獨置孤寺。羣仙馭飛駕。往往赴於此。風光幡影亂。日落鐘聲起。誰可謂詩豪。興來吟萬紙。○志云。香積山寺卽靈巖寺也。有瀑布及鷄骨禪師塔。卽周地圖之通靈山寺。又云。今縣東南四十里。承天寺有馬祖靈骨塔。高丈六尺。俗呼爲馬祖寺。有碑云。大歷間。靜照頭陀建雲峯道場。至宋宣和元年立石。○碑曰云。青城寶幢院記。元和十四年立。觀音院記。乾符二年立。改海晏寺記。中和二年立。俱在海晏殿中。○艾子云。蜀青城山老人村有五世孫者。道極險遠。生不識鹽醃。而溪中枸杞根如龍蛇。飲其水故壽。近歲道漸通。漸能致五味。而壽亦益衰。方與勝覽老人村在大面山之北。昔人避難其中。多享年壽。故名。或云。潛夫張不羣入山採藥。浹旬不返。見一叟致敬而問。答曰。本丞相范賢之裔。知李雄之祚不永。挈吾輩居此。爲終焉之計。圖經云。卽獠澤也。在青城北百三十里。昔諸葛亮遷羣獠於山下。故名。○碑曰云。獠澤水石記。在路次石門崖壁上。吳行魯大中七年。奉使巡邊行所鑄。按志。獠澤關在縣西南百

里。乃董卜胡通華捷徑也。○古今記云。老人村有牡丹坪。王漑序。謂有牡丹高數十丈。花開盈一尺。范至能詩。十丈牡丹如錦蓋。人間姚魏敢爭春。卽此。方輿勝覽云。牡丹坪者。自青城之長平山捫蘿而上。歷鳥道三十里許。有平阜數十畝。高樹蔽天。春深先花後葉。狀如芙蕖。香類牡丹。譙定天授。季浩太素。二先生隱其中云。



# 蜀中名勝記卷之七

## 成都府七

崇慶州

王勃送杜少府之任蜀州詩。城闕輔三秦。風煙望五津。與君離別意。同是宦遊人。海內存知己。天涯若比鄰。無爲在歧路。兒女共沾巾。宋之問送趙少府之蜀州詩。餞子西南望。煙綿劍道微。橋寒金雁落。林曙碧雞飛。職拜與方遠。仙成履會歸。定知和氏璧。遙掩玉韜輝。崇慶在唐稱蜀州也。○碑目云。天章雲篆。篆碑在蜀州。唐開元壽王清書。又云。蜀州刺史廳壁記。大歷年間作。以張柬之。鍾紹京。李峴。王縉。四公皆牧是州。故有四相堂。唐詩紀事云。貞元十四年。皇甫澈刺蜀州。時賦四相詩序云。居相位者。前後四公。謨明弼諧。遷轉歷比。願已無取。忝跡於斯。景行遺烈。嗟歎不足也。謹述其行事。詠其休美。庶將來君子知聖朝之德。云爾。○本志云。州治判官廨後池。卽罨畫池。趙抃有蜀倅楊瑜遊罨畫池詩。占勝芳菲地。標名罨畫池。水光菱在鑑。岸色錦舒帷。風碎花千動。烟團柳四垂。巧才吟不盡。精筆寫徒爲。照影搖歌榭。分香上酒卮。主人邀客賞。和氣與春期。○勝覽云。文潞公祠在判官廳。蓋公之父。在天禧時來作判官。令公受業於晉原大夫張錫之客任君。後爲立祠。○紀勝云。西湖在郡圃。蓋阜江之水皆導城中。環守之居。因循其餘。以爲湖也。范成大吳船錄云。蜀州郡圃內西湖極廣袤。荷花正盛。覓湖船泛之。繫纜脩竹古木間。景物甚野。

游宴繁盛。爲西州勝處。陸游劍南詩藁云。蜀人謂唐安有三千官柳。四十琵琶。故詩云。歸心日夜逐江流。官柳三千憶蜀州。致能詩云。閑隨渠水來。偶到湖光裏。仍呼水月舟。徑度雲錦地。誰云不解飲。詩已荷香。醉湖陰。玉蝸蟬。負立紅妝外。何須東閣梅。悠然自興思。驚風入午暑。水竹有秋意。采菱不盈掬。興與葦蘆會。遙知新津宿。魂夢亦清麗。○碑曰云。范公鎮留題在府城之太平院。范遊岷山過此。題紀院之經閣上云。熙甯八年三月遊青城間。四日趨峨眉。俱過此。與百世相見。百朋百嘉侍行。蜀郡公記。○志云。西南附郭龍門街是晉原縣治。寰宇記云。白馬江自晉原縣入新津縣界。卽杜甫詩曰。馬江寒樹影稀者。○碑曰云。蜀先主碑在晉原縣西南二里。唐房琯文。又云。唐開元碑。天寶八年立。在晉原常清觀。鮮于仲通文。○周地圖記云。晉原西五十六里。蠶頤山上有鹿市。百步平坦。諸山之鹿。日一聚於此。○寰宇記云。鶴鳴山在晉原縣西八十里。絕壁千尋。李膺益州記。張道陵登仙之所。嘗有白鶴遊其上。此與邛州交界。又云。臨邛故城。俗名公孫述城。益州記云。蓋李雄據蜀。李壽從梓柯引獠入蜀境。自象山以北盡爲獠居。臨邛舊縣。因茲置也。○志云。蜀州有東亭。杜甫和裴迪登蜀州東亭。送客逢早梅。相憶見寄詩。東閣官梅動詩興。還如何遜在揚州。此時對雪遙相憶。送客逢春可自由。幸不折來傷歲暮。若爲看去亂鄉愁。江邊一樹垂垂發。朝夕催人自白頭。○志云。東三十里江原鎮。卽漢江原縣治。華陽國志。江原縣郡西渡大江。濱汶井江水。經云。汶井江亦李冰所導。井上有守捉。三十里上有天馬祠。李膺益州記。甯州有馬元河。河邊牧馬產駿駒。一日千里。至此斃乏。岸南人爲立祠于此。水經註。小亭山有天馬冢。是也。○寰宇記云。鄆江出夔

金一名卓里水。自永康軍青城縣百丈水南流入江源界。志云。卓江逕江原至新津入河。昔張道陵投墨於江。其水盡黑。故名。卓江有北橋。杜甫詩云。望極春城上。開筵近鳥巢。白花簷外采。青柳檻前梢。池水觀爲政。廚煙覺遠庖。西川供望眼。唯有此江郊。○勝覽云。杜工部祠在江原縣。邑宰趙抃建。昔杜甫依高適寓於此。○寰宇記云。公孫述女冢在江原縣東一十三里。高三丈。周迴二十步。故老傳云。此冢銅作綬絡五里。故亂離發掘。莫之陷也。○碑目云。唐李百藥碑在江原縣之萬歲寺。唐樊知遷碑在江原縣淨居寺。顏師古文。今俱殘缺。又云。唐太平公主出家勅在天慶觀。按魏了翁江原縣天慶觀雲層臺記略云。開禧三年春。蜀盜未平。江原道士呂元素語其徒曰。吾儕小人。羣居族食。無益縣官。今逆氛若此。又不能刺刀賊腹。誓首原野。壺姑杜門以需底定。乃相與梭藏書。見其書有爲九層之臺。可以爲民禳沴祝釐者。則用其法而封之。名以雲臺。列天地日月星辰岳瀆之象。而禱祠焉。○宋皇祐間。趙閱道爲江原令。其二弟揚抗與俱。有引流聯句序云。江源縣。江緣治驛址。而東距三百步。瀧湍馳激。朝暮鳴在耳。使人聽愛弗倦。遂畱渠通民田。來囿亭增廡間。環迴遶旋。溝行沼渟。起居觀遊。清快心目。公暇事休。與弟抗揚坐東軒。樂然盤桓。共爲詩章云。別派從江垠。邀流入農畝。淙淙來源深。纒瀾度溝淺。園穿蕭艾芟。塹斷荆榛翦。疏功狹長流。旣利千步遠。田觀疑澤瀦。坎聽類瓊建。北溟歸鑿池。幽岳漾裝巘。瀉界紋湍駛。迴濟珠細轉。過實石眼窺。經虛吐口吮。流行值落葉。浸長浮生蘚。孤鶴眼怪覘。纖魚鬣跳展。中沉無穢淤。底靜有紋喘。映葦色莫分。噴琴韻難辨。增霖人鬧蛙。涵月夜驚犬。侵篁鞭起萌。逼水抵垂菌。憐黃澆菊籬。惜紫沃蘭畹。吏治審

甃甃童戲芒車卷。灌漑合手勞。漱掬致腰俛。庭秋臨加涼。軒夏向消焜。我矜近濟能。僮賀遙沒免。貯肥理巨甌。歸廚架修篲。供淘飯盞糧。給澳羹鼎嚮。調藥修舊餌。翦茶試蘿薜。坐客頻泛觴。蹲兒屢洗硯。聆寒心脫煩。挹冷酒除面。閒眺筇步隨。靜看髭吟然。高懷造文摠。清興團詩遣。瑰章非俗成。怪句自幽選。湧詞波翻瀛。綿意緒抽繭。書丹字隸行。款碣石磨琬。題爲引流篇。記耳非自銜。

新津縣

張天覺以古三墳書得於縣北陽民家。墳皆古文。傳乃隸書。天覺新津人。○范成大新津道中詩。雨後郊原淨。村村各好音。宿雲浮竹色。清溜走禮陰。曲沼擎青蓋。新畦藝綠針。江天空闊處。不受暑光侵。予以萬歷庚戌過此。詩云。結束爲津口。分明作秀顏。雪峯俱暎水。天社舊名山。客自荆吳外。民其邛蜀間。昔賢有佳句。磊落動人寰。壬子歲再過此。詩云。風日何淒緊。予行在仲冬。平林煙已盡。近郭渡猶重。古市沙中火。僧樓水際鐘。東西雖不辨。彷彿認前峯。蓋指修覺山也。○志云。南一里修覺山。神秀禪師結廬於此。唐明皇駐蹕爲題修覺山三字。寺有左右二井。春夏汲東。秋冬汲西。水則甘冽。反之則否。名曰林泉。殆靈泉云。其下爲三江渡。因岷江。阜水。白馬。三江並列而名。其上爲寶華山。橫跨江表。俯瞰平川。取物華天寶之義也。峯頂多雪。又名雪峯。杜甫新津寺寄王侍郎詩。何限倚山水。吟詩秋葉黃。蟬聲集古寺。鳥影度寒塘。風物悲遊子。登臨憶侍郎。老夫貪佛日。隨意宿僧房。又遊修覺寺詩。野寺江天豁。山扉花竹幽。詩應有神助。吾得及春遊。徑石相縈帶。川雲自去留。禪枝宿衆鳥。漂轉暮歸愁。又寺憶曾遊處。橋隣再渡時。江山如有



待。花柳更無私。野潤煙光薄。沙暄日色遲。客愁全爲減。捨此復何之。○志又云。南二里四安寺。亦神秀胤。杜甫暮登四安寺鐘樓寄裴十詩。暮倚高樓對雪峯。僧來不語自鳴鐘。孤城返照紅將斂。近市浮煙翠且重。多病獨愁常聞寂。故人相見未從容。知君苦思緣詩瘦。太向交遊萬事慵。○碑目云。唐開元皇帝送趙仙甫尊師歸蜀詩。碑見在新津縣寶真觀。○志云。南二里平岡。治下第八治也。上應參宿。蜀人李阿瞿君於此學道。有杜天師詩。○勝覽云。投龍觀在新津縣南六里。枕夜郎溪及白木水。上有龍穴。祈禱皆應。○又云。稠稷山在新津南八里。有草名稠稷。服之長生不死。上有丹竈。古碑宮闕。天池。軒轅帝於此得仙。中第四稠稷治也。上應危宿。○予友竟陵鍾伯敬遊修覺山記云。辛亥十月十有九日。早發新津。叔弟恬不知隔江者。爲何許山也。與童騎疾驅過之。予與艾子後坐舟中。指江干削壁千仞。竹樹榱桷。出沒晴嵐。雪浪外著。異焉問之。則修覺山。子美游修覺寺詩。明皇幸蜀。大書修覺山三大字。嵌石壁。今猶存者。卽其處也。決策登焉。所從徑。裏山之複者。爲磴。亂整枉直。各肖其理。登者屢憩。憩處每平。平處每當竹樹隙。隙處必從其下。左方見江。江錯積渚。或圓。或半。或逝。或返。去留心日間。土人縛竹爲亂。若童子置葉盆中。以度蟻。設身處地。頗危之。從上視下。輕且駛。甚適也。度磴去頂。可四五之一。行住坐立。更端者數矣。其傍乃有石級齒齒。蜿蜒壁間者。往修覺寺道也。曰姑舍是。尋中徑數折。上有亭翼然。祠杜工部。李供奉。蘇端明。方正學。方有石刻詩。可讀。亭後數武。爲寶華寺。禮佛畢。反自亭出山門。左行。竹樹純駁。夾砌。數折。卽修覺寺。寺前雙井。一井直一塔。唐物也。明皇書嵌佛殿左側巖壁上。字方廣三四尺。一字各專一石。飛翥沈著。

且甚完好。予入蜀所見唐碑獨此耳。出寺無所見。欲返寺。僧指石隙一小徑。才容足。出此徑。乃有平田大。陸。復緣磴數折上。蝨然。頽江者曰雪峯。兩寺乃在其下。始悟所云磴去頂四五之一者。第可指修覺耳。非此峯也。左眺稠稷山如旅行。而稍居其傍。下憑欄視江。則已正無所不見。不若初所見江之從其下。左方也。然從下上修覺去江稍遠。從修覺上雪峯視江。乃返近。舟中所指江干削壁者。卽著腳處也。降自雪峯。復遶井塔下。屈曲一二里許。不復見所由。寶華寺徑矣。乃忽得所謂石級齒齒壁間。往修覺寺道者。則今還道也。與初所從徑合。徑窮登輿。是日抵彭山宿。

茂州

史記曰南越破後。冉駹等皆震恐。請臣置吏。武帝元鼎六年。以冉駹爲汶山郡守。華陽國志。汶山郡有六夷。羌胡。羌虜。白蘭。蝮九種之戎。牛馬。旄毼。斑斕。青頰。髦毳。羊羖之屬特多。雜藥名香。土地剛鹵。不宜五穀。惟種菽麥。而多冰寒。盛夏凝凍不釋。故夷人冬則避寒入蜀。傭賃自食。夏則避暑反落。歲以爲常。蜀人謂之作五百石子也。○禹貢。岷山導江。註曰。江水出蜀西南徼外。東至岷山。而禹導之。郡縣志。岷山在茂州西北。最後。番曰。列鵝村。村有岷山。名曰鐵豹。一曰羊膊。則分水之水源也。一自西南入大渡河。一自正南入溢村。經石紐。過汝川水。經曰。岷山在蜀郡氐道縣。大江所出。東南過其縣北。又曰。江水自天彭關東。逕汶關。而歷氐道縣北。註云。岷山卽濱山也。水曰濱水矣。又謂之汶阜。天彭關亦謂之天谷也。秦昭王以李冰爲蜀守。冰見氐道縣有天彭山。兩山相對。其形如闕。謂之天彭門。亦曰天彭關。江水自此已上至徼窮。

荀卿曰：江水出於岷山，其始出也，其源可以濫觴焉。益州記曰：大江泉源始發羊膊嶺下，緣崖散漫，小大百數，殆未濫觴。東南下百餘里至白馬嶺，又自白馬嶺迴行十餘里至龍澗，又八十里至西陵縣，又西百二十里至汶山故郡，乃廣二百餘步。又西南百八十里至濕坂江，稍大矣。○河圖括地象曰：岷山之精，上爲井絡，帝以會昌，神以建福。古蜀謠云：汶阜之山，江出其腹，帝以會昌，神以建福。郭璞岷山贊曰：岷山之精，上絡東井，始出一勺，終至淼溟，作紀南夏。天清地靜，漢書註：岷山一名鴻冢，一名沃焦，在隴山南首，故稱隴蜀山，直上六十里，括地志云：中國山川東北流，其維首在隴蜀。正義曰：岷江發源隴山，東北流入渤涉，水經註：漢延平中，岷山崩，壅江水三日不流，揚雄自岷山投賦，江流以弔屈原，名曰反騷也。王羲之與周益州書云：想足下鎮彼土，未有動理，要欲及卿在彼，登汶領，義眉而還，實不朽之盛事。又與謝安書云：周益州書：述蜀山川如岷山，夏含霜，稜之所聞，崑崙之伯仲也。○山海經云：岷山神，馬首龍身，祠用雄雞，歷用黍，則風雨可致焉。郡國志：岷山俗謂之鐵豹嶺，陵陽李新詩：在昔岷峨神，龍文而馬首，卽鐵豹之形也。○華陽國志：宣帝地節元年，武都白馬羌反，使駱武平定之，因慰勞汶山，史及百姓詣武自訟，謂歲再度更賦，至重，邊人貧苦，無以供給，求省郡，郡建以來四十五年，武以狀上，遂省汶山郡，復置都尉。○唐茂州都督府壁記云：貞觀初，置羈縻州九，曰維、翼、笮、塗、微、向、冉、穹、維州，今威州，翼州，今疊溪，所笮以下，則皆白狗羌矣。其時一州所領，不過數十里而已。○寰宇記云：梁普通年，於此置繩州，取桃關之路，以繩爲橋也。繩橋之法，先立兩木於水中爲橋柱，架梁於上，以竹爲絙，乃密布竹絙於梁，繫於兩岸，或以大竹

落盛石。繫繩於上。又以竹繩布於繩。夾岸以木爲橋。繩緩則轉機收之。智猛法師所謂冰崖皓然。百千餘仞。飛繩爲橋。乘虛而過。窺不見底。仰不見天。寒氣慘酷。影戰魂慄是也。又有度索尋樁之橋。大江水峻極如箭。兩山之脊。繫索爲橋。中剝木爲樁。拴繫行人於上。以手自緣索到彼岸。則旁有人爲解其系。尤極危險。陸游詩。度索臨千仞。梯山躡半空。卽此。○方輿云。相公嶺亦名茂濕。州之主山也。州治內有雪峯堂。又有列岫堂。鄭徵列岫堂記云。九頂列於南。屏風臺盤列於西。巨人臺馳列於東。又有練光亭。王咨留題云。汶江自徼外東。繞汶川郡西北出。極目可百里許。每朝陽舒彩。夜月流天之際。一望水光。若萬丈長虹。天矯其上而吐吞之也。舊有亭曰觀瀾。據城之隅。不與景會。因取少陵賦。岷山池江圖。川蜺飲練光之句。以練光題其額云。○碑曰。唐刺史黃堂梁記。爲寶歷元年刺史竇季餘。大中三年刺史劉成師。咸通三年刺史蓋巨源題。又云。張延賞修城記。載唐大歷十四年吐蕃大下。火焚郊館。興元元年張延賞重修。其後別駕大夫修建城宇。堡壁雉堞。又云。唐迴車院碑。刺史蓋巨源撰。大中十三年立。又云。茂州治平寺碑。寺舊在外。緣叛羌董阿丹焚毀。元豐初移剏城中。○勝覽云。巨人山在州南三十里。山頭有石如人立。面南。元宗幸蜀時。以石人背立。勅令鞭之一百下。有九池。俗傳是九龍湫。其湫四山環遶百二十里。○又云。雞宗山在州西四十里。扼羌人出入之路。熙甯九年置鎮羌寨。按宋史熙甯九年。靜州楊文緒導番董阿丹作亂。聲援俱絕。至書木牌投於江以告急。朝廷遣內使王中正將兵旁出雞宗山擊之。文緒等伏誅。碑曰。云政和丁酉。倅貳跨蓋先生李新目擊靜州之變。記載其事甚詳。名更生碑。今在更生閣。○演繁露云。蘇易

簡言本朝使人使西番見有老人消縮如小兒伏梁上雞窠中乃其見在子孫九代祖也其說甚怪丙申十月十六夜寓直玉堂閣史見貞元間韋皋攻吐蕃其所攻州名有維保松及雞栖老翁城予欣然自笑曰易簡之說豈因此二城名而增飾之耶按寰宇記茂州西北至吐蕃栖雞城下或卽此處

### 汝川縣

華陽國志漢嚴季后爲汝江尉成都人仲昱少受學於季后及爲汝江以書呼昱昱許十月往會夷反斷道昱期必往經渡六十幾死數四卒得至汝江乃爲季后陳策俱得免難遠近欽之按漢武置汝山郡卽置縣曰汝江矣○水經註曰江水又逕汝江導汝出徼外岷山西玉輪坂下西南行又東逕其縣而東注於大江水經又云江水歷氐道縣北有湍水入焉註曰水出綿道亦曰綿鹿縣之玉壘山呂忱云一半浣水也下注江按汝川本漢綿鹿縣地矣○寰宇記云玉壘山在縣南三里又有玉輪坂其下汝水所經謂之玉輪江山出璧玉卽郭景純所謂玉壘作東列之標者○勝覽云七盤山去汝川縣九里志云卽玉壘關也賈島送元巖上人歸西蜀詩玉壘山中寺幽深勝槩多藥成彭祖搗頂受七輪摩去臘催今夏流光等逝波會當依糞掃五嶽徧頭陀○勝覽云慈母山在青城山東導江人馮大量與神仙相遇入隱此山外史云滋茂龍池在汝之尤溪萬山叢立中有方池周四十里廣幾百畝清水鏡開芳草四積眞靈境也登眞書云滋茂池龍一日慈姥在益州西南四百里有靈藥可以已疾山無毒害猶慈姥焉故曰母田況益州龍祠記云蜀之西山有池曰滋茂亦曰慈母以其能與雲雨救旱暵憐養百穀而名唐開元中章

仇兼瓊既得平戎城。夢一女子謂曰。我此城之龍也。今弃戎歸唐。願有以居我。章仇異之。表爲立祠。按總志。慈母山在縣南百五十里。昔有婦人引子采藥山中。虎負其子去。母逐虎不得。因長號而絕。見者哀之。曰慈母也。則其所載。又不同矣。碑曰云。滋茂池善應廟。張商英無盡處士文。其神或傳姓吳。或傳姓郭。頗有異同。○勝覽云。龍洞在牛溪鎮。入洞數步。向南石壁。有穴可通。無路可陟。掌洞道人附巨竹一枝於穴內。令遊人扳竹而上。可達龍池。○文同茂州汶川縣勝因院記云。絲玉壘南下過笮。迤西循阜江左折。越大平渡。行深入曲。無慮六十里。至茂之汶川。有地曰柘平。羣山卻立。大陸初露。畦廬增稻。杳遠空闊。披場帶麓。壤土鮮潤。景物瓌麗。人物純篤。就其佳處。有院曰羅漢。昔有頭陀德欽。戒操甚嚴。歲獵居久。其徒委散。是身獨在。常懼其所。將底墮落。願擇高行。屬以香火。得永康軍大中祥符寺僧義海者。付之。至惟簡師。凡五世也。惟簡性顛潔。所趣端慎。守僧律。作佛事。殫形晦面。不避風雨。遠近四衆。咸宗仰之。既至此地。乃圖崇飾。伐木鑄崖。大韓材礎。構廣廈。設尊像。儲祕典。納淨侶。凡所欲有。一一完具。殆逾一紀。功方方絕。以名上列。乃錫今號。庭堂虛敞。檐宇飄動。丹明碧照。續巖巖谷。誠歸嚮之福地。而莊嚴之道場也。惟簡余之邑人。遠來求紀其事。聞嘗謂余曰。青城諸峯。惟大岷最爲高厚。然丈人上清之望者。乃世俗之所能見。爾如吾所居。正向其面。脈絡表裏。披斂出沒。澗壑鉤蔓。巒嶺曲折。高林巨槩。巍岡險頂。晨霞夕靄。染漬輝耀。湍瀑淙激。禽蟲啼響。一日萬狀。無有窮極。鬼眼俱耳。不知厭倦。此方外清絕之境。世間奇偉之觀。而惟簡輒擅有之。山林之人所獲多矣。安得君之車馬。一至其地。以幸吾言之不誣。余聽其說。袞袞令人喜聞。

同視此身。若處泥窞。何時濯洗。以從師傲兀於其間哉。因命筆綴次其事。使歸琢諸崑石。遂以爲記云。熙甯二年十月十五日。

### 威州

漢徼外冉駹之地。蜀劉禪時。姜維馬中等討汶川叛羌。其屯兵之處。號爲姜維城。唐武德七年。白狗羌首領鄧賢佐內附。於姜維故城。置維州以統之。至上元之後。河西隴右州縣皆陷。吐蕃贊普更欲圖蜀。川累急攻維州不下。乃以婦人嫁維州門者。二十年中生二子。及蕃兵攻城。二子內應。城遂陷。吐蕃得之。號無憂城。外史云。古維州在今保縣之外。可八十里。其對面有無憂城。三面臨江。巋然峯頂。實諸夷之襟喉。中國之要塞也。李文饒籌邊樓故址存焉。今棄爲外徼矣。按僞蜀永平二年。改維川郡爲保甯縣。徙就中州城。卽今治也。州治後卽玉壘山。蜀後主觀瀾江至此。親書玉壘山三字於州署。其大盈丈。左有龍洞焉。瀾水自玉壘峽出而注爲泉。有魚長可徑尺。州人以爲神魚。無敢捕者。○本志云。州城原爲汶川縣址。城內之民。半屬汶川。城以外純屬汶矣。碑目云。鼓角樓記。唐維州軍事判官高測文。乾符五年十月十五日。維州刺史李光置。又云。天寶寺碑。唐咸通六年建。軍事判官陶師文。又云。伏波廟碑。咸通八年。左武衛兵曹參軍崔遂文。俱在維州。○張舜民畫墁錄云。凡自岷州趨宕州。沿水而行。稍下。行大山中。入棧路。或百十步。復出略崖。險豈不可乘騎。必步至臨江寨。得白江。至階州。須七八日。其所經。皆使傳所不可行。攷之山水秀絕。天下無有也。臨江寨上望一處。當大山中。西望雪山。日晃如銀。其高無際。出衆山上。居人曰。此雪

山佛居也。有獅子人常見之。非西域雪山。是蜀所記無憂城。東北望隴山。積雪如玉耳。

保縣

志云姜維築維州城。遂築下邑。其舊址在南溝之西。李德裕築無憂城。重築薛城戍。舊址在縣東葬墳壩。○又云縣四里。編戶七姓耳。通化鹽溪。已併入州。所存者玉山。箭上二里。皆番也。近亦叛去。按通化縣本唐咸亨二年刺史董弁招慰生羌置。小封縣在西蕃通鶴軍。垂拱二年城爲北蕃所沒。今置在威戎軍西。宋宣和加封西岳神勅詞云。維彼通化地。當西極。金天氏之分域也。卽隋之金川縣矣。今屬州爲通化里。○鹽溪縣。隋之定廉縣。與金川同置者。唐貞觀初改爲鹽溪縣。以村有鹽溪。民得採漉。今演化禪師所居之地。○玉山。夜靜恆有霞光。冉冉橫山前。東北半壁。天皆丹色。照林木如畫。至旦方滅。俗名爲筆架山。○箭上在縣東里許。一岡斗直而下如矢。曰箭嶺。又云箭上卽唐之守捉城也。亦不屬內地。



# 蜀中名勝記卷之八

## 成都府八

### 金堂縣

水經註云。新都縣有金臺山。水通於巴漢。以水出金沙。因以名山。蜀記云。金泉縣古有金船。沈江之東岸。銳底。民於水中往往見之矣。○寰宇記云。縣卽漢處士段翳宅也。輿地碑目云。段翳宅。治內天慶觀。是有段隱居。李真人二像。碑字磨滅不可讀。又云。如舜禪師塔銘。在金堂龍槐院。唐節度使杜悛撰文。○宋之問送楊六望赴金水詩。借問梁山道。嶽峯幾萬重。遙州刀作路。絕壁劍爲峯。惜別路窮此。留歡意不從。憂來生白髮。時晚愛青松。勿以西南遠。夷歌寢盛容。台階有高位。甯復久臨邛。宋勾龍行父送孫太冲詩。金淵春三月。桃李照城郭。石峽潁鯉魚。時時醉賓幕。○金淵志云。懷安叢爾國。而有雪峯月峽之勝。山之雄峙。從梁劍而來。江水洪深。自壩灌洛而至。晁公武作雨零堂記云。堂依雲麓。而中江縈之。氣象葱鬱。巖壑洶渚之美。映帶左右矣。○按中江在軍西北。源從漢州彌牟。洛水。毗橋等三水會爲一江。志云。東十二里曰前河。卽彌牟水。又三里曰後河。卽雒水也。碑目云。有幽州刺史牂柯太守漢張子陽墓。在沿江五里許。其碑表載順帝永建四年造。又云。放生記誓文。唐太和二年。令狐紉撰。亦在中江岸上。○圖經。懷安軍縣。二而鎮九。以縣而言。金堂爲大。以鎮而言。古城爲富。諺謂軍不如縣。縣不如鎮。舊縣在峽口。距東南四十

里鎮在北一里。下爲古城。河水由灌子灘入斜潭也。○志云。峽口相傳龍令所鑿。又云。金灌口東枕雲頂。南披峽口。水出山下。如岷江之狀。上有李冰祠。金川在其下流。稍寬平處。又云。金灌口之東有七織溪。白沙清流。文理如織。又有柳溪在舊縣南七里。常有柳葉從穴中出。○華陽國志。李冰導洛通山。洛水或出瀑口。經什邡。郫。別江。會新都大渡。志云。東南十里有大度鄉。漢書新都王恽有陰鷲。署大度亭長。初到日。有馬與繡被馳至。後爲郫令。行至蔡亭。有鬼夜見。稱其夫爲涪令之官。過此全家見殺。召遊徼按之。悉伏辜。而還其喪。時人爲之謠曰。信哉少林世爲遇。飛被走馬與鬼語。有廟在山麓。○志云。北十五里昌利山有石室三門。容數十人。俗呼爲三龍門。碑曰。唐昌利山有延祥觀。碑開元中金堂尉沛國武捷撰。○寰宇記云。銅盤山在西北二十里。北接雒縣。南接新都。山形如盤。洛水彌牟水毗橋水經此山下。合中江也。○名山志云。金堂三學山。乃漢州北山。一名雲頂。一名石城。亦名棲賢。開照。其實一山也。志云。東三十里三學山。李八百三度學仙於此。故亦名棲賢。其下隘口壁立千仞。惟一路可通人騎。謂之三學隘。寰宇記云。雲頂山舊名石城山。其狀如城。在縣四十五里。頂上平可十畝。有神泉方丈。澄清如照。雲霞常與。唐天寶六載改爲雲頂山。西幸略云。唐明皇至劍門。山神見形迎駕。稱姓李氏。後陟武擔東臺。遠望祥雲紫氣。盤結空界。問左右曰。此何處。對曰。石城山。乃悟山神扈衛之意。遂改雲頂爲慈雲焉。高僧傳。唐開元年鑿源禪師於此山。講華嚴。感聖燈現。善薩放光。大松林後有寺額。篆書三學字。其山四方面各三十里。因謂之開照山矣。勝覽云。三學山有佛迹。石理堅潤。瑩白如玉。非世間槌琢所能。又有碧玉佛龕。藕絲袈裟。錦

字心經。貝葉金字涅槃經。寺前後楹柏。皆隋唐故物。又有飛石。乃自雲頂飛來。先是寺有楠樹。已枯。石離而爲二。有王頭陀語曰。五百年後。寺當廢。若楠再生。石再合。然後復興。果如其言。碑目云。王頭陀塔銘在雲頂塔院。貞元十五年。薛僊撰。又云。三學山飛石記。邑宰張西撰。又云。支提石塔記。在三學山。唐節度使段文昌撰。又云。鸚鵡舍利塔記。在三學山。韋皋撰。又云。李義山爲八戒和尚謝復三學精舍表。略云。三學山夜有神燈。朝明佛足。風飄雨濕。且無金盞。落時。薜剝苔侵。尙有寶花承處。又云。杜光庭功德記。在三學山。○隋僧智炫遊三學山詩。秀嶺接重煙。嶽崑上半天。絕巖低更舉。危峯斷復連。側石傾斜澗。迴流瀉曲泉。野紅知草凍。春來鳥自傳。樹錦無機織。猿鳴詎假弦。葉密風難度。枝疎影易穿。抱裘依閑沼。策杖戲荒田。遊心清漠表。置想白雲邊。榮名非我顧。息意且蕭然。唐王勃遊梵宇三學寺詩。杏閣披青磴。瑠臺控紫岑。葉齊山路狹。花積野壇深。蘿幌棲禪影。松門聽梵音。遽忻陪妙躅。延賞滌煩襟。薛能自廣漢遊三學山詩。殘陽終日望。棲賢歸路攜。家得訪禪。世缺一來因。薄命。雨留三宿。是前緣。詩題不忍離巖下。屐齒難忘在水邊。猿鳥可知僧可會。此心常似有香煙。又題開照寺云。盡室偏相將。中方上下方。夜深楠樹遠。春氣柏林香。聖跡留崑嶽。靈燈出混茫。何因將慧劍。割愛事空王。僞蜀太后徐氏漢州三學山看聖燈詩。虔禱遊靈境。元妃夙志同。寶香焚靜夜。銀燭炫遙空。泉漱雲根月。鐘敲樹杪風。印金標聖迹。飛石顯神功。偶望天涯極。臨看日脚紅。猿來齋室上。僧集講筵中。頓覺超三界。潭疑證六通。願成修偃事。社稷保延洪。太妃徐氏和云。聖燈千萬炬。旋向碧雲生。細雨灑不暗。好風吹更明。磬敲金地響。僧唱梵天聲。若說無心法。此

光如有情。宋王雍題雲頂山詩。五色琉璃白晝寒。當年佛脚印梅檀。藕絲織出三衣妙。貝葉經傳一偈難。夜看聖燈紅菌菴。曉驚飛石碧琅玕。更聞鸚鵡因緣塔。八十山僧試說看。

簡州

華陽國志。犍爲郡牛鞞縣受新都江。去郡三百里。漢元鼎置。有陽明鹽井。卽牛鞞井也。南齊牛鞞戍設在州城西岸。卽古簡縣址。○三國志。姜維聞鍾會入犯。表守陽安關。關在西南三里。上流并依山爲之。舊陽安縣及今陽安驛。本此名。水經注云。晉羅尙乘牛鞞水東征。李雄發自陽安關矣。○九州要記。陽安縣南七十步。有赤水如絳。源出隆州。今治西二里絳溪是也。溪上龍門洞有石如龍。壁上龍門二字。州人許奕。嘗傍刻柳子厚銛鉞潭諸記。乃宋臨歐陽詢書。又云。陽安有雁水源。源出廣漢。曹榮謔詩。城下水流金。雁月亭中人弄玉弦。琴是也。雁亦二水之間。有江月樓。薛濤江月樓詩。凭闌却憶騎鯨客。把酒臨風手自招。細雨聲中停去馬。夕陽影裏亂鳴蜩。○方輿勝覽。簡郡設廳。棟宇盡唐制。梁上題寶歷元年刺史張炎建。抵嘉定之壬午。已二百九十有八年矣。碑曰。郡守壁記名氏。始唐貞觀十三年。見劉左史折柳亭記。亭在朝天門外。舊名情盡橋。刺史雍陶詩。從來只說情難盡。何事教名情盡橋。自此改名爲折柳。任教離恨一條條。○方輿云。紹興中建西州道院。在州治南。黎持記云。陽安鄰於會府。而有江山之勝。處於高仰。而有魚稻之饒。民事獄訟。比之旁郡。十無一二。凡隱於吏者。樂趣焉。人目之爲西州道院。又云。望湖樓在州治道院之後。湖光山色。交相輝映。輕舟小艇。時時撐出柳陰中。不謂重岡疊嶂間。乃有瀟湘若雲之景也。○志

云。簡縣忠清門外有唐太子誦書紀功碑。甚巨。元和二年。朝議郎使持節簡州諸軍事。守簡州刺史李維勒石。碑目云。南康郡王紀功碑。乃憲宗撰文。太子誦書。貞元十三年建。原在龍興寺。宋天聖五年移在州衙門外頡春亭側。又云。在郡市心居民室下。紹興丁巳。穴土見碑石。太守命工取之。重撤民屋。不果。上錄其文。乃唐御製紀功碑銘。并序。皇太子書。碑面殘缺不全。惟碑陰乃開成元年皋從孫銍爲本州守日記。述其文。俱全。遂覆之。按此碑已取出。今存。○志云。城內雙市街有叢桂樓。以宋紹興中。朱熹同榜李微如。李進修。范時中。袁炎。牟子正。俱州人也。大守郭由中爲樓記。○方輿勝覽。景德觀在郡南一里。山谷集云。簡池覺範道人。城東道友也。住景德院。其家風十二時似趙州。東院西池。種竹兩枝於宴坐軒中。山谷老農作頌曰。往在江南住竹山。道人兩歲三來訪。聽風聽雨看成龍。牛羊折角入朝餉。簡州城東刮地寒。手種檀欒三兩竿。竹成要作無孔笛。若有靈龜一任鑽。魯直又有題其也。足軒詩。詳詩話中。○圖經。簡有四巖。東西南北也。三溪。東南前也。三池。柳。鳳。賴。簡也。劉涇云。三溪號一郡之勝。前溪在陽安治後。亦稱後溪。文同後溪晚步詩云。陰陰芳樹暗迴堤。路入蒙籠轉野溪。澤雉應媒高復下。林鴉引子歇還啼。青蒲宛宛全淹水。紫竹斑斑半出泥。倚杖風前感時節。亂煙斜日一蟬嘶。○巨濟又云。南溪壽昌寺前水是也。由南溪沿隄一里許爲東溪。李良臣詩。簡州外處景最佳。東溪清絕人所誇。溪上有碧波亭。宋姚孝詩。賴簡池臺兩蜀誇。東溪別是一仙家。令人却憶康王谷。坐看珠簾濺雨花。志云。劉文節墓及讀書樓。俱在東溪上。今東林寺是。其樓址一名東溪菴。○志云。柳池。折柳橋下水也。鳳池。在治南三里。水自北一里鳳翅山來。

賴簡山接金堂山。郡池名皆因之。○勝覽云。東山在東江之外。州治之左。志云。在城東五里。巖高數丈。刻東巖二大字。有東巖院。賀通禪師卓菴處。地居兩山之間。溪流其中。下有懸溜。清音不絕。旁有洞。又有古柏。大可二十圍。爲一郡之望刹也。志云。即天王講寺。貞元初。施頭陀。○近巖有雙牙山。兩石對峙如牙。上有井及石箱。人見兩金鵝其側。晝浴於井。夜棲於箱。○蜀志補傳云。西巖在簡州湧泉鎮。有石刻大悲像。光相屢現。志云。在治西五里。巖洞深三丈。闊如之。洞門刻西巖二字。宋嘉定甲子。王武卿結菴於此。題名。○近巖有石柱山。孤高獨立。上有石像百餘。石室數間。有仙人楊氏養丹爐鼎。尙存。登其巔。可望逍遙山。○勝覽云。逍遙洞在元都山。去城三十里。景德間。有楊用晦者。隱居此山。其上有層崖。命工發之。得東西二室。西室後刻二窺。若養丹之所。又鑿二窟。中可坐五七人。東西二壁鑿二孔雀。二神人。有漢安元年四月十八日會仙友十二字。漢隸也。今存。按用晦。簡池人。有仕才。能詩。任心自適。不求當世。樂隱洞中。時太原王載。京兆金惟吉。南陽鄧曦度。杜審嗣。劉旻。遠來尋訪。刻詩壁間。○志云。南巖在治南一里。有洞深三丈。闊二丈五尺。方輿勝覽。南巖有光孝寺。前敞飛閣。盡覽江山之勝。左有洞。可容數十人。卽淳風洞也。石刻無名氏詩。煙飛風翠撲衣裘。落日牛羊下壠頭。莫道山中生意薄。江邊桃李自風流。簡州學記。李淳風生於州之乾封鎮。有故宅及墓。按今銅鐘寺。卽報恩光孝寺舊址。宋孝宗隆興二年。陽安尉歐陽獬。建疏請衡山和尚住持。寺前高敞。有會勝亭。趙抃知益州時。寺僧有能琴者。見知於公。作琴軒詩贈之。云。輟飲支筇會勝亭。溪山佳處古琴橫。憑君傾耳殷勤聽。一弄清風四座生。諫議大夫張方詩。早向溪山

得趣深。建亭今復寄餘音。紛紛塵市無閒地。獨有新人物外尋。○志云。北巖在治北二里。洞深三丈。闊五尺。有坐榻茶竈。傍開石牕。牕下有泉。清冷不竭。有寺舊名白馬院。開元中馬祖建。倚壁有丈六金身。無名氏詩云。一帶江煙半倚巖。檻前時眺黑龍潭。低昂竹影疎明月。屈曲松枝拂像龕。樹老硬根穿石罅。草生嫩葉入禪菴。西來白馬無踪跡。寒鷁昏鴉暮景含。碑目云。院有唐碑。其歲月乃六歷時重修。石壁刻云。郡守潼川王武卿攜家渡江過唐氏園。偶泛舟泊山下。登劉氏江閣。因上北巖禮大佛。開禧改元二月十有三日書。○近巖有洞曰朝陽。深三丈餘。高丈有八尺。廣一丈。內有石牀。額篆石室二字。蓋昔人煉丹之所。○志云。四巖附郭之勝也。其稍遠者有玉華池。天光觀。覺林寺。又遠則爲分棟。長松諸山。○寰宇記。陽安縣北二十里。玉女靈山。東北有泉。西北兩岸各有懸崖。腹有石乳房一十七眼。狀如人乳流下。土人呼爲玉華池。每三月上巳日。有乞子者。漉得石卽是男。瓦卽是女。自古有驗。山爲仙人李八百修煉處。○勝覽云。李八百居棲賢觀。一名天光觀。碑目云。天光觀在陽安縣東二十里。有唐碑可讀者。云太和初三洞道士王道賜因張文學施地基。剋建。按今爲明教寺。○志云。甕亭山在治南四十里。石甕舖。有覺林寺。在大道傍。王欽若題覺林寺詩。暫拂塵襟思倍清。竹風山色亂泉聲。安民功淺君思重。又策羸蹄向古城。趙抃詩。古寺無碑刻。僧云不記年。自余安所問。惟是愛林泉。○志云。分棟山在州西七十里。寰宇記曰。山北連秦隴。南入資瀘。東北入靜戎軍。在靈池縣東上十五里。劉涇分棟山少休亭記云。自成都趨陵簡。如在蜀。必由靈泉過分棟。其山周數百里。高大阻險。以石次第爲步。暑雨多雪。則馬不進。僕亦以病告。欲少休於

是建亭。名少休焉。○志云。西北七十里。長松山爲州斧展。界內諸山。皆發脈於此。長松寺本靈叢廟址。開元中。馬祖行空和尚乃建寺。明皇召對。賜額長松衍慶寺。又賜名香爲亭以貯之。曰御香亭。宋賜名嘉福寺。今名靈峯。○唐鄭谷集云。各自亂離之後。在西蜀半紀餘。多寓止精舍。與圓昉上人爲淨侶。昉公住長松山。舊齋。嘗約他日訪會。勞生多故。游宦對年。曩契未諧。忽聞謝世。愴吟四韻以弔之。詩曰。每思閒靜話。雨夜對禪牀。未得重相見。秋燈照影堂。孤雲終負約。薄宦轉堪傷。夢繞長松塔。遙焚一炷香。○志云。蟠龍山與長松相接。大歷四年。郡大夫傅著造大佛建院。曰石門。以山石分開似之。院門又有石形如夔。刻字其上。曰夔石。楊甲遊長松寺宿石門僧舍。以石門霜露白爲韻。得露字詩云。疾風吹輕衣。駕我雲脊路。人間一回首。驚絕不敢顧。鳥投虛無底。渺渺不知處。峯窠蟻丘垤。與世同所驚。試看一蒼莽。誰有不平慮。尙憐野僧屋。佛面荒苔蠹。斷崖割呀吻。洵洵崩石怒。我來得奇觀。拄杖叩巖樹。青山有驕色。斯客不得句。平生二三子。慰我一相遇。娟娟松間月。幽夕亦可度。夜闌更小語。風逼遺響去。酌君無多酒。繼以木蘭露。諸公綽石門院詩云。搖空柳色金猶嫩。傍道梨花雪未開。咫尺長松煙霧裏。石門頂上暫徘徊。○碑目云。周文王廟碑在陽安縣西北七十五里。卽後周高祖文帝之廟。舊碑題額云。大周植德碑。元年歲次丁丑造。元年。卽後周閔帝之初元也。今石刻存。○志云。去郡治五十里。山曰賴簡。自賴簡西互潛度。雁江而直走龍泉。又曰隆泉。在治北八十里。以澗水隆盛爲名。○寰宇記云。靈泉在靈池縣南三十五里。隋初。縣傍出湧泉。因置平泉縣於此。唐改靈泉。志云。廢靈泉縣在州西北七十里。隆泉驛之右。楊甲靈泉山中詩云。小



縣相籠合。濃濛數百家。果蔬爭晚市。樵牧亂晴沙。落日平林迴。青山去路除。偶居無事在。隨意問桑麻。又野色山圍盡。風煙更可憐。客情牛鐸外。農事藕花前。聚汲松根井。寬愁石底泉。雲安須斗水。詩興亦超然。又勝地仙靈宅。微官也謫居。焚香他日夢。隱几向來書。小睡便山雨。長齋稱野蔬。逢人問無恙。滿意說樵漁。又日下叢林薄。芊芊肅晚暉。閉門成小隱。飲水亦生肥。醉著溪藤杖。歸來木葉衣。狂歌有虎兕。吾道只應非。又何處長松寺。雨花雲外臺。山從百曲轉。路入九關回。老檜成龍盡。殘柯借鶴來。人間斤斧亂。風壑夜聲哀。又靈泉山上晚望詩云。野曠樹還亂。林深煙更微。天隨殘日盡。雲掣斷山飛。玉壘風煙闊。秦樓草木非。憑高千萬事。今夜客沾衣。蒲瀛宿靈泉。無我軒懷次山詩。幽軒著無我。居此合何人。聞道東山隱。當時此地親。心源將止水。世事甚浮雲。今日尋遺跡。空餘淡墨春。自註云。壁間有次山題字也。○成都文類益部十縣多引江水溉田。成爲沃壤。惟靈池疏決不到。須候大雨。俗謂之雷鳴田。縣東山下有朱真人洞。洞北岡嶺連屬。逾廿里得褚聖母祠。化跡尤異。民咸事之。祈禱獲應。潘洞詩云。錦里城東邑。高原十六鄉。江流分不到。天雨降爲常。節及三春後。晴逾兩月強。龍乖尋穴蟄。魚困入泥藏。樹影全虧綠。苗姿半吐黃。耕夫皆慘戚。市戶亦倉忙。潛慮冤無雪。深疑政有傷。推恩慙睿主。引咎謝虛皇。磬折真人宇。星奔聖女堂。先時獨玉饌。隔夜浴蘭湯。洞口焚香遠。山椒作梵長。幽誠期必達。元應果旋彰。雷振南峯下。雲飛北嶺傍。聲稠喧竹塢。勢迫瀉銀潢。飄灑連三晝。霽霽遍一方。稻畦煙漠漠。蓮沼水泱泱。物態涵優渥。民情遂樂康。洪施周庶品。餘潤浹他疆。稔歲還堪待。陰功詎可忘。明靈何以報。奮藻紀遺芳。按朱真人祠。卽安靜觀也。

楊甲宿安靜觀詩。青山轉龍脊。矯首西南天。上有仙人洞。臺殿飛後前。下見雲雨興。樹色暗平川。仙人兩黃鶴。一去無歸年。向來道上屨。人著幾何錢。一朝聞羽化。恨望空流涎。卻揮囊中金。瓦礫來投捐。巖巖化金碧。香火通雲煙。人間萬事爾。且暮有愚賢。而況爭奪場。轉手分嬖妍。仙人一回首。破隴與荒阡。紛紛不足道。衰此區中緣。石泉瀉幽潔。意寂不肯喧。夜聞松風露。起坐心寥然。又云。一濯巖下溪。再拜巖中庭。清風肅然來。吹我衣上腥。仙人芙蓉冠。乘月下雲駟。山空雜佩響。靜夜朝百靈。似聞客欲去。小語猶丁甯。蕭蕭上松柏。急以兩耳聽。寂寥古壇外。但掛斗與星。天明恐是夢。恍惚遺心形。去飲石上泉。再讀幽人銘。青山無行迹。霧雨松冥冥。○古今集記云。靈泉縣界有瑞應院。唐永平中段文昌來攝靈泉尉。手植四松於此。院有石刻云。乾坤毀。則無以見寺。寺不可毀。四松其遠乎。松至天福初。止存其一。縣令張松復補植三株。有栽松記刻於石。今不存。楊甲詩云。木落石出荒山臺。上有佛寺孤崔嵬。斷椽拆瓦無四壁。古佛已倒何人推。野蜂占窠挾肩背。山鼠出穴銜髻鬣。老僧見我欲愁哭。野葛蔽路官能來。文昌種松有斷刻。石柱半裂荒莓苔。老翁鼻祖無一在。獨樹晚出非蒼飴。乾坤未變已先滅。幾見賊火翻狂雷。至今野叟鑿山破。石窟尚有龍筋骸。當時手種意已遠。欲與草木爲渠魁。

仁壽縣

寰宇記云。陵州漢武陽之東境。晉初西城戍也。州南有陵井。周武帝因以爲州名。○陵井監。圖經漢張道陵經茲地。有山神稱十二玉女。指陵上開鹽井。監以陵名。志地也。文同奏疏謂因張陵以名井。復因陵井。

以名州矣。大觀四年改爲仙井。避其諱云。郡國志曰。仙井陰氣襲人。入者輒死。投以火。則煙氣上衝。濺泥漂石。沸吼如雷。今玉女洞是其處。○王象之碑曰。張天師靈廟。碑元和十五年。知陵州李正卿撰文。咸通十五年。丘冲書。又云。黃帝陰符碑在州城。至道觀。宋京記云。此中江山瑰奇。自古王公貴人。詞客才士。木管一至。故不得見於歌詠。而爲浮屠老氏之學者。往往擅而有之。○方輿勝覽云。驪陽洞在州城北。至道觀之後。昔天師旣誓玉女於井。因藏去其衣。鎖之石室。或謂之藏衣洞。洞在重巖下。崎岬幽窈。晦明變化。千態萬狀。雖距閭闔不數武。而若與世隔。蓋道陵脩煉之區也。杜光庭錄異記云。焰陽洞。古老相傳在陵州陽山之上。從來隱蔽。人莫知其處。乾德三年辛巳正月十六日癸卯。井監使保義軍使太保馬全章。夢一紫衣束帶。巍冠者。狀若道流。揖之。俱行至崖壁所。告曰。此焰陽洞也。閉塞多年。能開發護持。可以福利邦國。又指其地近開小徑曰。可斷之。勿使常人踐踏。言訖而去。及旦往尋其所。果見土勢微陷。以杖導之。深不可測。卽令本軍節級侯廣之。勾當人夫。斲地。漸獲蹤由。相次開掘。見三重石門。洞內並是細砂。一無蟲蟻他物。其洞自東入西。深三丈九尺。闊五尺三寸。洞門三重。第一重高六尺。闊五尺二寸。第二重高五尺五寸。闊三尺七寸。第三重從頂至底。一向高六尺一寸。三門相去。各只三四尺。鑿鑿精巧。殆非人工。三門內南畔別有石房。闊七尺四寸。高四尺八寸。深四尺二寸。其後別有一小洞。洞門有片石遮掩。旁通一縫。以燭照之。深不知其底。北畔亦有石房。深四尺。闊七尺三寸。高五尺。房內有石牀一。西畔又有小石房。深二尺。闊三尺五寸。高三尺一寸。西北畔有石牀長三尺八寸。闊二尺八寸。有石竈。模長二尺三寸。額

闊七寸。窺深八寸。周圍三尺五寸。計從洞門向東一直至鑿井西。相去可四十一丈八尺。井在洞門正東也。全章乃召當井監天師院主內大德費省異問之。答云。天師院見有元和年刺史李正卿著天師聖德碑云。天師以東漢建安二年。自沛遊蜀。占隄爲分野。見陽山氣象。指謂弟子。此山直下有鹹泉焉。今驗此洞正當井上。卽夢中所指者也。碑目云。洞顏隸書。監陽仙洞四字。字體兼篆。不知何代書。旁有款識。歲久磨滅。東南貴人見此碑本。寶而藏之。以爲真漢隸。志謂有東漢仙都四字在天師洞。未詳。○碑目又云。仙井監有蔡君謨法帖。蘇東坡心經帖。文與可書千字文。陸務觀跋蔡帖云。近歲蘇黃米芾書盛行。前輩如李西臺。朱宣獻。蔡君謨。蘇才翁兄弟書皆廢。此兩軸君謨真行草隸皆備。石在仙井。可寶也。淳熙元年九月八日。蜀州手裝。○勝覽云。監陽洞前有蓬萊閣。秦少游詩。雄簷傑檻跨嶂嶸。席上風雲指顧生。千里勝形歸俎豆。七州和氣入簫笙。人遊晚岸朱樓遠。鳥度晴空碧障橫。今夜請看東越分。藩星應帶少微明。程公闢次韻云。半天鐘鼓宴嶂嶸。早晚晴陰景旋生。湖暖水香春載酒。月寒雲迴夜聞笙。金鼈破海頭爭並。玉雁排煙陣自橫。我是蓬萊東道主。倚欄先占日初明。按蓬萊閣在治東百許步。又有含暉閣。近五十步。趙閱道詩。曉川嘉樹照雙扉。披豁幽軒景盡歸。自喜吾懷已虛白。三嵎山色更清輝。○輿地紀勝云。平雲閣在郡圃。文與可詩。陵陽郡事全稀少。懶守長飈半日閑。晚後須來上高閣。就中無厭是雲山。與可在州送通判喻郎中詩。可笑山州爲刺史。寂寥都不似州城。若無書籍兼圖畫。便不教人白髮生。又云。近日簿書全簡少。吏人惟聽雨衙休。歸來便只尋冠履。遠遍林亭山上頭。○輿可又有自然水石記云。陵陽守居

負山。悉石。西左砌層崖。餘地丈許。平夷可屋。因植四楹。面午。橫楣開幽軒。正對大林。高株缺間。視遠峯若  
畫工。引淡墨作巒嶷。巖時與煙雲相蔽虧。愛此有佳趣。復靜密。公事少休。卽至。宴坐伏息。日計數。取多  
乃去。外俗不得知。旁頽巨壠如溜。宜鐫刻。遂磨治。將紀建置。歲月沃水盪拭。見黝理若髮狀。傾灘平波。瀾  
漫瓶迤。復疊先後。倫次。窪淵聳浪。左右役目。自非天寫神摹。人巧孰能爲是。必由融結。固已有堅包厚藏。  
待予始發章。物蓋顯晦。信在時。人理疑亦然。苟達此。與知命何遠。雖爾。既有形。必復壞。倘後人加護。則傳  
久未易泐也。○李膺益州記云。東西南三山相對。州治居其中。去陵井各一里。謂之三峒山。按古謠云。三  
峒青陵陽榮。三峒翠陵陽貴。郡守何著仲嘗於東山之下。作青榮臺以表之。張紹祖山屏記曰。有岡北來。  
莫窮所自。不亟不徐。勢趨東南。欲薄城下。歧而爲三。行且五里。虎踞盤礴。不復去。此陵陽之所謂三山也。  
○西峒曰跨鼈。卽州衙坐山。李石超覺寺記云。州以跨鼈名者。居三峒山之槩也。去治半里。方輿勝覽云。  
跨鼈山上有跨鼈亭。每歲上元。重九。太守率僚屬燕其上。有石姥在山頂。歲旱。里人轉徙之。天卽黯黳。雨  
四注。文同賦云。上簪岑之飛泉兮。披蒼蔚之榛莽。爰有石之跂跂兮。旁無他而相伍。其遠睨之若人兮。追  
猶疑其蹲虎。里俗神而甚恭。今號相尊而曰姥。又云。印山在其坳。卽捫膝先生喻汝礪故居。○南峒曰翳  
嘶。頂上有翳嘶廟。相傳神卽巴郡太守嚴顏也。宋何真作碑記併書。山前有霄漢堂。紹定中隆州軍事推  
官文太虛爲碑記。俱存山之麓。有更生寺。宋丞相虞允文爲其父秦國公建碑云。紹興十八年六月二十  
六日。鄉人鮮于速旣死復甦。言地府有更生佛。故秦國虞公祺也。明日以告丞相。正秦國小祥之期。丞相

因言秦國屬續時微疾耳。忽脫坐客。古佛俱來。吾當歸。允文泣下。公顧曰。身得爲佛。有何不可。含笑而逝。按寺在縣東南數百步。秦國又有功德院。在城西玉屏山。○元虞集。仁壽寺僧報更生佛祠前生瑞竹詩云。聞道故園生瑞竹。令人歸興滿江干。扁舟不畏瞿塘險。匹馬誰云蜀道難。杜甫溪頭花隘市。孔明廟裏柏闌珊。新堂題作歸歎字。定得臨江把釣竿。伯生丞相裔孫也。有還鄉詩云。還鄉思速去鄉遲。王事相縻敢後期。里父留看題壁字。山僧打送捨田碑。胡桃策竹南方要。盧橘枇杷上國知。此日君親俱在望。徘徊三顧欲何之。又云。未忍他鄉作故鄉。故因使騎入陵陽。鄉人共訝聲音似。客路疑將鬢髮蒼。親老長懷鄉里思。孫多宜置墓田旁。治生自可依諸葛。數頃膏腴八百桑。○東嶠曰。飛泉上有超覺寺。按圖經。隋仁壽元年。獠反。百姓城於山頂避難。遂有飛泉湧出。獠平。泉涸。因呼爲飛泉山。文與可詩。東城兀高峯。爽氣浮翠微。霞光射巖壁。中有寒泉飛。碑曰云。飛泉院碑。唐神龍元年立。超覺寺碑。廣明二年。陵州刺史蕭兢記。志云。超覺寺有爾朱仙影刻二片。一全影。一半影也。有乾道中虞丞相書碑。勝覽云。飛泉山下。蟠溪丞相何公墓所居。何公始生六日。瑞雲山當夜半紅霧五天。此山東去蓋四十里。○碑曰云。佛龕山有唐貞觀中。率更令歐陽詢書金剛經摩崖碑。按卽佛厓山也。在縣東二十五里。志云。山有三石像。背虛面巖。俗呼倒坐寺。○碑曰又云。東北石城山平等寺。有大寶四載薛兼金撰道超和尚精德碑。勝覽謂石壁如城。絕頂望見峨眉也。○寰宇記云。州南一里。鼎鼻山隆然特起。又曰。隆山。隋大業改陵州爲隆山郡。本此郡國志云。周之九鼎淪一於此。往往見鼎耳。因名。南七里。一泉水碧色。投銀其中。成色卽變。孕婦飲之。墜胎。俗

以爲聖泉矣。○圖經云。南二十里有麗甘山。山下鹽井。是十二玉女故迹。以玉女美麗。井水味甘。合而爲名也。又云。古鹽井號聶甘井。井傍有神祠。號曰聶社。○又二十里有儒社山。虞允文書碑云。紹興癸酉十月八日。允文來遊。知先世種德本末。感愴久之。石刻今存佛子寺。○郡國志云。縣西朝女山。昔有女子居山悟道。肘脰之蹟印石上。猶存。○碑目云。後唐同光三年。靈泉院碑。在本院山上。按卽譚子池也。亦名天池。宋進士郭周藩詩云。靈泉在山頭。酌之不盈卮。試詢陵陽叟。何云譚子池。一叟爲我言。郡有譚叔皮。在唐開元末。生兒名阿宜。墜地解言笑。九歲森髻髻。不食且不飲。超然忘渴飢。十五銳行走。鸞若神駒馳。二十入山林。人莫知所之。父母念不泯。鄉人爲立祠。大歷元年春。此兒忽來歸。頭簪鳳凰冠。身著霓裳衣。再拜向父母。一吐心中詞。兒乃仙子流。塵市不可羈。鄉人意雖厚。立祠將焉爲。妖魅一朝據。作祟無休期。急爲告鄉人。毀之勿遲遲。祠下多金藏。不知使何時。盡取濟不給。幸勿藏於私。言訖卽辭去。仙袂風披披。於焉撤祠宇。突兀成平夷。果獲千黃金。貧匿得所資。金盡泉繼湧。湛若青琉璃。不滿亦不涸。旱潦恆若斯。禱之立有應。翁如墳協篋。由來羽化人。出處同鬱儀。去今數百載。跡在名還垂。志云。天池山麓有顯忠院。宋尙書僕射何臬藏主處。臬從徵。欽北狩。死沙漠華表。柱猶存。又有寶籙院。宋寶謨待制陳成華所。號寶謨院。已上在北二十里。宋故事名位顯者。得於墳側建剎度僧。以薦先福焉。○志云。陵州梵宇。多以龍名。若龍興、龍居、龍泉、龍厓是也。龍厓者。鑄石爲龍。臥厓下。卽文與可鑄怪石墨竹處。跨鼇山人李新題云。淺梢疏節似瀟湘。正向祁寒敵曉霜。清興未窮僧已老。自餘山色與溪長。雅安僉判程壬孫詩。風雨勞先別。敢

辭尊酒深。一梢牆上竹。留作歲寒心。俱在寺壁。龍興卽報恩寺。寺有大悲堂。大悲閣。王象之碑曰云。龍興寺大藏經碑。開成五年吳商撰。古大悲堂碑。乾符三年周宋莒撰。俱在報恩寺。篆字心經碑。咸通七年仇溥撰并書。修大悲堂碑。景福二年僧承徽記。俱在小大悲閣。又云。僧曉微碑。在寶林院西。蜀明德元年立。又有顯教大師碑。廣政四年立。鐵騎將軍碑。在歸安鎮。孟蜀廣政二年立。○寰宇記云。貴平縣漢廣都之東南境。後魏時與平井縣同置。舊治和仁城。開元十四年移治祿川。一統志云。元憲宗時併當縣。按圖經。祿川距貴平縣三十步。發源循州。下注資江而東。水多魚蝦。縣人利之。過祿川有蘭溪。唐隱士張鴻居其上。按益州記。平井縣兩窳二十八鎮。日收鹽四石。如霜雪是也。○碑目云。貴平縣文宣王廟碑。長慶五年。陵州刺史李正卿撰。尹泰階書。按碑在縣址後百步。可搨。而聖賢石像委榛莽中。近方瘞之。碑後巖下。○寰宇記云。唱車廟在貴平縣南九里。漢朱辰爲巴郡守。有恩於巴。吏人送辰到蜀。回至此爲辰立廟。以其山近鹽井。開推車唱歌之聲爲名。今鹽井推轆轳。皆唱爲號令焉。碑目。唱車山開國王碑。貞元元年貴平令王覺撰。牟尙書墓記。同光五年領州事陳貴民撰。○又云。貴平西北四十里。寶峯院有唐人撰寶峯院記。院內有王羲之記。王氏廬墓銘。按志。邑王氏女至孝。親沒。廬於墓側三年。有司立碑表之。王羲之爲作廬墓銘。剝蝕殆盡。○寰宇記。梁天監置席郡。隋廢爲縣。里語譎爲籍縣。志云。在縣百七里。今爲鎮。又籍田公館近華陽界。縣南有地畝餘踏之軟動。有泉淵。旱不涸。湧不溢。名曰息壤。魚鮑水在其北。導江水在其南。丹砂山在其西也。○碑目。漢黃龍甘露之碑。在籍縣江口。上銳下方。其狀如鐘。大書漢黃龍甘露之



碑七字。餘不可讀。其可識者。羣臣將軍位號。蓋爲龍紀也。

### 井研縣

寰宇記云。縣本漢武陽地。有彭山。彭首獠姓。在始建鎮之東。志云。後魏置蒲亭縣。今縣東一里。黃丞相池是也。池中生蒲。起亭以存古意。○周地圖云。蒲亭縣有鐵山。諸葛亮取爲刀劍。宇文度封鐵山侯。卽此。志謂鐵山一名茆香山。在縣東六十里。舊始建縣東。○寰宇記云。井鑊山在縣北。其山俯臨井鑊。因以爲名。元宗幸蜀。井鑊山神見。卽此山也。○碑目云。唐節度使楊公墓碑在隆州井研縣。道傍有石刻云。唐銀青光祿大夫檢校御史中丞上柱國節度使楊公墓。旁多楊姓。乃其子孫也。又有宋何稟撰陳德用墓碑銘。在縣南四十里木龍鄉。宣和六年立。又有青陽仲廣塔記。在縣之天王寺。寺有塔。以藏舍利。爲層十三。此釋迦氏殊勝莊嚴僧祖。逢創始於隆興壬午。基就。力不繼。邑人憫焉。願續其事。邑之利源。以鹽自屑一至九。費所取者三之一。施心殊未厭。又合力爲第十層。工徒輒瓦之。供自十而上。合尖有期矣。嗚呼。事有一人營之。百人終之者。不營於始。無以開其先。不續於終。無以卒其功。百人者一人之繼。是塔之興。雖多歷年所。然終於有成者。百人之助也。掌化任剛。乞文刻石置層上。以紀歲月云。

### 資陽

華陽國志。資中縣受牛鞞水。寰宇記。縣本漢資中縣。後周武成於資中。故城置資陽縣。以資水爲名。○志云。城西二里。資谿縈紆九曲。合流雁江。近掘得宋張方題資谿橋詩。有資水右旋江會合之句也。王巖資

陽江詩。淡雲殘雪簇江干。策蹇遲徊客興闌。持鉢老僧來咒水。倚船商女待搬灘。沙翹白鷺非真靜。竹映繁梅奈苦寒。阮籍莫嗟歧路異。舊山溪畔有漁竿。范祖禹月夜船行入資川詩。憶昨臥碧山。蒼蒼叢桂間。白雲爲屏石爲枕。綠蘿長掛明月閑。忽乘輕舟泛江水。山月隨人還在此。白鷺驚飛宿靄間。青山倒臥蒼波底。此時孤棹發中流。川後停波聽棹謳。不學子猷中夜返。欲乘明月向資州。○志云。漢王褒故宅。即今縣理廊中八卦井三字子淵筆也。與地碑目云。西漢王褒宅在資陽縣西駟馬里。今改爲靈仙觀。有觀碑。二說微有不同。舊圖經云。資陽南五里書臺上豐碑廿餘片。刻聖主賢臣頌。山是王子淵讀書處。有洗硯池一勺。○又云。縣之延壽寺。漢董鈞故宅也。志以爲宋張方宅。按亨泉墓在縣北廿里。有石獸存。其宅未詳。○方輿勝覽。資山在縣西南三里。迥然秀拔。卽寰宇記之獨秀山也。范祖禹資山詩云。醴壇巖谷多神仙。鸞車鳳輦隨飛煙。神女瀟瀟來暮雨。浮丘往往下雲輶。○碑目云。資陽有三仙磨厓石在三江鎮。刻云。貞元十四年十月十日杜錫。崔熊。席夔。三人同遊。○郡國志。資陽有鑲溪。百丈池。所謂溪流如鑲。池深百尺也。志云。學宮前有星月池。有井傍池如星。東一里有放生池。有碑碣。顏真卿書。南廿里有孔子溪。石壁上鐫孔子字。云其地昔有鄉校祀夫子。刻記猶存。

資縣

禮記。萋宏氏孔子嘗問樂焉。死之三年。而血化爲碧。按圖經。萋宏資中人。有祠在青泥坊。數里之內。土色尚青。又云。王子淵墓在縣東二十里。墓前石碣高丈餘。碑目云。王褒墓。右有河相宏農碑。未詳人代。○唐

元和中羊士諤爲賚州守。風流文采。照耀一時。其詩云。洛陽歸客滯巴東。處處山櫻雪滿叢。峴首當時爲  
風景。豈將官舍作池籠。登郡前山作也。一雨東風晚。山鴛獨報春。淹留巫峽夢。惆悵洛陽人。柳意籠丹檻。  
梅魂復錦茵。年華行可惜。瑤瑟莫生塵。郡中早春作也。腰章非達士。閉閣是潛夫。匣劍甯永試。籠禽但自  
拘。江清牛渚鎮。酒熟步兵廚。唯此前賢意。風流似不孤。郡中詠懷作也。二毛非騎省。朝鏡忽秋風。絲縷寒  
衣上。霜華舊簡中。承明那足厭。車服愧無功。日日山城守。淹留豈桂叢。郡中見白髮作也。又郡齋讀經作  
云。壯齡非濟物。柔翰誤爲儒。及此齋心暇。儻然與道俱。散材誠獨善。正覺豈無徒。半偈蓮生水。幽香桂滿  
爐。息陰慙蔽芾。講義得醍醐。跡似桃源客。身嬰竹使符。華夷參吏事。巴漢混州圖。堰草懷君子。移風念  
夫。騶桑俄有績。宿麥復盈租。圓寂期超詣。凋殘幸已蘇。解空囊不智。滅景谷何愚。幾日遵歸轍。東甯殆欲  
蕪。竇叔向雨後月下寄懷羊二十七賚州云。夕霽涼颺至。儻然心賞諧。清光松上月。虛白郡中齋。置酒平  
生在。開襟願見乖。殷勤寄雙鯉。夢想入君懷。○碑目云。羊士諤在郡有毗沙門天王贊碑。歲久陷於城北  
隅。紹興中邵博爲守。始掘得之。又云。青松亭記在州治。唐乾符四年西川節度使成都尹高駢文并書。又  
云。瀛洲亭在郡圃。繪唐十八學士。鮮于侁文并書。又云。聚書樓記。李石文博雅堂記。張震文。俱乾道七年  
立碑。○聚書樓記略曰。國家渡江以來。脫五厄之會。收四部之富。頒詔首降。三館所儲。兩學所集。分錫郡  
國。州有書樓。侈其賜也。自宣和辛丑。前太守魏侯潤博以州號多士。請於朝。減他州之賜。以益此州。宛乎  
如韓宣子所見。周書之在魯矣。歲久鼠穿魚蠹。且爲有力者夜半負去。今守宇文侯爲州起發手書之家。

傳入市。殘缺散逸者，咸綴錄焉。比舊日增千餘卷。因舊樓徙故，葺新。復爲廚肆貯之。○博雅堂記略曰：宇文紹奕爲資守，風清事簡，則歎曰：自吾承先大父右丞相公餘烈，以詩書發身，凡二十年間，聚書上自孔氏，下至歷代諸史、稗官小說，與夫國與名公之文，合萬餘卷。手所校錄者，幾半之。不爲不多矣。顧猶有遺恨者，嘗見前漢文字之與篆隸之工，鏤金石而傳。後世尙有可攷，乃其在中原者，淪於夷狄，後生不可復見。吾家故所貯，吾幸得之，不欲擅而有也。壺傳之是邦，以與學士大夫共之。於是摹刻漢石經及他碑，凡五十四卷，覆以石柱大廈，名其堂曰博雅。登斯者，如入太廟，見尊彝鼎簠簋孟豆之陳，聞咸韶濩武雲和笙篪之音，列天球河圖寶玉大弓之器。饗太羹，元酒，昌歆，醑醢之味，莫不咨嗟歎息，以爲君侯好古博雅之士矣。○方輿勝覽云：企仙閣，居郡治北，憑高視下，得一郡之要。李石爲記，以李傅、侯、張各據一山，合四山而拱揖之，故曰企仙，亦曰蓬萊。○志云：州北二里醴壇山，李阿修煉處，肖像猶存。杜光庭有醴壇山北帝院記，以爲張道陵居焉。山畔有洞，鑿石七十二級，遠望之如入雲中。范祖禹詩：醴壇高倚碧天開，中有清都白玉臺。霧擁雲旌乘月去，風吹仙樂下天來。○方輿云：縣西三里平岡山，傅仙宗所宅也。崔中吉、崔蔭亦居此。○志云：玉清山上可以瞰平湖。在州南二里，侯真人遺跡存焉。又云：得道山在州西十五里，張開光於此得道也。碑曰：陳圖南得道山詩鑄於壁。邵博跋：○宋京云：東蜀領郡十六，而江山瑰琦，資中爲最。資中勝遊十數，而北巖爲最。謂縣有東西南北四巖也。圖經：距州城東三里曰東巖，形若剖甕，側立千尺，溪壑深杳。石壁上刻中興顏魯公書，縱廣盈丈，去磨厓五里，有唐明渡，以明皇所經矣。巖上鐫宋

承議郎鄧錫詩云。逕轉得幽谷。雲巖屹相向。筵笏假重簷。灣環依疊嶂。緬想融結初。鑄鑪自天匠。了無斧鑿跡。但覺盤根壯。深可數千尺。廣逾八九丈。洞穴既窈窕。松門亦昭曠。廓含三千界。中列五百像。巨楠布幢蓋。翠葛垂帷帳。木靈不知名。境幽或難狀。我時馳征軺。奔走勸塵軌。獲此一段奇。欣然愜微尚。欲去興未闕。行行重回望。末云宣和壬寅題。又鐫云。丞相大觀文沂國趙公。以東川鎮鉞。畫繡來歸。弭節鄉郡。爲父老大夫士七日留。乃歸內江之府第。郡守楊樞。執門生禮。敬餞於東巖。一時賓客直祕閣。新利路運副韓炳。新巴州趙伯總。新恭州趙善詔。新大甯監黃中。前昌州黃圖南。新富順監黃裳。制幙句龍復。成與俱。語出林杪。慷慨與坐客盡醉。公抗大節於天下。而略位貌於鄉黨。於是氣凌八極矣。樞請磨翠壁紀盛事。共託公爲不朽。咸曰然。淳熙壬寅二月十七日題。○方輿勝覽。城西六里爲西巖山。行不踰百步。石壁夾道。如城如峽。○又云。城南五里爲南巖。按卽重龍山也。峇峇盤屈。隱若龍轉。有亭閣梵刹跨其上。江山城市。歷歷可觀。○又云。北巖去郡城半里。等慈寺之東。唐盧并詩。地靈無俗草。巖靜有仙禽。者此也。郡志。崖嶺古像半蝕。苔蘚乳泉滴瀝。四時不絕。蜀志補遺。唐李渭爲刺史。有遊山詩云。淮陽清淨理。永嘉山水心。刻於等慈寺壁。碑目云。邵泰修北巖寺碑。洗公石馬塔院碑。滴水巖結界碑。俱在本寺。又云。盧井及張公瑾北巖詩。俱刻在龍水縣。○寰宇記云。龍水縣本資中地。隋置。在龍龜溪。資陽西界。依龜山隴爲城。今縣三十里。龍水鄉是也。溪水屈曲。蟠擁猶龍。亦曰龍潭。石壁有古刻云。積雨新霽。灑爽澄空。寓異探幽。人生行樂。殊不易得。縣令任聖用。挈鄉人蒲君勉。楊述美。泊邑士張和叔。飲於龍吟亭。風味相投。山樹巖石。咸

助意氣。且移樽潭上。醉歡歌笑。見月迺歸。乾道辛卯仲秋。丁未述美書。○范祖禹知龍水縣。公餘紀興詩。云。縣門倚巖谷。終日對青峯。初仕借爲宰。讀書過三冬。忘機狎鷗鳥。觀稼親老農。訟庭可羅雀。銅印苔蘚封。○續古今記。龍水縣有昭烈皇帝碑。形如方柱。頂如蓬壺。文剝落三之一。紹興丙寅孫原濟書。○碑目云。龍川邑小而江水環秀。距邑不三里曰靈巖。又其傑出者。端平乙未夏五月十有八日。東川撫屬古渝李粹甫來。酬供於此。邑令眉山孫子山。警曹烏山馮亭叔。相與訪古靈湫。載酒酌其上。午暑正劇。樹林陰翳。巖氣襲人。恍若此身在冰壺。絕不知人間炎熱之苦。竟日徜徉。與殊未盡。而景已晡矣。遂拂翠崖。而書以紀歲月云。前蜀馮銖靈巖秋月詩。青松崖上紫雲生。崖下仙人約舊盟。駐馬看碑驚化鶴。暮雲回首萬家城。銖仕前蜀。武成爲盤石令也。○寰宇記云。盤石在州城北二里。狀若盤陀。後周以之名縣。遂甯傳耆盤石遷治記云。珠江流其前。丹神隱其北。離壇據其左。靈巖蟠其右。劉光祖記云。資號珠江。以地之靈。而產瓊異。相傳江中有夜光如燭。方輿勝覽云。丹神山在盤石西北五里。山之神靈。恒旱告之。卽雨。寰宇記之丹山縣。因此名也。○按魏書保定二年。資州盤石人反。殺郡守。據險自守。州軍不能制。總管陸騰率軍討擊。破斬之。而蠻子復反。所在蠶起。山路險阻。難得掩襲。遂量山川形勢。隨便開道。蠻獠畏威。承風請服。所開之路。多得古銘。並是諸葛亮。桓溫舊道。是年鐵山獠抄斷內江路。使驛不通。騰又進軍討之。一日下其三城。招納降附者三萬戶。今資陽之丹山鎮。入其縣界。○圖經。廢銀山縣在州東四十里。山形如錠。今銀山鎮是其處。古今集記云。唐田游巖入蜀。居於銀山。聚弟子歌雅詩。以爲樂。今山有雅歌臺。石刻存志。

云。銀山候館因掘地得一小碣石。乃黃山谷與門生戴經弟綱尺牘。云七二郎氣秀而有骨。他日學問仕宦。皆當過人。要須得一佳士與遊。養其忠厚之源。此最爲先務。涪翁書贈戴六六七二秀才伯仲。志云。鎮之杜家溝。池水一泓。清冷澄澈。下卽龍泉洞也。天將雨。則雲生竅穴。霧瀾空谷。前有石柱殿。相傳龍出殿。止存二柱。崖上鑄二龍。士人懼其飛動。摧去兩角。山谷曾遊此。碑目云。龍泉洞壁刻有淳熙丁未三月九日何少虛。少明從成都張無咎來汲深晤坐。因訪舊題。數丁亥仲春六日字書。與當時人物磨去。已六七年。中間幾風雨矣。少虛且老。日有倦遊之歎。方爲涪翁釣磯之行。益起丘壑之念。故山猿鶴其能忘情哉。又有王齊賢。李若水。王簡。熊九能。濯凡塵步武而去。○寫韻樓云。資州古碑有祝融氏。祝誦氏之號。學齋帖。資州掘地得漢碑。有伏羲倉精。初造工業。畫卦結繩。以理海內等語。碑目云。隋勅改羅漢院碑。在法雲院。唐開元棲神山略記。在法鉢池前。刺史房渙文崇壽觀碑。天寶二年建。元宗書額。御史中丞宋渾文。已磨滅。裴晉公自贊。在靈虛院。左僕射裴瞻墓。在盤石縣北五里。有世譜碑。記藏於寶靈院。馬端臨通考云。資州以新絳帖十卷刻石。予家多有之。前有目錄。元刻麻石上。續揚者不逮。舊所得本逾勁。已上皆不可攷。

### 內江縣

華陽國志。江陽郡漢安縣。郡東五百里。土地雖迫。山水特美好。宜蠶桑。有鹽井魚池。以百數。家家有焉。一郡豐沃。○水經注云。雒水又逕漢安縣。謂之綿水口。○寰宇記云。周天和中。於資中地置漢安戌。在水濱。

尋改爲中江縣。隋開皇避先諱改爲內江。仍徙治於漢安故城。卽今縣也。勝覽云。中江水經盤石縣。自十字水流入縣界。又云。內江有水深百丈。實羣川總會之所矣。晉郭璞城讖云。山行依舊合。水去復還來。沈約宋書云。中江爲內水。涪江爲外水。按志。中江源出汶山。自灌口分支。經懷口入簡縣。歷資江而下爲中江。經三堆山下。西折而東。至縣復東折而南。至裨木鎮。又南折而西。至黃市。市距三堆十五里。一水周環九十餘里。而縣當其中。故曰中江。江去城不百武。與城內桂湖相通。以盈縮清濁知之也。按湖在西北街。宋黃思莊大書二字於岸石上。旁植桂樹。影可婆娑矣。○碑目云。漢永建五年。陳君爲漢安長。失其名。有陳君德政碑在獠井壩層崖之腹。字雖磨滅。然尙可攷。又有漢永建五年。漢安修棧道記。俱在內江縣。○本志云。宋紹興末。於內江縣置安夷軍。董昌齡時爲令。移徙新市平縣基。得小碣一片。刻詩云。戰馬向風嘶。荒雞隔水啼。終日隨征旆。何時罷鼓鼙。○志云。城東半里東林寺。紹興中建。有石佛。按卽東津寺也。范祖禹資州路東津寺詩云。山行無晨暮。日暝崖谷昏。哀猿落客淚。永路驚旅魂。憑陵高山巔。俯視大江奔。迴環島嶼合。縈轉洲渚屯。行雲赴炎天。飛鳥下蜀門。地遐怪物聚。寺古深殿存。憶昔李氏末。煙塵暗中原。姦雄競草竊。割據窮海根。干戈百年後。見此敗屋垣。我來屬清秋。登覽無俗喧。山深虎豹歸。水靜蛟鼉齧。臨風獨笑叱。浩蕩欲飛翻。自註云。寺有石佛殿。唐乾甯元年建。○志云。城南銀杏鋪江邊。有放生碑。款爲宋都護校尉周仲亨立。有寶光洞。壁上鑄雲塞洛溪口。金波光明久十字。紹興進士邑人閻執中書。又云。銀杏鋪之陰。江所遠也。渡江對岸爲葛仙山。相傳吳郡葛孝先曾棲其上。今有巨人跡。編戶葛仙里之名。



本此。○志云。治南二十里有高峯山。瀕江有洞。曰會真。中刻大士羅漢。甚古。唐大姓閻氏所闢者。洞幽邃。時或撫掌聲若鳴蟬。洞有斷碣。○志又云。城西二里化龍山麓。舊縣址也。有長生觀。凌風龕。及冷然洞。咸淳中。郢有朱真人者。棲其中。修煉。有吐納之術。其冷然洞記略曰。予落迹安夷。有長生池。丹臺。冷然洞。青眼不逢。揭籃而去。因有容迹。安夷尋遂者。無緣寄語。共乘風之句也。咸淳癸酉九月五日記。又留題化龍山云。郭外郊西柳已芽。東流注目浩無涯。江明白紅紅樹。春在三三兩兩家。幾度來臨逢社燕。一樽相對到昏鴉。此邦物色吟成畫。高謝山中景致嘉。刊碑在長生觀中。正嘉之間。山崩得古鏡及劍印。石刻識云。有宋之始。化龍爲記。日月相均。永遠不墜。亦疑朱仙所留。○又五里爲聖水寺。寺有靈湫古碑。紹興庚申。水觀禪師所剏。邑尉蔡逸詩云。二月春事半。縣花無數開。江頭連騎行。江霧結紅埃。下馬坐清蔭。觀漁大江隈。行行歷山寺。金碧森樓臺。拂石有唐碑。字老生莓苔。緬想古今事。悠然一傷懷。解榼醉泉石。傍徨不忍迴。辭徑下扁舟。重開贖樽壘。江煙暝川谷。冰輪出崔嵬。水面映金波。流光浮玉杯。蕩漾洲渚間。往來恣徘徊。一棹轉圓沙。燈火來相催。高歌賦厭厭。會須期再來。又云。盡日苦征賦。公餘來放懷。霽雲生怪石。宿雨溜懸崖。鳥倦晨猶伏。僧眠午未齋。高人莫相笑。仙尉亦吾儕。○又云。城西廿餘里。三堆山。三峯插漢。高閣憑空。有古石像。士人多遊焉。昔耕者於山掘得小銅版。上鐫詩云。塵世不我留。身寄白雲浮。若問真遊處。三山與十洲。不知爲何代物。○志云。西北十五里有華蓴山。有寺臨江厓。上鐫匯瀾有斐四字。唐范崇凱書。方輿勝覽。華蓴山距內江縣十里許。唐范金卿讀書處。按范崇凱元宗時獻花蓴樓賦。爲天下第

一。鄉人榮之。以賦名其山也。其弟元凱亦能文。時稱爲梧桐雙鳳。李太白贈范金卿詩云。君子枉清盼。不知東走迷。離家未幾月。絡緯鳴中閨。桃李若不言。攀花願成蹊。那能吐芳惠。好鳥相招攜。我有結綠珍。久藏濁水泥。時人棄此物。乃與燕珉齊。拂拭欲贈之。申眉路無梯。遼東慚白豕。楚客羞山雞。徒有獻芹心。終流泣玉啼。祇應自索莫。留舌示山妻。其二。范宰不買名。絃歌對前楹。爲邦默自化。日覺冰壺清。百里雞犬靜。千廬機杼鳴。浮人少蕩折。愛客多逢迎。遊子覩佳政。因之聽訟聲。白集又有青山橫北郭。白水遶東城。此地一爲別。孤蓬萬里征。浮雲遊子意。落日故人情。揮手自茲去。蕭蕭班馬鳴。一首。志云。亦送崇凱作也。金卿所居故址有臥碑。鐫華萼樓賦。剝落殆盡。山之後灣有金卿墓。○志云。石筍山治東南七十里。有石如筍者三。下圓上銳。聳峙漢表。清影沉江。則長虹滿地。新月初上。則明燭當天。形家謂爲邑之地軸。以三堆爲天關云。

# 蜀中名勝記卷之九

## 成都府九

漢州

古語云。大旱不旱。蜀有廣漢。華陽國志。所稱蜀之淵府。浸以縣雒者也。陳子昂爲雒縣令。張知古頌德碑云。此邦膏腴。利在江浸。陶翰送孟浩然入蜀序云。廣漢城西三十里。清江資緣。兩山如劍。中有微徑。可入岷峨。括地志云。郡在水南。故曰漢陽。寰宇記云。蒲陽故城在州南一里。蒲陽漢縣。以其爲蒲水之所經矣。○圖經。洛水在治東半里。又名沉犀水。水性剛。宜淬刀。與信州葛溪同。雒字元從水。漢火德忌水。故改從雒。范曄後漢書曰。洛城南每遇陰雨。常有哭聲聞於府中。和帝時。陳寵爲太守。敕縣宰收葬骸骨。哭聲遂絕。三國志。建安十九年。先主攻雒城。拔之。襄陽馬良書詣諸葛亮曰。承雒城已下。尊兄配業先國。魄兆斯見者也。○圖經。雁江在治北半里。李膺記云。張任與劉璋子循守雒城。任勒兵出於雁橋。戰敗。卽此雁橋。東有嚴君平卜處。土臺高數丈。宋郭卬卜臺記云。故老相傳。州治形勢南高而北下。多火災。真君鑿井。塵間。上憲七星。杓指南方。以厭勝之。越千百年。卜臺旣已墜落。而井之應輔星者。亦多堙塞矣。○益州記云。廣漢郡北一里半有犀橋。卽白魚水也。志云。河出棚口。有白魚出焉。在治東十里。○錄異記云。漢州赤水。有湧泉。水脈五六自山下湧出。因成大池。流三二百步。可激碓磑。匯爲大溪。○志云。治西五里石梯河。源

亦出棚口。河岸鑿石如階級。有石梯橋。下出縑土可代墨。又云。彌牟河在治西二十五里。自灌口經州。會金堂峽。俗謂之三水關矣。○常道將云。廣漢郡本治縑鄉。永和中陰平漢中羌反。元初二年移治。後治雒城。王莽改曰就都。公孫述名曰子同。益州以蜀郡廣漢犍爲爲三蜀。土地沃美。人士俊乂。爲一州稱望。樂史云。漢州有西伍城。宋元嘉年於舊伍城立新都國。乃于城南別置西伍城焉。○漢選廣漢太守。每重德高俊。表章禮物。殊于諸郡。前有趙護。第五伯魚。後有陳寵。趙瑤。皆公望也。唐天寶初。房瑄以故相爲是州。有舊竹亭。鳴琴其上。公去已久。而李文饒。劉夢得。過其地。思之不置。形於詠歌。德裕詩云。流水音長在。青霞意不傳。獨悲形解後。誰聽廣陵絃。禹錫和云。尙有竹間露。永無亭下塵。一聞流水曲。重憶餐霞人。鄭澹和云。石室寒飈警。孫枝雅器裁。坐來山水操。絃斷弔餘哀。○次律於治西鑿有西湖。自題云。高流纏峻隅。城下緬丘墟。決渠信浩蕩。潭島成江湖。結宇依迴渚。水中信可居。三伏氣不蒸。四達暑自徂。同人千里駕。鄰國五馬車。月出共登舟。風生隨所如。舉麾指極浦。欲極更盤紆。繚繞各殊致。夜盡情有餘。遺亂意不開。卽理還暫社。安得長晤語。使我憂更除。杜甫陪王漢州留杜綿州泛房公西湖詩。舊相恩追後。春池賞不稀。闕庭分未到。舟楫有光輝。鼓化尊絲熟。刀鳴鱸縷飛。使君雙卓蓋。灘淺正相依。李德裕。月夕遊房太尉西湖詩云。丞相鳴琴地。何年闕玉徽。偶因明月夕。重敞故樓扉。桃李蹊空在。芙蓉客暫依。誰憐濟川楫。長與夜舟歸。又云。晚日臨寒渚。微風發權謳。鳳池波自闊。魚水運難留。亭古思宏棟。川長憶夜舟。想公高世志。祇似冶城遊。劉禹錫和云。太尉留琴地。時移重可尋。徽絃一掩抑。風月助登臨。榮駐清油騎。高張白雪

晉祇言酬唱美。良史記王篋。又云。靜對煙波夕。猶思棟宇清。臥龍空有處。馴鳥獨忘情。顧步襟期遠。參差物象橫。自宜雕樂石。爽氣際青城。鄭澹和云。木落漢川夜。西湖懸玉鉤。旌旗還夜次。舟楫泛中流。目極想前事。神交如舊遊。搖琴久已絕。松韻息悲秋。又云。林端落照盡。湖上遠風清。水榭芝蘭室。仙舟魚鳥情。人琴久寂寞。煙月似平生。一泛釣瑣處。再吟鏘玉聲。嚴公賦題漢州西湖詩。鳳池才未盡。餘思鑿西湖。珍木羅修岸。冰光映坐隅。琴臺今寂寞。竹島尙縈紆。猶蘊濟川志。芳名終不渝。薛能題漢州西湖詩。西湖天下名。可以濯吾纓。況是搢家賞。從妨半驛程。管茶春味渴。斷酒晚懷清。盡得幽人趣。猶嫌守吏迎。重餐逢角暮。百中喜詩成。坐阻湘江謫。誰爲話政聲。文同題房公湖詩。一頃清波四面平。宛然唐相舊經營。高秋林木形容老。落日樓臺綵繪明。有景可尋蘭櫂遠。無幽不入竹橋橫。二年所得官居樂。肯厭頻來緩帶行。陸游題房公西湖詩。房公一跌叢衆毀。八年漢州爲刺史。繞城鑿湖一百頃。島嶼屈曲三四里。蘇轍題房湖詩。酒壓鄆筒不用酌。花傳五老出新圖。此行眞勝成都尹。直爲房公百里湖。魏了翁題漢州房公樓記。略云。成都宇文侯鎮廣漢之明年。威行惠孚。侯度聿修。迺作樓於郡之西湖。名以房公。將以申懷賢尙德之意。樓故金龜亭。綠陂翠澗。橫陳夾翼而亭。宅于虹橋之左。有樓其上。端握要會矣。華父又和宇文漢州乞房樓記詩云。房公胷中妙刀尺。剪刻玻璃貯寒碧。今侯著樓於其上。竹色荷光得良覲。詩來殷勤問故侯。別日雖賒情轉密。因思當年飛蓋遊。鷗鷺不驚潛鯉出。春濃雪絮人影亂。秋老雲松半天屹。蘇公二十四橋月。尙愛西湖風月夕。江山好處餘戀戀。縱不卽人人自卽。況今簷檨雲與齊。激楚高歌朋友集。向來寒

乞翻自噫。詩掃黃泥已無迹。功名老我後加鞭。文字餘人先奪席。欲搜萬象供刻畫。自有此湖難此筆。終當爲君記斯遊。摹寫蒼顏真六一。按金龜亭者。僞蜀武成三年庚午六月五日癸亥。廣漢太守孟彥暉奏。西湖有金龜徑。寸遊於荷葉之上。畫圖以獻。故以之名亭也。○丹淵集云。嵇侯友仲立漢州學。制度宏侈。爲三蜀之冠。當時不知何所得。巨石置講堂之後。質狀怪偉。勢若飛動。昔孟氏僭竊。苑囿所蓄者。皆甯武軍節度使。顧璘所進。視旣面縛。是物亦散落民間。余在成都。往往見於好事家園館。凡自璘許來者。一一皆具款勒。此非耳。而其完厚瓌詭。上下可愛。雖到茂灌。牛奇章號爲好事。諒亦未嘗見此者也。治平丙午秋。余視郡進士。試於此。且暮環繞其下。歎惜之不足。乃爲之銘。其辭曰。廣漢學宮。後有奇石。礫礪一抱。嶽峩九尺。怒蜃驪首。狂龍轉脊。擎空將翻。壓地欲坼。神乳溜腹。老苔漬額。堅包勁脅。潤吐活脈。誇殺羽人。詠窮墨客。敢告存護。千古怪碧。與可又有題漢州王氏林亭詩云。短笻疎籬入野扁。竹煙松露滿襟清。奔湍激險飛寒響。弱蔓穿深挂短英。惜去更觀曾畫壁。記來重注舊題名。門前便是紅塵道。誰肯同過洗俗纓。亦皆韻事也。

什邡縣

寰宇記云。什邡本漢廣縣。屬廣漢郡。舊置在雍齒城。今於城北四十步立縣。雍齒卽漢什邡侯也。墓在縣南一里。李膺記云。雍齒墓高四丈。闊四畝。有石麒麟二。○志云。今縣治乃唐紫極觀地也。廳左衛真人墓在焉。觀前舊有水西南流。名老君洗腸溪。真人乃衛元嵩。雲笈七籤以爲有舊碑刻存矣。○寰宇記云。南

陽郡故城在縣西二十三里。李膺記云：漢中李雄亂，蜀遣李壽盡掠漢川五千餘家，流寓於此。晉太康元年立南陽郡，後魏三年廢。南陽郡南七里有新婦水，故老傳云：昔有新婦勤於侍奉，負汲水遠，不辭冰雪，泉爲之涌出，故曰新婦水。流合廉江水。○志云：治北六十里高境關，關外卽章烙山，亦曰章山，又曰洛通。又曰楊村，諸山物產出焉。華陽國志謂大姓楊氏之所居矣。山有風洞，卽之氣冷，有火洞，卽之氣熱。古老傳云：苻堅有子避難，死於洛通山，卽此。○古碑云：江水出高境關大郎廟前，始大放分流十支。又云：自章山內合五溪，而總名洛江，出章山分洛江爲十河，縣之名卽從起也。○華陽國志：李冰導水於洛通山，志云：章山後厓有大家碑，云：秦李冰葬所，按開山記云：什邡公墓化，上有升仙臺，爲李冰飛昇之處。古蜀記謂李冰功配夏后，升仙在修城化，織衣冠於章山冢中矣。○方輿勝覽云：治西五十里有大蓬山，高崖矗天而立，瀑布飛落，最爲奇觀。有保聖院，紹興中謝中大蓬山記略曰：嘗自紫微度綿水，覺佳氣逼人，竹木蕭蕭，臺殿聳岌，松根寒泉，流注不竭。懸厓萬仞，瀑布如線，山腰有大小白厓，甚奇，上有太子宮遺址，僅存而事迹不可考。厓下有洞，極深邃，中有石柱撐之，左右映出白龍十三，蜿蜒如畫。又自西越澗行一里，有馬師井，捫蘿陟磴，至峯頂，有石室，可坐百人，蝙蝠大如鳥，所謂扁蝠洞者也。北望龍居，其狀如偃月，有保聖寺。唐天福中鏡鎰禪師誅茆之處，其曰馬師，卽馬頭陀與師同時者。○本志云：大蓬山朝雲初起，日射圓光於山頂，觀佛臺西澗，光暈數重，作青黃紅綠色，稍升，象王峯大徑百丈，中有黑影，彷彿佛像，食頃方散。山高百里，六月積雪不消。國朝明本禪師因名爲鑿華山。○高僧傳：馬祖什邡人，志云：北郭羅漢寺，唐

中宗時馬祖出家之處。山門右有說法臺。臺角有井。皆祖所掘。○勝覽云。龍居山在什邡縣。有等慈院。飛瀑千尺。虛亭屹然。橋橫路轉。高柏擁翠。志云。龍居寺隋建。旁有神龍潭。其右爲蜀王孟知祥墓也。孟昶攜花藥夫人至寺避暑。寺僧水觀禪師先一月預知之。因賜號爲預知焉。○成都參軍任愿蜀王廟記云。什邡之西。行十許里。有古佛寺。曰南陽。宋大明中所建也。後周沙汰寺廢。隋文帝以皇子秀爲蜀王。王以暇日獵至寺廢址。有兔逸入壟中。發壟得石像甚巨。於是即其舊址復爲寺。以像寘其中。時有進禪師者。善水觀。王異之。從問道。得大無礙。今寺之左有王祠。祠下有泉。匯爲陂。浮於方亭。達出於雒。其發源流百許里。溉田數十萬頃。雖大旱。民不告病。其爲利可謂深且博已。卽泉之始則進禪師水觀之餘波也。李白冷泉亭詩。惜彼落日暮。愛此寒泉清。西暉逐流水。蕩漾遊子情。空歌望雲月。曲盡長松聲。志云。亭在南陽寺矣。

德陽縣

地理志云。東漢分綿竹置德陽。寰宇記云。綿竹縣故城在縣北三十五里。李膺益州記云。石子頭二十里。卽故綿竹縣。諸葛瞻埋人脚戰處也。○樊眞公德陽錄。略曰。邑西南石亭江畔。有石亭寺。江畔有缺亭。因以名江。晉李特。李流軍綿江。趙廩遣戍遠斷北道。屯綿竹之石亭是也。德陽學宮。有石版陰陽書。缺根因石阜以庭宇。跨飲江之鼈鼉。岌飛簷與鐵柱。插清江之齋淪。眩古潭之百尺。涵萬象於瑤崑。歌月魄以終夜。湛天容之方春。信蒼蒼之非色。極深遠而自然。疑貝闕與珠宮。有玉函之老人。予南征其萬里。友魚鰕



與蛭蟻逝將去而反顧。託江流以缺首。末無題名。其字盈版。字勢遒勁似王稚子。墓前石闕。漢人書法也。釋其文意。似爲石亭而賦。或三版四版。今存一版。斷文矣。○縣一名旌陽。晉太康初許遜爲旌陽令。屬歲大疫。死者十七八。遜以神方拯治之。符咒所及。登時而愈。蜀民爲之謠曰。人無盜竊。吏無奸欺。我君活人。病無能爲。本志云。東關內有旌陽井。許真君浴丹於此。其水香冽。暑飲尤宜。半倚江岸。漲減不崩。○治有三造亭。李膺記云。秦子勅之舊宅也。太守夏侯纂三造門。故以爲名。其宅綿水衝毀。僅有餘跡。○南偏有善果寺。晉泰始中建。唐名善寂寺。王勃碑記。以爲梁武帝所建矣。○寰宇記云。縣北五里有鹿頭山。自綿州羅江縣來。迤邐入縣界。古老云。昔漢有張鹿頭於此造關。因以爲名。杜甫鹿頭山詩云。鹿頭何亭亭。是日慰飢渴。連山西南斷。俯見千里豁。遊子出京華。劍門不可越。及茲險阻盡。始喜原野闊。殊方昔三分。霸氣曾間發。天下今一家。雲端失雙闕。悠然想揚馬。繼起名禪兀。有文令人傷。何處埋爾骨。紆徐脂膏地。慘澹蒙俠窟。仗鉞非老臣。宣風豈專達。冀公柱石姿。論道邦國活。斯人亦何幸。公鎮隴歲月。○其下有龜勝山道場。乃高崇文破劉闢處。初闢據鹿頭關。高與之對壘屯營。有神龜由壁門來。踰於牙旗之下。公命投之遠碕。翌日復至。議者以龜介蟲之長。介胄斯服。蜀有龜城。其城是師。果爲受降之兆。乃以龜勝名山。立道場焉。掌書記鄭宗經。大唐乙酉。明年六月記。○本志云。治北十里秦中治。天下第七治也。上應箕水豹。王逸少嘗欲遊焉。石洞產九節菖蒲。秦時韓仲修煉之所。此雲笈七籤所載。以爲其山浮。寰宇記云。浮中山在縣北三十里。益州記云。南陰平鄉東有浮中山。每芳春遊人登賞。謂之迎春岡。四面斷絕也。○錄略

云縣東南有鄧林禪院。按邑人公孫輔記云。吾鄉精藍之勝。鄧林爲第一。其地蓋起於綿。洛之左。宛若秦川壟坂。高下起伏。北包靈龜。南互旌邑。直走於鎔華之東南。楓楠柞柏。拔地倚天。蔚爲鄧林。東山襟其前。江水帶其中。川原綺錯。雲煙出沒。飛鳥上下。農夫耕穫。樵牧往來。庭戶間。皆一覽而有也。真公以爲從大將軍鄧芝而起。此非鄧芝欲居德陽。乃遂寧縣。

綿竹縣

綿竹漢縣。地理志云。紫嵒山綿竹所出。有綿水流注。謂之綿堰口矣。寰宇記云。綿竹縣舊屬廣漢郡。隋開皇三年。徙晉熙郡城。以爲晉熙縣。十八年。改爲孝水縣。以境有姜詩泉焉。高僧傳。南武都。今之孝水縣也。蓋縣北三十里。紫嵒山極高大。亦謂之綿竹山。亦謂之武都山。○唐吳融綿竹山詩云。綿竹東西隅。千峯勢相屬。峻嶒壓東巴。連延羅古蜀。方者露圭角。尖者鑽箭鏃。引者峨眉彎。斂者鳶肩縮。尾巒青蛇盤。頸低元兔伏。橫來突若奔。直上森如束。歲在作噩年。銅梁搖蠱毒。相國京兆公。九命來作牧。我提虎僕毛。專奉狼頭籙。行府寄精廬。開牕對林麓。是時重陽後。天氣曠清肅。茲山昏曉開。一一在人目。霜空正泱寥。濃翠霏撲撲。披海出珊瑚。貼天堆碧玉。俄然陰霾作。城郭纔震蕩。絕頂已凝雪。晃朗開紅旭。初疑崑崙下。天矯龍銜燭。亦是蓬萊嶺。金銀臺疊疊。紫霞或旁映。綺段鋪繁梅。晚照忽斜籠。赤城差斷續。又如袁吳鹽。萬萬盈初熟。又如濯楚練。千千匹未軸。又如水精宮。蛟螭結川瀆。又如鍾乳洞。電雷開巖谷。丹青畫不成。造化供難足。合有羽衣人。飄緜曳煙躡。合有五色禽。叫嘯含仙曲。根雖限劍門。穴必通林屋。方諸滄海隔。欲去

憂淪覆。羣玉縵縵間。未可量往復。何如常此境。終朝曠遐矚。往往草檄餘。吟哦思幽獨。早晚掃機槍。笳鼓迎暢體。休飛霹靂車。罷繫蝦蟇木。勒銘燕然山。萬代垂芳郁。然後恣逍遙。獨往羣麋鹿。不管安與危。不問榮與辱。但樂濠梁魚。豈怨鍾山鶴。紉蘭以圍腰。採芝將實腹。石牀須臥平。一任閑雲觸。○綿竹山有鹿堂致。卽二十四化之第二化也。漢元帝時。老子偕張道陵遊此。有仙基仙宮。古人度世之處。李膺記云。山崖有隙。出神泉。若詣者精志。則泉流奔涌。其信道不篤。便清源頓竭也。又有庚除致。爲第六化。方輿勝覽云。山有二石室。三國初有霽雲子者入洞中。見樓臺金碧。門者呵止之曰。子凡骨。可亟去。不然。及禍。霽雲子出後。再至。遂迷路矣。○武都山有玉妃溪。成都耆老傳。載妃與五丁同生。父母棄之溪。後聞呱呱聲。就視。乃一女五男。女卽蜀妃。男卽五丁。故華陽國志云。武都山精化爲美女也。○山下有嚴真觀。乃君平父嚴子晞所創。楊天惠記之甚詳。見神仙傳。又有君平池。古老傳云。君平拔宅上昇。基陷而成池。○武都山有惠淨寺。梁太清年建。唐貞觀九年。寺西院立七佛堂。一僧舍。王勃爲之銘曰。武都仙鎮。靈墟輿域。邑動香城。山開淨國。溯流百道。峯雲五色。谷暗藤斜。山高樹逼。千楣鶴列。萬拱星懸。分林構趾。接磴開塵。臨階竹樹。遶棟風煙。竊前怪石。塔下秋泉。綠崖疏選。青岑拒室。霧道相縈。煙房互出。葉濃磔淨。花深嶂密。鳥度難尋。猿驚易失。簪分石竇。地絡金沙。丹丘抗月。碧洞棲霞。松開野路。桂列山家。金鑪柏葉。寶座蓮花。砌因巖曲。橋隨峯返。果出天廚。香來仙苑。玉鑄啓曙。金鐘照晚。谷思鐘長。山悲鐸遠。閭闔踐勝。銅墨高情。聲飛別邑。望動專城。懸金道肆。刻石山楹。千載之後。吁嗟令名。○又有響應寺。在馬跪溪。相傳隋蜀王秀妃忠心。

疾。召寺僧法進不往。王怒。親往加罪之。所乘馬至溪邊而自跪。若爲之請者。因名馬跪溪。高僧傳。唐武德初。釋世瑜獨住此山。有四猿供給山果等食。初惟一泉。後有三泉。流出於下。俗謂之三溪河也。亦名射水河。相傳蜀王秀營軍於此。乏水。王乃築臺望三溪山下。發三矢。有三泉從石竇出。遂成河流。又有馬尾河。注之。河出無爲山。宋濬熙間有碑云。羣雁排空成無爲二字。因名。有河水出焉。流如馬尾。因名馬尾河也。○志云。綿竹故城有二。其一爲宋時築。在郭外西南隅。近龍頭橋。卽湖橋也。魏華父湖橋記曰。知縣宇文西叔。峒度地飛鳥門外。濬爲湖。周廣六十有五丈。伐石爲四缸。缸崇四尺。架橋其上。而屋之。銜從合十丈。以通南北車徒之往來。蓋紹定四年碑也。其一爲漢城。卽德陽之西界。華陽國志。稱沔鄉有孝子姜詩。田地宅是矣。姜詩。廟曰孝感。鄭少微記略云。漢州德陽縣西北四十里有鎮。東漢姜詩故宅在焉。故號姜詩鎮。治平中。知綿竹縣事郭震。謂士游行甚高。宜諱其名。白部刺史易之。鎮遂號孝泉。然廟猶因俗爲呼。於是開州司理參軍白壽朋與鄉之士民列於縣曰。姜詩夫婦事跡最詳於漢史。舍側湧泉。至今不絕。民賴灌溉。或遇旱厲。禱焉輒應。其厚俗利人之功居多。廟額獨未蒙賜。敢請縣乃上之。有旨賜名孝感。命至之日。稚童夾塗載舞。踴躍爭觀。爲人子若夫者。咸欲詩之行在其身也。爲人女若婦者。咸欲龐氏之行在其身也。爲人父母若舅姑者。咸願有子如詩。有女有婦如龐氏也。則又相與詫於他州之民曰。吾鄉雖僻幽。而姜詩夫婦乃吾東家子也。爾州曾有是耶。方且侈上之賜。以永稱厥名云爾。

綿州

元和郡縣志云。按州城理漢涪縣也。去成都三百五十里。依山作州。東據天池。西臨涪水。形如北斗。臥龍伏焉。梁天監中。張齊賢爲太守。更造樓櫓。卻敵。有東西門。東門久塞。富樂山氣所衝。門開則喪亂。宋元嘉初。太守王懷素開之。果致喪敗。爾後復塞。○輿地碑目云。漢刺史李頌碣在綿州。又云。州治十賢堂。繪涪翁。龐統。蔣琬。杜微。尹默。李白。陳該。蘇易簡。王仲華。歐陽修。共十八人。又云。綿州通判廳有伐木堂。鮮于子駿立。文與可記。陸務觀劍南詩藁云。姜楚公畫鷹。在綿州錄參廳。杜少陵有詩。輿地紀勝云。六一堂在司戶廳。舊爲推官廳。昔歐陽文忠父鄭公。嘗爲推官。公實生茲地。○方輿勝覽云。越王樓在城西北。唐顯慶中。太宗子越王貞爲刺史。建杜甫詩。綿州州府何磊落。顯慶年中越王作孤城。西北起高樓。碧瓦朱甍照城郭。樓下長江百丈清。山頭落日半輪明。君王舊迹今人賞。轉見千秋萬古情。刺史喬琳詩。三蜀澄清郡政閑。登樓攜酌日躋攀。頓覺胷懷無俗事。迴看掌握是人寰。灘聲曲折涪州水。雲影低銜富樂山。行雁南飛似鄉信。忽然西笑向秦關。唐詩紀事。王鐸與綿州守于興宗。登越王樓。以詩寄朝士云。謝朓題詩處。危樓壓郡城。雨餘江水碧。雲斷雪山明。錦繡來仙境。風謠入帝京。恨無青玉案。何以報高情。刺史樊紹述。越王樓詩序云。綿之城。帝獨歙。歙明威。瀾石稍馳。涪瀨左陵。凌紅穉。簪天地。送行癸壬。且掬跼。錫於西北。蟠紅頰。青越王貞。故爲樓。重軒榭。飛門明牕。蒙傘塞塞。予始登。謂日月昏曉。可窺其背。雷電合風。雲遶霜辛。露酸星辰。介行神鬼。變化草木。顯繡髻。銜蓑芰。皆可察極。旣縈視其江帶。又極視其土岡。斷暴遠近。山峯巖若。閩之東皇。天原開。見荆山。我其黃河。颯然爲曲直。淚雨落。不可掩。因口其心曰。無害。若其日杲。星星。

過歸。尙悲不能解。重爲詩以釋。益不可願。謂郡中諸君能無有意。綴以華豔。其念蓄云。詩曰。危樓倚天門。如圍星辰宮。樓薄龍虎怪。洄洄繞雷風。徂秋試登臨。大霧屯喬空。不見西北路。老懷益凋窮。石瀨薄濺濺。土山杳穹穹。昔人館爲逝。所適醜顏紅。今我茲之來。猶校成歲功。輟田植科畝。遊圃歌芳叢。地財無聚厚。入室安取豐。旣之富庶能。千萬慚文翁。○勝覽云。江樓枕城之東隅。上有唐時江亭記。杜甫送嚴侍郎到綿州同登杜使君江樓宴詩。野興每難盡。江樓延賞心。歸朝送使節。落景惜登臨。稍稍煙集渚。微微風動襟。重船依淺瀨。輕鳥度層陰。檻峻背幽谷。牕虛交茂林。燈光散遠近。月彩靜高深。城擁朝來客。天橫醉後參。窮途衰謝意。苦調短長吟。此會共能幾。諸孫賢至今。不勞朱戶閉。自待白河沉。○文苑英華。王勃綿州北亭羣公宴序云。下官人間。獨傲海內。少徒志不屈於王侯。身不縛於塵俗。孤吟五嶽。長嘯三山。昔往東吳。已有梁鴻之志。今來西蜀。非無張載之懷。況乎踐名場。攜勝友。風月無幾。琴酒俄乖。半年十年。一別千里。何少府故人。攀桂撫金石而論心。韓法曹新餞班荆。臨江湖而執手。離亭北望。煙霞生故國之悲。別館南開。風雨積他鄉之思。於時蒼雲穿色。白日無光。沙塵起而桂浦昏。鳧雁下而蘆洲晚。傍鄰蒼野。霜飄橘柚之園。斜枕碧潭。日斷芙蓉之水。旣而登臨。惜別。騶馬少留。季札何人。親逢贈縞。子荆不慙。思掛傾城。惆悵北梁。揖琴臺而漸閒。徘徊東道。思錦署以行遙。嗟乎。人事乖矣。江山遠矣。請命離前之筆。爲題別後之資。五際飛文。想羣公之不讓。一言有贈。知下筆之有神。○盧照鄰綿州官池贈別詩云。輜軒遵上國。仙珮下靈關。樽酒方無地。聯絳喜暫攀。離言欲贈策。高辯正連環。野徑浮雲斷。芳池春草斑。殘花落古樹。度鳥

入澄灣。欲敝他鄉別。幽谷有綿蠻。○本志云。巴字水在治西四里。涪水自北經城西而析爲二。安水自東迤邐繞城東南匯之芙蓉溪。成一巴字。每江漲登山望之。點畫天然甚肖也。芙蓉溪卽東津。杜甫觀打魚歌。是此處。子美又有巴西驛亭觀江漲。呈竇使君詩云。宿雨南江漲。波濤亂遠峯。孤亭凌噴薄。萬井逼春容。霄漢愁高鳥。泥沙困老龍。天邊同客舍。攜我豁心胷。唐庚芙蓉溪詩云。人間八月秋露嚴。芙蓉溪上春酣酣。人間二月春光好。溪上芙蓉迹如掃。小兒造化誰能窮。幾回枯枿還芳叢。只應人老不復少。有酒且發衰顏紅。○李膺益州記云。金山在涪縣東五十步。東臨澗水。光采映川。長七八里。每夏淹雨。金粟散出。○州東五里有靈山。郡國志云。昔有神女於此擣衣。山南絕巖。有方石明瑩。謂之玉女擣練砧也。○周地圖記云。富樂山高。廣爲衆山之秀。登之望見州內。勝覽云。在巴西縣東五里。劉先主入蜀。劉璋延於此山。望見蜀之全盛。飲酒樂。故得是名。又有石盆山。迎真觀。臥佛院。洞靈觀。俱在此山之麓。雍有容詩。當時四海一劉備。至此已堪悲。失脚出語翻爲樂。國想是人止。可偏方著。大漢會封隆準翁。聞道山河錦繡中。安能鬱鬱久居此。睥睨三秦日。欲東。唐子西詩。富樂之名誰所留。建安年中劉豫州。擁兵入蜀。萬貔貅。屏璋送國來迎頭。軍中釀酒椎牛肉。如巴山酒如涪。酒酣握手登高丘。極目紫宇蹲春疇。冉木震富樂山移文云。星車熒熒。駕風鞭霆。出霧入雲。回翔太清。是爲古富樂之英方。劉豫州置酒高會於吾山也。升高延佇。虎視徇符。沃野綿互。鬱乎蒼蒼。曰富樂哉。有德易王。其與勃然。唐高宗顯慶中建壇山上。奠簡江皋。瑞氣凝於翠嶺。祥光爛於丹霄。武宗會昌中。投金鮫室。沉璧龍淵。雲鶴降以飄颻。天花舞而踟躕。石刻長存。

於今屹然。○碑目云富樂山有唐乾符間王助碑。又有集古堂。涪熙間史邴建。悉舉近郭仆碑植於堂之左右。而繪像於堂中。涪川王讓記略云。西絕涪水有山曰柏下。諸葛公營壘在焉。而喬木婆娑者。蔣公琰萬秋之宅。鍾士季之所嘗致敬也。○漢書郭玉傳。涪翁者。左綿人。肥遯不出姓名。所居處爲漁父村。玉從之受易焉。本志。州南四里有巖。卽涪翁山也。宋別駕楊叔蘭書涪翁山三字刻於石。併刻用涪翁詞。○益州記云。猿門山在涪縣之北二十五里。上多猿。其峯磔豎如門。故曰猿門。○寰宇記云。鹽泉縣漢涪縣地。後魏於此置魏城縣。唐武德二年分魏城置鹽泉縣。以地有鹽井。民得採漉。爲四方賈售之地。蜀都賦云。家有鹽泉之井。取此爲名。羅隱魏城逢故人詩。一年兩度錦江遊。前值東風後值秋。芳草有情皆礙馬。好雲無處不遮樓。山將別恨和心斷。水帶離聲入夢流。今日因君試回首。淡煙喬木隔綿州。○成都文類魏城縣南五里有長嶺。高涼泉出焉。其始至也。則風於一山。玉溜潺湲。衆籟成吟。笙竽匪禁。登之洗然。如謁羣仙。心意自殊。若與道俱。橫石如隕。匪壘匪鑿。傍架絕壁。根山不落。上摩層霄。屹然岩岩。其間可俯而入焉。則啞啞博斂。如堂如室。苔駁古壯。奇怪生妍。旋開混沌。益偉造物。然則始知乎山林獨得之士。一丘自足。窮年忘歸。亦何必際耕父於清冷。送白日於昧谷。然後爲異也。傍有舊銘。隱磷餘字。卽久視元年崔司業融守涪。茲邑高謀致禱。刻石斯存矣。元和元年侍御史李訥記。○州南百里界於潼川。四山如城。涪水經乎其中。漢設涪城縣於此。三國志。昭烈自葭萌襲蜀。進據涪城是也。杜甫涪城縣香積寺官閣詩云。寺下春江深不流。山腰官閣迴添愁。含風翠壁孤雲細。背日丹楓萬木稠。外院回廊春寂寂。浴鳧飛鷺晚悠悠。



悠。諸天合在藤蘿外。昏黑應須到上頭。○按李雄春秋巴蜀謠曰。誰登涪城。文石在巴西。張羅守合水。巴氏那得前。是涪城與巴西向爲犄角之地。予以萬歷壬子陽月過此。有羅漢寺。是舊縣址。

### 羅江縣

寰宇記曰。縣本廣漢涪地。晉於梓潼水尾萬安故城置萬安縣。李雄之亂。移就潺亭。今縣城是也。○水經註曰。潺水出潺山。歷潺亭而下注涪水。今縣北二里有潺亭故址。舊經云。有唐開元二十四年立潺亭碑。文字磨滅。尙有潺亭二字。碑陰有宋邑令太常博士宋彥嘉書云。嘉祐三年。予始署邑事。明年訪古迹。而潺亭廟有遺址存焉。東南百步有碑仆於民田中。其潺亭二字亦不復覩。稽其址歷數百年。廟與碑俱廢。是神之祀於民者不亦闕乎。且俟因官之美材。而復廟貌。未幾。里民請自修之。次年廟成。秋大旱。晨禱而夕雨。自是潺之民益靈。其神相與輓碣揭之祠下。時嘉祐五年也。○圖經。唐明皇幸蜀至萬安驛。歎曰。一安尙不可。況萬安乎。乃迴登宿於真明寺。按驛在治西一里。昔有碑書一安且不可句云。是元宗親筆。今亦毀蝕。宋張績詩云。勁兵重鎮付胡奴。毆雀毆魚計自疎。地入萬安知幾許。卻憐此邑始回車。○志云。元宗入蜀。縣令造亭於北一里。祗候。土人呼爲接王亭。遺址猶存。北三里又有企僊亭。乃車巖上昇處。宋師堯俞作記。○寰宇記云。縣西南十里有羅嶺山。羅公遠隱居之處。山下有洞號真人宮。又有龍池山。山上有池。池有伏石如龍蟠也。○碑目。有文鐸書龍洞仙踪壁刻云。太白山道人李洞賓。以太平興國五年龍集。庚辰仲春乙丑朔。越十二日。奉敕費內庫乳香二十斤。詣靈山相度仙洞焚燒。初抵劍門。遵老人之告。

闕次離巴岸。逢孤鶴以來迎。及屆洞中。睹雙童之出入。已臻巖下。見玉輅之踪由。又聆音樂淒清。螺鈸竦越。若非吾道神變。其孰能與於此乎。勒於洞門。以爲他年會語張本。○真誥云。羅江大霍有洞臺。中有五色隱芝。陶註曰。此洞爲南真及司命所任之處。志云。大霍山在縣西南十里。羅公遠修真處也。上有羅真宮。宋何彥真有記。外志云。大霍山麓有丈餘磐石。耕者每宿其上。輒夢云。接引佛上可臥耶。驚以告寺僧。掘其下。果得像若天成。不事雕琢者。○碑目有元人虞琬東山寶明寺碑曰。東山巔有景樂寺。迺唐高宗神龍中所建。宋大中祥符初改今名。相傳十三尊者遊戲之所也。在縣東偏一里。○古蹟志。馬馳寺有井在山谷中。四時水溢。可以灌田。近日忽枯涸。土人浚之。得龍首骨及大珠如卵。光同水晶。閃爍奪目。衆競視之。忽然雷震。珠復墜於井中。○寰宇記。白馬關在羅江西南十里。與鹿頭關相對。志云。山上平坦。有小徑。僅容車馬。三國時營壘也。其下名落鳳坡。按鳳雛先生龐士元待昭烈至此。卒於流矢下。其葬在鹿頭關桃花溪東岸。墓右有龍洞。葬時人見白馬自洞中逸出。舊有白馬關巡司。

彰明縣

寰宇記云。縣治初在清廉鄉。梁大同四年移於讓水鄉。宋書。范柏年梓潼人。明帝語次問卿鄉土。有貪泉否。柏年曰。臣梁益間有廉遜水。不聞有貪泉。帝嘉之。即拜蜀郡太守。按廉水在縣北。平地出泉。或云。飲之生廉遜。故名。○吳曾漫錄。彰明縣清廉鄉有李白讀書堂。後廢。爲隴西院。蓋以太白系出隴西云。院後有太白像。○李翰林墓碑云。白本宗室子。其先避地客蜀。居蜀郡之彰明。太白生焉。彰明邑有大小匡山大

匡乃白讀書處。圖經梓州刺史于邵作李白碑在縣之甯梵寺三門下。志云碑在縣南二十里。卽白故宅。○按匡山在縣北三十里。後改康山。疑宋世避藝祖諱。併杜詩而改之也。杜甫寄李白詩不見李生久。伴狂真可哀。世人皆欲殺。吾意獨憐才。敏捷詩千首。飄零酒一杯。康山讀書處。頭白早歸來。一云宋改匡山爲翰林山。○方輿勝覽大匡又名戴天山。白集有訪戴天山道士詩。犬吠水聲中。桃花帶露濃。樹深時見鹿。溪午不聞鐘。野竹分青籜。飛泉掛碧峯。無人知處所。愁倚兩三松。○李膺益州記云。自戴天山向西。連接爲石磬山。週三十里。山有石室。口方丈三尺。內有石牀。四面高一丈。有懸石如磬。擊之聲聞數里。下有流泉。甘冽可掬。○寰宇記曰。孟津山在縣東南一里。自十八隴山而來。西魏曰讓水。鄉移縣於孟津里是也。○三洞羣仙錄。黃泰先移家入蜀。隱太華山。山盛牡丹。奉先栽蒔盈籬。春時花開。望之如錦。幃然。在治北五里。○杜光庭錄異記。綿州昌明縣寶圍山。真人寶子明修道之所也。西接長岡。猶可通車馬。東臨峭壁。陡絕一隅。自西壁至東峯。石筍如圖。兩崖中斷。相去百餘丈。躋攀絕險。人所不到。其頂有天尊古宮。不知建始年月。古仙曾架繩橋以通登覽。而繩朽絕。已積歲年。里中諺曰。欲知修續者。腳下自生毛。如此相傳久矣。咸通初。山下居人有毛意歡者。幼知道。常持誦五千言。不輟口。著弊布褐。日於市誦經乞酒。醉而登山。攀緣峭險。以絕道爲橋。山頂多白松樹。以繩繫之。橫亘中頂。布板椽於繩上。士女善者隨而度焉。行及其半。動搖將墮。而其底不測。莫敢俯視。數年繩朽橋壞。無復緝者。咸通壬辰。邑令與賓客離山。登西峯展禮。時毛師他游。人有謂令曰。此峯側有小徑抱崖。纔通人跡。無所攀援。意歡常從此去。逾旬而出。令

疑其隱在穴中。座上有廣陵郭頭陀者，令請由徑往探之。頭陀去久始還，驚胎不能語。已曰：此徑去約三十餘丈，然後到一穴口，纔三五尺，下去平地，猶數百尺。穴內可坐十餘人，中有巨木，匱絨鎖極固，其誦經處石面平滑，有足膝痕，經卷在焉，不知意歡所之。意歡有一妻一女，每持燈，椀度繩橋，山側居人見之，以爲非常。山多毒蛇，猛虎，人莫敢獨往。意歡雖夜歸，亦無所畏。常有二鴉棲巖下，客將至，鴉必飛鳴，意歡乃整飾資榻，未畢，客果至矣。○高僧傳云：綿州城西北四十里寶圍山，梁大同中僧林所居也。山北涪水之陽，素來無猿，自林師棲託，便有兩頭依林而住。有初見者，云渡水來，及後林出山門，猿還涸渡，如此非一年，月淹久，孳乳產生，乃至數十。有時送林至龍門口，佇望而返。○方輿勝覽云：猿門自縣北特起，去縣二十里，山多猿兒，險固如門，舊有猿門戍。瑯環記云：啼猿之地多巖，而縣於是有巖山矣。○郡國志云：彰明縣巖山有鍾乳穴十九，又西岸有自然石塞，其下流水上有一懸石似磬，擊之有聲。○寰宇記云：彰明有附子山，自松嶺關東來，去縣四十里，山出附子，其水亦名附子水。○勝覽云：彰明縣有李膺墓，西南去州四十里，按膺涪城人，梁時爲益州大中正，卽撰益州記者。

安縣

寰宇記云：龍子山自漢州綿竹縣東入縣界，亦謂之龍安山也。志云：縣北十里龍安山，有蜀王秀避曇亭，清泉修竹，餘韻猶存矣。○元中統間，升石泉軍爲安州，以神泉、西昌爲輔邑。神泉卽今神泉壩，西昌卽今花街鎮，舊址尙可考。○神泉者，郡國志云：縣西三十里有泉十四穴，甘香異常，痼疾飲之卽差，故曰神泉。

今有祠。勝覽云：銀線潭在神泉縣南山，相傳白龍潛泳其間，水面有銀線一痕，以物撓之，卽不見。波定如故也。○西昌舊名益昌縣，括地志云：城西十里，地名木柵，有益昌縣者，此矣。唐永淳年，以利州有益昌，故改爲西昌縣。取西昌山在縣北，山特起，舊名馬鞍。天寶六年，勅爲西昌山也。



# 蜀中名勝記卷之十

## 川西道

龍安府平武縣附郭

顧野王輿地志云。陰平縣本漢梓潼縣地。晉人流寓於蜀者。仍於益州立北陰平郡。西魏廢帝二年定蜀。改北陰平爲龍安。魏志景元四年。諸軍攻蜀。鄧艾自陰平行無人之地七百里。鑿山通道。作橋閣。山高谷深。至爲險難。艾以氈自裹縛而下。將士攀木緣崖。魚貫而進。先登至江油。卽此地。晉於此置平武縣。○志云。唐宋之龍州在雍村壩。梁李龍遷築城於此。魏置州。遺址尙存。雍村壩者。宋紹定進士郡人。雍繁採有文學。見所製文昌祠碑。村因此名。今之郡治則樂平鎮也。蒲規修造記云。通階秦路。嚴禁出入。與劍門關爲比矣。○唐許棠送龍州樊使君詩。曾見邛人說。龍州地未深。碧溪飛白鳥。紅旆映青林。土產唯宜藥。王租只資金。政成閑宴日。誰伴使君吟。李洞送龍州田使君詩。御札軫西陲。龍州出牧時。度關善作雪。挂棧水成澌。劍淬號猿岸。弓懸宿鶴枝。江燈混星斗。山木亂槍旗。鎖庫休秤藥。開樓又見詩。無因陪宴集。吟苦憶京師。項斯龍州與韓將軍夜會詩。庭綠草纖纖。邊州白露沾。別歌緣劍起。客淚是愁添。見月猿啼樹。迴風雪滿簾。將軍盡尊酒。樓上賦星占。李洞亂後龍州送鄭郎中兼寄鄭侍御詩。侍車登壘嶂。經亂集鴿原。省壤蘭終潔。臺寒柏有根。縣晴江入峽。樓靜雪連村。莫隱匡山社。機雲受晉恩。又龍州送裴秀才詩。遠拜

旆旗前。松陰路半千。樓衝高雪會。扉閉亂雲眠。勝掛臨江省。名題赴宅筵。人求新蜀賦。應貴浣花牋。宋邵稽仲詩。峭壁陰森古木稠。亂山深處指龍州。猿啼鵲噪溪雲暮。不是愁人亦是愁。○方輿勝覽。龍州倅廳有吏隱堂。僉判趙衆詩。滿耳江聲滿目山。此身疑不在人寰。民含古意村村靜。吏束刑書日日閒。司馬君實和云。四望逶迤萬疊山。微通雲棧訪雲巒。誰知吏道堪棲隱。未必人閒有此閒。范景仁和云。花陰掃榻常欹枕。月色侵門不下關。因諷君詩想佳景。夜涼依約夢魂閒。○寰宇記云。龍穴山在陰平縣東北五十里。古老相傳。此山有龍關死。血變爲石。宋齊於此置龍血戍。李膺益州記云。龍血東有龍像巖。絕壁約萬餘丈。有四石龍在壁間。今尤可驗。巖之東北有洞穴。莫測深淺。泉出其下。○又云。馬閣山在陰平縣北六十里。北接梁山。西接岷峨。昔鄧艾伐蜀。從景谷路徑龍州江油縣。至此懸崖絕壁。乃束馬懸車。作棧閣。方得路通。因名馬閣山。○龍門志云。賈子明遇仙處在縣西北九十里。今仙女鋪是。宋理宗寶祐間。有人於小溪山下見二女子冉冉升雲而去。異香經日不散。龍安新志又云。仙女洞在沿南江村口。山勢盤旋。巖洞深邃。水自中出。百里流入劍南。故老相傳。每風日清和。遙見仙女靚妝游行巖上。或理髮。或浣衣。於洞壑中。隱顯不常。人跡罕到。洞中石乳融結。狀甚奇怪。色如碧玉。取可供玩也。○道教靈驗記云。梁武陵王紀理益州。使李龍遷築城於牛心山。龍遷既歿。便葬山側。鄉里立祠。號李古人廟。唐初改爲觀。其後武氏革命。鑿斷山脈。明皇幸蜀。有老人蘇坦奏曰。龍州牛心山。國之祖墓。今日蒙塵之禍。乃則天掘鑿所致。明皇卽令刺史蘇邈併工修填如舊。明年。誅祿山。復宮闕。至德二年。乃升龍州爲都督府。號靈應郡。僖宗幸



蜀宗子李特請遣道士醮山祈福。禮有加焉。按唐書高祖紀七世祖曰。嵩爲梁昭武王。生欽。欽生重耳。重耳生熙。熙生天錫。天錫生虎。虎生炳。炳生淵。是爲高祖。虎當西魏時。賜姓大野氏。是虎祇仕西魏。亦非仕梁也。此說不知何據。○陰平修路記云。龍安棧閣在治東者。曰石城。曰佛厓。曰麻園。曰臺頤。曰黃林。曰三店。原曰七里。卽左擔也。曰飛仙。已上凡八。在東南者。曰石回。曰興文。卽袁烈婦投厓處。曰猿臂。在東北者。曰秦隴。曰東閣。已上凡五。在治東者。曰金鼓。以形肖也。曰芭蕉。曰椿株。曰盧厓。監司盧姓者所修。曰天井。曰桑坪。曰兜索。曰木蕊。曰飛泉。已上凡九。在治西北者。曰金匱。曰桐油。曰隆奉。曰胡空。曰黃梗。曰劉村。曰鷲頂。曰禪峯。曰石門。曰仙女。曰馬桑。曰溪壩。曰黑水。曰羅漢。曰羊腸。已上凡十有五。

### 江油縣

古江油郡及縣。今平武之江油鋪是。以江水所由矣。元遷江油於武都興教鎮。則今縣也。○方輿勝覽云。太白臺在江油縣。太白與江油尉往來。故有臺在尉亭。蒲翰爲之記。其贈江油主簿詩云。嵐光深院裏。傍砌水泠泠。野燕巢官舍。溪雲入古廳。日斜孤吏過。簾捲亂峯青。五色神仙尉。焚香讀道經。爲米芾書。刻在縣衙。志云。縣西三里有山接彰明界。高聳亭亭。形如匡字。此大匡山也。又云。南二十里點燈山。卽彰明之小匡山。上有太白祠矣。○寰宇記云。涪水在縣北一里。自松州崆峒山出西北至州界。南入綿州界。益州記云。陰平縣有左擔道。其路至險。擔在左肩。不得度右肩也。鄧艾由此伐蜀。勝覽云。左擔路上涪水崖壁有閣道六。曰青崖。曰臺頤。曰石回。曰七里。曰東閣。曰石城。卽陰平所記者。又縣有二閣。曰猿臂。曰黃林。不

在左擔之數。○寰宇記云。石門在江油縣東百里。有石門戍。漢水記云。與氏分界於石門。仇池戍去石門四百餘里。左思蜀都賦云。緣以劍閣。阻以石門。顧野王輿地志云。石門在褒中之北。漢中之西。今按其山。兩邊有石壁相對。望之如門。鄧艾伐蜀歷此。○寰宇記云。天池山在州南百三十里。高九十二丈。上有池。周迴二十三步。其水常滿。號曰天池。本名石人山。天寶六年。勅改爲靈液山。○勝覽云。太華山在江油縣南百四十里。有二峯奇怪。碑目云。弘真觀古碑。在江油縣南百三十四里。太華山之登真觀。此碑最古。不記撰人姓名。按此山卽羣仙錄所載黃奉仙隱處。

石泉縣

漢靈帝以汶江、蠶陵、廣柔、三縣立汶山郡。廣柔卽今之石泉也。志云。縣北二里有泉甘冽。崖上刻甘泉古蹟四字。此縣名之始矣。唐屬茂州。宋神宗時。靜州夷寇邊。攻茂州。窒隴東以孤石泉。成都守孫義叟經畫事宜。以石泉爲邑。介綿茂之間。道里闊遠。緩急不相應。非扼其衝要。不足以外患。於是詔改石泉縣爲軍。按新編。張上行字道從。漢州德陽人。登元豐第。習於邊計。後會石泉夷犯邊。朝廷命義叟帥蜀。召公問計。公引唐王涯傳云。吐蕃有兩道。一由龍安。青川縣。一由綿州。威蕃柵。取歷雞城。皆虜之險要。今石泉三十里。威蕃亭。地名柵底。卽唐之威蕃柵。宜先築堡寨。以禦其來。次陞石泉爲軍。以重其權。然後調思黔義軍。以制其暴。則取功一時。爲利後世。不然。蜀之憂未艾也。義叟盡用其策。○石泉圖經。國乎衆山之隈。林巒叢筍。樵蘇恣取。不食地利。而生計亦足。○寰宇記。縣蜀山。史記黃帝子昌意娶蜀山氏女。蓋此山也。○郡

國志云石紐山今在石泉縣南。帝王世紀以爲鯀納有莘氏。胥臚拆而生禹於石紐。郡人以禹六月六日生。是日熏修禱享。歲以爲常。水經注云石紐夷人共營之。地方百里。不敢居牧。有罪逃野。捕之者不逼。能歲三年。不爲人得。則共原之言。大禹之神所祐也。碑目云禹穴二字。大徑八尺。李太白書。刻在絕壁上。○又云石泉縣有周萬歲通天碑。前內供奉書手王惠元書。其石擊之清亮。全類玉音。碑陰有段文昌留題。在報恩光孝觀。又云誓水柱在治西四十五里河岸。柱高丈許。圍五尺。前人恐水衝縣。故立此誓之。未詳年代。



# 蜀中名勝記卷之十一

## 上川南道

嘉定州

水經曰。江水至犍爲武陽縣。青衣水。沫水從西南來。合而注之。酈道元註云。江水又東南逕南安縣西。有熊耳峽。連山競險。接嶺爭高。河平中山崩地震。江水逆流懸壑。有灘名壘。亦曰鹽壘。李冰所平也。縣治青衣江會襟帶二水矣。○華陽國志云。青衣有沫水出深山。伏行地中。會江南安山。山脇瀨崖水脈漂疾。破害舟船。歷代患之。李冰發卒鑿平瀨崖。通正水道。或曰冰鑿崖時。水神怒。冰乃操刀入水中與神鬪。至今蒙福。按漢書溝洫志。蜀守李冰鑿離壘。避沫水之患。晉灼云。峯古埽字。卽此。○寰宇記云。青衣水發源自蘆山。徼外東南流。逕嚴道。洪雅夾江。至龍游與岷江合。沫水發源大渡河。一名義水。自陽山縣流入江。按青衣沫水合流。在州西十五里。俗名尖山。其下爲紙房。楮薄如蟬翼。而質堅可久。○通志云。嘉定州治在兩川合流之際。晉郭璞所定治。東有八卦井。卽璞所鑿。○水經注云。蜀王開明故治也。來敏本蜀論曰。荆人鼈令死。其尸隨水上。荆人求之不得。鼈令至汶山下。邑復生。起見望帝。望帝者杜宇也。從天下女子朱利自江源出。爲宇妻。遂王於蜀。號曰望帝。望帝立。鼈令以爲相。時巫山峽壅。而蜀水不流。帝使鼈令鑿巫峽通水。蜀得陸處。望帝自以德不若。遂以國禪。號曰開明。○蜀記云。古夜郎國傳爲一女人浣溪。

有竹浮下而中啼聲取而視之則孩也及長呼爲夜郎封竹溪王今治北三里有竹公溪矣按宋祁答勸農李淵宗嘉州江上見寄詩嘉月嘉州路朔峽接畫船山圍杜宇國江入夜郎天即詠此事○輿地廣記云漢武帝開夜郎置犍爲郡漢書地理志夜郎故縣乃屬牂柯郡如此則今之嘉州犍爲縣非夜郎故地矣後世徒見嘉州名犍爲郡又領犍爲縣遂以爲夜郎國恐失真○蜀志補傳云嘉州十五景唐貞觀中刺史盧士程記曰望靈峯曰西嶺精舍曰石梁水曰後壑曰分溪塘曰桂竹汀曰梭原曰茗岡曰六度潭曰長林關曰望山臺曰青菴徑曰山樞園曰石壑院曰南洲草堂併賦詩刻之石上宋鄧諫從云天下山水窟有二曰嘉定曰桂林鮮子繪議道堂記云漢嘉背負三義襟帶二江爲西南州最清巋處○海錄碎事載僞蜀歐陽郁得嘉州曰青山綠水中爲二千石作詩飲酒爲風月主人豈不佳哉其後太守呂昌朝以宋復古所畫八景圖皆天下名勝懸於州治與相映發蘇子瞻有八咏繼東吳之贈也○蜀都賦云戶有橘柚之園注曰出犍爲南安縣華陽國志南安有柑橘官社出名茶○寰宇記云有石碑山上遍植海棠爲郡守宴賞之地一名海棠山花譜云海棠有色無香惟蜀之嘉州者有香○吳中復戒石云嘉州出荔枝輿地紀勝有荔枝樓愛日齋叢鈔云乾道間陸放翁取家藏前輩筆札盡刻石置荔枝樓下○方輿勝覽云梨花山過西津橋五里有梨花百餘樹人寒疾取此花食之即愈岑參過西津王判官所居詩勝迹不在遠愛君池館幽素懷茗中語宛得塵外遊○通志云蓮花山在治東八里山陽有溪四時不涸產蓮花爲盛○樓臺亭榭雅與勝會者曰都督府唐于邵序云犀灘古地熊阜外虞長空青冥通波萬里

○曰郡齋平望江山岑參詩山光圍一郡江月照千家○曰丁東院在州學前院有方響洞洞腹有水如環珮聲黃魯直詩古人題作了東水自古丁東直至今我爲更名方響洞信知山水有清音范成大詩隔凡水欄不可越乘眞微步壺中月徙倚含風玉佩聲何須聽作裝寶鏡自注云漢嘉廣佛院中水洞有聲琅然莫知其所由來舊名丁東水山谷易今名且有詩也石介詩云萬樹芙蓉秋色裏千家方響月明中○曰澄江樓在憲司左窺龍泓右瞰烏尤高明爽塏得江山之趣濟祐間提刑程逢辰摹刻蘇子瞻書其外祖程公逸事於此○曰明月樓在譙樓之右下瞰明月湖郭璞識云鬱姑鬱姑將州對洛都但看千載後變成明月湖後隋鬱姑將軍開此湖也洛都山名在州西五里○曰壁津樓宋郡守游仲鴻建魏了翁記在治東南跨城爲樓下瞰江流三峩九頂森列左右○曰萬景樓在高標山上高標一名高望郡之主山也有宏明觀後周所泐隋大業末方製大殿塑飛天神王像無名氏記其神異甚詳樓爲宋郡守呂由誠建宇文粹中記范成大云嘉州城中山上登覽勝絕殆冠西川予令畫工作圖以歸山谷谷來游時但有安樂園未有此樓也後人立涪翁亭在此樓前○曰月榭陸務觀詩試傾萬景湖亭酒來看半輪江月秋爲同年王子蒼作也註云傍榭有一壘景趣尤佳子蒼欲作樓未果○曰碧雲亭在石筍之隙楊鞏記云石筍出於山旁高丈有二尺上銳而下廣衆水匯於前左右視羣山之邐迤若覆孟於地此亭在其上也○熊耳平羌據其上流寰宇記云熊耳水一名熊耳峽古老言武侯鑿山開道卽熊耳峽東古道也又云平羌縣本漢平羌戍在榮州應靈縣界深谷戍是也周保定年置縣隋大業中獠叛移就大江唐寶

歷中又移於開峽驛。道書謂之平羌化。山圖經云。天下二十四化之一也。有太白亭在焉。相傳太白讀書於此。黃魯直作亭其上。蘇子瞻詩云。峩眉山月半輪秋。影入平羌江水流。謫仙此語誰解道。請君見月時登樓。○石闕堂。溪環遶其趾。那國志云。龍游縣有二石闕。卽漢武帝使唐蒙下夜郎置碑目云。嘉州舊市鎮石闕。上有唐李德裕領重兵過此九字。寰宇記云。石堂溪水在縣東一里。源出溪泉。流入明月湖亭。退入流花橋。會大江。薛能石堂溪詩。三面枕漁樵。前門向郡橋。岸沙崩橘柚。山徑入茶苗。夜擁軍煙合。春浮妓舸邀。此心無與醉。花影莫相饒。○九頂山。在城左。有九峯。曰鳳集。樓巒靈寶。就日丹霞。祝融擁翠。望雲兌說。唐會昌已前。峯各有寺。今惟存凌雲一寺。又名大像寺。開元中僧海通於瀆江。洙水。濠水。三江之合。衝濤怒浪之濱。鑿山爲彌勒大像。高踰三百六十尺。建七層閣以覆之。至章泉時。積十九年而工始備。泉有大像記。墨莊漫錄云。嘉州凌雲寺大像記。章泉文。張綽書。其碑甚豐。字畫雄偉。頊於潘羲榮處見之。岑參詩。寺出飛鳥外。青楓戴朱樓。縛壁躋半空。喜得登上頭。始知宇宙闊。下看三江流。天晴見峩眉。如向江上浮。迴野煙景豁。陰森樓榭稠。願割區中緣。永從塵外遊。回風吹虎穴。片雨當龍湫。僧房雲濛濛。夏月寒飈颺。迴合俯近郭。寥落見遠舟。發槩無端倪。天宮可淹留。一官詎足道。欲去令人愁。薛能詩。像閣與山齊。何人置石梯。萬煙生聚落。一崦露招提。霽月人來下。殘陽鶴去棲。從邊亦已極。烽火是沉黎。司空曙詩。春江古寺邊滄波。石磴盤空鳥道過。百丈金身開翠壁。萬龕燈焰隔煙蘿。雲生客到侵衣濕。花落僧禪覆院多。不與方袍同結社。下歸塵世竟如何。李習凌雲漫興云。古寺臨江開。



碧波石梯深入白雲窠。僧禪寂寂無人跡。滿地落花春又過。薛濤寄題凌雲寺上韋相公詩。聞說凌雲寺  
裏苦風高。日近絕塵埃。橫雲點染芙蓉壁。是待詩人寶月來。黃庭堅凌雲記游詩。凌雲一笑見桃花。三十  
年來始到家。從此春風春雨後。亂隨流水到天涯。陸游凌雲禮佛詩。山郭尋幽一笑新。旋呼艇子截煙津。  
不辭疾步登重閣。聊欲今生識偉人。泉鏡自涵螺髻綠。浪花不犯寶趺塵。始知神力無窮盡。丈六金身小  
果身。自注云。一泉泓然。正在巒下。每歲水漲。不能及佛足。○碑目云。凌雲山麓有唐放生碑。山頂有清音  
亭。邵博記。天下山水之勝在蜀。蜀之勝在嘉州。嘉州之勝在凌雲寺。寺之南山又其勝也。蘇子瞻名其亭  
曰清音。又南山之勝也。其下有治易洞。東坡磨崖大字云。聖作易。晦其數。劉傳吳。識易祖。蓋宋郡守吳祕  
得之於劉牧耳。○紀勝云。烏尤山一名離堆山。在九頂山之左。舊名烏牛。突然水中。作犀牛狀。至山谷題  
涪翁亭。始謂之烏尤。又名烏龍。碑目云。郭璞移水記。謂世主播遷。戎羯亂華。於是優游笑傲。放意山水間。  
乃於嘉州城東百步烏龍山鑿書壘。而蘇子由詩亦指其註爾雅於此。史謂璞無入蜀之文。按移水記有  
嘉州二字。則碑非璞手筆。恐後人之附會耳。蓋嘉州之名。始於後周。而自周已前。止曰漢嘉郡。曰龍游縣  
耳。安得有所謂嘉州哉。子由詩云。巉巖九頂峯。可愛不可住。飛舟過山足。佛脚見江滸。俄頃已不見。烏牛  
在中瀆。移舟近山陰。峭壁上無路。云有古郭生。此地苦箋註。洗硯去殘墨。逼水如黑霧。至今江上魚。頂有  
遺墨處。提刑張方詩。竹橋沙水度烏尤。絕壁孤巖意氣驕。故與凌雲分半坐。僧牕假寐見金焦。以其似金  
山。焦山也。○青衣石峽。循而東去。東觀漢記曰。元初二年五月。青衣蠻唐律歸義。註云。地在大江。青衣。

水之會。今嘉州龍游縣也。寰宇記云。青衣津在治南四十里。有青衣神。益州記云。神號雷堦。廟即華陽國志之雷地也。班固以爲離堆下有石室。名玉女房。蓋此神耳。岑參上嘉州青衣山中峯。題惠淨上人幽居。寄兵部楊郎中詩引云。青衣山在大江之中。屹然迴絕。崖壁蒼峭。周廣七里。長波四布。有惠淨上人廬於其巔。唯繩牀竹杖而已。恆持蓮花經。十年不下山。予自公浮舟。聊一登眺。友人夏官宏農楊侯。清談之士也。率工爲文。獨立於世。與余有方外約。每多獨往之意。今者幽躅勝槩。歎不得與此公俱。爰命小吏刮磨石壁。以識其事。乃詩以達揚友爾。詩云。青衣誰開鑿。獨在水中央。浮舟一躋攀。側逕緣穹蒼。絕頂詣老僧。豁然登上方。諸嶺一何小。三江奔茫茫。蘭若向西開。峩眉正相當。猿鳥樂鐘磬。松蘿泛天香。江雲入袈裟。山月吐繩牀。早知清淨理。久迺機心忘。尙以名宦拘。聿來夷獠鄉。吾友不可見。鬱爲尙書郎。早歲愛丹經。留心向青囊。渺渺雲智遠。幽幽海懷長。勝賞欲與俱。引領遙相望。爲政愧無術。分憂幸時康。君子滿天朝。老夫憶滄浪。況值廬山遠。抽簪歸法王。或云青衣卽烏尤山。然烏尤之廣。不能以七里計也。○方輿記云。東巖在城東佛峽。卽聖岡山。薛能詩。古蹟是何王。平身入石房。遠林通後逕。一郡隔前岡。晝靜惟禪客。春來有女郎。獨醒凹不得。無事可焚香。巖半有洞。出泉宜釀。東坡詩。一時付與東巖酒。卽此。陸務觀詩。罷仁院前有石像。高丈餘。蓋作大像時稿也。詩云。江閣欲開千尺像。雲龕先定此規模。斜陽徙倚空三歎。嘗試成功自古無。○碑目云。東津院有黃魯直草書圓照大師小碑。其詩云。赤梅檀塔六七級。白菡萏花三四枝。禪客相逢以彈指。此心能有幾人知。又云。黃太史自敘南經此。有所作墨竹記。○予觀嘉州新志。城西

一里有揚雄山。石洞幽邃。相傳以爲子雲遊此。有子雲草亭。蔡植詩云。獨步城西路。蕭條一草亭。古苔環徑碧。脩竹遶軒清。石鑿觀書所。碑鑄陋室銘。草元今已矣。千載想儀刑。東北四十里有麻平河。流出千佛崖。與泥溪合。王勃麻平曉行詩云。百年懷土望。千里倦遊情。高低循戍道。遠近聽泉聲。稠葉纒分色。山花不辨名。獨心何處盡。風急暮猿清。泥溪詩云。弭棹臨奔壑。低鞭躡峻岐。江濤出岸險。峯磴入雲危。溜急船紋亂。崖斜騎影移。水煙籠翠渚。山照落丹厓。風生蘋浦葉。露泣竹潭枝。泛水雖云美。勞歌誰復知。

### 義眉縣

任豫益州記云。義眉山在南安縣界。兩山相對。狀如義眉。張華博物志。以爲牙門山也。本傳云。昔善財禮德雲比丘時。佇立妙高峯。觀此山如初月現。故稱義眉。○李膺益州記云。隋開皇九年立義眉縣。以山爲名。縣在南安之西。義眉之東。唐乾元間。獠叛。移就義眉觀。東今縣理是也。○禹貢梁州之山四。岷。嶓。蒙。西山皆岷。北皆嶓。南山皆蒙。義眉之在禹貢。則蒙山之首也。○飛元羽經曰。義眉之山。金臺之室。飛元羽經。祕其內。稽神樞云。句曲洞天。西通義眉。皆大道也。其間有小徑。雜路阡陌。抄會非一處。華陽國志云。義眉山孔子地圖言有仙藥。漢武帝遣使者祭之。欲致其藥。不能得。碑目云。宋太宗義眉山普賢殿簡版書。天真皇人論道之地。楚狂接輿隱迹之鄉。按雜化經云。諸佛如來以大悲心而爲體。故因於衆生而起大悲。因於大悲生菩提心。因菩提心成等正覺。故我世尊等正覺而有方所。說經而有道場。普賢於道場開化人天等衆。故現相海於義眉山中。密引世人而通菩提覺性。○三皇經云。皇人者泰帝之所使。在義眉

山。黃帝往受真一五牙之法。○費士戮歌鳳臺記云。按晉皇甫謐高士傳。葛洪神仙傳。宋劉孝標注世說。皆以接輿爲避楚入蜀。隱於峩眉。不知所終也。○寰宇記云。中峩山在峩眉縣南二十里。又名覆蓬山。有葛仙洞。入穴初纔容人行。數里漸寬。洞中蝙蝠大如箕。小峩山在峩眉縣南三十里。一名鏹刃山。山有李仙洞。是爲三峩。○李膺益州記云。龍門山在峩眉西十里。兩崖峭峙。其形如削。仰視青天。纔餘一罅。又云。峩眉山下有池。廣袤十里。號龍池。○方輿記云。綏山廢縣。在峩眉縣西四十里。按列仙傳。葛由周威王時人。好刻木爲牛。賣之。一日騎木牛。見人。蜀中王侯追之。上綏山。綏山在峩眉山西南。其高無極。隨之者不復還。皆得仙道。諺曰。得綏山一桃。雖不得仙。亦足以豪。○水經註云。峩眉山有濠水。卽大渡水也。水發蒙漢。東西流。與泝水合。逕汶江道。呂忱曰。泝水出蜀。許慎以爲泝水也。从水我聲。南至南安。入大渡水。大渡水又東入江。○通志云。羅目河出峩眉山麓。右溪自小天池以東。左溪自黃毛坪以北。至羅目廢縣界。合二溪之委。爲江水。石甚奇怪。縣址去治西九十里。唐麟德置。宋省入。○寰宇記云。隴甯山在羅目縣東南七里。神仙傳云。宿山圖者。隴西人也。採藥此山。服之羽化。○又云。嘉樹在羅目縣東南三十里。陽山江。既兩樹對植。圍各三二尺。上引橫枝。互二丈。相援連理。陰庇百夫。其名曰黃葛。號嘉樹。蘇子由詩。予生雖江陽。未省到嘉樹。卽此。○又云。夷惜水在羅目縣東北五十里。源出欒州界。中有嘉魚長三尺。每年二月隨水而下。八月逆水而上入穴。蜀都賦云。嘉魚出於丙穴。是也。○予按名山記。峩眉山周而千里。石竈百一十二。大洞十二。小洞二十八。南北有臺。凡遊大峩者。自縣勝峯門出。至華嚴院。恰十五里。前代於峩眉山。

剎寺六。光相居山絕頂。爲遊山之底極。華嚴居山之前峯。爲遊山之嚮導。而白水寺居其中。自白水至光相。歷八十四盤。山徑如線。如是者六十里。至峯頂。卽普賢示現處。屋皆以板爲之。○予以萬歷辛亥歲遊。是山作記云。出嘉州之西門。爲義眉徑。而義愈用自遠。過津焉。絕流者二。揭衣者一。旣入縣。縣田食堰水。沔液雲油。有沃益之稱。遇嶺焉。閣覆於上。宋時建。魏華父書也。首坡名解脫。以出山者釋危就坦。至此而盡噫。予惡知乎。出解脫入解脫耶。過此爲華嚴寺。卽華嚴墩。爲純陽殿。殿前頽谿。有石如船。水出灌堰。石上龍門二字。蘇子瞻書。又過爲中峯寺。卽乾明觀。黃魯直居之。爲歌鳳臺。列仙傳所稱楚狂接輿隱於義眉山中。不知所終也。陳希夷福壽字。殊俗筆。襄石神水亦亡。謂又過爲雙飛橋。山中橋非一。此可稱橋。一橋受一水。一水自一洞來。有黑白之分。若挾而舞。若搏而赴。勢不相下。過橋始狎。久之乃濟。有石狀如牛心。受水所激而成。有前後牛心寺。前者白水。而後者黑水也。謂之符文水。孫思邈居于白水。今之萬年寺。卽白水寺。由山下至寺。一舍而遙。倍之而近。如循牆自牖。以達堂窔。每遇一嶺。輒如止扉。寺前爲四達。而內則大宮也。其地皆稻田塍埒。俯仰隈隩。氣候和暖。不異於外。有蒲氏村。蒲人居之。云漢蒲公之後。蓋權輿是山爾。出寺至明月池。俗名初喜亭。其嶺蔓延。行之無盡。石磴難數。始治終亂。騎已絕。輿用二十許人。昇蹕處于內。不能蔽軫。劣似輿形者耳。首十人不任輿。以舟視輿。背如弓。繩如絃。猶不滿輿者意。左右八人。翼伸縮如猿臂。莫知定向。輿首者察路。如察脈。常苦眩。次者如眩師。或亟跳出輿外。或僂入輿內。或同前後左右爲一井。計二十人之形。如鴻雁木葉。偶成文字。莫知所以。又或作十數層如懸線。或擁腫一處。

如木癭也。與不可以足代，足不可以手代。扶予行者不善地，以善讓於予。善在左則棄右者，善在右則棄左者，亦有時而下，下不十上之一。與相詬厲，彌甚。首者拊不任與者背，如相警然。留十數人後，後者踞石，石隨足下，擊前者足，驚全輿。前者交平地，欲趨後者未脫險，不能從。出初喜亭，至化城寺，俗名木皮殿。徑一嶺，狹束如溝，水所流注，多磊砢，善脫足，謂之滑石溝也。由木皮殿至雷洞坪，行者禁聲，有禁聲碑。與二十八人，他與者半，共百五十人，俱行篋篠，灌莽中，若不相顧。若夢與人語，而人不應。其木連困糾紛，或寓或族，或相切磨，或自斃死，或翹繚而句，或無枝而檄，每一上嶺，不能半望。若青天則有樹立於旁，爲客繇役而惺盱也。木皮殿以上，磴不能石，壘木如馬齒。雷洞坪以上，樹不能枝，向空如虎爪。由雷洞坪至天門，石路詰曲，爲八十四盤，峭直纒減半。梧丘當途，或出其前，或出其後，又或出其左右而還之。與者實則輿向空久，始實輿者空，則輿趾礪地有聲，而過門以外，爲娑羅坪。娑羅其葉冬青，其花薝蔔，其色赤白。木皮殿以上皆有之，然有雜樹，故不之稱。稱天門，天門樹娑羅三之二，松居其一。有一樹枯而復榮，定者居之，將合無迹也。門內有橋曰天橋，有井曰井絡，有臺曰光相臺，有鐵瓦殿，昔建，有銅殿，今建，有菴以棲禪者。予登乎臺焉，其穆穆肅肅者耶。其明明斤斤者耶。其見乎蒼蒼之色不在穹窿者耶。其於世也悠悠洋洋者耶。前之岷江大出而尾下也，背之瓦屋上正而平章也，遠之雪山激浮而汨沒也。予何以知朱明之別於元英，又何以知臬且之別於辜涂，何以知靈噎震震之相終始，何以知蟬蛻挈貳之自消息，又何以知龕日覆雲之不爲暈氣五采耶。又何以知人世之雕繪而繡錯，目眩而心亂者之有異乎此耶。噫，觀止矣。學

陸曰：予遊名山多矣，直上百里，無所因緣，則未之聞見也。高出五嶽，秀甲九州，天竺先生之言也。楚人李維植，述於臺側。李公本甯，前予守西川也。○陳子昂感遇詩：金鼎合神丹，世人將見欺。飛騎羊子，胡乃在峨眉。變化固非類，芳菲能幾時。疲苦逾世，憂悔日侵淫。眷然顧幽褐，白雲空涕洟。又浩然坐何慕，吾蜀有峨眉。念與楚狂子，悠悠白雲期。時哉悲不會，涕泣久漣洏。夢登綏山穴，南采巫山芝。探元觀羣化，遺世從雲螭。婉孌時永矣，感悟不見之。李白峨眉山詩：蜀國多仙山，峨眉邈難匹。周流試登覽，絕怪安可悉。青冥倚天開，彩錯疑畫出。冷然紫霞賞，果得錦囊術。雲間吹瓊簫，石上弄寶瑟。平生有微尚，歡笑自此畢。煙容如在顏，塵累忽相失。儻逢騎羊子，攜手凌白日。鄭谷峨眉山詩：萬仞白雲端，經春雪未殘。夏消江峽滿，晴照蜀樓寒。造境知僧熟，歸林認鶴難。會須朝闕去，祇有畫圖看。賈島送譚遠上人，下視白雲時。山房掛樹皮，垂枝松落子。側頂鶴聽棋，清淨從沙劫。中終日未敲，金光明本行。同侍出峨眉，釋皎然思遊峨眉。寄林下諸友詩：剛有峨眉念，秋來錫欲飛。會拋湘寺去，便逐蜀帆歸。難世堪言善，閑人合見機。殷勤別諸友，莫厭楚江薇。曹松送僧入蜀看夏詩：師言結夏入巴峯，雲水回頭幾萬重。五月峨眉須近火，木皮嶺上祇如冬。薛能咏峨眉聖燈詩：莽莽空中稍稍鏡，坐看迷濁變清澄。須知火盡煙無益，一夜闌邊說向僧。○子有前後峨眉二歌，前峨眉山歌：金陵爲松谷，上人作云：峨眉山上月，千里若爲看。峨眉山上雪，萬古逼人寒。山青如黛雪如粉，明月鏡中何隱隱。雙峯縹緲畫眉，挂在長空不可盡。西域雪山絕嶺响，此中應見西方人。普賢菩薩行具足，三千徒衆皆應真。始信峨眉自惆悵，不作巫山神女身。八十四盤婆羅樹，花

開如繪復如素。一間版屋千重嶺。正值行人問山路。登山路轉難。投寺日已晚。古苔如髮長。新松學蓋偃。冰窟炊不成。雷洞眠難穩。真僧入定久。行腳乞食遠。鉢裏龍形小。岳前鳥聲囀。雨氣沉如墨。雲光疾似電。應有千化身。故作百寶現。橋梁宛虹架。樓臺疑蜃變。天竺皆騎象。星光盡散燕。奕奕九微燈。莽莽五色線。人人爲攝受。各各覩顏面。欲知色是空。色卽空中滅。世事如幻影。詎必歎奇絕。依舊峩眉山。明月照清徹。君來白門秋。山月幾圓缺。浩浩江水流。尙帶峩眉雲。○後遊峩眉歌云。君不見太行誠險阻。西蜀峩眉羞。與伍。又不見雪嶺長晶瑩。來映峩眉一段青。禹貢蒙山此稱首。梵語勝峯傳日久。洞天列在位之七。秀色甲乎州有九。君不見軒轅氏。跪謁皇人叩元旨。又不見鬼谷子。著書瑤瑤藏洞裏。隴西仙人宿山圖。採藥山中顏色殊。葛由賣羊從此去。接與歌鳳胡爲乎。君不見子規啼處寶誼悲。夜啼竹裂人不歸。又不見崑崙伯仲未可分。逸少曾詢周撫軍。唐家子昂稱詞伯。青蓮居士李太白。往往見諸吟詠間。白頭欲返青山宅。豈是峩眉善妬人。江水茫茫難問津。我今來遊亦偶爾。不然惆悵蜀國將三春。三春花已謝。木冰猶未嫁。五月披重裘。四時無一夏。娑羅闢雪開。松枝受風亞。仙僧如故常。客子驚云乍。乍見甚遲迴。人生不再來。足篆符文水。身居光相臺。并絡金莖下。天門玉藥開。願言獻北極。千秋萬歲杯。

夾江縣

青衣水來遶縣界。而飛水溪注之。溪源出瀑布泉。狀如素練。李太白所謂瀑布天落。半與銀河爭流者耶。而鳳凰。天馬。虎履。伏龜。諸山。或舞。或翥。或躡。或處。左右而挾持之。過當縣城。下稍平坦。宋謝達夫詩。兩峯



懷抱揖平川。張孝芳詩。平川麥穗藹如雲。過此而東南三十里。乃作籬鉤之狀。晉張神君所謂日移紅影在籬鉤者。此也。○道書云。平岡化依鳳凰山。亦謂之依鳳岡。及桐梓林。山下有石湫門及石筍雷柱。可以禱雨。在縣南十里。○通志云。天馬山其勢飛騰似天馬。一曰馬鞍山。在縣東二十里。○形勝志云。青衣水遶於南。黑虎山峙於北。○福地記云。伏龜山有仙掌洞。相傳李阿真人所遺。宋人書其壁云。跨龍門。飲蟹泉。摩仙掌。扣丹竈矣。○本志云。治西二十五里。南安鎮。卽漢南安縣治。有鄧通宅故址。前有瑪瑙溪。中有磐石。可以修禳。○寰宇記云。夾江縣本漢南安縣地。卽封宣虎爲侯之邑。隋開皇中分龍游。平羌二縣置於涇上。臨江水。故號夾江。按涇水昔秦惠王得蜀。移秦人萬家以實之。秦人思故鄉水。乃呼此水爲涇水也。唐天寶六年改爲秦水。史記年表。宣虎以破滅荼功。食邑於此。○碑目云。漢和帝時開道碑在夾江縣西。青衣越巂道界。中有永和七年永和八年等字。○又云。漢楊宗。楊暢墓在夾江縣東十里。墓前兩闕。其左右皆隸書。縣志云。東二十里。漢川縣界有亭。亭內碑二通。前立二石柱。一云。漢故益州太守楊府君諱宗。字德仲。嘉道。一云。漢故中宮令楊府君諱暢。字仲普。嘉道。皆隸書大字。○予按楊雄賦云。五兀參差。左太冲賦。躡五兀之蹇澹。本志以爲縣之北隅五兀山也。後漢書。費貽宅。蒼草生焉。常有五色雲氣覆其上。貽蓋不屈於公孫述者。雉爲郡之夾江人。

### 洪雅縣

離堆川流東西。屈曲百三十里。而後入大江。所謂洪雅川也。○碑目云。古夷獠誓碑。在洪雅縣市中。又云。

漢靈帝時張道陵碑。在洪雅之易俗鄉。有嘉平二年三月一日等字。○此縣之西十里修文山。卽雅江所注。驚湍怒濤。名曰龍潭。漁者不敢入焉。又二十里其地多竹。爲竹箐山。石甃梯磴。盤折而上。唐宋所設也。○又十里爲隱蒙山。晉處士龐居正字隱蒙。隱此。○又二十里爲花溪。發源自瓦屋山。與青衣合。可望雪嶺。積雪經年不化。范忠宣詩。雲堆雪嶺鋪銀界。日射金仙照碧津。○又廿里思經山。則與雅安分界矣。山趾有廢嚴道縣基。其上呵叱山。瀑布千仞。響撼山谷。有巨石上鑄羅漢一百有八。○縣之東南有金釜山。下臨平羌江。古老相傳。昔有主簿於此煉金丹。故曰金釜山。亦名主簿山。

犍爲縣

左思蜀郡賦。東越玉津。註云。江出璧玉。故名。華陽國志。蜀有七津之一也。今之犍爲縣兼有玉津縣矣。陸務觀舟過玉津詩。玻瓈江上送殘春。壘鼓催帆過玉津。宋自爲玉津令。貽田表聖詩。玉津縣裏三年閏。金粟山前九月愁。又云。竹裏衙人吏。花間押簿書。○今縣治在沉犀山上。寰宇記云。昔有犀牛渡到此。上沉一名沉犀灘。志云。沉犀洞在沉犀山下。上有亦壁數丈。下有元水千尺。○縣有石人。蜀記云。昔諸葛高征蠻中。十里刻一石人。今黎傷之路。尚有存者。陳羽城下聞夷歌詩。犍爲城下牂柯路。空冢灘西賈客舟。此夜可憐江上月。夷歌銅鼓不勝愁。○郭璞記云。犍爲縣北百里書樓山。是孔子背書樓。○本志云。子雲城在縣南三十里。昔楊子雲避亂於此。後人增築爲城。今水月寺是其故址。俗譌爲紫雲城。○碑目云。孝女碑在犍爲縣清溪口楊洪山下。東漢永建初。孝女叔先雄以父尼和墜湍水。尸喪不歸。於溺處自投水死。

後五日與父屍相持浮江上。郡表言爲雄立碑。宋元祐中重立。本志云。清水溪在縣南十里。流至孝女渡入江。○神異傳云。趙昱嘗隱青城山。隋煬帝起爲嘉州太守。時健爲潭中有老蛟爲害。昱率甲士千人夾江鼓譟。持刀入水。有頃。江水盡赤。昱左手執蛟首。右手持刀。奮波而出。隋亂隱去。不知所終。後嘉州水漲。人有見昱青霧中騎白馬。從數獵者於波面過。宋太宗封神勇大將軍。廟食灌江口。○碑目云。健爲縣東南四十里有唐大佛寺。寺中菊坡二大字。乃袁天綱筆。○通志云。宋邵博墓在健爲縣。博爲制置司參議。卒葬於此。本志云。康節嘗言世亂。惟蜀可居。宣和末。伯溫攜家入蜀。止於嘉州。今健爲之紫雲城。是其故業矣。○杜甫宿青谿驛奉懷張員外十五兄之緒詩。漾舟千山內。日入泊荒渚。我生本飄飄。今復在何許。石根青楓林。猿鳥聚儻侶。月明遊子靜。畏虎不得語。中夜懷友朋。乾坤此深阻。浩蕩前後間。佳期付荆楚。自註云。青谿驛在嘉州健爲縣。崔塗秋日健爲道中詩。久客厭歧路。出門吟且悲。平生未到處。落日獨行時。芳草不長綠。故人無重期。那堪更南渡。鄉國已天涯。范成大健爲江樓詩。河邊塔立看歸篷。三老開頭暮欲東。漲水稠灘連峽內。淺山浮石似湘中。無人驛路榛榛草。有客江樓浩浩風。種落塵消少公事。曠哉新語寄詩筒。蘇軾健爲王氏書樓詩。樹林幽翠滿山谷。樓觀突兀起江濱。云是昔人藏書處。磊落萬卷今生塵。江邊日出紅霧散。綺牕畫閣青氛氲。山猿悲嘯谷泉響。野鳥嚶戛巖花春。借問主人今何在。被甲遠戍長苦辛。先登搏戰事斬馘。區區何者爲三墳。書生古亦有戰陳。葛巾羽扇揮三軍。古人不見悲世俗。回首蒼山空白雲。

威遠縣

縣有中峯。峯巒峭拔。又有中溪。溪水幽清。寰宇記云。東十五里葛仙山。古志相傳。葛仙翁曾遊其地。志云。舊設觀仙臺。碑刻剝落矣。○山居錄云。威遠李圃。澆熙中以忠州別駕歸隱白茅山。中築秀發齋。吟咏自適。齋銘曰。前山特秀。入我牕戶。朝來爽致。起我幽趣。望天宇之澄明。何迷途之獨悟。指頤終日。爲蝶爲周。兩忘之矣。聊舉扇以自障。豈世塵之能污。行歌山中。採其薇矣。雲外飛鴻。悠然來去。而弋人何慕哉。

榮縣

蜀地不宜松。而榮州之松獨著。紀勝曰。榮黎松樹如龍盤。陸游詩。枿根橫走松倒植。故擅有其奇狀矣。○曰榮黎。曰榮隱。曰榮德。所謂三榮也。寰宇記云。榮黎山在州東十五里。山上有龍池。池邊有松如盤龍。竹亦有如龍形者。俗謂之羅漢杖。碑目云。榮黎山古寺碑。唐元和禱雨碑。俱在本山上。紀勝云。榮隱山在州西三十里。一名石筍。無名氏石刻云。筍山高極入穹蒼。人道虎爲殃。行人過此不曾傷。咸陽宮闕在平地。高鹿食人無數計。吁嗟苛政猛於虎。斯言垂萬古。古有榮隱先生修道於此。石室猶存。碑目有榮隱山修道觀石碑。○方輿云。榮德山在州東北四十二里。州以此得名。其山在谷中。獨拔五百餘丈。中有希夷觀。老君祠。刻石爲像。有小路至山巔。以木爲梯。半山有唐刺史薛高丘磨崖碑。碑目云。開元二十年刺史薛高丘立。多載僊靈事。今已磨滅。本志云。榮德山爲陳搏修真處。又名希夷山。有石室二十四。及龍池。千葉蓮。○唐劉兼初至郡詩。嘉陵江畔接榮川。兩岸旌旗下瀨船。郡印已分炎瘴地。朝衣猶惹御爐煙。蓮塘小

飲香隨艇。月榭高吟。水壓天。錦宇莫嫌歸路遠。華夷一統太平年。又有去年今日詩云。去年今日到榮州。五騎紅塵入郡樓。貔虎只知迎太守。蠻夷不信是儒流。姦豪已息時將泰。疲瘵全蘇歲又周。聖主若容辭重祿。便歸煙水狎羣鷗。○碑目。有唐貞元二年建。榮縣碑。今移植於東橋。有榮州院碑。僞蜀司倉參軍苟延慶撰。本志云。蓮宇山在學宮後。有宋人九城圖碑。城東桂林山。舊縣學有衡陽王書文明碑。○碑目。又云。真義侯碑在本廟。唐元和二年遷。舊經云。卽古蜀將獨孤白馬二人廟也。又云。大周聖德勒石碑在州衙子城門外。長安三年章綸撰文。○劉兼登郡樓詩。偶奉繪書蒞旭川。郡樓佳致盡依然。松欹鳥道雲藏寺。月滿漁舟水浸天。望帝古祠花簇簇。錦城歸路草芊芊。有時倚檻垂雙袂。故國風光似眼前。○陸務觀自序其詞云。三榮郡治之西。因子城作樓觀。曰高齋。下臨山村。蕭然如世外。予留十日。被命參成都戎幟而去。臨行徙倚竟日。作桃源憶故人一首。所謂衰翁老去疎榮利。絕愛山城無事也。○城北有橫溪閣。務觀閣上。小宴沁園春詞引云。橫溪閣者。跨於雙溪之上也。一自西來其水濁。一自東來其水清。二水合流於城下。爲閣以頽之。其北鳳鳴山。則黃魯直所題。榮川祖無大師此君軒在焉。紀勝云。鳳鳴之竹多茂實。言此竹結實。有鳳來棲也。魯直詩云。王師學琴三十年。響如清夜落澗泉。有酒如澗客滿門。不可一日無此君。當時寺栽數寸碧。聲挾風雨令連雲。此君傾蓋如故舊。骨相奇怪清且秀。程嬰杵曰立孤難。伯夷叔齊采薇瘦。霜鐘堂上弄秋月。微風入絃此君說。君家周彥筆如椽。此君語意當能傳。○勝覽云。龍洞在州東南四里。真如院巖穴峭深。洞左右石壁奇聳。巨柏老蒼。洞右有石角立。舊經以爲孫登嘯臺。三者乃榮之

勝處。陸游詩。嘯臺載酒雲生屐。仙穴尋梅雨墊巾。碑目云。嘯臺磨崖記。宋隆興元年端午日榮守太史公李焘仁父書。○予考諸傳記所載。榮雖山谷間。實爲郡國一都會。青陽門記云。榮州有青陽洞。以少昊國在其北門。今正臨之。故名。按史。黃帝子元囂封於青陽國。爲少昊金天氏。少昊降居江水國於青陽。以金德王。位在西方。集覽云。江水在蜀青陽。宋朝類苑。崔仰之送人牧榮州詩。山色臨巴迴。江流入漢清。○志云。邑東榮川。卽古遯水河。岸有竹王祠。蓋以祀夜郎王者。蜀記云。昔有女人於溪浣紗。有大竹流水上。觸之有孕。後生一子。自立爲王。以竹爲姓。漢武使唐蒙伐牂柯。斬竹王。土人不忘其本。立竹王廟。歲必祠之。不爾爲人患。薛濤題竹郎廟云。竹郎廟前多古木。夕陽沉沉山更綠。何處江村有笛聲。聲聲盡是迎郎曲。○漢地理志云。縣有滇池。周迴三百里。水出駿馬。日行五百里。專同大宛。又有馬鳴戍。益州記云。漢刺史章拔夜過此地。聞神馬嘶。漢中馬嘶以應之。故有此戍。○成都市九州要記云。和義郡。古夜郎之地。武帝時開南中。使爨道令通爨青衣道。無功。唐蒙將殺之。令曰。恨不見成都市而死。蒙卽立市如成都。以殺之。故曰成都市。按和義郡本屬瀘州。寰宇記云。唐貞觀八年割屬榮州。○志云。城西清富山。有古榮王府。按周榮公封國之後。唐憲宗封其子贛。宋眞宗封子德雍。孝宗封子光宗。甯宗封子嘏。俱曰榮王。縣舊有綾錦村。杏春村。皆宋藩封故迹也。○朝野雜記。天子卽位。嘗所領州鎮。自防禦州而下。皆陞軍名。若節鎮州。則建爲府。光宗自榮州刺史進封榮王。而榮州不錫軍名。蓋中書之誤也。南渡後始陞爲紹興府。○宋名臣傳。載李昉爲國子直講。求郡晨登講席。諸生見昉巾兩焰火起。是日報得榮州。蓋當時亦甚重之矣。

# 蜀中名勝記卷之十二

## 眉州

賈島送穆少府知眉州詩。劍門倚清漢。君昔未曾過。日暮行人少。山深異鳥多。狖啼知峽雨。棧盡到江波。一路白雲裏。飛泉洒薜蘿。李頎眉州別李使君詩。回首雪峯前。朱門心杳然。離人自嗚咽。流水莫潺湲。毒草通蠻徼。秋林近漏天。一生從此去。五字有誰憐。薛濤送鄭眉州詩。雨暗眉山江水流。離人掩袂立高樓。雙旌千騎駢東陌。獨有羅敷望上頭。趙抃按獄眉山舟行詩。攜琴曉出錦官城。千里秋原一望平。放舸急流身覺快。披雲孤嶼眼增明。農田雨後畦畦綠。漁笛風前曲曲清。訊獄遠邦先滌慮。卹哉休戚在民情。蘇軾寄黎眉州詩。膠西高處望西川。應在孤雲落照邊。瓦屋寒堆春後雪。峨眉翠掃雨餘天。治經方笑春秋學。好士今無六一賢。且待淵明賦歸去。共將詩酒趁流年。黃庭堅次韻子瞻寄眉山王宣義詩。參軍但有四立壁。初無臨江千木奴。白頭不是折腰具。桐帽櫻鞵稱老夫。滄江鷗鷺野心性。陰壑虎豹雄牙鬚。鸚鵡作裘初服在。猩血染帶鄰翁無。昨來杜鵑勸歸去。更得把酒聽提壺。當今人材不乏使。天上二老須人扶。兒無飽飯尙勤讀。婦無複襪且著襦。社蠶可漉溪可漁。更問黃鸝肥與癯。林間醉著人伐木。猶夢官下聞追呼。萬釘圍腰莫愛渠。富貴安能潤黃墟。○郡有孫氏書樓。魏了翁記曰。孫氏居眉。以姓著。自唐迄今。人物之懿。史不絕書。而爲樓以儲書。則由長孺始。樓建於唐之開元。至光啓元年。僖宗御武德殿。書書樓二

字賜之。今石本尙存。自僞蜀毀於災。乃遷魚鰕。其居爲佛氏所廬。今所謂傳燈院是也。若里巷則固以書樓名。長孺之五世孫降衷。嘗遊河洛。識懿祖皇帝於龍潛。建隆初召至便殿。賜衣帶圭田。特授眉州別駕。因市監書萬卷以還。然樓尙未復也。別駕之孫關。乃入都。傳東壁西雝之副。與官本市書。捆載而歸。卽所居。復起重樓藏之。魚鰕之有樓則防乎。此又嘗除塾爲師徒講肆之所。號山學。於是士負笈景從。而書樓山學聞名於時矣。方樓之再建也。在天聖初。關之從兄直講君堪嘗爲作記。錢內翰希白。宋景文子京。皆賦詩。關性侷儻。不耐衣冠。衣方服其卒也。從弟文懿公爲識其竊。有不儒其身。而儒其心之語。故里人又六世孫曰某懼忝厥世。乃更諸爽塏。以唐僖宗所書樓刻揭之。樓視舊增拓焉。且病所儲之未廣。走行闕下。傳鈔貿易。以補闕遺。竭其餘力。山學載與。以余二十年雅。故以儒心名之。比歲樓又燬於火。書僅有存者。儒心之請書厥顛末。余因惟昔人竊書之盛。鮮有久而弗厄者。梁隋之盛。或壞於火。或覆於砥柱。唐太元文昭之盛。或毀於盜。或散於遷徙。本朝之初。如江源叔所藏。合江南吳越之書。凡數萬卷。而子孫不能有之。爲戚僕盜去。與市人裂之。以藉物者。不可勝數。余偶過安陸。亦得其省中所藏晉史。則伏於他人者可知。安陸張氏得江書最多。其貧也一篋之富。僅供之炊。王文康初相。周世宗多得唐舊書。李文正所藏。亦爲一時之冠。而子孫皆不克守。宋宣獻兼有畢文簡。楊文莊二家書。可敵中祕之藏。而元符中蕩爲烟埃。晁文元累世之蓄。校讎是正。視諸家爲精。自中原無事時。已有火厄。至政和甲午之災。尺素不存。劉壯與家於廬山之陽。所儲亦博。今其子孫無聞焉。南陽彥氏積書凡五十篋。則盡歸諸晁氏。嗚呼。斯非天



地神人之所靳者耶。而孫氏之傳，獨能於三百年間，屢絕而復興，則斯亦不可尙矣。夫雖然，余嘗聞長老言，書之未有印本也。士得一書，則口誦而手鈔，惟恐失之。其傳之艱，蓋若此。惟傳之艱，故誦之精，思之切，辨之審，信之篤，行之果。自唐末五季以來，始爲印書，極於近世，而閩浙庸蜀之鋟梓，徧天下，加以傳說日繁，萃類益廣，大綱小目，彪列臚分，後生晚學，開卷瞭然，苟有小慧纖能，則皆能襲而取之，噫，是不過出口耳，四寸間爾。若聖賢所以迭相授受，若合符節者，果爲何事，而學之於人，果爲何用，則諷不加省，然則雖充腐物，凡於我何加焉，可不甚懼矣。夫按書樓復興，雖在魚鯽江，而始創則在州城也。今蜀中書賈之家，往往稱書樓，蓋本諸此。○有石氏畫苑，蘇軾記曰：石康伯字幼安，眉之眉山人，故紫微舍人昌言之幼子也。舉進士不第，卽棄去，當以蔭得官，亦不就，讀書作詩，以自娛而已，不求人知，獨好法書，名畫，古器，異物，遇有所見，脫衣囊食求之，不問有無，居京師四十年，出入閭巷，未嘗騎馬，在稠人中，耳目謾謾然，專求其所好，長七尺，髻而黑，如世所畫道人劍客，而徒步塵埃中，若有所營，不知者以爲異人也。又善滑稽，巧發微中，旁人抵掌絕倒，而幼安淡然不變色，與人遊，知其意難甚於爲己，有客於京師而病者，輒昇置其家，親飲食之，死則棺斂之，無難色，凡識幼安者，皆知其如此，而余獨深知之。幼安識慮甚遠，獨口不言耳。今年六十二，狀貌如四十許人，須三尺，郁然無一莖白者，此豈徒然者哉。爲亳州職官，與富鄭公俱得罪者，其子夷庚也，其家書畫數百軸，取其毫末雜碎者，以冊編之，謂之石氏畫苑。幼安與文與可遊如兄弟，故得其畫爲多，而余亦喜其畫。古木蓋竹，因以遺之，使置之苑中。○有三蘇祠，在紗線街，卽蘇氏故宅也。

門前榆樹。云老泉手植。奇怪礪礪。人爭取去爲假山。魏了翁知眉時祭公文曰。眉號士大夫郡。聖天子不以某不肖。奠守此土。其在境內凡百辟卿士。有益於民。夙夜承祀無忒。矧惟山川炳靈。世載蘇氏。一翁二季。先後相望。文章事業。在太史之典策。今居郡滿歲。顧歲時奉嘗。闕然弗諧。非所以風境律我。有民也。用修圭薦。展於廡下。以內翰太師文忠公黃門太師文定公。從祀。既齊。既稷。神保攸歆。敢不永與多士。承敦斯文。以無忘德。○有觀蓮亭。在祠西。池中環臺皆蓮。中有碑刻東坡小像。李龍眠畫。山谷頌濱贊。今移入寢。○方輿勝覽云。臨風閣在州治內。宋沈迥詩。烟霞生座右。林沼市城隈。州園十詠。邵博著。環湖在署後。魏了翁築翠羽書臺。遠景樓在州治北。太守黎錞建。蘇軾記。通志云。雪臺在遠景樓前。亦希聲築。○本志云。東北二里有洛城。後漢時築。蜀漢廢。齊通城在城北。南齊建武置。隋開皇廢。碑目云。唐眉州剏羅城記。大順二年。盧拯撰文略云。象耳鎮於後。峩眉列乎前。勝覽云。嘉祐閣枕羅城。繪三蘇於上。刻東坡和陶詩於壁間。宋史。唐末。山行章攝眉郡守。值四方騷。乃合五縣之力築城。周遭八里有奇。計一千八百六十五丈。名臥牛城。淳化中。李順之變。攻圍不下。及順誅。守者以城完受賞焉。○通義志云。昔人評吾州。山不高而秀。水不深而清。列眉通衢。平直廣衍。夾以槐柳。綠陰翳然。小南門城郭。家多竹籬桃樹。春色可愛。橋之下流。皆花竹楊柳。泛舟其間。鄉人謂之小桃源。蘇子瞻詩。清江入城郭。小圃生微瀾。子由詩。彷彿城南路。繁香撲市橋。○通志云。醴泉山在治西八里。環繞州城。山半有八角井。清甘如醴。松江在治東南。自蜀江分派西南流。至州城與醴泉江合。○方輿云。蜀江在城外。一名玻璃江。水色清澈似之。陸游詩云。玻璃

江水千丈深，不如江上離人心。君行未過青衣縣，妾心先到峩眉陰。金尊共醕不知曉，月落烟渚天橫參。車輪無角留不住，馬蹄不方何處尋。空憑尺素寄幽恨，縱有綠綺誰知音。愁來只欲掩屏睡，無奈夢斷聞疎砧。范成大和云：玻瓈江頭春淥深，別時沔沔流到今。祇言日遠易排遣，不道相思翻苦心。烏頭可白我可去，蒼花易青君易尋。人生若未免離別，不如碌碌無知音。蘇軾送楊孟容詩：我家峩眉陰，與子同一邦。相望六十里，共飲玻瓈江。後人因立共飲亭，又改爲江鄉館。在津口矣。陸務觀詩：玻瓈江上柳如絲，行樂家家要及時。只怪今朝空巷出，使君人曰宴慕頤。慕頤山在江東七里，狀如慕頤，因名。有至德觀，有爾朱洵丹泉。傳記所載以爲軒轅氏丹宅，山腹有穴曰龍洞。傳者以爲四目老翁。唐末有楊太虛得道於此。今洞中有三仙象，四目居中焉。日出東郊，渡江遊慕頤山，眉之故事也。春風樓、明霞閣，俱在山上。○蜀構机云：僖宗幸蜀，政事悉出內侍田令孜之手。左拾遺孟昭圖上疏論事，坐貶。令孜遣人投之慕頤津。後人爲立祠。裴澈詩云：一章何罪死何名，千載惟君與屈平。從此蜀江烟雨夜，杜鵑應作兩般聲。本志云：孟拾遺祠在慕頤山上。今廢。○志又云：老翁泉在慕頤山東二十里。蘇明允嘉祐集云：十數年前，月夜有一老翁，蒼頭白髮，偃息泉上，就之則隱，而入於泉。洵斃以石，建亭覆之，而爲之銘曰：山起東北，翼爲南西，涓涓斯泉，溢溢以彌。斂以爲井，可飲萬夫。里無斯人，將此爲誰。山空寂寥，或嘯而嘻，更千萬年，自潔自好，誰其知之。乃訖遇我，惟我與爾。將遂不泯，無竭無濁，以永千祀。梅聖俞寄蘇明允詩：泉上有老人，隱見不可常。蘇子居其間，飲水樂未央。淵中必有魚，與子自徜徉。淵中苟無魚，子特翫滄浪。日月不知老，家有雛鳳凰。

百鳥戢羽翼。不滯彼泉傍。○蘇軾送賈誼餞眉二首云。當年入蜀嘆空回。未見峩眉肯再來。童子遙知頌襜褕。使君先已洗樽壘。鹿頭北望應遙雁。人日東郊尚有梅。我老不堪歌樂職。後生試覓子淵才。又云。老翁山下玉淵迴。手植青松三萬栽。父老得書知我在。小軒臨水爲君開。試看一一龍蛇活。更聽蕭蕭風雨哀。便與甘棠同不剪。蒼髯白甲待歸來。自註。先君葬於墓頤山之東二十餘里。地名老翁泉。君許爲一往。感歎之深。故及之也。外史元羽張大齡志云。歐陽永叔爲明允作志銘云。公葬於彭山之安鎮鄉可龍里。在今墓頤山之東。地名石龍。柳家溝老翁泉之側。或石可二字易誤。嘉靖壬子臺史喻公。按眉問老泉墓。檄有司求所在。而修復之。上下彭眉間數月。竟無所得。於是從老翁泉之傍。設一虛塚。青神余修撰。承勛記其事於石。又有廣福寺者。乃勅賜門下侍郎蘇轍香火院也。宋故事。宰相得賜寺院。薦福文定入相時。有賜貶官後。章呂盡追奪之。復官。手詔再賜。自爲文記之。人以爲墳必在賜院之近。又乃就寺之後山。更作一塚。顧穎濱記中云。墳之西南十餘步有泉焉。廣深不及尋。晝夜瀟湧。又曰。墳東南四里許。有故伽藍。轍以請於朝。則前所修泉傍者。差是。而廣福之墳非也。但廣福傍有古桂樹。橫陰一畝。大十圍。亦非近代物。若明允之族譜亭。則在州西南古修文鄉蘇氏祖塋側。今亭廢。刻石亦不存矣。○碑目云。天池院去眉山縣十里。蘇文忠公嘗過之。今柱上有手書云。自老翁井還。偶憩治平丁未十二月七日。子瞻。凡十八字。○勝覽云。石佛山在眉山之南。蘇子瞻寄子由詩。石田向何許。石佛山下路。下有爾家山。千畦種秬稌。山泉宅龍窟。平地流膏乳。志云。豬龍泉在治南石佛鎮。曾有乳豬伏於此。化二鯉。蓋豬龍也。詳見怪異記中。

志又云孫抃墓在石佛鎮乾明寺前。按乾明寺在魚鰲鎮。孫學士書樓山學碑藏寺中。卽宋賜孫公抃薦福地也。○志又云大旺山在東南五十里。自墓頭山南趨。或起或伏。至此峯巒屹立。迴拱州城。蓋與三峩氣接矣。○勝覽云。息臺山在治西四十里。東館鎮北。太平廣記載眉州有叟嘗攜子入此山。遇一道人。指其子曰。天叟欲道人已。長跪求壽。道人取箒檢視曰。壽止十八。叟與其子懇求不已。乃舉筆改爲八十。後子壽果如數焉。○志云。大明寺近東館鎮。隋建。有九樓十八殿。屋廡三千。井亦四十八眼。基跡猶存。又有燈壁寺在東館鄉。宋紹興建。有東館書院。紹興初。眉州學者甚多。州學不能容。東館鄉士大夫呂君玘。倣古鄉校。捃爲學廟。春秋釋奠。以鄉士夫居家者主之。丹稜令馮時行爲之記。○志又云。連鰲山在西南九十里。山形如鰲。傍卽栖雲寺。東坡少時讀書寺中。嘗於石厓上作連鰲山三字。大如屋宇。雄勁飛動。其畫專車今存。

### 青神縣

益州記曰。青衣神號爲雷埴廟。班固以爲離埴也。蜀江至此。始有峽之稱。華陽國志。望帝以熊耳爲後戶。熊耳峽卽今之縣治矣。郡國志云。漢武帝使唐蒙破西南夷。路始於此邑也。○志云。青州城梁置。在治南十五里。古青神郡縣皆治此。自熊耳山視之。今當爲百花鎮。黃山谷集云。青神尉廳。蒼城頭舊屋。作借景亭。下瞰史家園水竹。終日寂然。了無人迹。又嘗綠陰之間。戲作長句云。當官借景未傷民。恰似鑿池取明月。蓋尉乃雅安張禮介卿。山谷之中表也。○志云。縣東門外有青羊橋。相傳老子騎青羊過此。而入成都。

又云長泉鎮有麒麟橋。王蜀時麒麟見於此。因立麒麟院。又云縣西瑞草橋。橋崩得殘碑。乃蘇東坡與丈人丈母書也。東坡外家在此。所謂相望六十里。共飲玻璃江矣。後洪雅主簿王宣義謝事。家居於此。東坡贈之詩云。歸來瑞草橋邊路。獨遊還佩平生壺。○縣之名勝。在乎三巖。三巖者。上巖。中巖。下巖也。今惟稱中巖焉。自縣解維。始由芙蓉溪。以兩岸多芙蓉也。繼由五渡溪。以溪水曲折。凡五渡也。又過慈姥磯。有石刻李壁詩云。洗盡一春歡酒塵。蒼江吹破碧粼粼。韶華過眼都如夢。祇有三峯是故人。泊舟直抵下巖有題名云。子瞻子由與侃師至此。院僧以路險見止。不知僕之所歷。有百倍於此者矣。丁未正月二十日書。沿溪數折。有喚魚潭。上卽慈姥巖也。篆刻中巖二大字。徑可四尺。河南邵博書。陸務觀詩云。春枕悠然夢何許。兩枝筇杖喚魚潭。又跋程伯正誼所藏山谷帖云。此卷不應攜在長安逆旅中。亦非貴人席帽金絡馬。傳呼入省時所觀。程子他日幅巾筇杖。渡青衣江。相羊喚魚潭清泉翠樹之間。與山中人掃石置風爐。煮蒙頂紫苗。然後出此卷共讀。乃稱爾過潭循山三里。始至寺。爲中巖。其傍有羅漢洞。卽牛頭僧以木鑰叩石筍處。此地懸崖峭壁。上刻千佛。石覆如屋。中有臥仙之迹。有玉泉坎。黃山谷銘云。玉泉坎。坎來自重險。發源無所。龍口琬琰。我來峽中。初酌蛙頰。靈湫世鮮。百泉莫與比。甘山僧溥拙。袁餅馨香遠。拂淪茗泉味。不揀行爲白虹止。爲方鑿口題此德。用勒蒼崖。其上巖去中巖一里許。唐末有佛刹。號垂拱寺。相傳巖下有龍聽僧講經於此。由是建寺。有三石筍。唐無盡禪師伏虎在石筍下。所謂伏虎臺也。范成大詩。赤巖倚玲嶸。翠邈森成削。岑蔚嵐氣重。稀間暑光薄。聊尋大士處。往扣洞門鑰。雙撐紫玉關。中巖翠雲幄。應

供華藏海。歸坐寶樓閣。無法可示人。但見雨花落。不知龍湫勝。何似魚潭樂。夜深山四來。人靜天一握。驚看杯桂白。月影到林壑。門前六月江。世界塵漠漠。寶餅有甘露。一滴洗煩濁。捫天援斗杓。請爲諸君酌。○山谷題名云。元豐庚辰歲。秋多雨。其八月戊午。口遊慈姥巖。禮諾巨那尊者。巖下有泉。發山足。奔突。色如乳而味甘。取之不竭。豈巨那所奉供耶。余因竭其舊水。涓滌見石。少焉復盈坎。漚漚投澗中。喚魚潭投齋餘飯。魚出食者數百。見人不驚。○眉山程逢時跋余玠詩云。相公平賊後。攜吏上崢嶸。裴晉公以後。無此奇遇。醉翁行樂處。草木皆可敬。歐陽子而後。世無此樂。先生晉公德業。文忠詞章。書史精妙。視鍾。王有逸氣。而於山林悠然。心會殆伯仲之間。有裴。歐也。試語山靈。自有宇宙。便有此山。幾曾有此客耶。○邵溥來。紹興元年五月旦。從其弟博任也。○資中張方。自漢川易節益部。將母游。弟嵩午。猶子觀復。二子知復。甥何杓。侍眉山蘇禮偕來。嘉定壬午二月既望。○金華楊緯。被命赴闕。艤舟巖下。敬修尊者香火而去。紹熙壬子孟冬九日。弟綜及男師復。師晉同至。○河陽郭忠得之行部嘉眉。艤舟巖下。攜子游中巖。瞻拜尊者。過憩石筍庵。歷覽勝境奇哉。政和八年六月三日。○里人任逢。被旨赴闕。長子商輅。侍行。親友送別。筍峯者三十有九人。嘉定丁丑十月癸酉。○邑人楊大全。被旨進朝。將家來修淨供宗黨。親朋會別於此者五十五人。紹熙三年九月旦。○谷居翁大丞相趙公。留題。清祐壬子鄉貢方於此題名。巖寺奎書。適從天來。是秋楊巽冠。外省史夢錫。在選中。以山英靈發越愈大。凌儀趙公。握奎平岡。繼借南宮第一之客。明年端午。合邑士楊興仁。申錫柄。仲夢炎。惲森。孫侯國。史朝瑞。彪錫。王斌。文起之。巽己。程方。何明。磨崖大書。以侈

盛舉。以開方來。○慶元戊午冬。高公純遣姪魏了翁赴龍飛策試。艤舟來遊。男載夏卿、文卿、定子、姪遊、侍行。越三年。載定子、褰褐行都。復侍親過此。弟夏卿、文卿、林卿、長弟淞、同山下飲。作伴留。又二年癸丑秋十月。了翁蒙恩召。除侍東去。舍於眉。信於青衣。明日孫真勤飲餞於此。兄弟之偕行者如戊午。獨伯仲不與。紹定己丑六月丙午。○郡人蘇薰侍諸父率四弟。以嘉定戊寅上元日游。誦坡翁江山風月本無常主。開者便是主人。語信然也。弟黨書。○愁霖貫序。人心久鬱。秋季之旦。晴景開霽。草木悅茂。江山清新。太子宮史籍聖源。命前王穆伯恭及前進士楊穎臣廷芳。進士程戩景貺。羽衣李有慶仲祥。出邑東津亭。方舸南下。登石徑數里。遊中巖。僧居清晏。薄暮聞道而歸。試校書郎領簿馮越石君玉。俾識其時。乃嘉祐丁酉之歲也。景貺題。○辛亥歲。予友楚人鍾惺來遊。作記云。去青神西南十五里。江色盡綠。玉中邊皆見。隔岸坐立數山。若架閣者。中巖也。巖下上連延可十數里許。迴流峻壁。冥壑複磴。竹樹蒙籠。大要向背。往復皆與此巖終始。渡江即水月樓。樓趾留江寺冠之。由樓視江則已瀕。由寺登樓乃反降。階垂窮與樓湊。階代樓為梯者強半。揣本齊末。度樓之腰。猶未能至乎寺趾也。降自樓。出山門右行。不見江。則摩磴如蟻。屢折為喚魚潭。魚聽掌出石壁百仞。立而微瀨。潭漱其脛。石無完膚。有邵伯溫大書可模。並壁行數武。為羅漢洞。洞低曲。僕而入。如行牛角中。隙處稍右。則為伏虎巖。巖為百千萬億。佛如恆河沙數。巖之半跨。磴為一小石橋。銜木其壁為閣。若居人架竹梁。上以承燕巢者。人屈曲行其下。沿緣洞壑。俯仰竹石者數里。曰此走井研富順道也。巖又半為流杯池。一曰太極池。有屋數楹。屋後為泉。泉流洞中。石壁四周有黃魯直大



小二石刻。壁間宋元刻頗多。每兩石縫接處。往往上下各截其半。中嵌俗筆。亦有居石隙苟完者。出洞緣磴行。與步數代去。所謂羅漢洞。伏虎巖者。度可四三里。乃復覩前鑿巖佛像。須眉歷歷可數。才隔一壑。尋槿可度。疑前此一段途徑可省矣。大抵喚魚潭以往。行皆並壑。石壁夾之。若岸。壑若溪。藤蘿蔽壑。中若蒼藻。老樹如槎。根若石猿。鳥往來若遊魚。特無水耳。諸峯暎帶。時讓時爭。時違時應。時拒時迎。哀益避就。準形匠心。橫豎參錯。各有妙理。不可思議。又行里許。踰躑拾級。乃睹古中巖題額。去三石筍不遠。所謂詎那尊者。引牛頭僧持鑰扣石筍。筍開得低頭佛盜珠是也。鍾子曰。自中巖至尊者。巖從下視上。頂踵腹背。其石脈皆當爲筍。筍隙且平處則置屋。仄則鑿磴。斷則爲橋。處危臨深。則設石欄。欄則復見江。從江中望巖上。僧舍佛刹。雖一居之內。前軒後寢。纍纍綴高壁。上下臺而不覺。其前後通也。登巖行屋中。皆磴道。乃稍得其要領。趾後竟卽摩前頂。石筍中分處如一門。尊者像處。其中右旋。復爲佛殿。殿傍一筍。屹若浮屠。與中分者而三。實一筍也。人直指其巋然三峯者爲石筍耳。筍上宋元刻亦多。俗書災石者。亦復倍之。萬曆辛亥十月二十一日晚。齋與弟恬及艾子。登於中巖焉。禮諾詎那尊者畢。說偈。偈曰。偶爾喪珠復返。急時扣鑰相求。未免勞勞多事。世尊不合低頭。又曰。未必衣珠真失。總緣巖石當開。自供羅漢遊戲。不管山僧往來。說偈訖返。○予凡三過中巖。皆有詩。其一云。中巖如化出。秀色類烟舍。到鳥無歸路。游魚或泳潭。泉聲隨地有。石筍與天參。若作此山長。於心無不堪。其二云。再識中巖好。彌添乍到情。泉流因委曲。雨氣益淒清。橋險必當度。樓虛何所成。唯應石筍上。安坐學無生。其三云。莫謂客來數。聊無塵俗牽。巖光淨

落日梅意入初年。手搗碑文古。身行洞穴深。白魚灘最急。且宿在灘前。蓋予最後游。同青神令康君視搗山谷諸碑刻。又自梓州牛頭洞來。故及之。

彭山縣

揚雄蜀記。秦惠王遣張儀司馬錯伐蜀。蜀王開明拒戰不利。退走武陽。獲之。卽此地也。郡國志云。漢元光四年益州刺史任安城武陽。周圍千三百丈。本志云。今之舊土城。是有任公橋。後漢朱褒獲麟於馬頰嶺。因改名爲麒麟橋。○漢犍爲郡理本志云。治西北五里。犍爲城。漢建元中築。碑目云。漢犍爲太守楊洪碑。在彭山縣北小板橋。五十年前餘。楊洪碑三字。今皆磨滅。○華陽國志云。郡去成都百五十里。渡大江。昔人作大橋。曰漢安橋。廣一里半。每秋夏水盛。斷絕。歲歲修理。百姓苦之。建安二十一年。太守南陽李嚴乃鑿天社山。尋江通車道。省橋梁。三津吏民悅之。嚴因更造起府寺觀。壯麗爲一州勝宇。其地東接江陽。南接朱提。北接蜀郡。西接廣漢。按晉永和。中於此置西江陽郡矣。初唐沈宇武陽送別詩云。菊黃蘆白雁初飛。羌笛胡琴淚滿衣。送君腸斷秋江水。一去東流何日歸。○郭璞江賦云。流二江於岷嶽。註。岷山。北江所出。岷山。邛嶽山也。中江所出。皆東注於大江。○寰宇記云。岷嶽山在縣東北十二里。導江從山南合流。下有漢張綱墓。志云。墓在岷嶽山東百五十步。漢書。綱字文紀。犍爲武陽人。仕廣陵太守。平賊黨張嬰。有恩。卒之日。嬰率其徒五百人送喪。還武陽。負土成墳而去。按岷嶽二山。在漢嚴道界。其尾入江。○雲笈七籤云。第五北平治在眉州彭山縣。上有池水。縱廣二百步。昔越人王子喬得仙處。碑目云。此山有大書北平。

山治之碑。餘不可識。碑陰書大唐上元二年道士施仕衡等字。本志云。北四十里北平治應室宿。上有天柱峯。夜常見五色燈。山下有王喬墓。唐杜光庭詩。桐柏真人曾此居。焚香厓下誦靈書。朝回時宴三山客。澗盡閒飛五色魚。天柱一峯凝碧玉。神燈千點散紅蕖。寶芝常在知誰得。好駕金蟾入太虛。○南中八郡志云。犍爲有魚鼻津數百步。一名彭女津。在彭亡山南。導江、阜江等水會處。彭祖冢及祠在此。後漢岑彭爲刺客所中而死。又名彭亡山。亦名平模山。郡國志謂之朝女山。云昔有朝祖女於此山得道。今足跡尙存。故名。志云。山距治北十二里曰彭女。彭模、平模、平無、皆一山。○神異記云。犍爲有一白虎。出則衆黑虎隨之。不傷人物。漢王褒招碧雞神祠。黃龍見。今白虎仁。蓋指此也。寰宇記引秦昭王射白虎事。非。○李膺益州記云。周德旣衰。九鼎淪散。一沒於此。或見其鼻。故名鼎鼻山。一名打鼻山。上有城。亦名鼎鼻。打鼻音近也。大江過於山下有灘。宋將朱齡石伐蜀。立寨於此。括地志云。鼎鼻山北有龍洲。東接導江水。按已上卽常璩所稱王喬升其北山。彭祖冢其彭蒙。白虎仁於廣德。寶鼎見於江漑也。○漢書綏和五年。犍爲人上寶磬十六。此地因謂之寶磬洲。○益部耆舊傳。朱遵武陽人。仕爲功曹。率兵拒公孫述。絆馬死。贈復漢將軍。有祠。○後漢建安二十四年。黃龍見武陽。赤水九日。劉氏以爲瑞應。因立廟。在長江村。導江東岸。碑曰云。漢刻黃龍甘露之碑。在彭山黃龍鎮。今移於繫龍橋。周地圖記云。彭山縣北四里有潭水。後漢漢安元年。仙人瞿君武入峨眉山得道。每年繫龍於灘。龐籍詩。巢鳳閣邊勞遠夢。繫龍灘下認前題。按已上卽常璩所稱犍爲上寶磬十六。劉向以爲美化所降。後漢朱遵拒公孫述。光武以爲士大夫郡。建安末年。黃

龍見武陽赤水。蜀人以爲劉氏之瑞應也。○寰宇記云。金華山在彭山縣東五里。有丈六佛像。夜多神燈。○紀勝云。彭山東北六里盤石山。普照寺。藏有宋太宗、真宗、仁宗御書。崖之半有石室。范鎮詩云。窮幽訪盤石。細徑入荒涼。踏葉履屨溼。澗花衣袂香。○方輿云。平蓋山在彭山縣北二十四化之一也。七籤云。山下有玉人。長一丈三尺。昔吳郡崔孝通於此學道得飛仙。本志云。平蓋治上應婁宿。治前洗墨池。唐隱士羅公遠題詠之處。有清暉、滌覽二亭。提刑張方記以爲在鼎鼻山椒。而勾氏之逍遙軒。恰與之相對也。杜光庭詩云。勢壓長江空八陣。吳郡仙客此修真。寒江向晚波濤急。深洞無風草木春。江上玉人應可見。洞中仙鹿已來馴。龍車鳳蓋非難遇。只要塵心早出塵。亡名氏詩云。平蓋山高古木疎。昔人曾此築仙居。井通八角寒泉湧。觀燬三清劫火餘。洗墨池邊丹竈冷。繫龍巖畔石潭虛。吟成獨坐荒苔上。閑看蝸牛學篆書。○七籤云。本竹觀在彭山治北。相傳以爲竹林。黃帝所手植者。杜光庭詩云。樓閣層層觀此山。雕軒朱檻一躋攀。碑刊古篆龍蛇動。洞接諸天日月閑。帝子影堂香漠漠。真人丹澗水潺潺。掃空雙竹今何在。只恐投波去不還。○楊祐甫彭山十事記。一曰象耳山。二曰彭祖宅。三曰大悲道場。四曰寶現磨鍼。二溪。五曰太白書臺。有石刻。太白留題云。夜來月下臥醒。花影零亂。滿人襟袖。疑如濯魄於冰壺也。杜光庭詩。山中猶有讀書臺。風掃晴嵐畫障開。花月冰壺依舊在。青蓮居士幾時來。六曰師悟志棲。二大士。會昌寺。七曰薛范二詩。八曰龍池蟹泉。九曰千歲松柏。十曰石恪畫護法神。○志云。縣東北二十五里有磨鍼溪。在象耳山下。相傳李白讀書山中。學未成。棄去。適過是溪。逢老嫗。方磨鐵杵。問何爲。曰。欲作鍼耳。白感其言。

遂還卒業。姐自言武姓。傍有武氏崖。薛能過象耳山詩。一色青松幾萬栽。異香熏路帶花開。山門欲別心潛願。更到蜀中還到來。又到處逢山更欲登。自疑身作往來僧。徒行至此三千里。不是有緣應不能。文同題象耳山寺詩。轉谷縈巖路始窮。隔林遙望一門通。溪山俱在見聞外。臺殿盡藏懷抱中。像閣眾窺明海日。經幢環珞撼天風。勞生又逐輕舸去。珍重高僧解苦空。○碑目云。縣北四十里有古塔。刻云唐中和三年浴佛日。知元禪師自成都遊。表眉還。至此山。愛其幽僻。遂立庵於上。名曰知元庵。○按已上卽鄺道元所稱武陽龍尾仙者。羽化之所。神棲白雲。屬想芳流。藉念泉鄉。遺詠在茲也。○寰宇記云。馮翊王廟在縣五里。古老相傳有漢馮翊王郭子明墓。按漢書功臣。非賜姓者不得封王。恐此非實。又漢武帝遣拔胡將軍郭昌再度入蜀討南夷。昌字子明。漢記云。武帝元封六年。益州昆明反。使將軍郭昌擊之。或卽是此人。○碑目云。彭山縣東三十里有宋師中碑。云梁武陵王蕭紀寓此練兵。欲東下。故後人爲立武陵寺。○方輿記云。縣界有樂黎城。唐開元十道要略云。漢何斌爲蜀郡太守。理於此時。郡邑凋殘。人物窮困。乃以已祿米施惠百姓。此數城之民。由是獲存。臨別。百姓以白米倍填。曰。荷君父之恩。無以報。後之州郡有職田。始於此矣。

### 丹稜縣

志云。赤崖山在治北二十里。高聳赤色。如鳥旂之狀。拱翼縣治。雖林木叢茂。不能蔽之。縣以此能名也。其下卽丹稜川矣。○漁隱叢話云。花卿家在丹稜之東館鎮。至今猶顯英氣。血食其鄉。按花欽字敬定。本關

中人。唐至德間。從崔光遠入蜀討段子璋有功。後平寇亂。單騎屢戰。喪其元。猶操戈至東館鎮。下馬沃盥。適遇浣紗女。謂曰。無頭何以盥爲。遂自偃仆。居民葬之溪上。廟祀不絕。宋封爲忠應公。邵博云。州西有花將軍廟。廟史以阝藏。唐至德元年十月。鄭丞相誥云。花敬定將軍也。謝臬羽花卿家行云。濕雲模糊埋秋空。雨青沙白丹稜東。莓苔陰陰草茸茸。云是花卿古來冢。花卿舊事人所知。花卿古冢知者誰。精靈未歸白日西。廟鴉啄肉枝上啼。縣州拓黃魂正飛。○本志云。縣北十五里。龍鶴山三大字。宋孝宗書也。有松柏山碑記云。山有三宮九觀。乃成無爲。楊正見李鍊師成道處。唐天寶年建。杜光庭題龍鶴山詩。抽得閑身伴瘦筇。亂敲青碧喚蛟龍。道人掃徑收松子。缺月初懸天柱峯。李肅詩曰。已作清時鳥倦飛。杜鵑何事更催歸。似嫌住處猶城郭。不解攜家隱翠微。其子璧詩云。蕭條白日閉巖扃。留作遊人萬古情。猶有山中舊時鹿。舉頭如聽讀書聲。○此縣有楊素翁者。奇士。從黃魯直遊。盡刻杜子美兩川詩於眉山。所謂大雅堂也。魯直記曰。余謫居黔州。盡書子美夔峽兩川諸詩。以遺丹稜素翁。俾刻諸石。使大雅遺音久湮沒而復盈三巴之耳。素翁乃作高屋廣楹。以庇此石。因請名焉。余名之曰大雅堂。仍爲作記。其略云。由子美來四百餘年。斯文委地文章之士。隨世所能。傑出時輩。未有升子美之堂者。況家室之好耶。余嘗欲忻然會意。箋以數語。終以汨沒世俗。初不暇給。雖然。子美詩妙在無意於文。而意已至。非廣之以國風雅頌。深之以離騷九歌。安能咀嚼其意味。闐然而入其門耶。故使後輩自求之。則得之深矣。使後之登大雅堂者。能以余說而求之。思過半矣。彼喜穿鑿者。棄其大指。取其發興。於所遇林泉。人物。草木。魚蟲。以爲物物皆有所

託如世間商度隱語者。則子美之詩委地矣。





# 蜀中名勝記卷之十三

邛州

漢書張騫自河源歸來得高節竹植於邛山故名邛來郡國志云邛峽山自沅黎直走千里至臨邛環抱爲鎮山圖經云山曰邛峽浸曰邛水民曰邛民毛曰邛竹矣○水經註云江水又逕臨邛縣王莽之監邛也莽改成都爲導江太守爲卒正時公孫述爲導江卒正治臨邛志云廢公孫述城在州南十里○華陽國志張儀城臨邛周迴六里高五丈其制與成都郛同○寰宇記卓王孫宅在州南五里基方十里耕者往往得銅錢按史記卓氏之先趙人秦破趙遷卓氏夫妻推輦而出曰吾聞岷山之下沃野下有蹲鴟乃求遠遷致之臨邛華陽國志臨邛有古石山出石礮大如蒜子於火燒合之成流支鐵甚剛因置鐵官有鐵祖廟漢文帝以鐵銅賜侍郎鄧通通假民卓王孫歲取千匹故王孫貨累巨萬億鄧通錢亦盡天下寰宇記鐵山鑄錢卽此山也山出木蓮不異水之芬芳○史記司馬相如成都人素與臨邛令王吉善相如客舍舍都亭王吉日往朝卓王孫聞令貴客爲具召之并召令酒酣令前奏琴曰竊聞長卿好之願以自娛相如爲鼓一再行是時卓王孫有女文君新寡好音故相如以琴心挑之相如時從車騎甚都文君竊從戶窺心悅而好之相如乃令侍人重賜文君侍者通殷勤文君夜奔相如與俱之成都○采蘭雜志載文君閨中一井文君手汲則甘香沐浴則滑澤鮮好它人汲之與常井同本志云白鶴驛有文君井水作

酒味釋無可送李少府之任臨邛詩。邛南才作尉，調補一何卑。發論惟公幹，承家乃帝枝。山長風裏棧，江  
蔭石和澌。奮井王孫宅，還尋獨有期。陸務觀詩。落魄西川泥酒杯，酒酣幾度上琴臺。青鞋自笑無拘束，又  
向文君井上來。○水經註云。江水又與文井江會。李冰所導也。江上有長堤，堤跨四十里，有朱亭。亭南有  
青城山，山上有嘉穀。山下有躡鷗，卽芋也。所謂下有躡鷗，至老不飢。卓氏之所以樂遠徙歟。○酈道元又  
云。文井江至蜀郡臨邛，與布濩水合。華陽國志云。布濩水自布濩來合。文井江有火井，夜時光映上，昭。民  
欲其火，先以家火投之，頃許如雷聲，火焰出，通耀數十里，以竹筒盛其光，藏之可拽行，終日不滅也。井有  
二水，取井火煮之一斛，水得五斛，鹽家火煮之，得無幾也。博物志云。臨邛火井，諸葛丞相往視之，後火轉  
盛，蜀都賦云。火井沉燧於幽泉是也。隋置火井縣於此。舊史云。袁天岡爲火井令，殘碑尙存，有斷其龜趺  
以作盆盎者。立斃。圖經云。天罡營登山相縣治，其處有相臺山，文同寄太博孫公遊火井詩。七盤磴道與  
雲浮，下見高林壓縣樓。元時始省入州。○張說被使在蜀詩。卽今三伏盡，尙自客臨邛。歸途千里外，秋月  
定相逢。李頻送友人之蜀詩。天際蜀門開，西看舉別杯。何人不異禮，上客自懷才。夜澗青林發，秋江綠水  
來。臨邛行樂處，莫到白頭回。唐求送友人歸邛州詩。鶴鳴山下去，滿篋荷瑤琨。放馬荒田草，看碑古寺門。  
漸寒沙上雨，欲暝水邊村。莫忘分襟處，梅花撲酒罇。又邛州水亭夜讌，送顧非熊之官詩。寂寞邛城夜，寒  
塘對庾樓。蜀關蟬已噪，秦樹葉應秋。道路連天遠，笙歌到曉愁。不堪分袂後，殘月正如鉤。又發邛州寄友  
人詩。茫茫驅一馬，自歎又何之。出郭見山虛，待船逢雨時。曉鷄鳴野店，寒葉墜秋枝。寂寞前程去，閑吟欲

共誰。李商隱寄蜀客詩。君到臨邛問酒壚。近來還有長卿無。金徽卻是無情物。不許文君憶故夫。梅堯臣送錢駕部知邛州詩。細雨梅初熟。輕寒麥已秋。路危趨劍道。夢穩過刀州。秦粟非吳食。巴粳類越疇。當壚無復舊。試似長卿求。范鎮送文與可通判邛州詩。半刺爲官美。臨邛自古名。何言緹軾寵。更侍版輿行。仙籍新年貴。賓僚舊日榮。壺漿故父老。應在半途迎。王安石送文與可通判邛州詩。文翁出治蜀。蜀士始文章。司馬唱成都。嗣音得王揚。舉壘漢守孫。千秋起相望。操筆賦上林。脫巾選爲郎。擁書天祿閣。奇字校偏傍。忽乘駟馬車。牛酒過故鄉。問君行何爲。關隴正繁霜。中和助宣布。循吏綴前芳。豈特爲親榮。區區誇一方。○鶴山在城西八里。常璩云。臨邛名山曰四明。亦曰羣羊。卽今白鶴也。漢胡安嘗於山中乘白鶴仙去。弟子卽其處建白鶴臺。魏華父營造記曰。州之西直治城十里所有山曰白鶴。林麓蒼翠。江流縈紆。蔚爲是州之望。隋唐迄今。庵院凡十四所。遠有胡安先生授易之洞。近有常公諫議讀書之庵。泉有滴珠。樹有木蓮。白鶴有臺。玉兔有踪。中峯信美。平雲之觀。西巖翠屏。萬竹之境。皆山中勝處。壁間繪像。率范瓊杜遺丘文播諸人名筆。雖丹青剝落。而筆法具在。本山志云。前輩丹青則有任子逸。范瓊。與夫文同湖州之遺筆。文人詞翰則有鄭少微。張公庠。與夫張商英。王賞。趙雍之舊題。至於靈鶴去而臺空。玉兔潛而石化。此山之有可紀書如此。宜其歛西州之勝。而爲臨邛無窮之觀也。信美亭。翠屏閣。俱在山頂。勾龍庭。實信美亭詩。嚮雷渡水過西頭。東面一亭无限幽。火井江潮盤附郭。浮圖天際表吾州。陸務觀翠屏閣詩。把酒孤亭半日留。西崖獨擅鶴山秋。○按益部耆舊傳。胡安臨邛人。聚徒於白鶴山。司馬相如從之受經。此縣又

有林闔善博學自古天子有輪車之使。惟闔與嚴君平知之。爲揚雄所師。○本志云。西十里盤陀山。有石刻佛像。唐人鑄吳師二字。其上又有郭汾陽師四字。五代及宋人皆有書墨。○又云。西八十里萬松亭。魏太和中。建於山絕頂。今僅遺址。文同詩云。四野豁嘉亭。松門夜不扃。水邊來半偈。月下了殘經。又云。西百里石盤戍。俗呼爲望軍頂。昔諸葛武侯駐軍於此。○碑曰云。臨邛令封君遺愛碑。陳子昂撰。又云。大唐邛州臨邛縣花置山寺。新造無量壽佛石龕像記。朝議郎守太子左贊善大夫前殿中侍御史馬宇撰。元祐丁卯十二月立碑。又云。邛州天慶觀希夷先生詩刻。文同跋。元豐中元日書。

蒲江縣

蒲江者。以治枕蒲水也。志云。南八十步。蒲泉方丈許。冬煖夏涼。四時不涸。蒲草生焉。有亭覆其上。曰蒲亭。○方輿勝覽云。浴丹池在蒲江縣之崇真觀。世傳軒轅修煉於此。鶴山集云。嘉泰中常有羣鶴西來。翔舞於紫極殿之前檻。自後閒歲一至。志云。紫極觀在蒲江治內。○七籤云。主簿山治在邛州蒲江縣界。郡主簿王與於此學道得仙。一名長秋山。南有石室玉堂。松柏生其前。本志云。長秋山有臥牛井。昔女冠楊正見修煉於此。得石臥牛於下。砌井而泉湧出。今井碑尙存。寰宇記又謂之小可慕山。言登此山景慕仙風。非小可也。○紀勝云。南十五里莫佛鎮。相傳漢文帝時。有莫將軍征西南夷歸而學佛於此。其佛臺前石羊庇尙在。居民往往於其處得金銀。杜光庭莫公臺詩。奇絕巍臺時濁流。古來人號小瀛洲。路通霄漢雲。迷晚洞。隱魚龍。月浸秋。舉首摘星河有浪。自天圖畫筆無鈎。將軍悟卻希夷訣。贏得清名萬古留。

大邑縣

寰宇云。大邑縣唐咸亨三年分益州晉原縣置在鶴鳴山東。道書云。鶴鳴山二十四化之第三化也。應氏宿山有二十四洞。應二十四氣。洞口約闊三尺。深不可測。每過一氣。則一洞竅開。餘皆不見。有七十二穴。應七十二候。東西二溪出其兩腋。太清宮建在頂。元真坊建在項。大坪是其背。延祥觀在天柱山。石柱腰巖是其兩翼。冠子山三峯中。終是其尾。乃馬成子。張道陵昇仙之處。杜天師鶴鳴山詩。五氣雲龍下泰清。三天真客已功成。人間回首山川小。天上凌雲劍佩輕。花擁石壇何寂寞。草平轍迹自分明。鹿裘高士如相遇。不待巖前鶴有聲。文同題鶴鳴化上清宮詩。祕宇壓孱顏。飛梯上屈盤。清流抱山合。喬樹夾雲寒。地古芝英折。巖秋石乳乾。隨輪遊底處。空自立層壇。東北十五里有青霞峯。峯下有碧玉潭。劍南詩藁云。青霞障碧玉潭。皆山水佳處。詩云。千巖角逐互吞吐。一峯拔起矜崔嵬。日光微漏見潭底。水氣上薄雲成堆。志云。此山常孕雲霧。又名霧中山。峯頂有金剛足跡。曰金剛臺。張俞詩。霧山環合自雲川。戶有清溪種玉田。萬木桃花不知處。幾人曾得問秦年。碑目云。鶴鳴山柱腰巖有李陽冰篆。龜鶴齊年。及陳搏草書。福壽大字。○勝覽云。平雲亭在大邑之靜憲山。蓋文忠范公鎮所居。公熙寧間上疏論新法致仕。既還蜀。窮山水勝處。徜徉此山。詩云。磴道雖云險。肩輿亦可行。坐來知日永。立處與雲平。本志云。靜憲山一名東山。山下土城相傳是蜀漢將軍趙雲築。蓋雲嘗防羌於此。有雲墓及廟存。○通志云。鳳凰山在大邑西八十里。勝覽云。鳳凰山有虎劈泉。唐契覺道人結菴於此。有虎爲之擘地出泉。有柏十圍。根盤巨石之上。如騎

鯨然曰。騎鯨柏。文同。邛州鳳凰山新禪院記云。臨邛郡西北皆大山所叢。衍迤磅礴。深蟠遠走。直注大渡。限迥巒譎。鬱如雲烟。涌如波濤。晴光陰嵐。明昧一闕。其間孤峯峩然。傑立豪峙。首領崖巖。腹背犖臯。翼開長登。尾棹高岡。繁林茂樹。綠蔭纈菜。圍擁森合。絳若毛羽。地志書之曰。鳳凰山者。蓋前人嘗以狀而名之爾。唐有契覺道人。艾草鑿址構庵。此地日禮華嚴祕典。以作佛事。嘗汲泉澗下。頗念其遠。有虎爲之驛地。出泉澄潔甘凜。悉異他所。發源甚盛。於今願之矣。

# 蜀中名勝記卷之十四

雅州

史記秦始皇二十五年滅楚。徙嚴王之族。以實此地。故曰嚴道。漢爲縣。屬蜀郡。文帝徙淮南王之族於此。楊用修蜀志補遺。引蜀本紀。以爲許由之友嚴儋所隱地也。○漢高六年分置青衣縣。水經。青衣水出青衣縣西。蒙山東。與沫水合。註云。縣故有青衣羌國。竹書紀年。梁惠成王十年。瑕陽人自秦道。嶓山。青衣水來歸。漢武帝天漢四年分沱黎郡。置西部都尉。主青衣。公孫述之有蜀也。青衣不服。世祖嘉之。建武十九年以爲郡。安帝延光元年置蜀郡。屬國都尉。青衣王子心慕漢制。上求內附。順帝陽嘉二年。改曰漢嘉。得此良臣也。本志又有邛穀王任君。貴越。僞人。新莽之亂。奮集英雄。起越巒。殺莽。所立太守枚根。而自立。保全一方。見西南夷傳。按州城隅有任使君廟矣。○晉末李雄竊據。夷獠雜居。西魏僑立蒙山縣。後置雅州。郡國志云。漢源縣有離堆。蜀守李冰所鑿。離卽古雅字也。州以此名。○圖經。州治舊在雅安山上。大中祥符間。國子博士何昌言爲守。以地多嵐瘴。徙於山之麓。本志云。州治後雅安山。又名月心山。山形如月。象心字。州治左點。所治右點。文廟居中。皆倚山也。○禹貢。蔡蒙旅平。和夷底績。葉少蘊。解云。蔡在嚴道。蒙在漢嘉。漢嘉卽嚴道也。舊傳。諸葛亮於此夢見周公。因立文憲王廟。遂號周公山。按文憲王廟記。軍事推官王育撰。參軍李夢徵書矣。周公山半有石筍。移之卽雨。寰宇記云。山勢屹然。有龍穴。常多陰雲。李肅遊蔡

山序。蜀惟岷山。蔡蒙二山雅獨兼有之。本志云。旅平者。禹治水成功。旅祭於此。俗呼爲落平山。頂有萬壑亭在焉。○寰宇記云。和川路在縣界西。去吐蕃大渡河五日程。從大渡河西郭至吐蕃松城四日程。羌蠻混雜。連山接野。鳥路沿空。不知里數。卽禹貢所謂和夷底績也。本志云。東北有和夷壩是矣。○大唐新語云。陸象先爲益州長史。奏嘉邛路遠。請鑿岷山之南。以從捷近。發卒從役。居人不堪。道亡瘡死。行旅無算。左拾遺張宣明。監姚衛諸軍事。兼招慰使。親驗艱險。移牒益州曰。此路高山。臨雲深谷。無景。至有斗絕。巨險。不通人蹤。經之者。必搏壁傍崖。脅息而度。雖竟日登頓。二十許里。木人猶堪淚下。鐵馬亦可蹄穿。象先覽之。兢惕。遽罷役。仍舊路以聞。蜀人頹焉。○孫漸昭應廟記云。其山蔡蒙。其關邛峽。水經注云。岷山東北百四十里曰峽山。中江所出。東注於大江。峽山。邛峽山也。在漢嘉嚴道縣。一曰新道。又東百五十里曰踞山。北江所出。東注於大江。故郭景純江賦曰。流二江於嵯峽也。○圖經云。嚴道山在縣南五里。本名鹿角山。唐天寶六年。勅改爲嚴道山。山下有丙穴。出嘉魚。方輿云。萬勝岡在州西。有龍觀寺。其趾曰百丈山。自邛峽或起。或伏。環繞州治。本志云。諸葛武侯擒孟獲。旋師至此岡下。人聚觀之。因建亭於上。爲龍觀亭。○碑目云。高孝廉墓碑在嚴道縣東二十里。按其碑有年月。乃漢建安十四年立。高君兄弟皆孝廉。有二石闕。其一曰故益州太守武陰令上計吏舉孝廉諸部從事高頤字貫方。其一曰漢故益州太守陰平都尉武陽令北府丞舉孝廉高君實字貫光。又一大碑其首云。故益州太守高君之碑。本志云。漢孝廉高君墓在金鷄山。孝廉橋。墓跡蕪沒。惟二石坊在田中。坊亦以大石堆梁而成。非石柱也。其一方隸云。漢故益



州太守陰平都尉武陽令北府丞舉孝廉高君。仍有數字剝落。方輿云金鷄山在嚴道北三十五里。俗傳有金鷄鳴於此。循金鷄山而上二百步有石室。中有石像。爲爾朱真人宋嘉泰中刻。尙存碑目。又云羊竇道碑在嚴道縣東三十里金鷄山下。漢永初六年碑也。○梁益記云大小漏天在雅州西北山谷高深。沉晦多雨。而黎州常多風。故謂黎風雅雨。宇文溥新路賦。惟天下之至險。有嚴道之漏關焉。孤峯上絕於青天。湍波下走於長川。斷崖橫壁立之岸。飛溜濺千尺之泉。洪适隸釋云。蜀郡太守何君閣道碑。光武中元二年刻。此碑蜀中近出。東漢八分。斯爲之首。字法方勁。古意有餘。如冠章甫而衣縫掖。使人起敬不暇。雖敗筆成冢。未易窺其藩籬也。○碑目云。平羌江繩橋碑。在嚴道縣平羌橋。有唐咸通十年上官朴所撰。碑字亦隸體。今在江濱廟。方輿云。平羌江源出西徼邊西北郭。謂武侯平羌夷於此。又云。沫水自廬山發源。注於平羌江。與沉黎之陽山江合流。○本志云。州西北一里曰清源橋。東北十里龍門橋。三十五里道遠。填橋五十里魚喜河橋。西七里曰銅頭河橋。近多功路曰大繩橋。已上皆索橋也。凡橋每歲仲春於兩岸各樹兩臬。長二丈有奇。臬上橫穿二柵。上布竹繩。互兩岸繩之。餘者屈垂向下。轆轤絞束。復橫以木梯。布以篾笆。周以欄索。其高低闊狹。視江爲度。唐獨孤及索橋贊曰。筌相引一索。人綴其上。如猿之縛。轉帖入淵。如鳶之落。尋橦而上。如魚之躍。頃刻不戒。實無底壑。卽此橋也。○錄異記云。唐玉果謫雅州刺史。經平羌江。中望巖腹。有鐵栢欲墜。緣崖視其碑曰。地裂山崩。水漂我墮。及長江危欲墮。欲墮不墮。遇玉果。五百年後改葬我。乃改葬之。○本志云。州北百四十里山谷中湧泉。深不可測。一日三潮。風浪如雷。昔見白馬。

自泉出田野間。雲擁之復沒。名曰白馬泉。又曰龍淵。又曰龍門。有宋紹興間。祈雨碑猶存。○此州韻事。有雙鳳亭在署廳後。爲蘇子瞻子由設。至和中。老泉攜二子謁太守雷簡夫。雷以書薦於張文定公。及韓魏公。歐陽文忠公。其後太守樊汝霖作堂以表其事。○無絃亭在州學南。長濱江側。隱士王潛所居。潛好琴。趙蒲獻公爲榜其亭曰濯纓文同堂。○黃魯直木蘭歌帖。梁甫吟帖。俱在郡治。○竹溪在郡西三十里。隱士胥九鼎所居。陶仙洞在焉。有林泉之勝。魏了翁寄題胥園詩云。胥君頽然來。錦囊背奚奴。探囊發詩卷。一一卿大夫。未識胥園面。詩卷自畫圖。掃石臥石影。長鐻斲芋區。胥君於此時。林泉傲金朱。

名山縣

禹貢蔡蒙旅平。蔡屬雅州。而蒙屬嘗縣矣。九州記云。蒙者沐也。言雨露常蒙也。山有五頂。最高者名上清峯。有甘露井。水極清冽。四時不涸。相傳漢僧理真所鑿。後日隱化井中。圖經云。蒙頂茶受陽氣全。故芳香獨烈。方輿云。虞允文嘗爲名山監茶。今清溪橋頭北廳猶在。有梅及槐柳皆雍國手植。壁間遺墨尙存。○水經注曰。縣有蒙山。青衣所發。東逕其縣。與沫水會於靈關道。寰宇云。平羌水之源曰邛崃水。又名平鄉水。西北自嚴道縣流入。自眉州洪雅縣界下。又名青衣水。本志云。五頂山下。青衣河流遶縣前。下田水口。入嘉州。○寰宇記云。羅繩山在縣西五里。從蒙山西流入盧山縣。又北接邛州大井縣。又云。鷄棟山在縣西南十七里。地里志以蜀有鷄鳴山。俗傳金鷄鳴。天下太平也。紀勝云。鷄鳴山卽古之名山。因爲名山戍。○碑目云。名山治東一里許。有紫府飛霞洞。開禧丁卯邑人苟洙於梓潼觀後。鑿一洞穴。刻神之父母像。

併鑿石龍蟠於其中。請神作記。親書於石。今石龍書院是也。○本志云。東北三十四里。古土城。周七十二丈。乃武侯征蠻所築。遺址見存。○寰宇云。大慕山在縣東四十里。南接河羅戍。北入邛州。高七十里。上聳天際。靈怪錯雜之所。○九州要記云。百丈縣本嚴道縣地。李膺記。臨邛縣南百二十里。至百丈。即其地。圖經云。有一穴口。方圍百尺。深如之。山有九折坂。夏則凝水。冬則毒寒。漢王陽爲益州刺史行部。至此輿歎。因之棄官。唐武德元年。置百丈鎮。貞觀八年。改鎮爲縣。今之驛曰百丈。里曰安賢矣。本志云。百丈河在東北六十里。源自蓮花山來。經百丈驛。東與邛水合流。至新津。入白馬河。又名千尺潭。又云。百丈縣南五里。銅鼓山。爲漢唐戍守之地。○寰宇記云。泉池山在百丈縣東四十里。山四面縣絕。上有泉池。因名。○本志又云。東南七十里。佛鼻山。左右有二目。謂之天目。元時於左目下建寺。曰天目。有大石甕。小石甕之名。

#### 榮經縣

寰宇記。榮經縣本嚴道縣地。東西連接大山。並無州縣。巖巒阻絕。不辨疆界。唐武德二年。置縣。因界內有榮經水口。戍爲名。本志云。榮水在城北。一出相公嶺。一出番境。經水在城南。一出瓦屋山。一出改丁河。一出汶川。按相公嶺者。以諸葛丞相征蠻所經也。改丁河源出黑石。汶川源出邛崃馬耳。榮經水北流入擒孟渡。即孔明七擒孟獲之地。○方輿云。瓦屋山在榮經縣東北二十里。形如瓦屋。上有念佛鳥。娑羅花。其巖朝現辟支。午現普賢。夜有神燈。或問禪惠大師。瓦屋何故卻以木皮蓋。師曰。錦府豈從機上織。劍門寧自匣中開。李諫詩。瓦屋如廡平。金仙關光景。○雅安志云。榮經西北三十里。紫眼關。以紫眼番人僑寓得。

名。卽甕溪關。○寰宇云。邛崃關在縣西南七十里。隋大業十年置。約山據險。當雲南大路。以扼番夷之要害。碑目云。邛崃關開路記。天寶六年章仇兼瓊撰。又云。漢蜀郡太守治道記碑。在榮經縣西三十里。建武中元二年立。又云。尊健閣碑。建武中元二年物。亦在縣西三十里。景峪懸崖間。巽巖李燾有跋。以辨正年譜。且引後漢紀。建武二十三年夏四月。改爲中元。無建武字。又按祭祀志。改建武二十三年爲建武中元。年。以此知記與志合。而紀失之矣。又云。神水閣記碑。在榮經縣東三十里。銅山峽中。碑久磨滅。不可考。古老相傳。其體大率如尊健閣云。

盧山縣


寰宇記云。盧山縣亦嚴道縣地。晉書地理志。姜維於此置城。隋仁壽元年重開此地。遂於姜維古城置盧山縣。以界內盧奴山爲名。按紹興二十三年。徐闕中記。土人祀姜伯約有廟。額曰平襄。○志云。治有開明王城故址。華陽國志。蜀王開明以靈關爲前門。寰宇云。靈關山在縣北二十里。峯嶺嵯峨。傍夾大路。下有山峽口。闊三丈。長二百步。俗呼爲重關。通蠻貊之鄉。入白狼夷界。漢書通靈山有眼孔四。一名鏤靈山。文選註。靈關山名在成都西南。漢壽縣界。陳陰鏗蜀道難云。王尊奉漢朝。靈關不憚遙。高岷長有雪。陰棧屢經燒。輪摧九折路。騎阻七星橋。蜀道難如此。功名詎可要。隋孔德紹送蔡君知入蜀云。靈關九折險。蜀道二星遙。乘槎若有便。希泛廣陵潮。按張揖注史記曰。漢鑿開靈山道。於此置靈道縣矣。○寰宇記云。盧奴山在縣東五里。與始陽山相接。始陽山在縣東七里。本名蒙山。唐天寶六年。勅改爲始陽山。高八里。東道

控川。歷巖道縣。橫互入邛州火井縣界。又云。大渡水從生羌界來。流入浮圖水。浮圖水在縣五里。從生羌界來。水中有孤崖。狀如浮圖。出貢金。○志云。廬山南十里。三江渡。通天全。六番。下注多功峽。入雅之平羌江。多功河上。飛仙閣爲木棧道。卽古漏閣也。○方輿云。龍頭山在廬山縣。前後峽綿互四十里。天橋如龍。控接番部。實爲要害。又云。崖鉢山在縣西三百里。上聳雲漢。莫測其高。○志云。漢樊敏墓在縣南七里。前有二石馬。隸碑在石馬東。碑目云。漢故檢校巴郡太守樊府君碑。建安十年三月上旬造。又云。兩面碑在廬山縣南五里。與府君碑甚近。碑面與背皆有篆文。歲久訛闕不可識。或辨其文曰。廬山縣碑。○宋趙明誠金石錄云。右漢巴郡太守樊君碑。其文云。君諱敏。字叔達。肇祖虛戲。遺苗后稷。爲堯種樹。舍漆從岐。天顧亶甫。乃萌昌發。周室衰微。雲伯匡弼。晉爲韓魏。魯分爲楊。充曜封邑。厥土河東。肆漢之際。或居於楚。或集於梁。君續其緒。華南西壘。又云。總角好學。治穀氏經。貫究道度。無文不睹。於是國君備禮招請。濯冕題冠。傑立忠響。有夷史之直。卓慮之風。鄉黨見歸。察孝除郎。永昌長史。遷宕渠令。大將軍辟。光和之末。京師擾攘。雄狐綏綏。冠履同囊。封挾長驅。卑走枕北。國復重察。辭病不就。再奉朝聘。七辟外臺。嘗爲治中。諸部從事。又云。季世不祥。米巫媚虐。姦狡並起。陷附者衆。君執一心。賴無滂恥。復辟司徒。道辭不往。牧伯劉公。表授巴郡。以助義都尉。養疾閭里。又辟奮義都尉。年八十有四。歲在叶洽。紀驗期臻。奄忽藏形。其後有銘。題建安十年二月上旬造。他漢碑類多刊缺。而此碑首尾完存。故載其大略於此。所謂米巫凶虐者。謂張角也。宋成都丘常跋云。此碑相傳名魏受禪碑。爲世絕出。而其款乃建安十年。又在黃初之前。雖暴露中。

莖而字畫醇古。文尙可讀。豈非所寓僻遠。而人無知者歟。然而千餘年間。霖雨之所濯。盛陽之所暴。有獸已倒。有門已摧。而此碑將仆。是可憫也。余因扶其既倒。植其將仆。又爲屋以庇之。庶幾永其傳也。崇寧壬午。知縣丘常題。○宋程勤跋云。皇上勵精更化。以揚祖宗之大烈。屬當京師父老。流涕太息。思欲復見漢官威儀之時。而僕仕於廬山。天下最窮處。迺得建安十年巴郡太守樊君故碑於荒山榛莽間。亟作大屋覆其上。表而出之。目其顏曰巴郡太守樊侯之墓。嗚呼。碑陰所記崇寧壬午。距今五十八年而遙。任斯邑者。皆吾鄉人。扶倒植仆。偶相似。然豈物之廢興。固有數耶。紹興己卯。眉山程勤懋傳書。○國朝李一本跋云。此碑踞於道周。迨今幾千有餘歲矣。在宋以前。訛爲魏受禪碑。大明一統志。謂其字文漫滅不可考。以故惑於聞見者。不爲注目。予捧檄竊祿。於茲屢經過焉。見其荒於荆榛。蝕於莓苔。亦謂信然。越弘治己未仲冬。因偕門生白應清。駱琰。陳宣。宋萬全等。訪古偶憩其下。因束篠爲帚。掃拂之。倏見字畫隱隱而出。皆醇古迥異。從者進曰。此商彝周鼎復出也。殆奇遇乎。亟爲磨洗。尋具楮蜡。如法摹搨。得墨本有三。蓋以防字畫之同異者。而考正之。然其模糊不可讀者。亦過半矣。旣而歸置軒次。校以隸本。參以衆目。就其可識者。僅得什之九。其疑誤者。則傍爲點注。以俟博古者正焉。載考古文苑所紀樊毅。樊安等碑。亦靈獻中所作。其屬辭比事。與此文勢相類。或者當時史遷之徒爲之也。夫文選所集。皆秦漢以來古文。而此碑獨不見錄。古文苑乃補文選。而作又不見載。毋亦此地僻在遐荒。而人不知歟。抑或惑於聞見之似。而不及錄歟。吁。是碑雖不見錄於古。幸而石不泐壞。延有今日。得以附入邑志。以永其傳。亦奇矣。匪徒爲斯邑之光。

實斯文之幸也。然則世之爲志者，苟徒據耳之所託，而不博歷以致審焉，則雖有石鼓之文，其不至於湮沒無聞者，幾希矣。是月十一日長至，蜀忠南李一本識廬山廣文也。

4472





本國學基  
叢書 蜀中名勝記

下



MG  
K928.7071  
2  
:2


書叢本基學國

記勝名中蜀

(下)

著佳學曹

行發館書印務商






# 蜀中名勝記卷之十五

## 下川南道

敘州府宜賓縣附郭

水經云。江水又東南。過犍道縣北。若水、淹水、從西來注之。華陽國志云。犍道縣治。馬湖江會。輿地廣記云。馬湖之上源曰若水。出旄牛徼外。南徑三縫。淹水注之。又東。逕越巂之馬湖縣。為馬湖水。又東北。至朱提縣。與濞水合。至犍道。入大江。○夷裔考云。犍人者。其先世本華人。有罪貶遠方。以棘園之。故其字從棘。從人。漢制郡縣有蠻曰道。故曰犍道。其俗每歲六月二十四日為星回節。競舉火把盈野。居傍城郭。與漢人無異。水經注引地理風俗記曰。犍人夷中最仁。有仁道。故字施。而秦紀所謂犍人之富也者。其邑漢高后六年城之。武帝感相如之言。使縣令南通犍道。費功無成。唐蒙南入斬之。乃鑿石開關。以通南中。迄於建寧二千餘里。山道廣丈餘。深三四尺。其鑿之迹猶存。王莽更曰犍治也。○郡國志云。犍在施夷中最賢者。多以荔枝為業。園植萬株。歲收百五十斛。益州記云。荔枝潭在犍道縣山頂。有一家惟生女貞樹。樹上常有白猿棲息。古謂之玉女家。志云。即峯巖也。在宜賓西百里。山坡荔枝連袤。今多屬廖氏。黃魯直詩。廖致平家綠荔枝。即此。○圖經云。犍道縣故址有三。漢武帝時在中方鄉。即今西南與長寧界。及唐太宗徙於蜀江之右。二江口。即今府治。武宗會昌中。以大水復徙於蜀江北岸。即今舊州。○輿地紀勝云。西漢犍道。



卽漢武遺唐蒙鑿石以通南中者。今石門是也。本志云石門江在府西南百三十里。俗呼橫江。又名小江。唐書韋皋傳石門卽隋史萬歲南征之道。古有詩云石城門峻誰開關。更鼓誤聞風落石。界太白嶺勝金湯。鎮壓西南天半壁。按本傳萬歲入南中見諸葛亮碑銘曰萬歲後勝我者過此。○方輿勝覽云蘭山在犍道縣界。圖經云蘭生於深林石門尤多有春蘭秋蘭崇蘭鳳尾蘭竹蘭石蘭諸名。春蘭花生於葉之下。崇蘭花生於葉之上。黃魯直幽芳亭記一榦兩三花而香有餘者蘭一榦十數花而香不足者蕙。○水經註云犍道縣有蜀王兵欄其神作大難江中崖峻阻險不可穿鑿。李冰乃積薪燒之。故其處懸崖猶有赤白元黃五色照水。魚從楚來至此而止。言畏崖嶼不更上也。本志云西北二十里朝陽崖是。○華陽國志有孝子隗通爲母汲江裔水。天爲出平石於江中。今石在馬湖江口。○益部耆舊傳曰張員妻黃氏女也。名帛。員乘船覆沒。求屍不得。帛至沒處灘頭仰天而歎。遂自沉淵。積十四日帛持員手於灘下出。時人爲之語曰符有先絡。熨有張帛者也。○寰宇記曰犍道縣有貞婦石。在縣七里舊州岸。古老相傳昔有貞婦夫沒無子。專姑甚孝。姑抑使嫁。竟不從。終姑之身世沒。所居室有一大石湧出。後人號爲貞婦石。○黃魯直跋王荆公書云。熙寧中金陵丹陽之間有盜發冢得隱起。輒於冢中識者買得之。讀其書蓋山中宰相陶隱居墓也。其文尤高妙。王荆公常誦之。因書於天慶觀齋房壁間。黃冠遂以入石。予常欲摹刻於犍道。有李祥者聞之欣然。礪石來請。斯文旣高妙。而王荆公書法奇古。似晉宋間人筆墨。此固多聞廣見者之所得也。李君字聖祺。犍道人。喜炎黃岐雷之書。嗜好酸醜。與世殊絕。嘗從軍得守國子四門助教。歸而

杜門家有山水奇觀。教諸子讀書。而宴居自如。從其所好。不喜俗人。一再見輒罵絕之。此孟子所謂有所不爲者也。○朱提漢舊縣。屬犍爲郡。東漢屬犍爲郡。蘇林云。提音時。晉太康地志云。章武元年。先主以犍爲屬國爲朱提郡。鄧方爲都尉。先主因易名太守。領漢陽等五縣。朱提縣治有千秋池。今府西南六十里有朱提山。山下有大池。曰瑞蓮池。是。又有朱提村。今卽立郡處也。諸葛武侯云。漢嘉金。朱提銀。采之不足以自食。古志云。朱提西猶有鳩鵲。以南則無矣。○志云。瑞蓮池在府西南六十里馬湖江側。故老傳云。江有石生魚。常游聚。漁者甚利之。一日獲巨鯉。衆分食之。翌日又至。俄見江中有三石室。各長丈許。廣七尺。人咸異之。願見對岸石。亦有三穴。如鑿去者。其長短與此無異。而向之食魚者。所居皆陷沒爲地矣。巨鯉蓋龍子也。池有無種蓮。或間十數歲一花。花開則國家有大吉事。舊志。朱提縣有千秋池。疑卽此。今在朱提山麓。按華陽國志云。崩江多魚。此之謂矣。○寰宇記云。開邊縣在州西南六十里。亦犍道地。隋開皇六年於此置縣。以開拓邊疆爲名。在馬湖。朱提。兩江口。大黎山。小黎山。在此縣界。四時霖霖不絕。俗以爲大滂天。小滂天。其諸山自嘉州以來。每峯相接。高低隱伏。奔走三峽。石狀難名。本志卽今之開邊鄉也。○寰宇記又云。宜賓縣本漢南安縣地。屬犍爲郡。蜀諸葛亮南征。於此置都鄆戍。後改爲都鄆縣。唐開元十七年爲義賓縣。後移於狼川。卽今理也。宋朝開寶九年改爲宜賓縣。○通志云。宣化縣在宜賓縣境。本唐之義賓。宋之宣化。今省入者。舊址在當縣之宣化鄉。○水經注云。存水出犍爲都鄆縣。王莽之屏鄆也。夷率雍閭繫馬於柳。而柳成林。故曰存馬。本志云。縣西北百六十里爲都鄆灘。○蜀志補遺云。可無山古宜。

資縣也。今訛名可盧。○方輿勝覽云：夷牢山在宣化縣南。夷人祭社於此。飲酒歡樂。夷語以牢爲樂。故也。二蘇有過宜賓見夷牢亂山詩。輿地紀勝云：宣化縣南山叢秀。中一峯突出爲菩薩頂。故老嘗見聖燈。碑目云：宣化上流三十里。吳季成所卜築。在山之阿。有山谷老人所書盤谷序。虔州學記碑刻。本志云：復魚池在府西北百七十里。故宣化縣東。宋皇祐間。白雲先生張俞爲記。○寰宇記云：梁武帝使先鐵計定夷獠。乃立戎州。以鐵爲刺史。方輿云：宋紹聖四年。戎倅蘇時上書曰：今車書同聲。教一而州名戎。是夷其名也。請易之。遂改名敘州矣。○唐劉兼秋夕書懷呈戎州郎中詩：素律初迴枕簟涼。松風飄泊入華堂。談雞寂默紗牕靜。夢蝶蕭條玉漏長。歸去水雲多阻隔。別來情緒足悲傷。霜砧月笛休相引。只有離襟淚兩行。○碑目：唐都督李通破賊碑。在州南百里。今亦殘缺。又云：唐古戎道記在州治之對天蒼山崖壁間。筆畫勁正。乃乾封二年。詹君秀修復此道。爲之記并書。又云：定誇湖碑在戎州城外。有唐人所立碑曰：山蒼蒼兮煙際橫。波渺渺兮湖水平。其餘漫滅不可考。○古跡考云：縣有張儀同城。古老相傳以爲張儀同祠也。不知何義。魏鶴山集有堯道諸葛武侯碑。又有答馮敘州邦佐謝武侯廟碑。啓本志云：府城南姜維屯。一峯突起。高千仞。其頂平。相傳姜伯約於此駐軍。○勝覽云：敘州有東州道院。在州治內。碑目云：治東墨妙亭。貯黃庭堅筆跡。○杜甫宴戎州楊使君東樓詩：勝絕驚身老。情忘發興奇。坐從歌妓密。樂任主人爲。重碧拈春酒。輕紅擘荔枝。樓高欲愁思。橫笛未休吹。劉兼重陽感懷詩：重陽不忍上高樓。寒菊年年照暮秋。萬壘故山雲繚隔。兩行香淚血和流。黃茅莽莽連邊郡。紅葉紛紛落釣舟。歸計未成年漸老。茱萸羞戴雪。

霜頭○勝覽云東一里花臺寺卽今壽昌寺也東殿石壁露立大像其地內外石間鑄有萬佛卽刺史張九宗撰記處○又云東山在州城東門外有報恩寺塔高二百尺南望七星山七峯團秀狀若連珠卽南山也○方輿記云西樓在州治陞務觀詩畫船衙雨入戎州縹緲山橫杜若州須信時平邊瘼靜傳烽夜夜到西樓○碑目云韋南康紀功碑在江西舊州治岸旣元和五年刺史張九宗立碑陰載南康謝表大半磨滅又云唐黎幹墓表在州西岸石馬溪之上今石馬尚存○本志云馬鳴溪在府西十九里俗稱龍馬溪源出慶符之西會馬湖水達於蜀江昔士人鄭氏牧馬於溪上產龍駒四蹄利爪朱鬣頰尾高可七尺州聞之將以貢行在所載至溪口攘鬣長鳴躍於江溪因以名○寰宇云滇池在州西二十里一名天池一名波凌池其池長五十里闊七里風吹一動波浪凌山中有芰荷按秦惠王破滇池始通五尺道者卽此也志云滇池與天池相連大者廣一里長五里小者廣一里長三里其中有石橫瓦南北如橋梁狀往來由之唐韋臬天池晚棹詩雨霽池塘生意足花間誰詠採蓮曲舟浮十里芰荷香歌發一聲山水綠春煖魚拋水面綸晚晴鷺立波心玉扣船歸載月黃昏直至更深不假燭宋牟孔錫詩天池十里如鑿湖荷花可折魚可鱸○本志云縣西五十里水濱昔有浮舟者見空中飄然降一道人止於峯頂土人呼其處爲師來山後訛爲書樓山○勝覽云無等院在州南門外魯直以元符間寓居作稿木寮死灰庵今猶存其寺額亦魯直筆蹟陸務觀詩文章何罪觸雷霆風雨南溪自醉醒八十年間遺老盡壞堂無壁草青青○李嘉謀記紹聖初章蔡用事山谷以前史官得罪安置黔州二年移戎州方公之遷以涪州別駕因



自號爲涪翁。放浪山水間。初不知有遷謫困窮之意。城南有溪。公遊而樂之。命曰涪溪。其後溪山悉以是名。○本志云。舊戎州南門外里許金魚井。山谷品其水爲第一。○寰宇記云。鎮江在城北兩岸。大石屹立。因置鐵櫃橫截其處。控扼夷荒。黃魯直鎮江亭酌酒詩。西來雪浪如魚烹。兩崖一葦乃可橫。酒盃未覺浮蟻滑。茶鼎已作蒼蠅鳴。又云。山繞樓臺鐘鼓晚。江觸石磯礧杵鳴。鎮江主人能致酒。願渠久住莫終更。又云。鎮江亭上一樽酒。山自白雲江自橫。李侯短褐有長處。不與俗物同條生。蓋同李仔任道也。又安樂泉。頌云。鎮江安樂泉。爲樊道第一。姚君玉取以釀酒。甚清而可口。食之令人安樂。故予兼二義名之曰安樂泉。并爲作頌。姚子雪麴。杯色爭玉。得湯郁郁。白雲生谷。清而不薄。厚而不濁。甘而不噉。辛而不齏。老夫手風。須此晨藥。眼花作頌。頌倒淡墨。○本志云。北二里鬱姑臺。相傳宋楊仙遇鬱姑於此。○又云。蘇溪在府北二里。以蘇子瞻常遊於此。故名。○輿地紀勝云。自州治泝流十里。有前後潭。瀑布自懸崖千尺而下。本志又云。水籬洞在府北十五里。瀑布瀉出兩峯間。垂數十丈。如珠簾狀。其側有亭。黃山谷扁曰奇觀。何師心滿江紅詞。一水飛空。揭起珠簾全幅。不須人捲。不須人軸。一點不容飛燕入。些兒未許遊魚宿。向山頭款步聽疎音。清如玉。三峽水。塘人掬。三級浪。堪龍浴。更雨邊瀟灑。數竿脩竹。晚情碧煙爲純綠。夜憑新月爲鉤曲。問當年。題品是何人。黃山谷。○又云。北百二十里真溪。源出於旬山。舊有姓真者居之。今爲真溪驛。又云。北百七十湼溪。有阿湼者居其傍。故名。今之月波驛是。余以壬子暮秋宿此驛。書懷作云。月波來夜宿。月色似波明。遇景一相湊。觀空聊復情。寒蟬吟似懶。水鳥去何輕。借問渝州路。還家近幾程。蓋亦情

見乎詞矣。

南溪縣

漢地理志武帝太初元年置南廣縣。隸犍爲郡。蜀志後主延熙中立爲郡。以常竺爲太守。元和郡國志晉分朱提郡置南廣郡。齊郡廢。後周於此置南武。隋改龍源。又改爲南溪縣。在犍道之南。○水經注云。自犍道至朱提。有水步道。有黑水。羊官水。三津。俱險極難行。故行人語曰。檜溪赤木。盤蛇七曲。盤羊鳥欄。氣與天通。禹貢華陽黑水惟梁州。註云。出南寧州南廣縣汾關山。北至犍道縣入江。一名阜水矣。○郡國志。犍爲郡故城在青衣江七里。舊經云。青衣江在南溪縣南十五里。古有青衣國。與敘州相隣。其人因賈至蜀。見漢衣冠。遂求內屬。因以名焉。其地名龍騰溪。卽隋之龍源。今之龍騰驛是也。○按青衣。蜀中見者凡三。其一在漢嘉者。卽大渡河所經。漢書公孫述僭據青衣。人不賓是也。其一在青神者。以蠶叢衣青。而教民農事。人皆神之是也。其一在當縣。以古有青衣國。慕義來賓云。○志云。龍騰山半有洞。深四丈。李八百所鑿。額鐫曰李公洞。八分體。字畫遒勁可觀。洞前有折梅亭。宋楊萬里詩。李真宅子故依然。道院西偏古洞前。一日身遊八百里。三番花落九千年。○龍騰山下有岑參別業。參從明皇幸蜀。尋守嘉州。置業於此。國朝成化中。掘得斷碑。有南溪別三字。傍題嘉州主人岑參六字。其集中詩曰。結屋依青嶂。開軒對翠巒。樹成花兩色。溪合水重流。竹徑春來掃。蘭梅夜不收。逍遙自得意。鼓腹醉中遊。○志云。溪北有橋曰黃渡。魯直每遊龍騰山。必經此橋。故名。唐韋莊詩。大江西面小溪斜。入竹穿松似若耶。兩岸巖風吹玉樹。

一潭明月照銀砂。因尋野渡逢漁舍。更泊前灣上酒家。去去不知歸路遠。棹聲烟裏獨嘔啞。蘇軾南溪對雪詩。南溪得雪真無價。走馬來看次未消。獨自披榛尋履跡。最先犯曉過朱橋。誰憐破屋眠無處。坐覺村居語不聊。惟有暮鴉知客意。驚飛千片落寒條。皆此橋中景物。○寰宇記云。馬湖江從州西南流。出東郭與蜀江合。諸葛武侯五月渡瀘。則此水之上流也。○郡國志云。乞子石在馬湖南崖。東石腹中流出小石。西石腹中懷之。焚人乞子於此有驗。因號乞子石。寰宇云。乞子有二石。夾青衣江。樹對立如夫婦。古老相傳。東石從西。乞子將歸。○魚臈津。按郡國志云。南溪縣西三十里有津。津南有鴛鴦圻是也。鴛鴦圻者。以烈婦黃帛得名。詳見焚道。今縣有帛廟。子在飛霞閣西阜上。阜有飛霞井。嘗有赤髓自井中貫日。觀者如堵。因建飛霞閣焉。○洞廟記云。南溪琴山有忠利廟。祀漢牂柯太守陳立。廟中有制祠古碑。張鼎修所記。負山濱江。地勢險阻。○志云。治西彈琴臺。唐楊發彈琴於此。瘞琴其下。父老言。每夜靜。人或時聞琴音。發亦家於此。有南溪書院詩云。茅屋住來久。山深不置門。草生垂井口。花落捲籬根。入院將鷓鴣。攀蘿抱子猿。曾逢異人說。風景似桃源。○志又云。隔江琴山橫洲渚間。俗云。無徵則琴不鳴。元時熊萬戶者。乃聚土爲徵。依巖閣鐫刻羅漢諸像。以成其勢。○輿地紀勝云。東南逾江七里有隱山。唐李涉詩。如雲不厭蒼梧遠。似雁逢春又北飛。惟有隱山溪上月。年年相望兩依依。又云。銅鼓灘在縣東十里大江之右。波浪極險。縣治坐乾。此水出辰爲不利。近歲灘之上流生石積高十數丈。蔽壅下流。水從巽出。自是文物稍振。寰宇記云。西南十五里平蓋山。山有九隴。惟此特出衆山之上。頂圓似蓋。一名瑪瑙山。漢真人劉景鶴隱此。至

魏武時始跨鶴仙去。有石洞深邃不測。中有小穴。圓如盞。有水出焉。山上有木生葉。其紋如篆。謂之符葉也。○志云。西七十五里桂輪山。昔涪翁書大桂輪山四字於其岸壁。是山惟中秋見月。故名。有桂輪山寺。

長寧縣

圖經。西徑馬湖。南控烏蠻。東介安溪。北接綿水。趙招討平夷表云。左連阿水。右連石門也。○碑目云。長寧志。嘉定己卯。教授賀寅東亭。又云。祥符平夷本末。慶歷皇祐平夷略。元豐平乞弟本末。嘉祐三年。給長寧頭首斗蓋充土刺史。詔熙寧七年。范中書百祿誓夷文。皆有可考。○十道志云。長寧清井監。供輸紫竹。本志云。縣西北七十里古賢鄉。宋時鑄崖曰紫竹山是也。方輿引舊郡志。今夷衆開箐路。芟去箐竹。惟冬藟醬可以入藥。○寰宇記寶屏山軍治之主山也。與械山諸峯相對。登雲亭在寶屏山上。每歲九日登高於此。○紀勝云。牛心山在軍治。山形峯嶺如牛心。然硯石溪在牛心山後岸。石如磬。可以爲硯。○東溪發源白崖山。與嘉魚泉合。嘉魚泉者。去城一里。馬鞍山之趾。泉激石湧出。小魚四時如一。不增不長。故以名之。邦人釀酒。必用山後秫及嘉魚泉。則味甘冽。王章嘉魚泉記。兵廚之酒。冠於東州矣。上有臨流閣。流杯池。諸勝。○志云。南一里金龜山。四面平曠。中突一阜如龜狀。又名松子山。輿地紀勝。以其上有波淪殿。舊志。邑人於四月八日取嘉魚泉浴佛。故曰波淪也。○勝覽云。介湖在郡治西城下。中植荷芰。有西溪。發源越王山。與桃源溪合。此溪相傳有耕者得一銅版。鑄曰小桃源。其陰有詩云。綽約去朝眞。仙源萬木春。要知竊桃客。定是滑稽人。其水發源筆架山。其軍城冷水溪上。嘉定己巳。太守張公市民田。種植桃李。創置亭。

樹橋曰仙津。洞曰桃源。亭曰蒸霞。堂曰詒然。○通志云：萬松嶺在長寧縣西。宋趙使君詩：清溪狹逕小橋東。春日桃花處處同。我爲日長無一事，偶然來此聽松風。○紀勝云：小離堆在城北岸溪上。崇德廟前溪中有怪石似離堆之象，因作亭於此。榜曰小離堆。○燕崖去軍北三里許，在棲真洞路旁。石峯巉巖，森列者數百，虞易簡有記。○本志：東西二溪至清井合流，名清溪。至武寧砦爲武寧溪。至安寧砦爲安寧溪。○碑曰載：王蜀武成三年，牒清井鎮羈縻十州五團土都虞候羅元審，又牒清井鎮羈縻清井土刺史羅元楚，文俱在本監。○歸田錄載：蘇子瞻常得清井監夷人所賣蠻弓衣，其紋織成梅聖俞春雪詩，蓋當時名重，傳落夷狄故也。○本志云：東十五里武寧溪，上有巨石橫截中流，虞允文鑿之以通舟楫。石上大鑄虞公峽三字。溪左逕灘，有瀑布自山頂飛流而下，數十丈爲深潭。○輿地記云：越王墓在寧遠巖，高廣各數丈，以花磚砌，有合抱古柏，故老傳爲越王墓，或云唐太宗子越王貞爲綿州刺史，卒葬此。○志云：治東九十里，有凌家崖，有水流寺，遠眺敝瀟之景，大江如帶矣。

富順縣

華陽國志云：江陽富義有鹽井。郡國志：劍南鹽井，惟此最大。舊日爲額八百餘斤，今日額千五百餘斤。楊光帝操堂記云：三榮富順產鹽，其地號爲食泉。韓子華詩：土瘠事力耕，家無終歲蓄。所資鹽井利，持易他州粟。方輿云：宋太宗朝置監，有榕齋在監治，以榕木名也。○水經注：綿水滄水與洛水會，逕牛鞞資中，又東逕江陽縣方山下入江。按此水至富順神龜山下，榮紆向西而云，謂之洛源，以源出洛通江也。後周於

此置洛源縣矣。謂之金川。以綿、洛、瀟三水會於金堂峽也。秦時於此設金川祠。亦謂之釜川。則以其盤繞縣治。有若釜形然。○寰宇記云。鷄足山、同心山。俱在城東。隔水三五里。教授錢士開記。翠巖絡繹。張其前。大江繚繞。環其下也。○輿地紀勝云。神龜山下有湖。嘗見大龜出。小龜從之。不可勝數。山背有讀易洞。里人李暉讀易其中。○李昌金川驛記。南距戎瀘。北走普資。舊制等於諸縣。嘉祐以新例擬於列藩。本志云。金川神廟在縣西二百餘步。有十像。莫知姓氏。相傳秦惠王時。擒鯨。治水有功。卽此神也。○勝覽云。凌雲山在監西。與養秀山相接。大江前橫。一峯突兀。瑤瑤山亦與凌雲相接。西北諸山。惟此最高。○又云。西湖在監之西。相傳有此監。卽有此湖。皇祐間。周侯延篤記。仍有亭樹。輿地紀勝云。西湖周迴三里。有洞窈邃。昔有人洞者。見二女櫛髮於竇間。遺以石鏡。其人致富百倍。碑曰。西湖洞前厓上。鑄觀音大士像。天禧元年。刻石記云。六月。甘露降。像前。明日。又降。紹聖元年。又降。瑩潔如珠。程驥富順西湖詩云。春風楊柳曉藏鶉。秋水芙蓉晚著花。細數一年湖上景。天涯行客忍思家。○志云。西五里中江之右。有峯峭拔。數丈如佛像。傍有二石如侍者對立。因鑄成之。藤蘿遶身。而不上其面。輿地紀勝謂之聖佛。有磨崖碑。皇祐七年。知監張齊古題云。西山城郭。沿灘數里。羣峯重疊。一佛獨立。容相端正。真如塑出。高聳數丈。古代留跡。後倚林翠。前瞰江碧。○西峙在縣西南七里。輿地紀勝云。由城南絕江而上。西行六七里。廣六十畝。萬松森列。嘉樹離立。爲李氏西峙。晁公武記云。有亭臺齋館。泉石花木。盤據一山之上。○方輿云。聖燈山在監西五里。碑曰云。山址有董孝子墓。表云。漢益州刺史廣平郡侯董孝子。○紀勝云。中崖山在西北二里。山勢盤

薄。林木葱茂。有叢林氣象。有霧隱堂。資中趙丞相沂公謁中崖大士。或以夢告。明年舉於鄉。公爲文記之。後人爲建斯堂。碑曰。中崖普覺院。天禧丁丑賜名。康定二年。翰林學士李淑撰碑志云。中崖以北。崖山居左。瑪瑙山居右。此居其中。故名。唐咸通中。依崖鑄大悲佛像。宋初。僧自悟架屋三百楹。天聖丁丑。賜名普覺院。徽兩朝宸翰。後林靈素毀佛法。欲壞其像。圍繞鑿之。不損。乃以泥覆之。罷禁。將水洗去。依然如新。岑象求中崖詩。瀟酒監城隈。聊驅俗駕回。世塵飛不到。山色翠成堆。太常博士周延雋詩。茲辰始休沐。夙駕出公府。往造釋子居。嶽崎僅容戶。雲林信樂就。安問非吾土。衆香纔發春。微雲忽蔽午。敲石煎佳茗。忘翫攀芳杜。徘徊仍少留。婦泛凌前浦。卻顧衣上塵。猶露山際雨。○志又云。北崖在縣北二里。隋大歷中建資國寺。有彌陀崖。足容數百人。有五百羅漢洞。有水簾。並元祐八年李元淵記。

慶符縣

漢置。屬犍爲郡。蜀先主置朱提郡。以縣屬焉。華陽國志云。有漢水入延江。本志云。漢陽山在縣北八十里。漢武通西南夷。自此山之南皆漢地。故云。諸葛武侯征蠻過此。今崖壁上鑄武侯征蠻故道六字。猶存。縣有順應廟。乃祀馬謖者。我明永樂中。尙書宋禮奏。神有陰助運木之功。賜萬貫。其廟。命有司。每歲三月二日致祭也。○碑曰。晉張麟夫人墓表。在慶符縣南百六十里。又云。大唐南詔王碑。在石門界。貞元七年。袁滋題云。此石門。卽隋史萬歲南征之道。○志云。祥州故址。在縣西一里。初本南廣地。宋改名祥州。置慶符。來附二縣。而南廣爲鎮。宣和中。省州。止存慶符縣。黃山谷所書戒石銘。尙存。今來附縣爲來復鋪矣。

筠連縣

漢定川縣。唐之筠連州也。其地南通芒部。西控烏蒙。四山皆竹。一色相連。因謂之筠連矣。志云。舊州黃牛山距縣南三十里。高山石壁。作人作驢牛狀。因呼為黃牛山也。又云。縣西南孔雀溪。有孔雀巡檢司土舍主之。

高縣

志云。唐高州故址在縣南百二十里。正州鄉。縣有朱水勢如之。元有騰山。常孕霧雨。俱在西南五十里外。

珙縣

唐竊糜薩。鞏二州也。薩州今之下羅計。鞏州今之羅星渡矣。志云。治南北五十步。即珙溪也。多石似玉。民以筒引車入田中得灌溉之利。又云。落哨山有生成石鼓二石。鼓下下有仙洞。石乳凝聚。如人如獸。千態萬狀。至洞頂。黑質白章。如雲如篆。又云。縣北四十里芙蓉山。有九十九峯。其南三峯突起。謂之小芙蓉。

興文縣

戎州故址。在甯遠坊之西。唐晏州羅陽郡領思峨、犸陰、新賓、扶來、思晏、多岡、羅陽、七縣。今皆屬夷。南五里有南壽山。宋時夷酋卜漏據山為砦。一豆一蠻。數有五斗。故名五斗夷。又十五里有丹篋箐。且暮霞彩浮於木杪也。

隆昌縣



隆昌新設之地。古跡無聞。予問諸劉給事。有金鵝洞焉。溪水東來。遠城西折。里許。孤山柱立。水環其趾。下爲懸崖。壁立千尺。飛流下墜。常時如匹練。如散珠。及至溪水暴漲。倒立懸垂。雷聲衝激。聞數十里。細霧麴塵。飛洒千步。亦奇觀也。峭壁中有洞。方廣丈許。人跡難至。疑鬼工所鑿。名曰金鵝。不知所本。俗傳有藏金鵝其中。或以銅鵝換之。故又名換鵝洞。其編戶亦有換鵝里。

馬湖府屏山縣附郭

龍湖去郡三百里許。四圍皆峻。崖長二十里。廣七里。中有堆如螺髻。去大江二里。有水與江同消長。日夕作潮。相傳有龍馬見於此。○四夷考云。馬湖江發源西蕃。流至打冲河。入會川。衛與安甯河合。經雲南與浪滄河合。至武定。與金沙江合。經東川。烏蒙始達於蠻夷司界。經府前流出。與鉞州江合。○志云。馬湖鎮舊城。唐乾符中高駢築。按馬湖所轄地。漢之鹽縣。平夷縣。唐之瀉浪州。沐川寨也。漢書。營有不狼山。營水所出。隋志。平夷縣有洮津。宋史。寇瑊祥符中爲轉運使。多剛夷斗望叛。瑊集瀉浪刺史簡松。李紹等平之。○志云。平夷東百二十里有書樓山。編戶爲書樓鄉。又云。府西三百八十里。雷番山。隋史。萬歲征西南夷。過此。書雷番山三字。鑄於石壁。山中有毒。經過。牲畜必籠其口。行人必緘默。若或吐聲。雖冬月必起雷霆。○碑目。沐川古碑。唐垂拱三年。玉津令馬元慶等破馬湖夷。紀功者。張無盡。沐川寨記略云。南蠻東北接壤。常挾吐蕃以爲中國患。蓋其路一出大渡河。一出沐川源。一出馬湖江。其狹邪之徑。曰榮涇。曰八面箐。曰黑水。曰中鎮。曰賴因。曰龍水。曰陰川。而沐川之路。常爲嘯集之地也。

# 蜀中名勝記卷之十六

## 瀘州

漢江陽縣。蜀志曰。魏武屯漢中。諸葛亮出屯江陽是也。水經曰。江水又東過江陽南。洛水東南注之。酈道元注曰。江陽縣枕帶雙流。據江洛會也。漢景帝六年封趙相蘇嘉爲侯國。○洛水與綿水合。至州西方山下。謂之綿水口。通志云。廢綿水縣在綿水溪口。汶江水中洲上。梁置縣。宋省入江安矣。○洛水逕資中謂之中江。又謂之支江。支江水從富義縣鴛鴦池屈曲方至城。與汶水合流。又有赤水源從昌州昌元縣界流入去合支江。○有合江在州治東。蜀江與之溪合流處。之溪源出仁懷縣。其形曲折如之字。○有悅江在州治東北。源出戎縣潛武管經悅州。因名。○有思晏江在州治西四里。源出古思晏縣。○有宋江在州治東百步。源出大壩兒北洞。經宋州故名。任汲記云。淙流東北貫其隅矣。○李壘西山堂記云。郡得名爲瀘者。蓋始因梁大同中嘗徙治馬湖口。置瀘州。蓋馬湖卽瀘水下流。因遠取瀘水以名州也。志云。宋制置使余玠遷州治於神臂山。則在百里外。號鐵瀘城矣。○勾公權瀘川縣廨記云。江陽氣候偏陽。夏秋多炎燠。冬無苦寒。每夏秋蒸溽。如傍挹火爐鞮。○孫義叟修城記。瀘控西南諸夷。遠逮蠻蠻。最爲邊隅軍地。元豐以來用武臣。其後始更置儒守。錢若水以右贊善拜茲官。宋太祖召見於武德殿。謂之曰。瀘川最近蠻獠。尤宜緩撫。蓋重之矣。○方輿勝覽云。整暇堂。雅歌堂。俱宋時建。在郡圃之內。四香亭在州治。潛熙中郡

守趙公建。自題云。永嘉何希深之言曰。茶麝香春。芙蓉香夏。木樨香秋。梅花香冬。斯名以之。有南定樓。取出師表語也。陸務觀南定樓詩。行遍梁州到益州。今年又作渡瀘遊。江山重複爭供眼。風雨縱橫亂入流。一名海觀。侍郎閻蒼舒詩。雲南之陰大江東。二水奔騰如海衝。誰能具此壯觀眼。南定樓中今臥龍。○水經注。江中有大門小門焉。季秋之月。則黃鱗死。湓也。郡國志。瀘江水中有大闕。季春三月。黃龍堆沒闕。卽平黃龍堆者。昔尹吉甫子伯奇至孝。後母譖之。自投江中。衣苔帶藻。忽夢見水仙美樂。揚聲悲歌。船人學之。吉甫聞船人之聲。欬似伯奇。援琴作子安之操。按曹植之惡禽論。韓愈之履霜操。皆指此事。志云。州東三里歸子山。相傳伯奇溺處。○又云。三國董允。墓在州治東。今名董允壩。○方輿云。東巖在汶江之東。紹興中。邦人開創。大像依崖。不足以庇風雨。近歲有庖者。祁氏親死。廬舍棄俗。奉香火於此崖。邦人信之。不十年。重樓複屋。佛宮經藏。甲於一境。碑目。黃太史大像記。醉僧圖碑刻。並在此巖之開福寺。○州志云。東二十里。潭中一小山。相傳下有龍窟。二水交流。清濁不混。每春漲。其山若浮。州人遊賞之處。通志云。卽龍馬潭也。唐王昌遇落魄仙。授以道術。比歸。售馬送道童於澤前。得馬乘之。瞬息至家。而馬化龍入潭。潭上有沖虛。碧梧二觀。俱宋建。○勝覽云。龍女洞在城東南二十五里。高崖之畔。有二穴。俗傳爲龍女洞。李巽巖管遊有留題。○寰宇記云。鑿井在城西偏。紹興中。掘濠。暫得碑。乃唐乾元中。蘇德充所開。○紀勝云。滴乳泉在城西真如寺。自崖石中流出。味甚甘。魯直經行大書此三字。碑曰云。唐真如寺碑在本寺內。山谷集云。瀘州大雲寺西偏崖石上。有甘泉滴瀝。一州泉味。皆不及也。余名曰滴乳泉。山谷又跋常山公書云。

常山公齊如霍去病用兵。所謂顧方略如何耳。不至學孫吳。至其得意處。乃如戴花美女。臨鏡笑春。後人亦未易超越。紹聖五年五月晦。避暑瀘州大雲寺。子茂攜此書來。妄意評之如此。○寰宇云。尹吉甫江陽人。有祠在城南。又報恩觀建清穆堂以祠之。碑曰。李沆記。周尹吉甫實生此地。見於圖經舊矣。陳帥損之作清穆堂祠焉。觀鄺道元水經注。江陽異聞與華陽國志頗類。其載揚雄琴清英。敍伯奇流放。并子安之。操附於江陽。雄蜀人也。其說必有據。○勝覽云。寶山在城南。初名堡子山。爲巡檢廨。陳公損之。移廨山西。建堂其上。袁公說友。榜其堂曰。江山平遠。易堡子爲寶山。大書揭之。下瞰城郭。萬瓦鱗集。兩江合流。郡國志一名瀘峯山。高三十丈。地多瘴。三四月渡之必死。唯五月上旬渡之。卽無害。故諸葛亮云。五月渡瀘也。李壘西山堂記云。以常璩華陽國志及辛怡顯雲南錄考之。諸葛渡瀘。乃在越嶲之地。非瀘之寶山也。木龍崖在寶山之趾。有古榕木盤結。天矯如龍。黃魯直爲題榜。○通志云。瀘州寶山之瀘峯有武侯廟。每歲蠻人貢馬。相率拜於廟前。宋劉光祖詩云。蜀人所至祠遺像。蠻獠猶知問舊碑。紀勝云。黃太史書砥柱銘。碑在瀘峯高寺。○通志云。三泉在寶山嵌崑間。昔王大過鑿山濬泉。榜曰三泉。○志云。州南元妙觀有紫房洞。唐應靜煉丹於此。丹竈石牀尙存。有煉丹井。亦唐真人酌挹之所。又云。治南二里茶蘘洞。石刻茶蘘洞三字。西南有飛雲洞。爲唐庚讀書處。按子西丹稜人。徙居瀘之安夷門外。自號魯國先生。有文集行世。○寰宇記。方山距州南一舍許。又名回峯。其山八面。下瞰江流。有魏武帝廟。唐元宗敕文。華陽國志云。方山蘭祠。昔漢光武微時過江陽。有一子。望氣者言。江陽有貴兒。氣王莽求之。縣人殺之。光武怒爲子立祠。

譙江陽人不使冠帶。通志云：巖池在方山之頂，周圍一里，有龍潛其中。○勝覽云：北巖在城北，舊有小庵，尚書楊汝明搆爲大剎，又創五峯書院，以爲士友會課之所。○志云：州北二里撫琴臺，山石生成，周圍七尺，昔尹伯奇投江，吉甫登其上，鼓子安之操焉。○又云：州北有蓋亭，郡人王綸以母姜氏卒，終身不敢食葷，因植葢於亭側，以志不忘。○又云：東北二十里特凌橋，宋治平中有女子因母病歸省，溪漲不能渡，忽見一木橫凌水面，遂舍生以濟，既渡失木所在。○通志：州東北有餘甘渡，唐子西瀘川六言云：百斤黃鱸，歸玉萬戶赤酒流霞，餘甘渡頭客艇，荔枝林下人家。○又云：拙溪在州東北七里，黃山谷過而墮馬，自以爲拙，呼爲拙溪，書大字於石，見存。○山谷有瀘州中壩葛氏竹林，留題云：江南黃庭堅自犍道蒙恩放還，元符三年十二月道出江安，江安宰石諒信道以親親，見留作歲，建中靖國元年正月丙寅，置酒中壩葛氏之竹林而別。

江安縣

漢地理志：犍爲之漢陽縣也。注曰：犍爲郡尉治。山有關谷，漢水所出矣。今縣南七十里連天山，漢水出焉。又西南有漢陽山，以在漢水之陽也。廢漢陽縣當在此二山間。○寰宇記云：涇灘在江安縣南三十里，灘上有山刺天，瀑布飛瀉，相傳武侯誓蠻之地。此唐涇南縣所爲設也。縣有綿水鄉，卽古之綿水縣，有思晏江，卽古之思晏縣矣。○本志云：有縣市，有井市，宋南渡後置，南井暨在縣東北，監有鳳凰山，山上有雁塔。刻唐五代以來進士題名。○勝覽云：偶住亭在江安縣之對，建中初魯直自犍道還，過邑宰石諒同遊此。

亭。書琴操。後改爲渡瀘亭。碑曰。瀘州平夷記。熙寧中。范百祿撰。今在江安偶住亭。志云。北城街有渡瀘碑亭。宋時范百祿立。自載其平夷事迹。今碑止存篆額。熙寧甲寅平夷之記八字。○都巡檢使鄧巽。陽安濟廟記曰。吾邑城外。汝江流其東。清溪匯其左。溪上陰崖峭峙。草木芴蔚。下臨深潭。蒼黯寒碧。有神宅焉。號曰五龍。○紀勝云。鏡子山在江安縣南五里。又名照山。一峯中峙。兩峯旁翼。二溪交流。峯巒蔥蒨。庵廬梵室。金碧交輝。旁有二潭。爲龍所居。禱旱輒應。山有眠雲石。龍淵橋。玳瑁崖。磨鎌溪。爲一邑勝遊之地。

#### 納谿縣

宋紹定初。割江安之地而立納谿。則瀘川縣所爲廢也。納谿水源自阿永蕃部。爲唐之羈縻納州。納水所出矣。流至縣之西門。與瀘江合。○通志云。縣東一里有樓子山。層峯疊嶂。若樓閣然。三里有撥旗山。相傳諸葛武侯豎旗於此。以誓蠻人也。又其遠者。爲保子寨。倒馬關。石虎關。則皆通牂柯。且蘭。交趾諸夷。○本志云。治西有寺。其地產青白石似玉。曰玉林寺。又云。治北十里爲舊縣基。昔人掘得銅轆象樽一。太和羹盃二。爵三。貯於學宮。

#### 合江縣

漢符縣。東漢爲符節縣。水經曰。江水東過符縣北。邪東南。解部水從符關東北注之。酈道元注曰。縣故巴夷地。漢武帝建初六年。以唐蒙爲中郎將。從萬人出巴符關者也。漢元鼎二年立。王莽之符信矣。縣治安樂水會水源。南通寧州平夷郡。暨縣北。逕安樂縣界之東。又逕符縣下。北入江漢。縣長趙社。遣吏先尼和。

以永建元年十一月詣巴郡。沒死成濡灘。子賈求喪不得。女絡年二十五。有二子五歲以還。至二年二月十五日。尙不得喪。絡乃乘小舟。至父沒處。哀哭自沈。見夢告賈曰。二十一日與父俱出。至日父子果浮出江上。郡縣上言。爲之立碑。其巔部之水。所未聞矣。○寰宇記。安樂山在縣東五里八十步。羣峯峭拔。瀑布千尺。天寶六年。敕改爲合江山。圖經。安樂山在合江西五里。三峯俱秀。溪流遶其下。有石櫃。爲仙人藏經之所。歧而左。有爛柯跡。後有仙影隱隱。在石壁中。歧而右。歷柎木臺。仙人室。十二盤。至翳刀峽。循山有八洞。通南崖。有石曰許由瓢。又有芙蓉城。滴水崖。白猿洞。此三峯之景也。黃山谷記云。安樂山。劉真人飛昇之所。真人字善慶。初卜居時曰。樊道平。蓋氣濁而不清。江安方山。氣清而不秀。成山而清秀。惟安樂山耳。乃居之。碑曰。唐高宗取丹經詔碑。賜進經道士詔碑。劉真人藏經碑。俱在安樂山。志云。在本山經書峽中。其峽峭削。人跡不到。世傳蜀有黃澤書。在揚子雲之前。藏於名山。卽此峽也。○吏隱閣記曰。宋治平四年。鄧太師綰作邑於瀘川。曰瀘之合江。邑居之南。轉清溪而上六七里。曰安樂山。世傳隋開皇劉珍先生登眞之地。杜光庭傳。李淑記。開皇所置三觀。其一尙在。乃命道士作劉真人祠堂。因名其閣曰吏隱。志云。安樂山俗名筆架山。唐神童先汪有記。今藝文不載。惟載其一絕句云。碧峯橫倚白雲端。隋氏眞人化蹟殘。翠柏不凋龍骨瘦。石泉猶在鏡光寒。任彼遊安樂山詩云。安樂溪上峯。萬木生翠羽。孤撐切天心。橫拓壓坤股。氣勢西吞夷。光芒南定楚。雲泉出石竇。淋漓灑玉宇。煙蘿纏林梢。搖拽垂翠組。山有天符葉樹。一夕大風雨。拔去後。得於容子山。葉如荔支而長。上有紋宛如蟲篆。或以爲劉真人仙跡。蘇子瞻詩。天師化去

知何日。玉印相傳世共珍。故國子孫今尚在。滿山秋葉豈能神。○安樂溪側有呂光廟。苻秦時光討李益之亂於此。李暄詩。西涼宮闕化灰燼。一時壯觀今何許。又名登天王洞。西南隅有之溪。三遠筆架。九遠文明。過月臺。迤邐而去。望如秋練。形如之字。注於江。○南五里月臺山。三溪旋遶山足。形如臺面。列十二月波。上有晉王廟。祀唐李克用。又五里丁山。形如丁字倒峙。又曰文明。丁火文明之象也。有丁公廟。其碑乃蕭齊時立。趙世延先氏書。岳記云。合江之北有神臂山。呀然虛開。清竊竦深。廣袤百十步。飛泉簾垂。列巖屏。嵐光林影。映帶左右。與塵陌迴隔山之麓。卽先氏書。岳志云。鐵瀘城三里。讀書岳。父老往往過之。聞書聲。後神童先汪七歲至其地。曰。吾讀書故處也。遂寢處其中。爲九經注。元虞集跋云。涼國公勳業聞望著於天下。我國家之善龜也。年七十餘。閑居金陵。又以文章學問爲吾道砥柱。其得於天而裕於人。何其盛哉。讀書崖之記序。其原委博覽。考據鄉里。晚生後進。蓋有不及聞者。吾蜀百千年。故家舊族。若先氏崖者。多有之矣。安得一一表章於大臣元老之手乎。然先氏子孫所恃以不朽。有不徒在於崖者矣。謝端跋云。端蜀人也。流離江漢間。幾十餘年矣。某山某水。不知幾何。所覽讀書崖之記。始知先氏世有賢子孫哉。端今老矣。行於四方。欲求一畝之居而不可得。吾蜀多異人異書。何時扁舟沂江而上。從書崖嵐光林影之下。求其遺書而讀之。庶幾補過。以希前脩。汝礪其尚不吾却也。其可感慨也夫。





# 蜀中名勝記卷之十七

## 上川東道

重慶府一巴縣附郭

山海經曰西南有巴國。大隰生咸鳥。咸鳥生乘釐。乘釐生後照。後照是始爲巴人。有國名曰流黃。辛氏其域中方三百里。其出是塵土。有巴遂山。澗水出焉。又有朱卷之國。有黑蛇青首食象。郭璞注云。今三巴是也。後照乃巴人始祖。辛氏卽鄧氏。出是塵土。言殷盛也。食象卽巴蛇也。○水經注曰。江州縣故巴子都也。按春秋桓公九年。巴子使韓服告楚。請與鄧爲好。實始見傳。文公十六年。楚人。秦人。巴人。伐庸。實始見經。及後七國稱王。巴亦稱王。華陽國志。愼王五年。蜀苴相攻苴侯。奔巴。巴爲請於秦。秦使張儀救苴。滅蜀。儀貪巴道之富。遂滅巴。執王以歸。乃城江州而置巴郡焉。漢書列傳。揚雄之先稱揚侯。處於巫山。至漢興。其族遡江上。居巴之江州。卽此縣矣。○兩漢巴郡東至魚復。北接漢中。西連犍道。南極黔涪。孝桓帝時。刺史但望采。文學掾趙芬等議上疏曰。謹按巴郡圍經。境界南北四千。東西五千。周萬餘里。屬縣十四。鹽鐵五。官各有丞史。遠縣去郡千二百至千五百里。鄉亭去縣或三四百。或及千里。刺史行部不到十縣。太守行桑農不到四縣。且江州以東。墊江以西。上下殊俗。情性不同。敢欲分爲二郡。一治臨江。一治安漢。朝議未許。獻帝初平元年。劉璋始以墊江以上爲巴郡。治安漢。以江州至臨江爲永寧郡。胸忍至魚復爲涪陵郡。

巴遂分矣。建安六年，魚復塞亂，白璋爭巴名，乃改永寧爲巴郡，固陵爲巴東，以治安漢者爲巴西。於是有三巴之號。按今地理沿舊，但墊江猶屬巴郡耳。○巴志曰：漢世郡治巴水北，有柑橘官。今北府城是也。後乃徙南城。志云：北府城今江北，南城今南城坪是。○常道將志云：劉先主時，都護李嚴，大城江州，週迴十六里，欲鑿城後山，自汶江通水入巴江，使城爲洲，求以五郡置巴州。丞相亮不許，亮北征，召嚴漢中，故穿山不遠，然造蒼龍白虎門，別郡縣倉皆有城。按治西十里，佛圖關左右，顧巴、岷二江，是李正平欲鑿處，斧跡猶存。今府城爲門，十有七，九開八閉，以象九宮八卦，或曰象龜首，乃向塗山。○水經曰：江水又東北至巴郡江州縣東，強水、涪水、漢水、白水，宕渠水合南流注之。註曰：強水卽羌水，宕渠卽潛水，渝水又云，巴水出宣漢縣巴嶺山，南流歷巴中，徑巴郡故城南。李嚴所築大城北，西南入江，庾仲雍所謂江州縣對二水口，右則涪內水，左則蜀外水是也。巴水亦名西漢水，寰宇記云：巴縣所理岷江之北，漢水之南矣。○李白峨嵋山月歌：峨嵋山月半輪秋，影入平羌江水流。夜發清溪向三峽，思君不見下渝州。司空曙發渝州，寄韋判官詩：紅燭津亭夜見君，繁絃急管兩紛紛。平明分手空江轉，惟有猿聲嘯水雲。○府治枕金碧山，漢時分祀金馬，碧雞處也。宋淳祐中，制置使余玠因舊址累爲臺，曰金碧臺。嘗草詩餘一闕，綠友石二字，刻在治後式燕堂。玠又嘗剏招賢館於府東偏，下令曰：有謀欲以告，近則徑詣公府，遠則言於郡，以禮遣之。館中供帳一如府帥焉。○輿地碑曰：渝州有漢故益州刺史碑，有延熙中嚴孝子碑，有漢靈帝時太守張洵頌德碑，俱云在郡治。有劉宋義熙碑在岷江邊，水淺澗始得見之，見必有秋，又名豐年碑。○本志云：

郡學後蓮花壩有石麟石虎相傳爲古時巴君冢。又云治北康村有小阜二十餘俗呼古陵亦曰巴子冢矣。縣學有夫子燕居像有元文宗書萬里歸程四字故猶稱御書樓。○梁書曰巴郡有地忽自開成井方六丈深三十二丈。圖經唐刺史皇甫珣於巴縣南鑿石六丈得泉號爲新井以別於舊井也。○志云城內崇因寺有淨香亭修竹檀欒與金碧臺相掩映。又云治平寺有石刻西山佛三字。剏刻開山祖月名祖月宋治平時僧也有羅漢先天二洞皆古洞。又云城中有東華觀觀後有東華十八洞皆相通今土人呼其處爲神仙口相傳東華真君於此得道。又云五福宮乃城中最高處俯窺闔閭坐帶江流矣。○寰宇記云塗山在縣東南八里岷江之南岸高七里周迴二十里尾接石洞峽劉備置關於此峽東西約長二里許華陽國志曰禹娶於塗山今江州塗山帝禹之廟銘存焉。又曰山有禹王祠及塗后祠陶宏景水仙賦云塗山石帳天后翠幙夏禹所以集羣臣也。按倦游錄三門禹廟神儀侍衛極肅後殿一甃裘像侍衛皆胡人云是禹婦翁今不存。○三巴記云塗山北水有銘書辭云漢初犍爲張君爲太守忽得仙道從此升度。又云縣下有清水穴巴人以此水爲粉則膏暉鮮芳貢粉京師因名粉水故世謂江州墮林粉也。今山下有清水溪卽其處舊有道院名清溪院清水穴左爲龍門峭壁中分瀑布下垂春遊汎艇必曲折經此渡江而歸穴之右爲海棠溪溪植花木當夏漲時擊舟深入可數里而得幽勝矣水經注云江水又東逕黃葛峽山高險全無人居。圖經云塗山之足有黃葛樹其下有黃葛渡制置余玠詩云龍門東去水和天待渡行人暫息肩自是晚來歸興急江頭爭上夕陽船。此黃葛晚渡作也。○白樂天塗山寺獨遊詩云野

徑行無伴。僧房宿有期。塗山來去熟。惟是馬蹄知。宋余玠詩。木魚敲罷起鐘聲。透出叢林萬戶驚。一百八聲方始盡。六街三市有人行。則今之覺林寺矣。○志云。城西雉堞下有洞曰洪崖。覆以巨石。其下嵌空。飛瀑時至。亦名滴水崖。有元豐時蘇軾。任仲儀。黃庭堅題刻。嘉泰中成繪於中。起吏隱亭。洪偃又起輕紅亭焉。○茅盈內傳曰。秦始皇三十一年九月庚子。茅盈高祖濛乘雲駕鶴。白日昇天。先是有巴謠曰。神仙得者茅初成。駕鶴上昇入太清。時下園洲戲赤城。繼世而往在我盈。帝若學之臘嘉平。始皇聞之。於是改臘爲嘉平也。今治西有棲真洞。在大茅峽。相傳洞中曾息大茅君云。○李膺益州記。廣陽州東七里。水南有遮要之鵝。石志云。治東江潯廣陽壩。卽廣陽州也。字宜從洲。此石江中突起。俗名遮夫鵝。○華陽國志。郡東枳有廣德嶼。有明月峽。故巴亦有三峽也。王維曉行巴峽詩云。際曉投巴峽。餘春憶帝京。晴江一女滌。朝日衆雞鳴。水國舟中市。山橋樹杪行。登高萬井出。眺迴二流明。人作殊方語。鶯爲舊國聲。賴多山水趣。稍解別離情。杜甫渝州候嚴六侍御不到。先下峽詩。聞道乘驄發。沙邊待至今。不知雲雨散。虛費短長吟。山帶烏蠻關。江連白帝深。船經一柱觀。留眼共登臨。○益州記云。遮堦石東二里至明月峽。峽前南岸壁高四十丈。有圓孔如滿月狀。本志明月陀邊有高冢。橫刻伯喈墓三大字。按蔡邕曾遷巴郡太守。不拜。有謝版云。巴士長遠。江山修隔。宣暢聖化。道遠和風。非臣才力所能供給。其墓未詳矣。過此有紫金山。有寺名紫金寺。又過此有古灘城。爲巴子置津處。又二十里有銅鑼峽。以水響聲似之。是涪岷水會處。峽有關。馮當可葬其上。有圓石高懸。○志云。治西十里石壁繪佛像。一徑僅容輿馬。卽佛圖關也。又三十里爲多

功城。宋末築。有寺名多功寺。門垣猶存。寺有天池水。又四十里爲長安洞。秉燭深入可里許。見雙石墩猶龍。過此則皆渟泓積水矣。相傳崇因寺前。居民屋內有洞與此通。故崇因寺亦謂之長安寺也。又二十里爲東陽鎮。唐置東陽城焉。輿地碑目。蜀廣政十五碑。在東陽鎮市心。卽此。陳子昂入東陽峽。與李明府舟前後不相及。詩云。東崖初解纜。南浦遂離羣。出沒同洲島。沿洄異渚濱。風煙猶可望。歌笑浩難聞。路轉青山合。峯迴白日曛。奔濤上漫漫。積浪下沄沄。倏忽猶疑及。差池復兩分。離離間遠樹。藹藹沒遙氛。孤猿啼寒月。哀鴻叫斷雲。仙舟不可見。遙思坐氤氳。又合州津口別弟。至東陽峽步趁不及。詩。江潭共爲客。洲浦獨迷津。思積芳亭樹。心斷白眉人。同衾成楚越。別鳥類胡秦。林岸隨天轉。雲峯逐望新。遙遙終不見。默默坐含嚙。念別疑三月。經遊未一旬。孤舟多逸興。誰共爾爲隣。峽之隔岸亦名龍門。有石刻。是江津縣龍門灘矣。○圖經。縉雲山在縣西北百三十里。其山高聳多林木。下有溫泉。分東西流。相傳黃帝於此合藥。陶宏景水仙賦曰。增城瑤館。縉雲瓊闕。黃帝所以騰百神也。方輿勝覽。卽謂之巴山矣。宋靈成侯廟碑云。此山出於禹別九州之前。黃帝時有縉雲氏不才子。曰混沌。縉雲氏高辛氏亦有不才子八人。投出於巴。竇以禦鬼魅。名基於此。山有九峯。寶塔峯最著。亦阿育王塔八萬四千之一也。迦葉尊者於九峯頂上示一十三足。又飭袈裟印文於獅子峯。○按感通錄。縉雲寺卽古相思寺也。以此山有相思崖。生相思竹。形如桃斂矣。吳均春秋。渝州西百里相思寺北。石山有佛跡十三。皆長三尺許。闊一尺一寸。深九寸。中有魚文。在佛堂北十餘步。貞觀二十年十月。寺側泉內忽出紅蓮花。面廣三尺。遊旅往還。無不嘆訝。經月不滅。高

僧傳。隋無相禪師渡笠。唐慈應禪師受記二龍處矣。○縉雲傳勝錄云。宋初慧權禪師住持。太宗皇帝御誦梵經二百四十函。真宗咸平元年迎至寺。景德中勅改崇教寺。封慧權爲慈印大師。有慈印師遺誠碑。咸平三年二月二十七日立。凡十三則。有熙寧三年提點夔州路諸州刑獄江中行立石界約祕書。有權渝州事都管宋構藏經記。按宋史仁宗天聖元年三月庚辰涪陵相思寺。夜有光出阿育王塔舊址。發之得金銅像三百二十有七。則此山在宋時稱極盛矣。○山麓溫泉懸崖湧出。四時騰湧。中有遊魚數十尾。人皆見之。宋推官彭應求詩云。公程無暇日。乍得宿清幽。故覺空門客。不生浮世愁。溫泉喧古洞。寒磬度危樓。微曉都忘寐。渾疑在沃州。周茂叔艤舟其下。刻之於石。方輿勝覽載縉雲先生馮時行詩云。借問禪林景。若何半天樓。殿冠嵯峨。莫言暑氣此中少。自是清風高處多。岷峩九峯晴有霧。瀾瀾一水遠無波。我來游覽便歸去。不必吟成證道歌。○圖經云。西南百里涪江中有魚石。俗呼魚鹿峽。以形肖也。○杜光庭錄異記曰。江州縣南五十里。沱江山下有七里店。其處夜常有光十餘枚。如流星環石。或聚或散。石亦有光。乃珠胎於此。或人見而密識其處。遲明尋之使不得。○志云。治南六十里冠山多古寺。有仙侶洞。洞中石牀石傘。儼如刻畫。又十里爲大華山。有荔枝禪院。按華陽國志。江州縣多荔枝園。熟時二千石。常設廚膳。命士大夫共會樹下食之。今樹已烏有。而院名無恙也。

江津縣

南齊時爲江州縣理。寰宇記所稱犍溪口矣。今呼南溪。溪源在縣東南。合岷江。遶治如几。亦名几水。按四

夷縣道記云。自江津路南尋熨溪水路。往南平州。卽此。○周地圖記。七門郡置在熨口。今之七門灘也。志云。在縣西七十里有七石橫江中。○志又云。治西有石門。號龍門灘。卽龍門峽也。按陳子昂龍門峽詩曰。龍門非禹鑿。詭怪乃天功。西南出巴峽。不與衆山同。長竇互五里。宛轉若嵌空。伏湍照潛石。瀑水生輪風。流動無晝夜。噴薄龍門中。潭河勢不測。藻葩垂彩虹。我行當季月。煙景共春融。江關勤亦甚。巘嶂意難窮。誓將息機事。煉藥此山中。○志又云。縣西十里有古石羊驛。其地亦名石門。對江壁上鑄大佛。有大佛寺。故相張無盡所剏。亦名無盡菴。傍有亭翼然。據大石。而藏茂林修竹中。客登之徘徊四顧。南有鼎山。東有天池。北有馬驍。其高各刺天。中突一峯名箕星。尤奇特。邑聚橫前。萬瓦鱗列。大江從西來。委蛇曲折。灌流杯池。激挑燈石。直注亭下。鷗鷺往來。在烟波杳靄間。清絕不可名狀。○宋知縣事冉木震碑云。廳事後有合抱荔枝。唐人所植。每熟時。令肅士大夫會食樹下。猶有漢之遺風。荔枝舊有亭。亭中碑刻。歲久剝落。想涪亭卽舊址也。昔黃魯直過江津。與馮壽李仔善。其樂閒堂記爲馮作也。魯直與王觀復書云。梓州李仔任道。流寓江津。二十餘年。言行有物。參道得要。老成人也。山谷晚號涪翁。亭名想涪。寄遐思耳。○圖經。縣北有巴子養魚池。神龍是潛。志云。在岷江南十里有長池。廣袤五丈。四時湛然。范景仁墓居其北。按流寓傳。范蜀公居縣之長池里。又云。居樓臺山。山在治西。有范鎮村。○碑目云。剛直御史之墓。虞允文爲杜莘老書。按碑在縣之杜村。有紹興乙亥右朝奉郎守司農少卿杜莘老題次。乾道丙戌杜宗甫磨厓。宗甫卽莘老拾遺之後也。自青神僑居於此。又蘇伯瑜者。叔黨之後。亦自眉山僑居縣之聖鍾里。東坡書歐陽醉



翁亭記。真蹟尙藏其家。○李膺益州記云。江州縣西南有仙池。昔有仙人於此池側。置樓而居。多植香草於樓下。一夕忽縱火焚其草。天降紫雲。飄然而去。後又指此地爲香草樓。志云。在今治西南三十里。○志又云。唐大聖寺在縣西七十里。按太平廣記。東蜀大聖院一木像。製度瓊異。耆老云。像自荆湖泝流而上。歷歸峽等郡。所過多具舟楫。取千夫牽挽。不抵岸。流至渝州。州人焚香祈請。應聲而往。建此院安置焉。○異物志云。在昔天旱。水泉皆涸。有姑氏病渴。思得甘泉。其婦徬徨。至周陽山下。遇一叟曰。能與吾斂。則泉可得。婦拔斂授之。墜於地而泉出。至今磧中餘淺水一泓。周五六尺。有金斂影一雙。按在縣西之周溪上。婦亦周姓。○又云。昔有飛鳥銜僧衣袖。僧異之。隨至石隙中。窺見一金注子。手不能及。鳥復銜一枝與僧。因得取注。顧視銜枝。乃苦椈木也。其處在治北五里。○碑目。縣南三里。挑燈磧石壁上。鐫云。乾道辛卯正月十九日。天水趙宜之陪王屋李希仲。太原王直夫。同寺首珍。況來遊。飲不至醉。王屋李孝友書。按此卽蓮花石也。在江中不恆見。見則歲豐。○巴中記曰。江州縣有窳窮峽。按在今縣東七十里。珞璜鎮渝志云。五十里有西山。石壁上刻終古礙新月。半邊無夕陽之句。志又云。近時盜發王居士墓。墓中鐫二詩云。官無名字私無債。架有衣裳廩有儲。只此便同天上樂。不知天上又何如。又芳草煙村宿雨收。牧童歸去倒騎牛。笛中一曲昇平樂。弄得生來未解愁。此墓在縣南一里。居士亦不知爲誰。

壁山縣

宋李濟壁山普澤廟記云。國朝蜀分爲四。而方各有鎮。由劍之裏爲七曲。劍以東爲白崖。劍以西爲玉壘。

自蜀而下爲渝。則有壁山。是四山者。如蜀之鎮一道。生靈之司命也。○寰宇記云。四面高山。中央平田。周圍二百餘里。唐天寶中。諸州逃戶。多投此營。川中有一孤山。西北二面險峻。東南削平。土人號爲重壁山。五代史。後梁乾化三年五月。壁山驕虞見二鹿隨之。歐陽永叔嘆以爲異也。

### 永川縣

縣有蓮池。壩二巨石。崇聳欲合。平衍可半里許。石竅中出水。匯而爲小池。世傳蓮子從石竅中出。而生蓮。不由栽植。又有石松坪。在來蘇鎮。有松化石。石質而松理。或二三尺許。大可合抱。然不過相望數山有之。俗呼雷燒松。杜詩所謂萬年松化石者。卽此。○志云。鐵山鎮在治東三十里。趙抃過鐵山舖。寄交代吳龍圖詩。暫留山驛。又晨興。西望旌麾。想舊朋。三院筆簪。曾對直。兩川兵印。復交承。年光頭鬢華如雪。世態心。情冷似冰。境上憑詩。馳遠意。青泥寒曉入雲登。又云。六十里有牛尾驛。鄭國華留題云。龍尾道中退朝客。雕鞍寶馬黃金勒。誰憐遠使足馳驅。夜半孤村牛尾驛。

### 榮昌縣

譚用之榮昌記云。巴叢之饒。谿交水橫。列岫羅巖。瓜隄不斷。詩紀云。河梁望壘頭。分手路悠悠。徂年驚若電。別日欲成秋。黃鶴飛飛遠。青山去去愁。不言雲雨散。更似東西流。此梁江總別袁昌州作也。勝覽云。唐段建中太尉文昌之父。嘗典榮昌二郡。事見李德裕成都資福寺記。唐守之可考者。惟建中。楊瑄。李師望。韋君集四人而已。唐史載大厯中。韋君靖爲榮昌令。值黃巢兵起。君靖引兵從征。動以信義。所向克捷。累

官尙書僕射矣。○碑目云。演教院碑在昌州舊基院。有斷碑載唐咸通歲縣令唐允中。又云。六十四卦象碑在昌元縣。又云。淨土院碑在昌元縣東四十里。唐太和五年建。又云。昌州北二十里亂石灘。有唐人碑刻曰龍灘。其溪深遠千餘丈。世傳古有龍行。石裂成溪。因名。○大抵昌州。今之舊州。是昌元里。卽葛昌元縣地也。今榮昌乃古寶蓋鎮。志云。南一里曰寶蓋山。有臥佛寺。壘形如阜。蓋圓淨。明朝聳翠。炫奇矣。○楊子謨顯惠廟記。靜南山水奇秀。士大夫避地者多居焉。仙靈逸迹。尙有董葛之遺風。按志云。縣東二十里曰葛仙山。相傳漢葛孝先受左慈術於此。修煉又有峯腦山。山巔有白石如羣羊狀。下有石洞。亦葛仙修煉處。崖畔有巨石突出。石縫中生桃一株。高丈餘。葉榦與凡桃異。花實不常。國朝宣德中。桃實各圍尺許。○紀勝云。縣南二十里老鴉山。有李戡。李戮。兄弟故宅。二李善棋。會虜索棋戰。詔求天下善奕者。蜀帥以戡應詔。虜望風知畏。不敢措手。文潞公贈以詩云。昌元建邑幾經春。百里封疆秀色新。鴨子池邊登第客。老鴉山下着棋人。

大足縣

唐光啓以前。昌元是昌州。光啓以後。則昌州理大足矣。縣左有碑。字畫模糊。大略是昌州郡孔子題名也。碑目云。六經圖。碑在郡學。郡人楊甲鼎卿所著。又云。漢王方平古碑。顏魯公書。在舊學。今徒爲別刻字。尙在碑陰矣。○冷齋夜語載。有人調官都下。踰年始得昌守。已而求易便郡。有涪才者。聞而往見之曰。昌佳郡也。官欲易地有之乎。曰然。涪曰。誤矣。曰。奉給優乎。涪曰。否。訟簡乎。涪曰。否。然則奚誤。曰。海棠。患無香。獨

靜南者有香。非佳郡而何。故昌號海棠香國。土人云。地宜此花。易植易蕃。郡治香霏室。一老樹重趺。擧尊。每花或二十餘瓣。花氣穠郁。餘不能及也。○志云。縣之東禪寺有宋徽宗手碑。西禪寺晉永和建。寶頂寺唐柳本曾學。吳道子筆意。環崖數里。鑿浮屠像。奇譎幽怪。古今所未有也。○志又云。老君洞在治東南三十五里。玉口山巔。洞宏敞。可容十餘人。內石牀。石臼。丹竈尙存。洞巔一隙。透明。有泉自石罅中流出。山麓惟一。小徑可通。相傳老子煉丹於此。○又云。寶珠溪在治南四十里。唐貞觀時。漁人郭福者。夜捕魚。見水際有光。卽之。有蚌如斗。剖得珠徑寸。獻之太宗。賜以積善井碑。碣存。○又云。北巖在治北三里。唐韋君靖建。碧其上。曰永昌。有石刻沿巖。皆浮圖像。輿地碑目云。吳季子墓碑在。北山。相傳以爲孔子書。開元中。殷仲容奉詔。摸搨大歷中。蕭定移刻。潤州有張從申題其後。又云。高祖大風歌碑在。北山。又云。古文孝經在。北山。凡二十二章。與今文十八章小異。王象之曰。今文先出於漢初。而古文與尙書同出於孔子壞宅。今文已盛。而古文獨不列之學宮。惟孔安國。馬融爲之傳。及明皇注。今文十八章。孝經古文益微矣。司馬光。范祖禹。皆曾繳進。光謂始藏之時。去古未遠。其書最真。祖禹又爲之說。亦云。古文廣得其正。○碑目又云。唐韋君靖碑在。北山。乾寧二年。靜南令胡密所作。按胡密。永昌寨碑云。永昌寨者。君靖章公所建也。頃乾符之際。天下騷然。旱蝗相仍。兵戈四起。公視茲遐僻。民不聊生。遂合置義兵。安戶口。抑強扶弱。務織勸農。足食足兵。以殺去殺。自黃巢侵略。京闕鑿與出。幸成都。四海波騰。三川鼎沸。韓秀昇勃亂。黔峽侵軼。巴渝公迺統率義軍。討除逆黨。值秀昇盡挽舟楫。圍逼郡城。公迺詳度機宜。上下攔截。依山排陣。背水布兵兩。

面夾攻。從中翦撲。賊勢大敗。我武維揚。渝牧田公備錄聞奏。迴張忠節。檢校御史大夫。除拜普州刺史。值川師效逆。帥臣專征。公又收復合州。絕其枝蔓。加右散騎常侍。拜合州刺史。泊鄭雄僕射失律廣漢。山行章尙書攻圍當州。故太尉顧公屢降命旨。頻招延應。公統領精銳二萬餘人。虔告善龜。申令士卒。並破二十七砦。殺戮五萬餘人。上聞偉績。特加檢校工部尙書。拜當州刺史。充昌普渝合四州都指揮使。加刑部尙書。右僕射。公以臨郡歲久。迺思退居。上表陳情。宸衷未允。特旨量留。加金紫光祿大夫。檢校左僕射。扶風縣開國男。食邑三百戶。屢銜鳳詔。真剖魚符。政懋穎川。化隆河內。邑有箱倉之咏。俗多襦袴之謠。求瘼之念彌堅。去害之心益切。其於駕馭英傑。取舍毫釐。重仁義如邱山。輕金帛如泥滓。憐孤恤老。濟弱扶危。行旅如歸。遠邁鄭莊之驛。遊人若市。悉登漢相之門。其拯綏四方。乃如此也。每遇良辰美景。月夕花朝。張管絃以追歡。啓華筵而召侶。周旋有禮。揖遜無諱。罇俎不空。座客常滿。王衍之冰壺轉運。嵇康之玉岫寧頽。其禮讓謙恭。有如此也。至若立功立事。爲國爲民。或身提黑槊。或坐運元機。身先士卒。首挫兇徒。謀必十全。舉無遺筭。其剛毅果敢。又如此也。當夫賞功訴罪。激濁揚清。甄獎功勤。黜棄私黨。三異感德。萬衆歸心。其恩威刑賞。有如此也。公以海濤未息。雲陣猶橫。常願驅脅。安置左綿。載實倉庾。奔衝遂府。使牒呼逼。邊檄征行。然士馬雖精。其如柵未固。思大易習坎之義。徵王公設險之辭。迺於景福元年歲春。卜築常鎮西北。維沿岡山。建築茲山也。上摩掩靄。下抗平原。盪似長雲。萃如斷岸。崖巖重疊。磴道崎嶇。一夫荷戈。萬人失據。由是芟薙草萊。相度地形。人力子來。畚鍤雲至。連臺比屋。萬戶千門。高亢濬流。煙籠粉堞。霧

捧朱樓。龍吟笳角之聲。雷動鼓鑿之響。而又良工創墨。心匠設規。築城堡二十餘間。建敵樓百十餘所。遙瞻天際。非龜城之可倫。高倚雲間。豈麗樓之能擬。其上則飛泉迸出。綠水滂流。崢嶸一十二峯。周迴二十八里。蓋造化之凝結。豈金湯之比倫。況纒儲十年。兵屯萬數。遐邇徵休。軍民肯慶。耕織無妨。徭役不缺。可謂一勞永逸。有備無患者矣。其軍中節級。將校等賢。深達機略。博識古今。有如同志弟兄。異姓骨肉。一心報國。戮力從軍。咸奉渥恩。皆沾爵賞。或崇帶劍。或位專城。或榮授金貂。或職兼霜憲。雅荷際會。允屬休明。請列署石。庶不墜勳業云爾。乾寧二年乙卯十二月朔日癸未十九日辛丑記。



# 蜀中名勝記卷之十八

## 重慶府二

合州

三國志先主詣劉璋。取道墊江入涪。常道將曰。巴子時。雖都江州。或治墊江。又曰。墊江在巴郡西北中水。四百里。有桑蠶牛馬。漢時涪于長甯。雅有美貌。卽此地矣。○圖經云。魏之合州石鏡縣。隋之涪州涪陵郡。唐之合州巴川郡。宋之合州石照縣。皆理此。方輿勝覽。州南百步。內江水心有石屹立。正圓如月。其根巖。崑如雲捧之。謂之石鏡。冬出水可三丈。碑曰云。涪內水石鏡。題名云。大歷三年。此石出。兵甲息。黎庶歸。六氣調。五穀熟。刺史兼侍御史王鋌記。按石鏡。石照縣俱以此名。○魏華父瑞應山記云。景德間。合州瑞應山出異木。文理成天下太平字。志云。瑞應山在州後。漢子墓在其上。光教寺在其下。寺今爲州埋所。○方輿云。張柬之守合州。姚崇薦其沈厚具相才。故州治有沈厚堂。今名景厚。本此堂。中篆鑿辭八字。字徑四尺。李陽冰書。碑陰爲孟景石經周禮數段。○碑曰云。李當塗篆龍門鳳穴。司馬君實書公生明。蘇唐鄉篆蒙泉竹鶴等字。俱嘉定間。李元庚刻。在治北薊林巖上。治西鶴鳴里。有招鶴亭三字。宋徽宗書。按志。宣和間。許生舉進士。愛其隣人朱受家。羣鶴起。亭作詩。招之。鶴果來集。朱憤而勸諸朝。上命均之。鶴以離羣悲鳴不已。道君爲書亭額賜焉。○州有永清里。里有夜雨寺。僧智果所居。取李義山巴山夜雨之句也。又



有墊江里。里有龍骨寺。爲龍蛻處。巴中記云。墊江多龍矣。志云。周元公判州事。嘗與客弈。一老人來觀。口流涎而香。公驚問曰。汝龍也。何以至此。老人曰。安知之。公曰。以涎知爾。忽大雷電起。老人化龍。泝溪而上。公乃令琢方石二十四片以鎮之。今通曉橋是其處。在城內之明月街。○晁公武清華樓記曰。合州其山龍。多銅梁。上接岷峨。下繞甌越。屬海而止。所謂南戒者也。水則涪水嘉陵。合流城下。貫江沱。通漢沔。引衆流入於海。所謂南紀也。○水經注云。宕渠水亦名潛水。又名渝水。俗謂之渠江。寰宇記云。渠江水在縣北十五里。源自萬頃池分來。經巴達渠廣安等界。至本州東北與嘉陵江合。卽西漢水。勝覽云。西漢水在石照縣東百步。戰國策所謂漢中之甲。輕舟出於巴。乘夏水下漢。四日而至五渚也。其源發西和州徽外。徑階沔。又逕大安軍利劍閣。果與涪水會。○蔡松年南北史補云。吐谷渾主登其國。西疆觀墊江源。問水所經。長史曾和對曰。此水經仇池。過晉壽。出宕渠。始號墊江。至巴郡而入於江。度廣陵會於海。主嘆曰。水尙知歸。吾獨無所歸乎。乃遣使南通於劉宋。○志云。會江門樓。卽唐之會江樓也。杜詩。君今起柁春江流。余亦沙邊具小舟。幸爲達書賢府尹。江花未盡會江樓。范成大詩。井陘東山縣。山河古合州。本根擎斷岸。急雨洗江流。關下嘉陵水。沙頭杜老舟。江花應好在。無計會江樓。文苑。穆員送合州徐使君序云。二月中節。時芳爲人。柳先攀折而垂。水待臨泛而滿。花迎酒客而笑。鶯隨詩人而吟。亦會於江樓矣。○方輿勝覽云。直郡治之會江樓。有學士山。其高不能臨傍山。而南峯斜崖諸勢。班班若出其下。亦甚異也。山麓有張氏荔枝。異本合榦。唐文若曲端嘗賦之。○勝覽又云。石照東北七里東臺山。漢末薛融讀書處。東十里東

山。趙子伯章別業。有東山二字。廣丈餘。西二十里。牟山。唐康元良讀書處。○舊經云。合州北崖在州北五里。或以古濮國。附會爲濮巖。非也。崖有古柏數十章。圍八九尺。有定林院。歲正月九日。郡以故事。設宴於此。遊人盛集。又有荔枝閣。沿崖鑄象設。古意生動。及古賢題刻甚多。又有濮湖。在巖下。雖傾圮。古隄及巖上刻字。猶存岑象求定林院詩。野闊蓮宮迴。樓臺半倚山。地連巴峽近。門對濮溪灣。柏徑松烟濕。巖房雨薜斑。白雲邀客住。明月伴僧閒。經梵喧譁外。香燈杳靄間。勝遊成邂逅。危攢喜躋攀。世路長何極。塵心久欲還。輜車正催發。緩步出重關。元祐五年。太守劉象功作濮岳銘。其序云。距城三里。有僧舍。依大江林麓。樓觀聳出。如畫者。伏於繡素間。其絕俗幽邃。歷歷可指。予幼時侍先君嘗遊。今被命領郡。復至其所。慨然有感。親懷舊之嘆。因作銘。書諸岳石云。合之二川。河漢發源。極地通天。浩渺東傾。奔龍竄鯨。吞夔走荆。上有蒼巖。喬松古杉。陰晴撲藍。飛岳斷壁。烟昏霧塞。溟空嶽坼。巴漢鄰國。氣象相賊。爲狼爲豹。劍血禘蝕。二王滅迹。雲開晝寂。世變茫茫。山空地荒。鳥勦獸藏。創業其時。鑿高構危。立剎開基。在昔幼沖。侍於先公。曾步岳宮。帝命惟汝。克蹈前武。得治茲土。馳馬歲久。江山惟舊。中懷孔疚。勒銘其巔。子承孫傳。與山齊年。○輿地碑目。石照北岳。盧舍那佛。題名云。敬造盧舍那佛一軀。菩薩二軀。唐長慶三年。歲次癸卯。三月十九日。銀青光祿大夫。使持節。合州諸軍事。行合州刺史。兼御史中丞。劉溫。溫自幽燕而來。從左羽林軍使。改授此。記之歸正寺巖。○又云。石門彌陀像。開元二十三年。州別駕張釗爲刺史。孫希莊作。○又云。關詠永言王。暫微之。李儀表。臣皇祐壬辰。寒食日來。○又云。崇甯丙戌歲。雨霑足。因觀民田。率巡檢高公綜。

仲實石照令王叔陵仲陞法曹馬師古宗道主簿姜宇定中同行至此早膳重午後一日郡守李樂道題  
○又云馮茂恭郡商民唐立夫紹興乙亥十月癸巳同遊○又云宇文休冉德濟閻文叔呂達夫乾道己  
丑三月廿四日來遊○又云漢巖東州勝處乾道辛卯立秋杜國光偕趙彥和馮廷式及其弟慶遠酌歲  
寒亭○方輿勝覽云釣魚山在石照縣東十里涪內水在其南西溪上流經其北郡人遊者以舟下涪水  
艤而上已乃繞山北沿西漢水而歸此遊觀之奇也山南大石砥平有巨人迹相傳異人坐其上投釣江  
中山以是名下有大刹曰護國寺歲二月八日太守率僚屬宴集於此志云釣魚山東南西南三面據江峭  
壁懸厓安撫使余玠於山建城以禦胡元故又呼釣魚城也上有天池周五百餘步後有石菴凡二十四  
片石鑿成開山石頭和尚所剏西南隅有祠奉李忠宣公德輝蓋安撫王立之義妹李氏在園中忠宣奏  
闕得保全其人民云元人登釣魚山詩臺倚層巒萬仞高魚龍面面湧驚濤振衣更切臨淵想擬選長竿  
學釣鼈又峯頭借得月爲釣把向江心自不收莫笑山人似緣木磻溪元是釣西周又遺庵故傍唐僧塔  
荒壘猶餘宋戰場讀罷題詩聊騁望半江寒霧送斜陽○輿地碑目眉山王魯望萬里西歸艤舟合陽趙  
涪甫侯德之定之孫相之載之相與游釣魚秋雨初霽心意豁然酌酒僅明興盡而返○又云眉山家漁  
歸以嘉定乙亥七月九日訪釣魚小供因留詩石上暫脫塵羈入古藍西風送我與禪參漲開二水虬朱  
甃嵐隱諸峯玉碧簪兩武深痕墮塵跡一樵打就蹋雲庵自憐把釣人多老消息遙遙自渭南○又云紹  
熙改元郡守汲國呂交修無棄以清明日率長安母如懋子發長江杜凡伯扶資中馬三捷周臣普慈楊

文彥章蓬溪趙君瑞族人郁某既放舟來尋釣魚城之勝積雨初霽放懷舉酒男鑒仁姪近仁明仁與仁偕麟孫住僧侍行其傍有閩人朱濬詩云釣魚磯上閒著身曾次應無一點塵偶爾不逢周漢主此心端弗愧前人紹熙辛亥臘月既望○又云東沂尉行之輔之約晉國趙資深才父遂甯陳子龍益昌王國秉錦官王正仲乙卯慶元仲冬來遊○又云眉山李壁來遊甥劉沖之族子潮俱慶元三年九日○又云新南劍州使君三衛徐公以今春解南昌之組治舟合陽避夏秋之漲以良月甲子解纜西歸攝郡僉李忠父偕同寮史仲立趙季紳梅君用張子信何文振張通叔白德章劉光父晁季子錢別於此○郡國志云巴城在漢南江是楚襄王滅巴封其子爲銅梁侯故有此城方輿勝覽云石照南五里有巴子城乃周武王封其支庶處在涪江南銅梁山下縉雲馮時序謂山有茶色白甘腴俗謂之水茶甲於巴蜀元和志謂其多玉蕊花桃竹杖也○寰宇記云銅梁山在石鏡縣南九里東西連亘二十餘里山巔平整環合諸峯此其獨秀者圖經有宿雲崖方巖松風閣讀書堂博古齋諸勝趙伯宣之別業也○志云山在州南五里石梁橫亘其色如銅崖鑄銅梁山三字有石洞深丈餘有石牀可坐十餘人唐閩丘道人居此五十餘年迺化去棋局丹井猶存題名於洞壁者有閩州城南果何在永州澹岳天下稀使山谷見之嘗復作何等語紹興癸酉春九日韓國趙善敏漢澤王季蒙普慈馮憲來○又梁叔解組舟過合陽奉同登銅梁地主趙周祐鄉人王彥澤梁公行家姪方叔俱來紹興二十九年四月癸巳景和仲書○又魯國趙彥博富文從元憲兄造銅梁山觀洞天石室丹臺靈泉茂林修竹之富仙境宛然追思周祐兄清標高致今已隔

世恨不當日得陪杖屨。周祐乃元憲仲弟。其子師美敦書樂善。予子信常與之同僚。知有子矣。是晚元憲具酒肴於洞靈之道院。道京師陝西專談論竑偉。袞袞可聽。吾宗之英也。元憲之子師儒。師老侍。皆孝友恭儉。克其家者。日既夕。乃歸。祐祜二年五月十三日題。○蜀郡賦云。外負銅梁。劉孝威詩。銅梁不可攀。孔德紹詩。銅梁忽背飛。王維送李員外賢郎詩。少年何處去。負米上銅梁。借問阿戎父。知爲童子郎。魚腹請詩賦。檀布作衣裳。薏苡扶衰病。歸來幸可將。晁公武將發合州詩。銅梁山昏空翠重。石鏡水落灘聲遲。皆此山也。○寰宇記云。隋析石鏡置赤水縣。以赤水出其源也。按志州西百餘里有赤水鄉。赤水縣址存。王象之碑目云。唐令長新戒。在赤水縣。開元二十四年立。元宗嘗擇縣令百六十三人。賜以丁甯之戒。其後爲縣者。皆以戒刻石。集古錄取焉。景祐中令重刻之。今非唐故物矣。又云。雁塔題名在赤水縣摩。宣和間柳玳始刻。置長安慈恩寺。此蓋搨本也。又云。赤水縣龍多山。唐人刻字。此山高明竊深。變態萬狀。下視涪水如帶。烟雲出沒。山之偉觀也。又云。祭龍多題名。天寶十四載十月十一日。大中大夫守巴川郡太守真甯縣開國男。上柱國賜紫金魚袋。韋藏鋒。準。制。醮。祭。又云。唐孫樵。龍多山錄。舊刻刊闕。元祐七年。劉象功再書。遒勁可喜。又云。集聖院記在赤水縣之龍多山。唐咸通間。李稽作。又云。龍多山鷲臺院。紹興三十二年十一月。縉雲馮時行記略云。龍多山有至道觀。觀東大池。爲則天后放生池。中峯有鷲臺。佛慧二院。院栽萬竹。竹圍徑尺。有仙柏。圍丈有二尺。中空。而柯葉敷腴。有靈山院。泉自崖出。瀦爲方池。大旱不竭。有駕鶴軒。下視涪水如帶處。○圖經云。晉永嘉三年。馮仙舉家十七人於龍多山昇去。按卽馮蓋羅也。今仙臺

觀其燒丹處。至道觀壁間。其繪像存焉。馮時行詩云。兒童使讀山中記。老大才登記裏山。何麟詩。世路聲牙赤水過。故升天險問龍多。彭應求詩。一望東川盡數州。依崖泉石更清幽。不辭挹月披雲臥。攬取山房一夕秋。註云。山遠且高。逶迤如龍躡。故曰龍多也。涪江在其下。去州百二十里。○寰宇記。青石山在石鏡西二百二十里。涪水之南。漢時山裂之處。至今猶存。李膺益州記曰。昔巴蜀爭界。久而不決。漢高八年。一朝密霧。青石山爲之裂。自上及下。破處直若引繩焉。於是州界始判。上有古祠。靈於水旱。華陽國志所謂青石神矣。○予觀孫樵龍多山記云。梓潼南鄙。越五百里。其中有山。崛起中天。卽山之趾。得徑委延。舉武三十。北出其巔。氣象巒妍。孕成陰烟。屹石巉巖。別爲東巖。榑牙重複。爭先角逐。若絕若裂。若缺若穴。突者虎怒。企者猿踞。橫者木仆。挺者碑豎。又有似乎飛簷連軒。櫨櫨交攢。欹撐兀柱。懸棟危礎。殊狀詭類。愕不得視。下有畝平。砥若戶庭。攄乳側脈。膏渟泓石。俯對絕壑。杪臨蘭薄。仙臺標異。藂石負起。屹與山別。猿鳥躡絕。腹竇空路。由其中。斷齧相望。攀緣上下。闕然而出。躍見白日。始時永嘉。飛真蓋羅。元踪斯存。石刻傳聞。丹成而蜕。駕鶴騰天。一去遼廓。千載寂寞。澄泉傳靈。別壑絕明。風閑境清。寂寞無聲。佳木美竹。岡巒交植。風來怒黑。雷動巖谷。山禽昂獸。捷翻互鶩。曉吟暄啼。聽之淒淒。迴環下矚。萬類在目。因山帶川。青紫碧聯。莽蒼際天。杳杳不分。月上於東。日薄於泉。魄朗輪昏。出入目前。其或宿霧朝雲。糊空縛山。漠漠漫漫。莫知其端。嗚。曜始浴。徹天昏紅。輪高而赤。洪流激射。濃透薄釋。綿裂綺折。千狀萬態。條然收響。樵起來而遊。泊車而休。登降信宿。聞見習熟。始曰。山乎。曾未始有得乎。無處夸世釣名者。汚此巖局乎。且欲聞於穎。

陽之徒乎。

銅梁縣

川曰巴川。以水遠其治前如巴字矣。山曰巴嶽。以峯高出雲表如嶽勢矣。○碑目云。古書巖在巴川縣。石間隱隱如篆文不可讀。又云。季札墓銘在巴川縣。相傳以爲孔子所書。○紀勝云。縣東里許。丘曰羅塢。名東岳。宋馮偁記云。歲星位於泰。熒惑位於衡。太白位於華。辰星位於常。鎮星位於嵩。而羅塢計都二星位於巴嶽之旁。昭然可考也。○勝覽云。南峯在巴川縣東四十里。高五里。是爲峽山之首。兩山複出對峙。中廣十里。塗左有穴謂之僊洞。其深五里。寶水流出爲澗。有嘉魚。又云。中峯在巴川縣東南六十里。山環二十里如盤。民錯居如畫。有泉自山注下曰天池。○紀勝云。縣南十五里有巴嶽山。絕頂蟠螭若爐。其下有崑崙洞。多蒼玉。產仙茅。管唐長慶中。采樵者服之得仙。又產木蓮花。高五六尺。葉如榲楠。花如茵蔯。出山則不植。有玉板泉在山上。味甘冽不竭。相傳昔人斲井得玉版。叩之清越。如磬聲然。○碑目云。唐永泰二年。石刻在巴嶽山之化度院。石刻但云。永泰二年。按永泰。齊明帝。唐代宗年號。齊永泰止五月。而唐永泰二年十一月始改大歷。故知爲唐無疑。○周茂叔天池詩云。清和天氣年能幾。短葛輕紗近水涯。風似相知偏到袖。魚如通信不驚槎。笑凭山色傾新甕。醉傍汀陰數落花。嘯傲不妨明月上。一行歸路起栖鴉。又有觀巴嶽木蓮詩云。仙姿元是華嶺栽。不向東林沼上開。嫩蕊曉隨梅雨放。清香時傍竹風來。枝懸繡蒂垂金彈。瓣落蒼苔墜玉杯。若使耶溪少年見。定拋蘭棹到岳隈。是時濂溪判合州事來游。二作亦皆輕逸。

不沾道學氣。可喜也。○志云。治西百步有望仙樓。爲唐刺史趙延之建。延之刺合州。破賊有功。後得道仙去。詳神仙記中。按少陵巴山詩云。巴山遇中使。云自峽城來。盜賊遂奔突。乘輿恐未迴。天寒召伯樹。地闊望仙臺。狼狽風塵裏。羣臣安在哉。又有亡名氏詩云。西山頂上最高樓。登眺能消萬古愁。奉使客來纔十日。登仙人去已千秋。荒涼巖棺含風雨。曲折巴川學字流。傍晚蹇驢林下過。谿雲潭影兩悠悠。皆爲延之作也。

### 定遠縣

縣南江邊有新明寺。古斷碑云。此晉之新明縣也。嘉陵玉溪在其左右。中有一巖。據大江以西。秀拔自雄。此卽西岳境。而漢初縣設焉。○碑目云。唐趙應龍塚在舊漢初縣。上有一坊。左右畫彩鳳。大書雍侯之居。開元乙卯季秋十九日立。又云。大圓山有光塵子墨迹云。三山相接欲飛騰。高下來爲半日登。合向中間著夫子。大員道士小員僧。傍書宋乾道壬辰年。相傳以爲呂仙作矣。

### 安居縣

陳子昂詩序入峭峽安居谿。伐木谿源幽邃。林嶺相映。有奇致焉。其詩曰。肅徒歌伐木。鶩櫂漾輕舟。靡迤隨迴水。潺湲沂淺流。烟沙分兩岸。露島夾雙洲。古樹連雲密。交峯入浪浮。巖潭相映媚。谿谷屢環周。路迴光逾逼。山深興轉幽。廡隴寒思晚。猿鳥暮聲秋。誓息蘭臺策。將從桂樹遊。因書謝親愛。千歲覓蓬丘。此卽舊縣之安居場也。○今縣別名瓊江。以官濺溪平灘一帶流入涪江。舊傳有瓊花浮水面而出。故號爲瓊



江矣。縣理在波羅川東里許。蓋有波崙寺云。層峯峭壁。聳插雲霄。凭欄而望。江山如繡。每月白前後。皎然冰輪若自頂出。而殿閣暈飛。悠悠松檜間也。三仙石。連埋樹。俱在其趾。濟勝者所必由矣。又東去爲鳳凰山。昔人於此得遺碑云。朝棲梧桐。暮宿此山。其山頂巨石平正。謂之鳳凰臺。而西南對立者曰龍歸山。上有龍歸寺。山形盤旋如龍。亦一方之幽勝也。正南則龍門山。兩峯壁立如門。漢隱士蘇汝礪藏書三萬卷於此。此初學記所載。舊屬銅梁。今割入當縣。碑目云。龍門山東八里有印土院。院有將軍祠。石刻云。故唐將也。逃難山中而死。葬山陰。或曰戰國時人也。歲春夏。民以車蓋迎其神至水上。張帷致饗矣。○志云。縣太平里有唐柳玳墓。玳在景福間刺渝州。遷瀘州道。卒葬於安居也。玳公綽之後。善書。初任御史大夫。在渝時。東川節度使顧彥暉請書德政碑。玳曰。若以潤筆爲贈。即不敢從命矣。其剛正如此。

綦江縣

江發源夜郎。作蒼帛色。故名。昔南平軍之長官司也。志云。治南三舍溪關。上有雁塔碑曰。此地南平軍舊址。南平王墓亦在此關。○瀛山在縣境。去郡百二十里有四十八面壁立高峻。四時青翠。望若蓬瀛。唐貞觀置瀛山縣於此。宋劉望之詩。山盤四十八面險。雲暗三百六旬秋。其上有白雲觀。觀前石筍參天。有碑名鳥道碑。○方輿勝覽云。南平軍西北有東溪。溪上小市有孝感橋。紹興甲戌有里婦從姑過溪。姑墜水。赴救之亦墜。漂至灘下皆不溺。

南川縣

陳復亨應專記云。南平州邊夜郎。外控諸酋。跨漢二郡。唐五州之境。○寰宇記曰。武德二年置南州。理隆陽縣。取西永隆山爲名。先天避諱。改爲南川。貞觀四年置南平州。理南平縣。八年改爲霸州。又云。貞觀十一年。涪州置隆化縣。亦取永隆山。先天改爲資化縣。按三地相去密邇。俱在渝州南境。及涪陵。枳縣之舊墟矣。通志謂宋初於當縣置南平軍。熙甯省入隆化。尋復置。元併南平軍及隆化入焉者也。文苑英華。李嶠有勅奉議郎行涪州隆化縣元素履制。綰符兩穴。游刃三巴。賓僚戀仰。蠻漢謳吟者矣。○寰宇記云。南平西四里有赤水。卽丹水也。唐置丹溪縣於此。丹溪合於焚溪。故改南州爲焚州焉。焚水流入江津縣南。齊所謂焚溪口也。今縣西二里有焚水寺。○方輿勝覽云。焚溪。東溪。葛溪。合流當縣西北。故貞觀又置三溪縣焉。其所理名爲石城。在今縣東。甚峻險。○僞蜀毛文錫茶譜云。南平縣有狼貓山。出茶黃黑色。渝人重之。寰宇記云。狼貓鄉人構屋高樹上。謂之閣欄。不解絲竹。惟擊銅鼓祭鬼。以祈福。一名獾。厓在南平軍西。○方輿勝覽。熊本平木斗夷得地五百里。山高谷深。乃奏建南平軍。謂卽板楯七蠻故地。先是劉孝標守南州。請置郡縣。遠人安之。晏殊爲孝標撰墓銘尙在。○劉夷叔雲山堂詩。山繞郡樓初過雨。月臨池樹晚生烟。蒲公南川驛詩。鶯花非漢舊。棟宇尙唐餘。趙彥邁歲熟詩。藁爾曾無一掌平。由來作郡亦強名。雲連萬障山橫翠。川合三溪水繞城。又云。風俗連巴楚。封疆接播濠。方輿勝覽。縣去濠溪三十里。爲鹿洞堡。去播州三百里。爲白錦堡。○王象之碑目云。濠溪。寒路西心坎。厓上有隸書。本初三年三月十六日。共二十餘字。文多殘缺。不可讀。漢質帝時刻也。去南平軍七十餘里。又云。濠州堡吹角壩上。有古磨厓。風雨股

剝苔蘚侵蝕。惟識其一二曰建安。其他不可辨。漢獻帝時刻也。又云吹角壩有姜維碑。始士人開山得一穴。穴內有碑。姜維字。猶可辨。又云南川鎮下三里。崖上有石佛像。近有碑出於其下。司法參軍員外郎置司正靳豫撰序云。南州城門前右岸盧舍那石像。乃開元十八年十二月丙戌中大夫使持節南州諸軍事守南州刺史上柱國晉昌唐虞景所造。又云白鶴寺鐘碑。字磨滅垂盡。尙餘一二可識。曰白鶴寺鐘處士彭城劉欣文也。又云羅圍城上有古碑。名平真碑。未詳。按志治境上有此城。

長壽縣

華陽國志。江州郡樂城縣在州西三百里。延熙十七年省。按今縣界有樂磧鎮。卽其地。寰宇記曰。唐武德置樂溫縣。秦時枳地也。桓元子別置枳縣。在巴之北。涪之南。至後周省入於巴縣焉。○樂溫志曰。樂溫山下有樂溫灘。在縣南四十里。元時置涪陵巡檢司。因唐縣址也。地氣常溫。禾稼早熟。因之得名。志以此山人多耆耆。亦名長壽山。○圖經云。昔徐神翁煉丹於枳。有丹厓高二十餘丈。下垂瀑布。注於江厓下。老榕蒼翳。宏敞而陰森者。清陰洞也。洞中多留題。剝蝕不可辨。有數行逾楷。相似涪翁。及元許衡偕門人趙進真來遊。題名。志云。在學宮右側。圖經集。仙山爲徐神翁飛昇處。在縣之北。真觀搗藥杵。曰尙存有臺。曰烟霞臺。卽此。○志又云。白虎山亦名鳳山。在涪西一里。山麓刻讀書處三字。旁識云。端平二年。鶴山赴樂溫爲史子書。按眉人史大用。讀書於樂溫白虎山。作崇德廟碑者也。鳳山下有韓村。宋開禧中。士人韓申之。見山坡有綠衣端坐指麾。其僕入村。酌酒。有白驢齧草其旁。卽文昌書所謂牧驢化矣。圖經云。白虎山石

龕塚風月之臺四字甚古。其上石厓桃花水出焉。有洞古邃幽深。銀鴨石筍。杳然人境。卽桃花洞也。○志云不語灘在縣東一里。相傳客航過此。皆相戒不言。言則灘加洶湧。又云玉溪里在縣西八里。宋賢譙定天發。髮淵亞夫所居也。譙學於伊川。髮學於考亭云。○輿地碑目。古書山去樂溫縣四十里。有大歷年石刻云。昔人砌山路。見石穴中藏蟬蚪。書數軸。古書之名起於此。○宋安剛中張栻侯廟記云。漢自建安以來。皇綱齊弛。神鼎震覆。姦雄觀覺。實生豕心。本初孟德之徒。磨牙礪吻。血視生靈。期於吞噬。不留遺臭。元德忼慨爲國志。在援拯。一時豪英狗義。蜂起相與提挈。共成大事。諸葛關張實爲之最。凜冽威風。萬夫之雄。荊州之役。羣盜鼎來。公爲後拒。畢力盡死。以抗羣醜。奮髯張目。橫戈一叱。蛇豕異類。褫魄逃遯。虞淵之日。復耀西南。繫公之功。迄今千歲。英靈之氣。森聳如在。廟食百世。在禮固宜。樂溫之山下。瞰大江。公之神爽。實茲寓焉。自古迄今。長載祀典。舟行上下。與彼士民。奔走奉事。敢不虔至。九穀嘉生。連被原隰。舸楫往返。安流無恙。陰相之功。在國與民。天朝累封。進爵爲王。惟是廟宇興建。歲久行廊爛頽。往來咨嗟。力莫能振。郡守李公。向者趨朝。祇謁祠下。再拜祈禱。厥應如響。至郡未幾。首議修繕。自捐金帛。衆趨成之。功費雖多了。不病民。撤去卑陋。增飾輪奐。開展基地。比舊加倍。是役也。議興於庚午之冬。落成於辛未之春焉。



# 蜀中名勝記卷之十九

## 重慶府三

### 涪州

華陽國志巴子時雖都江州先生陵墓多在枳又云涪陵郡巴之南鄙從枳南入折丹涪水與楚商於地接司馬錯昔取商於繇此道也漢時恆有都尉守之蜀延熙中車騎鄧芝以江州都督治陽關於此陽關者巴子所置三關之一○水經江水東至枳縣西延江水從牂柯郡北流西屈注之又云江水至巴郡涪陵縣注更始水酈註曰水東逕陽關巴子梁江之兩岸猶有梁處寰宇記云岑彭破公孫述將侯丹於黃石黃石者橫石灘也謂之石梁○水經註曰江水東至梨鄉歷雞鳴峽江之兩岸有枳縣治故華陽國志謂枳縣治涪陵水會庾仲雍謂有別江出武陵者也又曰更始水即延江枝分之始也延水北入涪陵水王莽更名巴亭張堪爲縣會公孫述來擊於時同心義士選習水者筏渡堪於小別江即此水也其水北至枳縣入江○方輿勝覽云涪江者自思州之上費溪發源經五十八節名灘方至黔州既自黔州既與施州江會流九十里經彭水武隆二縣凡五百餘里與蜀江會於州之東以其出於黔州又呼黔江亦名內江其水淵澄清澈可鑿毛髮底見苔石魚鰕可數○張祐送李長史歸涪州詩涪江江上客歲晚却還鄉暮過高唐雨秋經巫峽霜急灘船失次疊嶂樹無行好爲題新什知君思不常戴叔倫漸至涪州先寄

王員外使君縱詩。文教通夷俗。均輸閩火田。江分巴字水。樹入夜郎烟。毒瘴含秋氣。陰崖蔽曙天。路難空計日。身老不由年。將命甯知遠。歸心詎可傳。星郎復何意。出守五溪邊。陸游詩。古壘西偏曉。駭舟倚闌搔首。思悠悠。欲營丹竈。竟無地。不見荔枝空遠遊。官道近江多亂石。人家避水半危樓。使君不用勤留客。瘴雨蠻烟我欲愁。○方輿云。黔江東岸有龜山。州治其上。元和志。舊州在岷江南。今州在涪江西。蜀漢涪陵太守龐肱。有惠政。與地碑目。淳熙中。左綿任子宣過涪陵。於民家見漢隸石闕。上書漢涪陵太守龐肱闕。闕裂如碑。○東渡高峯之上。與州治相對。爲石甕磧。方輿勝覽云。太守吳侯嘗遊石甕磧。遇一女。繖蓋步磧上。曰。吾父居此。瀕去解一玉環付廂吏。爲我謝使君。異日當歷顯任。子孫復守此州。言訖不見。按志。吳光輔爲涪守。後三十年。其孫仲復又守是邦。今吳公溪。吳公山所爲得名也。○舊經云。吳君山一名鐵櫃山。橫亙江北。與涪陵縣相望。雄壓衆山。俯臨長江。屹立如櫃。相傳武侯屯兵於此。舊城猶存。○勝覽云。鐵櫃之南爲北巖。王真人修煉處也。紹聖丁丑。程伊川謫涪。卽普淨院。關堂傳易。再閱歲。爲元符庚辰。乃徙夷陵。○碑目云。涪陵江北普淨院記。治平間。校書郎傅耆撰。北巖書院記。嘉定丁丑。簡池劉光祖撰。普淨院鈎深堂。勝別駕黃庭堅書。又有淳祐辛亥三月。旣望。古綿劉濟川。三山林元。成都杜庭燮。三澗何清題名。又有汴陽吳克舒。以紹興癸未書雲日。舉家來遊。排掾侍行。諸刻。○輿地紀勝云。開寶四年。黔南上言。江心石魚見。上有古記云。廣德元年二月。大江水退。石魚見。郡民相傳豐稔之兆。按其處在近州鑿湖中。央石上刻雙魚。一銜萸草。一銜蓮花。各三十六鱗。傍有石秤石斗。或十年。或三五年一出。唐大順元年。鑄

詩甚多。○方輿勝覽。州西一里白鶴灘。爾朱真人冲舉之處。志云。爾朱既浮江而下。漁人有白石者。舉網得之。擊磬方醒。遂於涪西灘前修煉。後乘白鶴仙去。因以名灘。○又云。爾朱先生種松山。在州東二里。種時松影映石。石皆有松紋。至今呼松屏石探者。禱於先生乃得佳。不煩人力。自然成文。○華陽國志。延熙二年。馬忠定越嶲。置赤甲軍。常取涪陵之民。蜀丞相諸葛亮亦發勁卒三千人爲連弩士。按志有赤甲戍。與黃草峽相近。在李渡之上。蘭市之下。杜甫詩云。黃草峽西船不歸。赤甲山下行人稀。卽此地也。○碑目云。許雄山有古廣漢縣令神道碑。俗呼爲蒼虎碑。偶碑仆。遂有虎入城。縣官設祭。復豎碑。虎害乃止。按山在州西南七里。山之東有馬援壩。○志云。馬援壩在治南四里。伏波祠在治東十里。相傳將軍征武陵蠻。駐兵之處。寰宇記。涪陵江中有銅柱灘。最浚急。昔人維舟於此。見水底有銅柱云。○灘之東爲錦繡洲。九域志云。此洲人業織錦。繭也。宋翰詩。錦繡洲猶在。熊羆夢已無。文風齊兩蜀。仙洞接三都。白石從天設。青崖見地圖。荔枝妃子國。不復憂時輸。○方輿勝覽云。城西十五里有妃子園。其地多荔枝。昔楊妃所嗜。當時以馬遞馳載。七日夜至京。人馬多斃於路。百姓苦之。故杜牧之過華清宮詩云。長安迴望繡成堆。山頂千門次第開。一騎紅塵妃子笑。無人知道荔枝來。○華陽國志。涪陵郡有丹興縣。以山出名丹也。蜀時省李特傳。范長生一名延久。又名九重。涪陵丹興人。按史記。巴寡婦清之先。得丹穴而擅其利。家富不貲。清能守其業。用財自衛。秦皇帝以爲貞婦。而爲築女清臺。括地志云。女清臺山。在永安城東北七十里。爲涪陵南平二郡界。



武隆縣

漢涪陵。積二縣地。唐武德元年分涪陵縣立。以邑界武隆山爲名。本志云。積縣故址。在治東上流二十里。李膺益州記云。內江水自萬甯西北二百八十里至關頭灘。灘長百步。懸崖倒水。舟楫莫通。寰宇記云。內江一名涪陵江。一名巴江。在縣南。屈曲北流。又云。蜀江門灘。在縣前。巴江水中。○志云。縣西一里古渡頭。有斷石中白痕如劍。光芒燭天。名爲天劍。又云。南二十里有信水。在峽口。其泉如沸。水與江等。日有三潮。每至。則高尺餘。又云。龍寶潭在縣東北七十里。古箐淒其人鳥兩絕。杖藤而入。幽徑可十里。忽平沙廣野。曲壑清泉。別一世界。○四夷攷云。武隆之地。東隣黔楚。西接牂柯。北枕巴江。南通貴竹。又三面界土司。爲酉陽之咽喉。石柱之頂臂。至若眞州。則撲胷之患矣。所謂難先全蜀險阨諸蠻者也。

彭水縣

史記秦司馬錯取楚商於之地。爲黔中郡。卽此。寰宇記云。卽劉璋之漢葭縣矣。隋開皇十三年。蠻帥內屬。故於此地設彭水。屬黔州。亦州之所理也。本志云。舊理在壺頭山之麓。今移於紹慶府基。按宋史太平興國八年。黔州摩圍山慶雲出。通判黃仲震圖頌以獻。中興小歷。理宗始追封爲紹慶府焉。○權載之黔州觀察使應記云。黔中爲楚西南微道。在瀆爲武陵。莊躡循江以略地。唐蒙浮船以制越。舊經地近荆楚。候如巴蜀。五溪襟束。蠻蠻聚落。陰雨多晦。草木少凋。寰宇記云。五溪謂酉辰巫武沅等五溪。古老相傳。楚子城巴巴子兄弟五人流入五溪。各爲一溪之長。一說五溪蠻皆盤瓠子孫。自爲統長。故有五溪之號。古謂

之蠻蠻聚落也。三國志劉先主於五溪蠻之地置黔安郡。卽此地。樂史以爲郡後周設。誤矣。○劉長卿送任侍郎黔中充判官詩。不識黔中路。今看遣使臣。猿隨萬里客。鳥似五溪人。地遠官無法。山深俗易淳。須令荒徼外。亦解懼埋輪。司空曙送龐判官赴黔中詩云。天遠風雲異。西南見一方。亂山來蜀道。諸水出辰陽。堆案青油暮。看棋畫角長。諱文誰可製。記室有何郎。李嘉祐送上官侍御赴黔中詩。莫向黔中路。令人到欲迷。水聲巫峽裏。山色夜郎西。樹隔朝雲合。猿窺曉日啼。南方饒翠羽。知爾飲清溪。許棠寄黔南李校書詩。從戎巫峽外。吟興更應多。郡響蠻江漲。山昏蜀雨過。公筵饒越味。俗土尙巴歌。中夜懷吳夢。知經滯灑波。顧非熊送皇甫司錄赴黔南幕詩。黔南從事客。祿利向來饒。官受外臺屈。家移一峒遙。夜猿聲不斷。寒木葉微凋。遠別因多感。新郎倍寂寥。杜荀鶴送人尉黔中詩。盤山行幾驛。水路復通巴。峽漲三川雪。園開四季花。公庭飛白鳥。官俸請丹砂。知尉黔中後。高吟采物華。許琳黔中書事詩。巴蜀水南偏。山窮塞壘寬。歲時將近臘。草樹未知寒。獨狖啼朝雨。羣牛向暮灘。更聞蠻俗近。烽火不艱難。寶羣黔中書懷詩。萬事非京國。千山擁麗譙。佩刀看日曛。賜馬傍江調。言語多重譯。壺觴每獨謠。沿流如著翅。不敢問歸橈。李頻黔中酬同院韋判官詩。平生同所爲。相遇偶然遲。各著青袍後。無歸白社期。江流來絕域。府地管諸夷。聖代都無事。從公且賦詩。○碑目云。漢故孝廉柳莊敏碑。在州廡內。字迹銷謫。唐黔南節度使趙國珍德政碑。上元二年立。在州南隔江。崔能神道碑。集古錄以爲長慶二年立。在州治。山谷刀筆云。宋左藏庫副使東南第八將秦世章。自長沙買石摹僧寶月古法帖十卷。載回黔安。壁之紹聖院。庭堅爲之跋。按世章秦

子明涪州人也。丹鉛錄謂寶月帖又在隋開皇帖。南唐昇元帖之前。比之金薄。置紙銀錠。痕者優劣當懸矣。○紀勝云。魯直謫居。有涪翁晚策杖至此。觀江漲。雨餘天欲涼。十五字墨蹟在州之嘉禾堂。又黔中與人帖云。庭堅頓首。竊觀鎮靜。足以安夷獠。清節足以服吏民。郡閭宴閑。時與僚佐歌舞。以謝江山。當亦無不樂時。別後未嘗不思。英對也。齋中小宴。歌舞中更得新進否。此邦樂籍。似皆勝渝瀘。微有成都之風也。○本志載宋冉木震黔州倅衙月山巖銘云。黔號古郡。地居極邊。倅治倚山。其山刺天。有日月巖。古老相傳。視事累月。徧求茫然。偶濬溝渠。巨石中填。深掘視之。厥狀嶺峽。中竇一穴。透明而圓。皎如秋月。翳絕雲烟。旁補三隙。如星之聯。杖拭細觀。古識存焉。壽命僕夫。挽置座前。負以層石。映以灣泉。日對其側。卷舒簡編。凡物遭遇。皆有夤緣。高岸深谷。知幾變遷。惟我月巖。存千萬年。又飛來峯銘云。黔山角逐。雲空相摩。巖石其間。如戟如戈。否則踣伏。橫立攢阿。千狀萬怪。知名幾何。惟飛來峯。涪翁相遭。有筆如椽。三字袞袞。一經品題。聲價倍高。譬如人乎。何地無材。不遇知音。均混草萊。有送吹噓。清冥路開。一飛冲天。迴絕塵埃。噫。歎茲石。千古體體。四維整植。如出剪裁。日炙雨澆。蒼然生苔。不動惟汝。何從飛來。因涪翁重汝。何能哉。○志云。綠陰軒在治南一里。石軒下平曠。可容十數人。黃魯直過此。手書綠陰軒三字。鑄於石壁。至元年紹慶總管向午鳳重修。有臥佛巖。與綠陰軒相近。巖石欹懸。生一竅。甚圓。仰窺之。又生一竅。其中虛明。有橫石一塊。眉目宛然。如來佛曲肱枕臥時也。○紀勝云。西南過江五里。有摩圍山。夷獠呼天爲圍。以其高摩於天也。道家謂之洞天福地。昔有樵者攀緣入洞。見二老圍棋。其中回復尋之。了不可得。魯直安置黔

中寓開元寺。號摩圍老人。有石泉在山頂。山勢壁立。泉從石竇中流出。寺僧以甕接之。爲朝夕清供。碑目載摩圍山唐人石刻云。巴黔路途闊遠。亦無館舍。凡至宿泊。多倚溪曷。就水造澆。鑽木出火。山谷集云。丙子仲秋黔守席上客。有舉杜少陵中秋詩曰。今夜鄜州月。閨中只獨看。遙憐小兒女。未解憶長安。因戲作詞云。舉頭無語。家在月明生處住。擬上摩圍。最上峯頭試望之。偏憐鍾秀。苦淡同甘。誰更有想見牽衣。月到愁邊總未知。又丙子仲秋奉陪黔陽曹使君伯達翫月。作減字木蘭花。兼簡施州張使君仲謀云。中秋多雨。常是罽罽狼籍去。今夜雲開。須道姮娥得得來。不知雲外。還有清光同此會。笛在層樓。聲徹摩圍頂上頭。○九州要記云。黔州有彭水。在信甯縣。卽古之黔中。地志云。唐長孫無忌墓在信甯西岸岐山之麓。按史無忌洛陽人。累官太子少傅。同中書門下三品。高宗時諫立武后。許敬宗誣奏無忌反。削其官爵。謫黔州安置。沒葬是鄉。居人歲以三月三日致祭云。

#### 黔江縣

隋之石城縣也。志云。城東二十五里爲舊縣矣。又云。歌羅驛在治東百九十里。黃魯直竹枝歌七首題於驛壁。其一云。浮雲一百八盤纜。日落四十九波明。鬼門關外莫言遠。四海一家皆弟兄。志云。四十八渡水在治西二十里。發源桐山溪。水折流四十八灣。夾於兩岸之間。春月百花飄落。隨水可愛。又云。治西五十里峭壁中有木樞人迹。不到曰樞子屋。在四十八渡之中。李頻泛黔江詩。野梅將雪競。江月與沙寒。卽此水也。

忠州

譙周三巴記曰。臨江縣。後漢初平六年立。在永甯郡東四百里。臨江南古城。○水經曰。江水又東逕臨江縣南。註謂王莽之臨江縣也。郡國志云。梁於此立臨江郡。隋置臨州。貞觀始改爲忠州。忠之名以巴蔓子。或云嚴顏。按華陽國志。周之季世。巴國有亂。將軍蔓子請師於楚。許以三城。楚王救巴。巴國旣甯。楚使請城。蔓子曰。藉楚之靈。克弭禍難。誠許楚王。城將吾頭往謝之。城不可得也。乃自刎。以頭授楚。使楚王歎曰。使吾得臣若巴。蔓子用城何爲。乃以上卿禮葬其頭。巴國葬其身亦以上卿禮。今治西北一里有蔓子冢。○三國志。劉璋使嚴顏守巴郡。爲張飛所擒。欲降之。顏曰。有斬頭將軍。無降將軍。飛怒。命斬之。顏從容曰。斫頭便斫頭。何必怒耶。今臨江縣西南二十里有嚴太守碑。及祠。蘇軾詩云。先主反劉璋。兵意頗不義。孔明古豪傑。何以爲此事。劉璋固庸主。誰爲死不二。顏子獨何賢。談笑傲嗔几。國亡君已執。嗟子死誰爲。何人刻山石。使我空涕淚。蘇轍詩云。古碑殘缺不可讀。遠人愛惜未思磨。相傳昔者嚴太守。刻石千歲字已譌。嚴顏平生吾不記。獨憶城破節最高。被擒不辱古亦有。吾愛善折張飛豪。軍中生死何足怪。乘勝使氣可若何。斫頭徐死子無怒。我豈畏死如兒曹。匹夫受戮或不避。所重壯氣吞黃河。臨危閒暇有如此。覽碑慷慨思橫戈。自註云。碑在忠州。本志。州西五十里江中高阜。名塘土洲。有嚴顏墓碑及祠。○九域志云。臨江郡有古屈原碑。王象之碑目亦引之。東坡謂屈原古塔在忠州。不當有此。意者後人追思爲之。其詩曰。楚人悲屈原。千歲意未歇。精魂飄何處。父老空哽咽。至今滄江上。投飯救飢渴。遺風成競渡。猿叫楚山裂。

屈原古壯士。就死意甚烈。世俗安得知。眷眷不忍決。南賓舊屬楚。山上有遺塔。陸游詩云。我遊南賓春暮時。蜀船曾繫掛猿枝。雲迷江岸屈原塔。花落空山夏禹祠。塔在江之南岸。○紹聖四年。王闢之知忠州。建四賢關於治後。四賢者。故相司徒鄭州刺史南華劉晏。士安。故相贈兵部尚書嘉興陸贄。敬輿。中書侍郎平章事贈司徒安邑李吉甫。宏憲。刑部尚書致仕贈右僕射下邳白居易。樂天。皆有像設。今移在學宮。○輿地碑目云。忠州學宮有漢江原君石闕。闕上延熹等二十七字。可搨。自州西十五里移來者。又有晉王右軍半月橋帖經。涪翁題跋。○又云。州治有漢建初中修道碑。字已漫滅。餘建初等十二字。可辨。治內議道堂有唐率更柘漿帖碑。太守王聖塗購自臨江農民瞿氏。命男宗摹刻。紹聖四年七月二十四日。後有山谷題跋。○又云。州儀門下有漢延熹嚴孝子碑。按華陽國志。元初中貢孝子嚴永。卽此碑矣。字已漫蝕。餘延熹二年等八十餘字。自城西二十里移來者。○文苑英華。唐蘇頌有授忠州刺史。上騎都尉王守廉制。陳子昂有忠州江亭喜遇吳參軍。以牛司倉序。略云。江亭迴瞰。羅雜樹於階基。山樹遙臨。列羣峯於戶牖。丹藤絲篠。俯映長筵。翠渚洪瀾。交流合坐者矣。杜甫宴忠州使君姪宅詩。出守吾家姪。殊方此日歡。自須遊阮舍。不是怕胡灘。樂取長歌送。杯饒旅思寬。昔曾如意舞。牽強爲看。李端送濮陽錄事赴忠州詩。成名不逐鸞旌遠。空印還爲一郡雄。亦葉黃花隨野岸。青山白水映江楓。巴人夜語孤舟裏。越鳥春啼萬壑中。聞說古書多未校。肯令才子久西東。白居易郡中春燕因贈諸客詩。僕本儒家子。待詔金馬門。塵忝親近地。孤負聖明恩。一旦奉優詔。萬里牧遠人。可憐島夷帥。自稱爲使君。身騎牂柯馬。口食巴江鱗。暗淡

緋衫故爛斑白髮新。是時歲一月。玉歷布春分。頽條足皇澤。命宴及良辰。冉冉趨府吏。蚩蚩聚州民。有如蟄蟲鳥。亦應天地春。薰草席鋪座。藤枝酒注樽。中庭無平地。高下隨所陳。蠻鼓聲坎坎。巴女舞蹲蹲。使君居上頭。掩口語衆賓。勿笑風俗陋。勿欺官府貧。蜂巢與蟻穴。隨分有君臣。○樂天刺史茲邦。風流暇豫。日事遊賞。其踪跡最著者。有東樓。荔枝樓。鳴玉溪。龍昌寺。巴子臺。東坡。東澗。諸勝。黃魯直爲王聖涂作記云。樂天東樓以燕賓。佐西樓以瞰鳴玉溪。登龍昌上寺。以望江南諸山。張樂巴子臺。以會竹枝歌女。東坡種花。東澗種柳。皆相傳識其舊處焉。○東樓。卽城東樓也。白公東樓詩云。山東邑居窄。峽牽氣候偏。林巒少平地。霧雨多陰天。隱隱煮鹽火。漠漠燒畚烟。頽此東樓夕。風月時儻然。憑軒望所思。目斷心悄悄。又東樓竹詩云。蕭蕭城東樓。遠之多修竹。森然一萬竿。白粉封青玉。捲簾睡初覺。欹枕看未足。影轉色入樓。牀席生浮綠。空城絕賓客。向夕彌幽獨。樓上夜不歸。此君留我宿。○荔枝樓在治西南隅。卽西樓也。公旣作荔枝園。以寄親友。又建樓以賞之。其詩曰。鄉路音信斷。山城日月遲。欲知州近遠。階前摘荔枝。又西樓詩云。悄悄復悄悄。城隅隱林梢。山郭燈火稀。峽天星漢渺。年光東流水。生計南枝鳥。月沒江沈沈。西樓殊未曉。○寰宇記云。鳴玉溪在州西十里。上有懸巖瀑布。高五十餘丈。潭洞幽邃。古木蒼然。前刺史房式嘉其幽絕。特置蘭若。凡有五橋以渡。長慶集云。鳴玉溪上。木蓮穠茂。元和十四年夏。命道士母丘元志寫之。本志云。溪在治西二里。發源西厓水。聲如珮玉。其傍有古刻。亦名西溪。又云。西北五里有木蓮洞。宋錢求之詩云。鳴玉溪邊堪寓目。木蓮洞下更關情。忠州好景無人說。祇得孤城小市名。今治內有木蓮樓。相沿其名。

非故處也。○龍昌有上寺。下寺。俱唐建。在西山頂者爲上寺。卽巴臺寺也。與翠屏山相對。故云可以望江南。志謂之巴子臺。巴子所築也。唐宋詩刻存焉。下寺卽治平寺。寰宇記曰。龍昌寺在臨江縣東。今爲治平寺。白公嘗於寺旁植柳。柳盛則寺興。柳衰則寺廢。寺僧愛此柳。比之甘棠。○白傳登城東古臺詩。迢迢東郊上。有土青崔嵬。不知何代物。疑是巴王臺。巴歌久無聲。巴宮沒黃埃。志云。巴王廟在州東一里。卽卞子將軍也。歲三月七日。太守以豕帛致祭。先期土人具千鈞蠟祠之。宋爲永順祠。今爲忠貞祠。○王象之碑目云。漢丁房雙石闕。在巴王廟前。按左闕高可二丈。覆以飛甍層觀。最上琢雙扉。一美人現半身。倚立中層。琢車馬人物。旁刻文螭。糾蟠長可三四尺。金石古文云。此漢畫之始也。正面漢隸十行。行三十字。強半剝落。惟漢都尉丁房五字。相聯可讀。它無恙者尙三二十字。闕陰鐫云。紹聖丁丑五月戊午。知忠州軍州事齊國王闕之。軍事推官荆南李鑒。兵馬監押雒陽田缺。巡檢安化楊中孝。監稅濟南蓋轅逸。錄事高陽張復。臨江縣令竟陵張徽。司戶參軍陽安文同。司理參軍雲安常彥。臨江縣主簿東武缺。同遊永順王祠。坐東軒。面巴峽。臨岷江。望東溪之龍潭。崇山峻嶺。激湍清流。真山陰之蘭亭也。於是賦詩酌酒。極一時適。將歸。共觀石闕之上。讀漢都尉丁房碑。欲重加刊刻。而文字磨滅。竟不可辨。相與嘆息而去。右邊闕就圮。近日爲有司者新之。了非故物。○巴臺下江中。有石圓光如鏡。旁有五石筍簇之。呼爲仙人照鏡臺。○勝覽云。東坡在南賓郡圃。有亭名東亭。白公詩。綠樹爲閑客。紅蕉當美人。又何處。慙慙重回首。東坡桃李種新成。又最憶東坡紅爛熳。野桃山杏水林檎。蘇子瞻東坡之號。實始於此。其詩云。平生自覺出處老大。



粗似樂天。非東坡之名。偶余同也。○志云。東澗。在治西。開元寺側。亦樂天時鑿。公有東澗種柳詩云。野性愛栽植。植柳水中坻。三年未離郡。可以見依依。○水經曰。江水又逕虎鬚灘。灘水廣大。夏斷行旅。今州西二里。有石梁三十餘丈。橫截江中。俗呼倒鬚灘。即其處。○輿地碑目。塘土洲。有貞元十七年段文昌撰耆老思舊碑。有唐刺史房公式善狀。碑志云。塘土洲在治西五十里。有景德寺善狀碑。立在普賢院中。○水經曰。江水又東。得黃華水口。左逕石城南。志云。卽皇華洲。在東五十里。江浦週迴可二十里。碑目云。有宋忠州貢院碑。參軍安元白立。金魚堡碑。陸忠州爲咸淳府碑。俱在此洲上。咸淳碑詔文。勅門下。皇天畀付有家。敢怠繼承之敬。乾元首出。庶物聿懷。潛躍之初。念聖考之貽謀。擇价藩而錫履。嚴陵龍水之鎮。受節齋壇。永嘉忠雨之封。分茅主社。瞻言屏翰之重。允協謳歌之歸。漢輿地之上圖。若規先憲。周舊邦之新命。並錫府名。以壯萬年之觀。亦尙一人之慶。其改陸溫州爲瑞安府。嚴州爲建德府。宣州爲慶遠府。忠州爲咸淳府。咸淳元年八月二十九日午時。急速按寰宇記。石城在臨江縣東百里。岷江之北岸。李雄之亂。巴西郡寄理於此。城四面懸絕。亦謂之巴子城矣。○華陽記曰。臨江縣有鹽官。在鹽涂二溪。一郡所仰。按涂溪在州東八十里。發源蟠龍洞。來經涂井。井神爲漢楊伯起。井廟碑云。神嘗刺史荊州。遡江至此。憩於南城寺。謂人曰。江北二三里間。安得有寶氣耶。至蟠龍洞。見周柱下吏丹爐曰。此地有龍無虎。宜其丹不就也。至涂山。見白鹿飲泉。曰。寶氣在此矣。土人從所指處鑿磐石。而得鹽泉。廟在治東一里。志云。東南八十里方斗山。以形名也。山有龍洞。其神號方斗龍王。所謂涂山與蟠龍洞者。此是。又云。東二十里香爐堆北。

有石碑云。處士楊佐墓。漢楊伯起之裔孫。○南山，卽翠屏也。在對岸二里。山中有禹廟。陸宣公墓。玉虛觀。朝真洞。望夫臺。仙履迹。諸勝。白傅作樓以望之。其詩云。江上新樓名四望。東西南北水茫茫。又有望南山。寄行簡詩。臨江一幘白雲間。紅綠層層錦繡斑。不作巴南天外意。何如昭應望驪山。○輿地碑目。禹廟有唐碑。字畫漫滅。不可讀。宋碑乃張俞作。杜甫詩云。禹廟空山裏。秋風落日斜。荒庭垂橘柚。古屋畫龍蛇。雲氣噓青壁。江聲走白沙。早知乘四載。疏鑿控三巴。度禹廟。緣山行。可里許。爲玉虛觀。輿地碑目云。玉虛觀有唐人修建碑。四方輿勝覽云。玉虛觀南三十步。有陸宣公墓。舊經陸宣公贊。葬於此。或曰宣公已歸葬橋李。忠南特虛冢耳。然子美已歸葬偃師。而耒陽之墓自若。太白已移殯青山。而采石之冢猶在。則敬輿此墓宜封殖之矣。玉虛亦名紫極觀。○通志云。忠州南十里有望夫臺。未詳其事。按東坡忠州望夫臺詩云。山頭孤石遠亭亭。江轉船回似石屏。可憐千古長如昨。船去船來自不停。浩浩長江起滄海。紛紛過客似浮萍。誰能坐待山月出。照見寒影高伶俜。○本志。仙履跡石在治北八十里。相傳昔有真人立此飛昇。今足跡尙存。宋秦東詩。仙人雙赤脚。踏石如踏泥。泥痕尙可沒。石痕不可迷。○杜甫嘗居龍興寺。有題院壁詩云。忠州三峽內。井邑聚雲根。小市常爭米。孤城早閉門。空看過客泪。莫覓主人恩。淹泊仍愁虎。深居賴獨園。陸游龍興寺弔少陵寓居詩。中原草草失承平。戍火胡塵到兩京。扈蹕老臣身萬里。天寒來此聽江聲。註云。寺門外江聲甚壯。在州北八十里。又二十里有拔山寺。與龍興寺俱。漢永平間建。宋馮時行寶華寺詩。宿雨初收草木濃。羣鴉飛去法堂空。長廊無事僧歸晚。盡日門前只看松。卽漢之普明寺也。已

上三寺志云。在州北九十里。○志云。東北三十里大成寺。漢初平建。西北四十里寶珠寺。晉永和建。西北百里雙龍寺。唐貞元建。張詠雙龍寺詩。未踏關陽已見山。木鯨時吼翠微間。老僧隨隊看雲起。居士忘緣共鶴閒。入眼烟光依砌濕。倚空霧氣遶山環。三朝寶訓神明謔。大讀經章祝玉顏。

鄧都縣

水經曰。江水又逕東望峽。東歷平都。註謂峽對豐民洲。舊巴子別都也。華陽國志。巴子雖都江州。或治平都。卽此。續漢書。永元二年。分枳置平都。取界內平都山爲名。○方輿勝覽云。自鄧都縣東行二里許。始登山。石徑縈迴。可一二里。平塋如掃。林木遼茂。夾逕翠柏黃葛。殆萬株。有數十株。是千年物。此卽平都山也。○鄧道元曰。平都有天師治。兼建佛寺。甚清靈。道書號爲平都福地。輿地紀勝云。仙都觀在平都山。唐建。宋改景德。又名白鶴觀。有陰長生詩。天成四年書也。通攷云。陰真人祠刻詩三章。乃貞元中刺史李貽孫書。元豐四年。轉運判官許安世過洞下。閱石定爲陰仙之作。乃屬知夔州吳師孟書石。送置觀中。詩見神仙記。○百川學海云。治平末。蘇東坡泝峽泊舟仙都山下。道士持陰長生石本金丹訣。就質眞贗。東坡答曰。不知也。然士大夫過此。必以請。久久自有知之者。按古今詩謠云。蜀道觀中渌井得一碑。其文曰。有物有物。可大可久。採乎蠶食之前。用火化之後。成湯自上而臨下。夸父虛中而見受。氣應朝光。功參夜漏。白英聚而雪慚。黃酥凝而金醜。轉制不已。神趨鬼驟。金歟玉歟。天年上壽。無著於文。訣之在口。此卽陰仙所著丹訣也。○勝覽云。陰長生以延光元年於平都山白日昇。天山頂五雲洞中。嘗有雲氣從丹井中出。

洞有五雲樓。壁上瑤池樂部四字。段文昌書。○輿地碑目云。仙都觀有二仙公碑。李虔撰。二仙銘。薛湜撰。俱景雲二年立。陰真人影堂碑。王真人碑。俱李吉甫撰。貞元年立。其石瑩潤而白。號爲玉石碑。又有商比干銅盤銘。開元間掘。自偃師縣。翻刻於此。文曰。右林左泉。後岡前道。萬世之銘。茲焉是寶。又有中和元年忠州刺史陳旉三官碑。丞相段文昌修觀碑。段少監修齋記。天尊石像記。老君石像記。張大理詩。杜光庭石函記。按今皆不存。○志云。總真羣仙之府。道出洞天等刻。或隸篆。或真行。大徑尺。呂純陽書。見存。純陽登平都有訪仙詩云。孟蘭清曉過平都。天下名山總不如。兩口單行誰解識。王陰空使馬蹄虛。又云。一鳴白鳥出青城。再謁王陰二友人。人口惟言三島樂。擡眸已過洞庭春。宋蘇軾詩。足躡平都古洞天。此身不覺到雲間。擡眸四顧乾坤闊。日月星辰任我攀。又平都天下古名山。自信山中歲月閑。午夢任隨鳩喚覺。早朝又聽鹿催班。蘇轍詩。山前江水流浩浩。山上蒼蒼松柏老。舟中去客日紛紛。古今換易如秋草。空山樓觀何嵯嶭。真人王遠陰長生。飛符御氣朝百靈。悟道不復誦黃庭。龍車虎駕下來迎。去如旋風轉紫清。真人厭世不同願。世間生死如朝暮。學仙度世豈無人。殄霞絕粒常辛苦。安得獨從逍遙君。冷然乘風駕浮雲。超世無有我。獨行范成大詩云。神仙得者王方平。誰其繼之陰長生。飄然空飛五雲駟。上賓寥陽留玉京。石爐丹氣常夜明。龍光萬柏森千齡。峽山偃仄江滌滌。洞宮福地古所銘。云有北陰神帝庭。太陰黑簿囚鬼靈。自從仙都啓巖扃。高霞流電飛伏精。暉景下墮燦九水。塞絕苦道升無形。至今臺殿棲岑嶻。隋坊唐堊留丹青。十仙怪寄溪如清。瑤池仙仗紛娉婷。琅玕赴節鏘欲鳴。我來秋暑如炊蒸。汗流吁氣扶枯

藤摩挲衆蹟不暇評。聊記梗槩知吾會。○段文昌修平都觀記云。平都山最高頂。卽漢時王陰二真人蟬蛻之所也。峭壁千仞。下臨湍波。老柏萬株。上插峯嶺。靈花綵羽。皆非圖志中所載者。昏且萬狀。信非人境。貞元十五年。余西遊岷蜀。停舟江岸。振衣虔潔。詣諸洞所。石崑靈竇。蒼然相次。苔籠古書。依稀可辨。時與道侶數人。坐於下。須臾。天籟不起。萬竅風息。山光耀於耳目。烟霞拂於襟袖。相顧神竦。若在紫府元圃矣。率於行役。不得淹久。瞻眺惆悵。書名而去。邇來已三十四年。太和庚戌歲。自淮南移鎮荆門。有客由峽中來者。皆言當時題記文字。猶在觀宇。歲久臺殿荒毀。不三數年。必盡摧沒於巖壑矣。乃捨一月秩俸。俾令修葺。子來同力。浹旬報就。去年冬十一月。詔命換磨壚。再領全蜀。泝三峽。歷舊遊。依然景物。重喜登覽。聞泉聲而緩步。愛松色而難別。遂命筆視志於巖谷。時太和七年正月五日。○道經云。老子騎青牛度函谷。將息駕於平都。今縣二里有青牛山。在平都之左。○方輿勝覽云。景德觀前。鹿麕時出。沒林間。與人狎。志云。自平都西去一里。林樹叢密者。白鹿山也。霏雪錄云。蘇老泉將遊仙都觀。知縣李長官云。故知君之將至也。問何以知之。曰。此山巨鹿鳴。輒有客至。屢驗。輒未一失。老泉亦嘗爲人言之。東坡白鹿山詩云。日月何促促。塵世苦拘束。仙子去無踪。故山遺白鹿。仙人已去鹿無家。孤悽悵望曾城霞。至今聞有遊仙客。夜來江浦叫平沙。長松千樹聲蕭瑟。仙客去人無咫尺。夜鳴白鹿安在哉。滿山秋草無踪跡。山之翠微有玉鳴泉。響作琴音。清澄玉色。其麓有流杯溪。溪凡七出。相傳平都之仙常燕集於此。○華陽國志。巴子又立市於龜亭北岸。今新市里是也。註水經曰。平都縣有市肆。四日一會。東坡詩。我生飄蕩去何求。再過龜城

歲五周。身行萬里。半天下。僧臥一菴。初白頭。題云。過石龜山作也。舊志石龜山在縣東五十里。其下有村墟。○志云。縣在豐民洲。登平都山。望岷江西來繞之而去。其支流派別。名爲溪者。可得而數焉。稂溪在治東。山上有魏國夫人墓。未詳年代。葫蘆溪在西南。遂竊莫測。蛟龍是宅。青螺綠鬢。上下相映。志謂之月鏡潭也。碑溪以古碑名。不知何代物。去縣稍遠。望遂溪在古南賓縣地。今爲南賓里。舊屬忠州。鄰石柱司。○志又云。龍渠縣今名縣壩。屬散毛宣撫司。縣有引藤山。出藤大如指。可以吸酒。白樂天詩。閑拈蕉葉題詩句。悶折藤枝引酒嘗。亦近南賓界。○愚按。豐民洲在平都山下。隋兩取之。以名縣。自豐旁加邑。而羅酆地府之說始行。今引真誥。廣記二文附此。真誥曰。羅酆山在北方癸地。註此癸地。未必以六合言。當是於中國指向正在幽州遼東之北。北海之中。去岸不知幾千萬里。又曰。六天宮。是鬼神六天之治也。洞中六天宮。亦同名。相像如一世。有知酆都六天宮門名。則百鬼不敢爲害。陶宏景曰。此應是北酆鬼王。決數罪人住處。其神卽經所稱閻羅王矣。太平廣記曰。東都豐都市。在長壽寺之東北。初築市垣。掘得古冢。土藏無磚甃。棺木陳朽。觸之便散。屍上著平上幘。朱衣得銘曰。筮道居朝。龜言近市。五百年間。於斯見矣。當時達者。參驗是魏。黃初二年所葬也。然范成大詩云。有北陰神帝庭。太陰黑簿囚鬼靈。則酆都之說。亦不起於近代。

### 墊江縣

唐通典曰。魏恭帝始置忠州墊江縣。後周改名魏安。隋開皇十八年。復爲墊江。蔡松年南史補曰。漢之墊

江。今之合州也。合州置自西魏。及隋煬帝改合州爲涪陵郡。於是移墊江之名於桂溪縣。桂溪溪旁多桂樹也。縣以樹名。寰宇記曰。桂溪縣有清水。有容水在桂溪南三里。清水唐縣名。猶開州之清濁二水矣。縣又有鹽溪。今治北小溪上有古碑。乃宋淳熙中物。○孟康註地理志曰。墊江之墊。音重疊之疊。晉太康地記曰。墊江因李雄之亂。移置於陽關。陽關未詳。疑卽陽關。爲三關之一。○碑目。會仙洞勝。在治東四十里之鳳凰山。李太白書。羅王洞勝。在治北五十里之西山。李唐勅賜也。按西山盤石上有巨人迹。或羅王榜之始名。○志云。東北二十里有古寺。曰秋月禪關。唐馬祖修淨之所。卽峯頂山也。又二十里有古洞。飛漚噴。厖如雷聲。聞十餘里。久晴聞之則雨。久雨聞之則晴。○段氏遊蜀記曰。忠州墊江縣。以蘇薰爲席。絲爲經。其色深碧。○渝志云。明玉珍僭號。以墊江爲鷄鵝食邑。亦猶巴子以東突硤爲畜牧沮矣。

# 蜀中名勝記卷之二十

## 遵義道

遵義府遵義縣附郭

漢書唐蒙上書說武帝曰。竊聞夜郎國所有精兵。可得十萬。浮船牂柯。出其不意。此制越一奇也。上乃拜蒙爲中郎將。從巴笮關入。見夜郎侯。厚賜。諭以威德。約爲置吏。夜郎傍小邑。皆貪漢繒帛。以爲漢道險。終不能有也。迺且聽蒙約。還報。乃以爲犍爲郡。發巴蜀卒治道。自犍道指牂柯江。可馬相如。又往諭。意皆不聽。命數反叛。及南越反。上使馳義侯同犍爲發南夷兵。且蘭君乃反。殺使者。會越已破。引兵誅且蘭。遂平南夷。○唐書云。天下山河之象在乎兩戒。南戒自岷山。迤邐及北地上郡。西南至巴蜀。漢中東及牂柯。今遵義之區。雖四塞爲固。而襟帶之脈。則牂柯江水矣。○郡志云。碧雲峯在治西。四峯並峙。中央迥出。青碧如雲。按神君張亞播州玉皇碑云。城西碧雲峯下。公府西北隅。夷衍清勝。隱然神仙窟宅。○志又云。城外桃源洞。石乳天垂。見者眩目。沈德元詩云。亭跨桃源石。溪山真美哉。笑同今日上。醉去幾時來。環野誰堪據。寸心當自裁。丈人千古意。倚望一銜杯。後人因立美哉亭。○四夷傳。宋濬熙中。遷遵義軍於穆家川。志云。穆家川源出龍巖山。流經湘山。一名湘川。李白詩云。洛陽才子譎湘川。元禮同舟月下仙。記得長安還一笑。不知何處是西天。白詩又云。石筍如掉筆。懸於山之巔。誰謂不平者。與之書青天。志云。今樓山關石



笱參天是白題詩處也。○志云海龍岡爲楊會穴壘。在治北三十里。四面斗絕。後有側徑略一線。今居人尙不知通於何所。故老相傳。昔白龍太子據此。今爲白龍寺。又城外福光寺有銅佛像。初人見之。荒莽中。欲取者。數風雷輒作。不敢近。有異僧率土人齋戒。乃得今在寺中。又有龍山鐘。黑達樹皆異物也。播平鐘爲水西持去。樹猶存。○志又云。城北門有廖孝廉故宅。城東郭有二再故宅。司北有苗齋郎故宅。按齋郎太廟執事之官也。人代未詳。寰宇記謂齋郎水源出菑芰里。楚米陂。經小溪里入瀘江。本此二再宋未播州名士。再龜再璞也。有文武才。前後辟召皆不赴。余玠安撫四川。築招賢館。兄弟往謁。玠與分庭抗禮。久無所試。使人窺之。惟相對據地。以壘畫地爲山川城池狀。因獻城釣魚山之策者。廖孝廉事不可考。○寰宇記云。貞觀九年。分牂柯北界。置郎州。領恭水。高山。貢山。柯盆。邪施。釋鷲六縣。十一年省。十三年又於其地置播州。取播川爲名。仍復六縣。其明年改恭水爲羅蒙縣。高山爲舍月縣。貢山爲胡江縣。柯盆爲帶水縣。邪施爲羅爲縣。釋鷲爲胡刀縣。十六年又改羅蒙爲遵義縣。二十年以夷州之美蓉。瑯川二縣來屬。顯慶五年廢舍月。胡江。羅爲三縣。景龍三年陞播州爲都督府。先天二年罷。天保元年改爲播川郡。乾元元年復爲播州。○寰宇又云。畚陵山在遵義縣東四十五里。夷牢水西。自帶水縣來。東流經縣北一里。又屈曲南流。入廢胡刀縣界。帶水源出舊縣西大山。東流經帶水縣城北。又東流至廢胡刀界。注胡江水。按唐永徽中。廢帶水縣在府北三十里。宋大觀建。遵義軍於白綿堡。亦在府北三十里。似同一地。○隋楊素贈薛播州詩凡十四首。卽薛道衡也。汾陰人。少孤。專精好學。甚著才名。隋高祖除爲內史。累遷上儀。同其爲

播州疑在煬帝之世。詩云：在昔天地閉，品物屬屯蒙。和平替王道，哀怨結人風。麟傷世已季，龍戰道將窮。亂海飛羣水，貫日引長虹。干戈異革命，揖讓非至公。又：兩河定寶鼎，八水域神州。函關絕無路，京洛化爲丘。漳滏爾連沼，涇渭余別流。年郊滿戎馬，涉路起風牛。班荆疑莫遇，贈綺竟無由。又：五緯連珠聚，千載濁河清。金亡潛虎質，閩盡自蛙聲。聖期伊且暮，天祿啓炎精。霧生三日重，星飛五老輕。禪宗答上帝，造物創羣生。又道昏雖已朗，政故猶未新。剡舟洄水際，結網大川濱。出遊迎釣叟，入夢訪幽人。植林雖各樹，開榮豈異春。相逢一時泰，共幸百年身。又有帛黃丘園，生芻自幽谷。塵芳金馬路，瀾清鳳池澳。零露旣垂光，清風復流穆。傾蓋如舊知，彈冠豈新沐。利心金各斷，芬言蘭共馥。又：自余歷端揆，緝熙惡時彥。及爾陪帷幄，出納先天睇。高調發清音，縹瀟流餘絢。或如彼金玉，歲暮無凋變。余松待爾心，爾筠留我箭。又：荏苒積歲時，契闊同遊處。閭閻旣趨朝，承明還宴語。上林陪羽獵，甘泉侍清曙。迎風含暑氣，飛雨淒寒序。相顧惜光陰，留情共延佇。又：滔滔彼江漢，實爲南國紀。史收求明德，若人應斯美。高臥未褰帷，飛聲已千里。還望白雲天，日暮秋風起。峴山君儻遊，淚落應無已。又：漢陰政已成，嶺表人猶蠹。借寇比方新，還珠總如故。楚人結去思，越俗歌來暮。陽鳥尙歸飛，別鶴還迴顧。君見南枝巢，應思北風路。又：北風吹故林，秋聲不可聽。雁飛窮海寒，鶴唳霜皋淨。含毫心未傳，聞音路猶覓。唯有孤城月，徘徊獨臨映。弔影余自憐，安知我疲病。又：發病願歸閑，居榮在知足。棲遲茂陵下，優游滄海曲。古人情可見，今人遵路躅。荒居接野窮，心物俱非俗。桂樹方叢生，山幽竟何欲。又：所欲棲一枝，稟分豐諸已。園樹避鳴蟬，山梁遇時雉。野陰冒叢灌，幽氣含蘭

正悲哉暮秋別。春草復萋矣。鳴琴久不聞。屬聽空流水。又秋水魚遊日。春樹鳥鳴時。滌梁莫共往。幽谷有相思。千里悲無駕。一見香難期。山阿散瓊藥。庭樹下丹滋。物華不相待。遲暮有餘悲。又銜杯向南浦。寒色黯沈沈。風起洞庭險。煙生雲夢深。獨飛時幕侶。寡和乍孤音。木落悲時暮。時暮感離心。離心多苦調。詎假雍門琴。○唐韓愈作柳宗元墓誌略云。初子厚自柳州召至京師而復爲刺史也。中山劉夢得禹錫亦在遣中。當詣播州。子厚泣曰。播州非人所居。而夢得親在堂。吾不忍夢得之窮。無辭以白其大人。且萬無母子俱往理。請於朝。將拜疏。願以柳易播。雖重得罪。死不恨。遇有以夢得事白上者。夢得於是改刺連州。嗚呼。士窮乃見節義。今夫平居里巷。相慕悅。酒食遊戲。相徵逐。詡詡彊笑語。以相取下。握手出肝肺。相示。指天日。涕泣。誓生死。不相背負。真若可信。一旦臨小利害。僅如毛髮。比反眼若不相識。落陷穽。不一引手救。反擠之。又下石焉者。皆是也。此宜禽獸夷狄所不忍爲。而其人自視以爲得計。聞子厚之風。亦可以少愧矣。

桐梓縣

華陽國志夜郎郡。古夜郎國也。屬縣二千戶。治夜郎縣。有遜水通廣鬱林。有竹王三郎祠。甚靈響。劉敬叔異苑云。漢武帝時。夜郎竹王神者。名與。初有女子滄於豚水。見三節大竹流入足間。推之不去。聞其中有號聲。持破之。得一男兒。及長。有才。遂雄夷獠氏。自立爲夜郎侯。以竹爲姓。所破之竹。棄於野。卽生成林。王皆與從人止石上。命作箋。從人曰。無水。王以劍擊石。泉便湧出。今竹王水及破竹成林。並存。○後漢使

唐蒙開牂柯郡。斬竹王首。夷療咸訴以竹王非血氣所生。甚重之。求爲立後。太守吳霸以聞。帝封三子爲侯。死配食父廟。今夜郎縣有竹王三郎祠。是其神也。本志云。夜郎里有竹王洞。是其故處。○九州要記云。夜郎自古非臣服州郡之地。昔漢武帝開拓南邊。始置夜郎縣。○後漢書曰。夜郎者。臨牂柯江。江廣百餘步。足以行船。唐蒙發巴蜀卒治道。自犍道抵牂柯江。卽此地。十三州志云。牂柯者。江中山名。晉永嘉二年。分牂柯置夜郎郡。兼置充州。寰宇記。唐武德二年。以梓潼縣爲充州。開元十五年。改爲夜郎縣。又云。充州。故夜郎侯邑。牂柯都尉居之。南中八郡。悉夜郎之西陲也。其屬縣有梓潼。思王思渝。底水。按梓潼。卽今之桐梓縣矣。○志云。緇戶夜郎里中。有李太白故宅。白坐永王璘之禍。南流於此。按蔡寬夫詩話云。太白之從永王璘。世頗疑之。唐書載其事甚略。亦不爲明辨。其是否。獨其詩自序云。半夜水軍來。潯陽滿旌旆。空名適自誤。迫脅上樓船。從賜五百金。棄之若浮糧。辭官不受賞。翻譎夜郎邊。以此觀之。則太白豈從人亂者哉。○太白集有流夜郎題。葵葉云。慚君能衛足。歎我遠移根。白日如分照。還歸守故園。其流夜郎聞。不預詩云。北闕聖人歌。太康南冠君子竄。遐荒漢醜開。奏鈞天樂。願得風吹到夜郎。寄內詩云。夜郎天外怨離居。明月樓中音信疎。北雁春歸看欲盡。南來不得豫章書。流夜郎贈辛判官云。昔在長安醉花柳。五侯七貴同杯酒。氣岸遙凌豪士前。風流肯落他人後。夫子紅顏我少年。章臺走馬著金鞭。文章獻納麒麟殿。歌舞淹留玳瑁筵。與君自謂長如此。寧知草動風塵起。函谷忽驚胡馬來。秦宮桃李向胡開。我愁遠譎夜郎去。何日金雞放赦回。寄韋南陵冰云。胡驕馬驚塵沙起。胡雛引馬天津水。君爲張掖近酒泉。我竄三

巴九千里。天地再新法。令寬夜郎遷客帶霜寒。西憶故人不可見。東風吹夢到長安。竄夜郎憶秋浦桃花舊遊云。桃花春水生。白石今出沒。搖蕩女蘿枝。半挂青天月。不知舊行徑。初拳幾枝蕨。三載夜郎還。於茲煉金骨。又夜郎承恩放。還兼欣克復。京師示息秀才。黃口爲人羅。白龍乃魚腹。待罪豈怨天。以愚陷網目。鯨鯢未翦滅。豺狼屢翻復。悲作楚地囚。何日秦庭哭。遭逢二明主。前後兩遷逐。去國愁夜郎。投身竄荒谷。半道雪屯蒙。曠如鳥出籠。遙欣克復美。光武安可同。天子巡劍閣。儲皇守扶風。揚袂正北辰。開襟攬羣雄。胡兵出月窟。雷破關之東。左掃因右拂。旋收洛陽宮。回輿入咸京。席卷六合通。叱咤開帝業。手成天地功。大駕還長安。兩日忽在中。一朝讓寶位。劍舄傳無窮。媿無秋毫力。誰念饗鑠翁。弋者何所慕。高飛仰冥鴻。築劍學丹砂。臨爐鑿玉童。寄言息夫子。歲晚陟方蓬。○唐李嘉祐送上官侍御詩。莫問黔中路。令人到欲迷。水聲巫峽裏。山色夜郎西。張籍送蠻客詩。借問炎州客。天南幾日程。江南惡溪路。山邊夜郎城。按志。夜郎城在桐梓驛二十里。有碑版字已剝蝕。明楊慎元夕梓桐驛詩云。載石孤峯古驛門。青羌吹笛報黃昏。三家村裏無燈火。千樹梅花作上元。夜郎曲云。夜郎城。桐梓原東。堞壘平。村民如野鹿。猶說翰林名。夜郎溪。梁木陰中。半景西。漁舟投樹宿。水鳥遶花啼。夜郎歌。漢宮會取教秦娥。竹枝傳竊糾楊柳。轉猗儻。○志云。夜郎里有廢扶歡縣址。按寰宇記。扶歡縣。唐貞觀十七年與榮懿縣同置。以縣東扶歡山爲名也。屬漆州。唐書貶韓偓爲榮懿尉。即此地。又有廢漆溪郡。按寰宇記。漆州土地所屬。與夷州同。亦貞觀十七年置。天寶元年改爲漆溪郡。志又有廢鼎山驛。在治西十里。不知何代設。城壘猶存。

仁懷縣

寰宇記云。芙蓉縣。唐貞觀五年置。屬郿州。十六年。郿州廢。改屬夷州。又改屬播州。初置在芙蓉山上。後移於縣東南三里之芙蓉江側。此芙蓉縣之所由名也。○寰宇記又云。仁水在縣西南一里。東南流注郿水。志云。仁水在宣慰司東南五十里。此仁懷縣之所由名也。○圖經云。廢舍月縣在州東南九十里。唐貞觀九年於縣理置高山縣。旋改爲舍月縣。以界內舍月山爲名。涪陵江在其東九十里。○廢胡江縣在州東南四十里。貞觀九年於縣治貢山縣。旋改爲胡江縣。以界內胡江爲名。有巴水在其南三十四里。○廢羅爲縣。在縣西南二百里。貞觀九年置郿施縣。旋改爲羅爲縣。以界內羅爲水爲名。水源自縣西百里羅爲山出。流經縣南。又東流至胡江。入涪陵水也。顯慶五年廢。城址猶存。○廢胡刀縣。在縣西南五十里。貞觀九年置釋鸞縣。旋改爲胡刀縣。因胡刀水爲名。水在縣南一里。東流合胡江。開元二十六年廢。

眞安州

圖經云。本夷州之境。與黔思犬牙。其地山溪竦秀。岡巒連綿。竹樹茂林。千里不絕。物產頗饒。與渝之南川。武陵彭水相接壤。○寰宇記云。唐貞觀十七年。廓闢邊夷。置播川鎮。後因其處有降珍山。乃以鎮爲珍州。取山名也。長安四年。改舞州。開元十三年。又改鶴州。十四年。復爲珍州。宋乾德四年。刺史田遷上言。自給賜珍州郡名已來。連遭火災。乞改州名。詔改爲高州。尋以嶺南有高州。加西字。元復爲珍州。僞夏明玉珍避諱。因改爲眞州。○圖經云。唐太宗開山洞。始置珍州。時并置夜郎。麗泉。樂源三縣。寰宇記云。其縣并在

州側近或十里或二十里。隨有畚田處爲寄理。移轉不定。方輿云。珍州有麗泉。白厓。思義。安定。壽山五堡。官軍所駐也。夜郎今桐梓縣。樂源。磨縣在治西六十里。有樂道書院。漢尹珍建。又云。尹珍以俗敦稼穡。併建務本堂。○紀勝云。珍州有東松。西松。豹子。羅蒙四山。按。二松俱在州南三百二十五里。豹子在州北八里。山多產豹。羅山在州西南三百里。內唐志有羅蒙縣。言此山高遠可瞰羅蒙也。○勝覽云。三江者。去州三十里。卽明溪。又曰虎溪。在州東十七里。思溪在州西北百八十里。出南平軍。與明溪合。又有貫珠溪。按在今治西八十里。源出虹轉山下。屈曲會合三江矣。○志云。楊六郎。寓白鳩亭。亭在古城。其憩休處在三塊石。足迹猶存。按六郎。宋太原楊業之子。楊延昭也。事跡不可考。又云。僞夏傑號其將江中立。築城以守。舊州城是也。眞州將鄭昌孫。據石城。抗之。今南山寨是也。天兵初至。昌孫執中立以獻命。得世其地焉。按平播之後。眞州始加安字。州判官有鄭。駱二姓。鄭卽昌孫後也。駱氏未詳。方輿勝覽云。宋徽宗時。大駱解上下族帥。駱世華。駱文貴等。獻地立珍州。亦曰樂源郡。或卽駱之始云。

綏陽縣

寰宇記云。夷州義泉郡理綏陽縣。在滇爲泮柯郡境。歷代恃險。不聞臣附。隋大業七年。始受招慰。置綏陽縣。屬明陽郡。今甯夷縣西北八十里。舊明陽郡是也。唐武德四年。罷郡。置夷州於思州甯夷縣。領夜郎。神鳳。豐樂。綏養。雞翁。伏遠。明陽。高富。甯夷。思義。丹川。宣慈。慈岳十三縣。六年。廢雞翁縣。貞觀元年。廢夷州。仍省夜郎。神鳳。豐樂三縣。以伏遠。明陽。高富。甯夷。思義。丹川六縣隸務州。宣慈。慈岳二縣隸溪州。綏養縣屬

智州四年於黔州都上縣置夷州六年復分置雞翁縣十一年以義州之綏陽黔州之高富二縣來屬其年又自都上縣移於今理領綏陽都上高富雞翁四縣十七年又以廢牢州義泉洋川二縣來屬天寶元年改爲義泉郡乾元元年復爲夷州按今貴州石阡府所轄多係夷州地以綏陽爲舊理所故詳及之○圖經綏陽縣有波利山在北二十里有安徽水一名孤微水西自綏養故縣來東流經縣南八里又東入都上縣界涪江水在縣東十八里南流注安徽水○方輿云綏陽故城在今縣西三里貞觀十二年移於今理廢城存按縣志今綏陽又移治劬竹里在真州長官司西北二百五十里外○志云縣北十里碧霄洞闊數十丈懸石鱗岫天成萬態如刻如畫又二十里有三漲水卽羅甘溪也其源出於古井每日辰午申三潮不爽焉○古蹟考云趙家里之望魚樓旁有三撫墓按楊侖家廟碑三撫姓趙氏鄱陽人乾符初播有白龍太子之亂其父常寨團練使偕楊祖平之遂插草爲標於杉木堂入籍而生三撫旣長有神異讀書於趕水鎮嘗騎馬歸驢下拖砂石兩片今趙廟前上馬礮是也刻有壬戌年等字墓存廟後二十丈許有隙可窺見其櫛以鈿懸去地二尺許○古蹟考云朗水里之溪源地有柳宗元書院按子厚以柳易播尙未得請不知何以有祠曰意其義也○志云宋大觀初於綏陽縣置承州廢都上縣在其南二十五里廢義泉縣在西南百里廢洋川縣在西北百里○寰宇記云都上縣隋置唐武德元年屬黔州貞觀四年置夷州縣爲理所十一年州始移綏陽有涪水一名泝野水西北自綏陽縣界流入經縣西十四里又折西南流入費州雞翁縣界○義泉縣本牂柯地隋大業十一年置初屬明陽郡唐武德二年改屬義



州。貞觀十一年於縣理置牢州。十七年牢州廢。縣屬夷州。有支離水。東北自廢綏養縣流入。流經縣西。又東南流入廢樂安縣界。○洋川縣。亦泮柯地。武德二年於縣東北七十里置屬義州。貞觀元年改屬思州。開元二十五年屬夷州。有小水西南自廢高富縣流入。東北經縣七十里。又北入務川縣界。○甯夷縣。舊屬思州。開元二十五年屬夷州。○廢高富縣。在今州東北百里。隋大業七年於廢縣南三十里置蜀明陽郡。末年陷夷獠。唐武德四年再置屬夷州。貞觀元年改屬務州。十年又改屬黔州。十一年復屬夷州。有小水在其縣南三十里。東入甯夷縣界。○廢雞翁城。在縣西南七十里。武德四年置屬夷州。有洪野水。東自都上縣界流入。經縣南三里。又南入費州城樂縣界。永徽後與高富縣同廢。

# 蜀中名勝記卷之二十一

## 下川東道

夔州府一奉節縣附郭

水經曰。江水又東逕南鄉峽東。寰宇記云。南鄉峽在奉節縣西四十七里。龍洞溪出焉。按即今之龍洞候館矣。梁元帝早發龍窠詩。征人喜放溜。曉發晨陽隈。初言前浦合。定覺近林開。不疑行舫動。惟看遠樹來。遶際起漲岸。稍隱陽雲臺。○經云。江水又東逕永安宮南。注云。劉先生終於此。諸葛亮受遺處也。其間平地可二十許里。江山迴闊。入峽所無。城周十餘里。背山面江。頽墉四毀。荆棘成林。左右民多墾其中。郡國志曰。劉備改魚復爲永安。仍於州西七里別置永安宮。城在平地。陸游入蜀記云。二十七日早至夔州。州在山麓沙上。所謂魚復永安宮也。宮今爲州倉。而州治在宮西北。甘夫人臺西南。景德中。轉運使丁謂。薛顏所徙。比白帝頗平曠。然失關險無復形勢。按寰宇記云。周武帝天和元年。自白帝城移理於永安宮南五十步。宣政元年。復還白帝城矣。○志云。郡有義泉。諸葛武侯所鑿。侯虛城中無水。乃接筒引泉入城。後夔守亡。藝以榷水取錢。至宋待制王龜齡罷之。陳剛整井記云。夔惟節度府漕臺西廳有井。紹興二年。井大壞。景公領使事。發地二百尺而始及泉。以柁木墊之。○志云。郡學卽永安宮址。岡陵文類云。郡守錢唐單夔。同漕使。漢澤張玠。以紹熙元年六月初吉。祗謁先聖先師。因延肄業之士。別駕漢嘉張子震。郡文學

三山柯甲皆在。施萬大窟文學掾。鏡塘李廷光。九華湯崑起三衛。毛憲實與焉。遂會食明道。規廡一新。見國子錄。范仲輔經營之美。因墜茗觀。三峽圖。聽水琴聲。清話久之。儻然忘暑。遐想詠歸之風。名教之樂。其有既耶。按柯甲跋云。其字皆隸古體。○碑目云。少陵遊蜀。凡八稔。在夔獨三年。平生所賦詩。凡千四百六篇。而在夔者三百六十有一。治平中。知州賈昌言刻十二石于北園。歲久字漫滅。建中靖國元年。運判王邁新爲十碑。今碑在漕司。○北園卽灤西果園也。入蜀記云。地在灤之西。故一曰灤西。土人謂山間之流。通江者曰灤。杜甫暮春題灤西新賃草屋詩。久嗟三峽客。再與暮春期。百舌欲無語。繁花能幾時。谷虛雲氣薄。波亂日華遲。戰伐何由定。哀傷不在茲。其二。北郊千樹橘。不見比封君。養拙干戈際。全生麋鹿羣。長人江北草。旅食灤西雲。萬里巴渝曲。三年實飽聞。其三。綵雲陰復白。錦樹曉來青。身世雙蓬鬢。乾坤一草亭。衰歌時自短。醉舞爲誰醒。細雨荷鋤立。江猿吟翠屏。其四。壯年學書劍。他日委泥沙。事主非無祿。浮生卽有涯。高齋依藥餌。絕域改春華。喪亂丹心破。王臣未一家。又將別巫峽。贈南鄉兄。灤西果園四十畝。詩云。昔竹素所好。萍蓬無定居。遠遊長兒子。幾地別林廬。雜菜紅相對。他時錦不如。具舟將出峽。巡圃念攜鋤。正月喧鶯未。茲辰放鶴初。雪籬梅可折。風樹柳微舒。託贈卿家有。因歌野與初。殘生逗江漢。何處狎樵漁。○郡有制勝樓。卽北樓也。宋張商英序云。夔據荆蜀往來之衝。渝瀘施黔疆場之郡。倚州爲重。而頽垣廢塹。居民暮夜出入不禁。殆非所以防微消患。嚴官府。壯屏翰之意也。熙甯十年。轉運副使董大夫請於朝而新之。知郡事王仲祥董其役。遂負赤甲之固。合月臺之遺址。而增築之。建爲譙樓。宏大煥聳。凡山川

之形勝。盡在目中。大夫以制勝名之。蓋慮深哉。既落成。諸公賡詩以詫之。將錢子石以廣其傳。於是金馬張商英適西來爲之序云爾。尙書司門郎中知軍州事王延禧北樓詩云。夔子城新築。長江便作濠。欲兼諸面敵。故起北樓高。即舊基仍峻。因時力不勞。青天纔咫尺。翠壁似周遭。近照東西瀼。遙分上下牢。百蠻歸指掌。三峽見秋毫。帝道方無外。皇威到不毛。三鉤閑夜鎮。八陣縱春遨。守土慙非稱。提兵亦謬叨。經營皆使指。備豫本戎韜。力乏爲山助。名加制勝褒。登臨欲吟咤。深愧杜陵豪。○方輿勝覽云。白雲樓在計臺有三層。程之才序云。漕舍據此山之麓。西園錦石堂。又據漕舍之北。地勢最高。歲久且敝。因稍增築。代以重樓。名其上曰白雲樓。中曰秋濤閣。下曰山堂。登覽之勝。甲於一郡。於其成也。不可無紀。輒吟詩一篇。爲作者前驅耳。詩云。巒熊城郭遠蒼崖。萬壘煙嵐亦壯哉。平地窺覲心未愜。重樓徙倚眼前開。披襟風月爭新入。剖目江山破迴來。日落三峨知處所。雲浮雙闕欲崔嵬。胡牀不愧庾公興。奕簞還思杜老才。更待攜衾盡清景。夜深欄檻逼昭回。○勝覽云。江月亭在戎鈐司。王龜齡詩。長江何處水。明月幾州天。月與江無約。相逢是偶然。碑目云。癸亥燈夕前一日。臨川何異同叔招王鈐轄飯。次日當用故事。邀漕使鉅野李誠之。同至江月亭。鈐轄錄示梅谿舊題。豫有所請。方辭以老罷。無復強綴語。言聊記歲月云爾。是夕五鼓。形於夢寐。得二十字。其辭曰。月湖湖上月。到處有光輝。旣解相隨出。嘗須照我歸。覺而甚喜。歸日可期。旣登茲亭。水月相得。愈切刀頭之夢。故併書以遺之。鈐轄名光遠。字宏父。是爲江月主人。○固陵文類云。瑞白堂在治內。郡守王十朋五月十五日夜。與劉韶美草酌於瑞白堂。秉燭觀跳珠。分韻得跳字。詩云。五月峽

中天氣歇。竹筩引水那能澆。江濱龍老臥未起。崖石不枯珠自跳。草草杯盤對君酌。燈前疑是簷花落。毫  
端寫出萬斛珠。共向炎天作冰雹。妃子名園荔子丹。絳囊初摘堆金盤。細擘輕紅唱君曲。咀嚼水晶牙頰  
寒。老翁真箇如年少。激水成珠堪一笑。劉侯自有胸中珠。不止照人兼自照。劉儀鳳得珠字云。別來世故  
朝昏殊。相與言之汗模糊。兩翁得酒促坐席。感深念極氣欲蘇。籀龍亦解作水供。細繹詩文如渴烏。衣巾  
生秋背毛豎。金石相應環珮趨。江山豪壯傍尊俎。醉中頻覓藥珠。此時一事復挂。爲樂未竟成暗鳴。  
夔州憂民困湯火。潤澤有志無坦塗。眼前焦熬十萬戶。欠伸戲笑皆霑濡。自操量鼓入官廩。不輸一錢分  
水符。讀書功力無表畔。久矣俗吏輕吾儒。○詔美有自歸州陸行至夔州詩云。久客歸心速。江流設險艱。  
夢驚人鮮甕。生出鬼門關。草滿離騷國。神依暮雨山。未平千古恨。慘澹入躋攀。又飛溜時時雨。疎風處處  
蟬。草茵秋臥月。雲幕午垂天。夷險籃輿底。陰晴鳥道邊。荒村無勞酒。坐睡媿頰肩。又戶口村無幾。犁鋤力  
不堪。林荒樛櫟壽。月黑虎狼貪。幽絕雲眠穩。清閑谷飲甘。故山深未極。壤斷蓋茅菴。又倚伏關羣動。幽微  
各有生。燒痕移窟穴。林曲聚飛鳴。瘠土常饑色。層坡被惡名。經行不睡地。山好故留情。又曠野無人宿。危  
亭犯雨鴻。嶺雲堆鳳鼠。刺海現兜羅。酒觸秋懷壯。天留暮色多。不厭行役古。裁入竹枝歌。又行行夔子國。  
尺寸到江濱。間闔一杯酒。平生三故人。逐臣猶費祿。夢境欲抽身。脫粟羹藜覓。重關任汝噴。自注云。故人  
謂龜齡。元章。行可也。按詔美。普州人。性酷嗜書。祕閣板木。抄錄殆遍。親自校讎。至杜門絕交。爲人劾歸。詳  
見著作記及詩話中。○經云。江水又東。逕諸葛亮園。壘南。注云。石磧平曠。望兼川陸。有亮所造八陣圖。東

跨故壘。皆累細石爲之。自壘西去。聚石八行。行間相去二丈。因曰八陣。旣成。自今行師。庶不覆敗。皆圖兵勢行藏之權。自後深識者所不能了。今夏水漂蕩。歲月消損。高處可二三尺。下處磨滅殆盡。荊州圖副云。永安宮南一里。渚下平。磧上週迴四百一十八丈。中有諸葛孔明八陣圖。聚細石爲之。各高五尺。廣十圍。歷然棋布。縱橫相當。中間相去九尺。正中開南北巷。悉廣五尺。凡六十四聚。或爲人散亂。及爲夏水所沒。冬水退。復依然如故。八陣圖下東西三里。有一磧。東西一百步。南北廣四十步。磧上有鹽泉井五口。以木爲桶。昔常取鹽。卽時沙壅。冬出夏沒。劉賓客嘉話錄云。夔州西市。俯臨江岸。沙石下有諸葛亮八陣圖。箕張翼舒。鸞形鶴勢。聚石分布。宛然尙存。峽水大時。三蜀雪消之際。湏湧滉漑。可勝道哉。大樹十圍。枯槎百丈。破磴巨石。隨波塞川而下。水與岸齊。人奔山上。則聚石爲堆者。斷可知也。及乎水落川平。萬物皆失。故態唯諸葛陣圖。小石之堆。標聚行列依然。如是者。僅已六七百年。洶灑推激。迨今不動。高似孫緯略曰。八陣圖在魚腹者。隨江布勢。填石爲規。前障壁門。後倚卻月。縱八橫八。魁容二丈。內面偃月。九六鱗差。江自岷來。奔怒湍激。驚雷迅馬。不足以敵其雄也。徒華變滄。不足以窮其力也。磊磊斯石。載轟載椿。知幾何年。曾不一灰。是非天所愛。神所敬者歟。詩林載晉桓溫伐蜀。觀八陣圖詩云。訪古識其真。尋源愛往跡。恐君遺事節。聊下南山石。仍願謂從事曰。此常山蛇勢也。杜甫八陣圖詩。功蓋三分國。名成八陣圖。江流石不轉。遺恨失吞吳。劉禹錫詩。軒皇傳上略。蜀相運神機。水落龍蛇出。沙平鸞鶴飛。波濤無動勢。鱗甲避餘威。會有知兵者。臨流指是非。蘇軾詩。平沙何茫茫。髣髴見石迹。縱橫滿江上。歲歲沙水齧。孔明死已久。誰復

辨行列。神兵非學到。自古不留訣。至人已心悟。後世徒妄說。自從漢道衰。蜂起盡奸傑。英雄不相下。禍難久連結。廬民市無煙。戰野江流血。萬人賭一擲。殺盡如沃雪。不爲久遠計。草草常無法。孔明最後起。意欲掃羣孽。崎嶇事節制。隱忍久不決。志大遂成迂。歲月去如瞥。六師紛未整。一旦英氣折。唯餘八陣圖。千古壯夔峽。蘇轍詩。漲江吹八陣。江落陣如故。我來苦寒後。平沙如匹素。乘高望遺迹。磊磊六四數。遙指平沙棋。就視不知處。世稱諸葛公。用衆有法度。區區落褒斜。軍旅無闊步。中原竟不到。置陣狹無所。茫茫平沙中。積石排隊伍。獨使後使人。知我非莽鹵。奈何長蛇形。千古竟不悟。惟餘桓元子。久視不能去。李興宗詩。江從岷來觸瞿唐。夏潦潰裂怒勢張。霜溝水落洲渚露。粟壘江石堆作行。半斜半直半疎密。方營周市門東出。相傳呵護有鬼神。驚波不能移寸尺。想見當年諸葛公。給巾羽扇揮愁風。令嚴部伍寂如水。出沒變化機無窮。乾坤不足當經理。寫留古法良岑趾。上灘下峽一千年。多少英雄測元旨。小兒元子強多知。常山蛇勢吾能窺。灞上枋頭真絕倒。空使虬髯論鬪奇。斯輪不可傳其子。此公天機絨骨髓。奈何螟蝗生蝮蝎。炎劉已灰吹不起。天教三馬食一槽。老馬啼嚙暫咆哮。渭陽巾幗勢將蹶。大星夜隕西軍號。嗚呼與廢盡天意。中原腥羶今六紀。胡雛骨肉正相殘。欲拯塗炭嗟誰使。大官酣燕芻豢餘。小官踟躕塵埃裏。舉目厭厭九泉人。誰訪草廬談世事。向來韜略機莫投。而今投機欠良籌。君不見峽山深深茅舍底。有人抱膝高聲謳。張續陪安撫。大卿登八陣臺。覽觀諸葛公遺像。偶成長句云。白帝城西魚復浦。十月江平見津滸。當年累石紛成行。此地臥龍經講武。轅門外建巖中權。列陣相承存後伍。何人蛇勢識常山。未數魚麗於

鄭拒惡知精神貫金石尙想號令嚴鉦鼓老兵料敵應疑生川后澄波其敢侮向令赤伏有餘符下睨皇州直指取云何遺跡司神明獨斬豐功被寰宇高城置酒共臨眺往事興懷增歎撫巍然王佐三代前信矣明言照千古○舊經云八陣圖銘石刻在磧中今不復見張季長詩刻銘久伏水底碑教戰時存山下鼓自注云有圖銘巨石今伏水底又云山下有石鼓相傳爲武侯教戰之音也○志云先主廟舊在永安宮南今移白帝城內杜甫謁先主廟詩慘澹風雲會乘時各有人力侔分社稷志屈偃經綸復漢留長策中原仗老臣雜耕心未已歐血事酸辛霸氣西南歇雄圖歷數屯錦江元過楚劍閣復通秦舊俗存祠廟空山泣鬼神虛簷交鳥道枯木半龍鱗竹送清溪月苔移玉座春閨闔兒女換歌舞歲時新絕域歸舟遠荒城繫馬頻如何對搖落況乃久風塵孰與關張並功臨耿鄧親應天才不小得土契無鄰遲暮堪帷幄飄零且釣繆向來愛國淚寂寞灑衣巾○三山林栗詩序云諸葛武侯祠舊在西山歲久摧圯永嘉王詹事帥夔日移置陣磧淳熙漕使張著庭重修杜甫諸葛廟詩久遊巴子國屢入武侯祠竹日斜虛寢溪風滿薄帷君臣當共濟賢聖亦同時翊戴歸先主并吞更出師蟲蛇穿畫壁巫覡醉蛛絲歛憶吟梁父躬耕起未遲資叔向武侯廟詩永安宮外有祠堂魚水恩深祚不長角立一方初退舍擬稱三漢更圖王人同過隙無留影石在窮沙尙啓行歸蜀降吳竟何事爲陵爲谷任蒼蒼○方輿勝覽云武侯廟在八陣圖之臥龍山上時州理白帝故少陵詩云猶有西郊諸葛廟臥龍無首對江濱也有堂曰開濟堂何着仲開濟堂小記云堂閱歲久垂歷矣淳熙疆圉作噩瀆山何着仲假守舉而新之因訪善本重肖侯像摘老杜兩



朝開濟老臣心之句以字堂巫山尉任份來董事春二月乙亥落成丁謂遊臥龍山詩日暮春老職司閑縱鬱因尋郭外山花氣半飄青嶺外泉聲多在白雲間香燈肅肅嚴僧事鐘梵蕭蕭爽客顏坐有詩人樽有酒擬拋城市宿禪關溫陵會懺和承平桑者自閑閑巴俗燒畬滿四山招集賓僚來野次追呼父老到田間及時勸課知宣化繼踵催科卻厚顏底事羣僧享安逸坐令檀施叩禪關陸游題臥龍山詩浣翁幾日客遺墨徧蒼崖作吏今三月偷閒始一來雲歸就窠宿江怒觸山迴更欲窮幽賞城頭疊鼓催查籥題臥龍武侯廟詩山巔祠貌儼丹青千載懷人爲一登隱隱故營連白帝茫茫恨水向西陵石根蘭芷香無價雲頂松杉翠作層人事天機古難料詩成試語定中僧周時題臥龍詩雨過羣峯入骨青杖藜曾憶去年登無風細路尋齋寺落照孤城認固陵割據江濤隨渺渺清明花樹又層層不聞不見無窮盡唯有禪房白足僧王十朋題臥龍山觀音泉二十韻呈行可元章云去歲游廬山社中觀白蓮不飲遠公酒聊酌聰明泉肩輿過武昌乘輿西山巔岳乳飲菩薩詩篇誦蘇仙夔州苦無井瘦俗殊可憐竹箛喉不乾可流不可煎日汲臥龍水屢積擔夫肩所取卻幾斛深慙未投錢前日招提游入耳聲涓涓泓澄可照膽草木皆光妍道人出新茗林間手執研至今清夜夢猶到幽亭邊交遊況離索回首成悽然何時鹿呦呦重訪山中禪柯甲題臥龍武侯廟詩巴江一綫東巴山不礙登臨氣象寬寺隱蟠龍松影亂碑殘科斗藓痕漫十分嫩醞隨宜暖一酌泓澄徹骨寒欲說孔明千古恨令人勇跨玉驄鞍三山朱煥詩云野往從來物外便瘦筇拄到臥龍巔下臨斗絕疑無地峻極盤旋別有天遠遠峯巒猶帶雪蒼蒼竹柏幾經年武侯向日

三分國。大士今朝一派泉。休泥遺編論往事。且將此水滌眞田。淵源瑩潔爲方寸。世界收藏幾大千。黃山谷臥龍行記云。天水張茂先世京。南昌黃庭堅魯直。弟叔向嗣直。建中靖國元年三月丁卯同來。時左綿道人思順開法席於此山。道俗歸心。荆棘草萊化爲金碧。新雨晚晴。同登中閣。觀白鹽之崇嶺。想少陵之風流。歎大雅之不作。裴徊久之。跋云。涪翁以文學名世。書學徐浩而婉美。翁死三十年矣。今人見其翰墨。及從之遊者。莫不欣然景慕之。都運徽猷。久從翁遊。而文學翰墨皆造其妙。步趨之相若。模範之相承。譽望之相維。輝映炳耀。卓乎其能肖也。後之人苟未知涪翁之賢。請觀於公可知矣。苟有未知公之賢。請觀於涪翁可知矣。建炎五年正月日。門生從政郎夔州奉節縣令主管勸農公事王行謹跋。○潁川劉均國邀古雍李紹隆。洛陽邢仲時。陽翟衛師房。黃山韓次阮。游臥龍山咸平院。謁長老忍禪師。建炎四年十月晦日。均國之子瓊侍。○侍郎閻公運使張公同遊臥龍紀行云。余初自宣威幕府送季長。奏事北闕。入道山爲學士。後三年。余始被命造朝。遂玷論思之列。今丐祠得請而歸。會季長謫漕夔門。相與道舊。故握手驚嘆。蓋閻別已十年矣。辱通家燕款。浹辰亡倦。最後游臥龍山。松風蕭爽。雲日蔽虧。千載英靈。恍若來下。晚趨躍馬城。赤甲白鹽陵極。極天半晴。光返照。噴浪帖伏。慈明行酒。道輶誦詩。至大醉而去。不圖天涯爲樂之。至於斯也。淳熙九年三月癸巳。唐安閻蒼舒才元書。○王十朋臥龍行記云。永嘉王龜齡少城周行可。海陵查元章。載酒來遊。時凍雨初霽。風日清美。山谷明秀。照人道傍。雜花盛開。籃輿徐行。應接不暇。寺有茶蔭。羅絡松上。如積雪。崇蘭數百本。秀發巖石間。微風透香。所至芬郁。東榮牡丹大叢。雨前已開。道人植

蓋護持留以供客飲罷。縱步泉上。淪茗賦詩而歸。乾道丙戌清明前四日。○陸游跋關著作臥龍行記云。著作關公出使。陝中風采峻甚。仕者人人震懼。莫敢仰視。遊以孤生起罪籍。萬里佐州。淺闇滯拙。自期且汰去。而關公獨厚遇之。舉酒賦詩。談臺閣舊事。忘其位之重也。公免歸之明年。游以事至臥龍山。咸平寺長老惠總言。公往有行記。今將刻之石。因屬游書其末。游曰。方關公之門可炙手時。此書伏不出。今公歸臥青城山中。賓客解散。形勢一變。而總方刻其書爲不朽計。嗟乎。足以愧士大夫矣。乾道七年七月左奉議郎通判夔州軍州主管學事陸游謹識。按關著作着孫青城人。○黃傑臥龍紀行云。帥帳跨鼉。陳損之繡衣具茨。王璆聯轡登臥龍。置酒高會。賓客從者十有六人。是日金虎嘯風。丹雲蔽日。涼生尊俎。輿在江山。獻酬庶唱之餘。挹大士泉。訪海仙像。慶慮息。神情清。瞿塘晝漏垂盡乃去。眞勝遊也。慶元己未七月十有四日。魯齋黃人傑書。○李璽臥龍行記云。眉山李季允。同漢嘉王申父襄陽晏亞夫來遊。時春陽驟驟。風埃四起。酌泉松石間。意頗愜。無何雷雨忽至。晚登寺閣。望赤甲白鹽山。色如洗。相與舉酒樂甚。遂留宿山房。慶元六年五日。○水經注云。白帝城西有孤石。冬出水二十餘丈。夏卽沒。秋時方出。灑灑如象。行人莫上。灑灑如馬。行人莫下。峽人以爲水候。李膺益州記云。灑灑堆與水漲沒數十丈。其狀如馬。舟人不敢進。故曰灑灑。又曰淫豫。言舟子取途。不決水脈。故猶預也。南史云。淫豫大如襪。瞿塘不可觸。樂府云。淫豫大如馬。瞿塘不可下。類要云。淫豫大如鼉。瞿塘行舟絕。淫豫大如龜。瞿塘不可窺。坤元錄又作猶豫。水經注。灑灑歌曰。江頭白渚。堅相持。倏忽淪沒。別無期。孝子傳云。庾子與扶父柩過瞿塘。六月水泛。子與禱而

遂平。既過，泛溢如故。人歌之曰：灩澦如牛，本不通。瞿塘水退爲庚公。○成子詔高齋題灩澦水則云：開封成鋪子詔寄瞿塘關懷安容渥澤民。成都郭公臨舜卿東去，過高齋，覽形勝，遣人撐舟，垂繩墜石，則灩澦之水約八十四丈。子詔曰：夏中江漲，灩澦水上猶三十餘丈，可想見矣。澤民之子慶冒侍，淳熙乙巳正月二十五日。○范成大吳船錄云：六月丙辰泊夔州，早遣視瞿塘水，僅能漫灩澦之頂，盤渦散出其上，謂之灩澦撒髮。人云：如馬尙不可下，況撒髮邪？是夜半水忽驟漲，滄及排亭，及明走視灩澦，則已在五丈以下，或可以僂倂入峽，而夔人猶難之。丁巳水漲未已，遂決解維，十五里至瞿塘口，水平如席，獨灩澦之頂猶渦紋淺薄，舟拂其上以過，搖櫓者皆汗手死心，面無人色。蓋天下至險之地，行路極危之時，旁觀者盡皆驚阻，余已在舟中，一切付之自然，不暇問。據胡林坐招頭處，任其盪兀，每一舟入峽數里後，舟方續發，水勢怒急，恐猝相遇，不可解拆也。帥司遣卒執一旗，次第立山之上下，一舟平安，則簸旗以招後船。舊語云：灩澦大如樓，瞿塘不可觸，灩澦大如馬，瞿塘不可下。此俗傳灩澦大如象，瞿塘不可上，蓋非是也。後人立石辨之甚詳，峽中兩岸高巖峻壁，斧鑿之痕，皴皴然，而黑石灘最號險惡，兩山東江驟起，水勢不能平，余來此，水勢適可，俗所謂茶槽者，又水大漲，滄沒草木，謂之青草齊，則諸灘之上，水寬少浪，可以犯之余之來此，水未能盡漫草木，但名草根漲，亦不可涉，然犯難而行，不可回首也。陸游入蜀記云：二十六日晚至瞿塘關，唐故夔州與白帝城相連，杜詩：白帝夔州各異城，蓋言難辨也。關西門正對灩澦堆，堆碎石積成，出水數十丈，土人云：歲旱時石露大半，有三足如鼎狀。○關着孫瞿塘關行記云：乾道庚寅中元日，關着

孫約李時雨、陳彥、岳建壽、宋嵩、李普、張徽之、雍大椿、飲於三峽堂。晚攜餘觥下瞿唐。關訪夔刺史。舊治客曰。今之司關者之居是也。遂飲於此。茂林修竹間。小亭縈紆。客曰。此唐劉夢得故宅址。夢得遺墨舊有石好事者取去。復飲關上。高齋誦少陵薄雲巖際宿。孤月浪中翻之詩。歎此老具眼如此。夔江山元惡。爲少陵所紀處。獨異。高齋其一也。高齋故基。屋隘而陋。予惜之。方欲爲太守。王君言。客陳彥辛景賢出席。願出力更築之。僕謂不可隘而陋。亦不可侈而大。此少陵誅茅避世意也。併書以告二子。云。景賢今司瞿唐關者。○詩話珊瑚鉤云。唐周邠自蜀買奴曰。水精善洗水。乃崑崙泗水之屬也。邠疑瞿塘之險。必有怪。使水精入瞰之。久乃出曰。下有關。不可渡。得珠貝而還。按今謂之下關城矣。○樂府解題曰。瞿盛也。唐。陂池也。言盛水其中。可以行舟也。又云。夏則爲瞿。冬則爲唐。杜甫瞿唐兩厓詩云。三峽傳何處。雙厓壯此門。入天猶石色。穿水忽雲根。猿獼鬚鬢古。蛟龍窟宅尊。羲和冬馭近。愁畏日車翻。白居易夜入瞿塘峽詩云。瞿塘天下險。夜上信難哉。岸似雙厓合。天如匹練開。逆風驚浪起。拔棹暗缸來。欲識愁多少。高於灑灑堆。宋肇峽口詩云。萬里西南路。瞿塘居上游。峽分山對立。江令水爭流。蛟鱗從來患。風波自古愁。幾時飛兩槳。歸去滿帆秋。蘇軾瞿唐峽詩云。自昔懷清賞。今茲得縱探。長江連楚蜀。萬派瀉東南。合水來如電。黔波綠似藍。餘流細不數。遠勢競相參。入峽初無路。連山忽似龍。縈紆收浩渺。蹙縮作淵潭。風過如呼吸。雲生似吐含。墜崖鳴窅窅。垂蔓綠穉穉。冷翠多崖竹。孤生有石楠。飛泉飄亂雪。怪石走驚驂。絕澗知深淺。樵僮忽兩三人。煙偶逢郭沙岸。可乘籃野戍。荒州縣。邦君古子男。放衙鳴晚鼓。留客薦霜柑。聞道黃精草。叢生綠

玉筵。儘應充食飲。不見有彭聃。氣候冬猶暖。星河夜半涵。遺民悲昶衍。舊俗接魚蠶。版屋漫無瓦。巖居窄似菴。伐薪常冒險。得水不盈甌。歎息生何陋。劬勞不自慚。葉舟輕遠泝。大浪固無諳。嬰鑿空相視。嘔啞莫與談。蠻荒安可駐。幽邃信難耽。獨愛孤棲鶻。高超百尺嵐。橫飛應自得。遠颺似無貪。振翮遊霄漢。無心願雀鷗。塵勞世方病。局束我何堪。盡解林泉好。多爲富貴酣。試看飛鳥樂。高遁此心甘。蘇轍入峽詩云。舟行瞿塘口。兩耳風鳴號。渺然長江水。千里投一瓢。峽門石爲戶。鬱怒水力驕。扁舟落中流。浩如一葉飄。呼吸信奔浪。不復由長篙。兩山蹙相值。望之不容舳。漸近乃可入。白鹽最雄高。草木皆倒生。哀叫悲元猿。白雲繚長袖。零露如飛毛。○峽程記曰。瀘合。遂蜀。四州皆峽中郡。自蠻江。枯柏。淹導等江至此二百八十里。會於峽前。次荆門。都四百五十灘。卽有清水。重峯。胡灘。漢灘。忽雷。閃電。沱灘。瀨灘。狼尾。使君。主簿。二灘。以沈舟得名。其他不悉記。三峽者。卽明月。仙山。廣澤。其有瞿塘。醴瀨。燕子。屏風之類。皆不預三峽之數。唐楊炯廣溪峽詩。廣溪三峽首。曠望兼川陸。山路遠羊腸。江城鎮魚復。喬枝百丈偃。飛水千尋瀑。驚浪迴天高。盤渦轉深谷。漢氏昔云季。中原爭逐鹿。天下有英雄。襄陽有龍伏。常山訓軍旅。永安與板築。池臺忽已傾。邦家遽淪覆。庸才若劉禪。忠佐爲心腹。設險猶可存。當無賈生哭。○經云。江水又東。逕廣溪峽。注云。斯乃三峽首也。其間三十里。巖巖倚木。厥勢殆交北岸。山上有神淵。淵北白鹽厓。高千餘丈。天旱然火。白鹽椎燼入淵。卽雨。常璩以澤有神。鳴鼓則雨。蜀都賦。謂應鳴鼓而與雨也。刺史二千石經過。皆不得鳴角伐鼓。商旅上下。恐觸石有聲。乃以布裹篙足。此峽多猿。猿不生北岸。北唯一處。或有取之。放著此山中。初不聞聲。

將同貉獸渡汝而不生矣。其峽蓋自神禹鑿。以通江郭。景純所謂巴東之峽。夏后疏鑿者。杜甫白鹽山詩曰。徐步移斑杖。看山仰白頭。翠深開斷壁。紅遠結飛樓。日出清江望。暄和散旅愁。春城見松雪。始擬放舟歸。接盛宏之荊州記。謂漢高祖伐秦。途經於此。見淵中白壁赤柱。狀若官府。因名龍淵矣。○經云。江水又東南。逕赤岬西。注云。是公孫述所造。因山據勢。周迴七里。一百四十步。東高二百丈。西北高一千丈。南連碁白帝山。甚高大。不生樹木。其石悉赤。土人云。如人袒胛。故謂之赤岬山。淮南子曰。傍皇於山岬之旁。注曰。岬。山脊也。郭仲產曰。斯名將因此而興矣。注云。赤岬山巖穴中露一匣。甚高不可升。相傳乃古兵書匣。○經云。江水又東。逕魚復縣故城南。注云。故魚國也。春秋左傳文公十六年。庸與羣蠻叛。楚莊王伐之。七遇皆北。唯裨儵魚人逐之是也。地理志。謂江關都尉治。公孫述名之爲白帝城。取其王巴蜀。蓋巴東郡治也。漢獻帝初平元年。分巴爲三郡。以魚復爲固陵郡。趙允訴劉璋。改爲巴東郡治。白帝山城周迴二百八十步。北緣馬嶺。接赤甲山。其間平處。南北相去八十五丈。東西十七丈。又東傍瀼溪。卽以爲隍。西南臨大江。關之眩目。唯馬嶺小差。委迤猶斬。爲路羊腸數四。然後得上益州。刺史鮑陋鎮此。爲譙道福所圍。城裏無泉。乃南開水門。鑿石爲函道。上施水天公。直下至江中。有似猿臂。相牽引汲。然後得水。水門之西。江中有孤石。爲淫預石。冬出水二十餘丈。夏則沒。亦有出處矣。縣有夷溪。卽狼山清江也。經所謂夷水出焉。益州記曰。水色清照。十丈分沙。蜀人見其澄清。因名清江也。○水經注云。昔虞君浮土舟於夷水。據捍關而王巴。是以法孝直有言。魚復捍關。臨江據水。實益州禍福之門。漢書地理志云。江關都尉理魚復。寰宇記。

蜀章武二年。先主爲吳所敗。改白帝爲永安。晉太康中復永安爲魚復。有故江關。在江南岸。北對州城。宋泰始三年。以山峽險隘多寇賊。立三巴校尉以鎮之。宋末廢。唐置都督府及刺史郡。治於此。○文苑英華常袞授持節都督夔州諸軍事兼夔州刺史。柏貞節制云。山峽雄重。江關要衝。輿地碑曰。夔州都督府記。唐會昌五年。刺史李貽孫。繆師禹書。見歐陽公集。古錄云。今在漕臺集。古錄云。余嘗謂唐世人人工書。故其名湮沒者。不可勝數。每與君談嘆息於斯也。如貝靈該。繆師愈。今人尙不知其姓名。況其書乎。余以集錄之博。僅各得其一爾。○又云。唐夔州刺史。應壁記。長慶二年五月一日。刺史中山劉禹錫撰。今見存。○張說下江向夔州詩。天明江霧歇。洲浦棹歌來。淥水逶迤去。青山相向開。城隨蜀帝祀。雲接楚王臺。舊知巫山上。遊子共徘徊。司空曙送夔州班使君詩。魚國巴庸落。摩幢漢守過。曉檣爭市隘。夜鼓祭神多。雲白常山雨。風清滿峽波。夷陵舊人吏。猶誦兩岐歌。戴叔倫送盧使君赴夔州詩。鏡管隨旌旆。高秋遠上巴。白波連霧雨。青壁斷蒹葭。凭几雙童靜。登樓萬井斜。政成知變俗。當應畫輪車。唐求舟行夜泊夔州詩。維舟鏡面中。迴對白鹽峯。夜靜沙堤月。天寒水寺鐘。故園何日到。舊友幾時逢。欲作還家夢。青山一萬重。鄭谷入夔州詩。萬家煙靄裏。隱隱見夔州。夜靜明月峽。春寒堆雪樓。獨吟誰會解。多病自淹留。往事如今日。聊同子美愁。張祜送曾黯游夔州詩。不遠夔州路。層波灑瀨連。下來千里峽。入去一條天。樹色秋帆上。灘聲夜枕前。何堪正危側。百丈半山巔。又送楊秀才入蜀夔詩。鄂渚逢游客。瞿塘上去船。峽深明月夜。江靜碧雲天。舊俗巴渝舞。新聲蜀國絃。不堪揮慘恨。一涕淚潛然。釋齊己送周秀才遊峽中詩。又向夔城去。知難



動旅魂。自非亡國客。何慮斷腸猿。醴湏分高初。瞿塘露淺痕。明年期此約。平穩到荆門。○白帝城。公孫述所築也。東觀漢記。白帝城舊名魚復。公孫述見白龍入井中。以爲應己之祥。改爲白帝。陳子昂白帝懷古詩云。日落滄江晚。停橈問土風。城臨巴子國。臺沒漢王宮。荒服猶周甸。深山尙禹功。巖懸青壁斷。地險碧流通。古木生雲際。歸帆出霧中。川途去無限。客思坐何窮。杜甫上白帝城詩。城峻隨天壁。樓高更女牆。江流思夏后。風至憶襄王。老去聞悲角。人扶報夕陽。公孫初恃險。躍馬意何長。又上白帝城樓詩。江度寒山閣。城高絕塞樓。翠屏宜晚對。白谷會深遊。急急能鳴雁。輕輕不下鷗。夷陵春色起。漸擬放扁舟。○城中有白帝廟。入蜀記云。白帝廟氣象甚古。松柏皆百年物。有數碑。皆孟蜀時立。庭中石筍。有黃魯直建中靖國元年題字。又有越公堂。隋楊素所創。少陵爲賦詩者已毀。今堂近歲所築。亦甚宏壯。自關而東。卽東屯。少陵故居也。碑目云。關城白帝廟碑凡三。其一元和元年。其二長興二年。其三廣政元年。廟有斫殘柏柱。大可十圍。高二丈餘。乃公孫述時樓柱所斫之處。忽生枝而不朽。又有三石筍。王十朋詩云。白帝祠前石筍三。根連醴湏立相參。不知此石能言否。往事應同老柏談。自注云。有二柏甚古也。石筍上行記云。江通濟道。呂珣東玉黃庭堅魯直同來。建中靖國元年三月。○方輿勝覽云。越公堂在瞿唐關城內。隋楊素所建也。杜甫宴越公堂詩。此堂存古制。城上俯江郊。落繡垂雲雨。荒墟蔓草茅。柱穿蜂溜蜜。棧缺燕添巢。坐接春杯氣。心傷豔藥梢。英靈如過隙。宴衍願投繆。莫向東流水。生涯未卽拋。張俞越公堂詩。越公作隋藩。烈烈耀威武。駐馬白帝城。營堂歷巴楚。俯瞰萬里流。徘徊覽千古。鬼工役精魄。梓制銜刀斧。四柯無藥植。

大廈唯柱礎。嶙嶙露節角。犀籥轉檐廡。丹漆久磨滅。風雲尙吞吐。自注云。堂奇構宏敞。內無撐柱。覩視中脊。邈不可度也。○城隅有堂曰三峽堂。宋肇詩云。林巒十里上巉巖。飛檻初憑縹緲間。夔子風煙依白帝。夜郎耕稼接烏蠻。砌橫亂石遙臨澗。門對高峯近帶山。咫尺驚濤吁莫測。每來登此念江關。又云。初尋磴路踏雲煙。漸引茅簷屋數椽。江影動搖波。日日山光隱見峽中天。放懷樽酒憑欄客。回首舫歌趁市船。要與舟人同此樂。移花種竹滿巖前。呂商隱三峽堂行記云。商隱被命赴闕。大卿李先生實帥夔門。作三峽堂。成而未考也。因相率置酒作樂其上。同來者郡僚張悅之。陳子長。員仲文。謝邦彥。堂據峽口。俯瞰洪流。震搖灑瀨。眞爲偉觀。歲淳熙己亥八月二十三日。成都呂商隱周父書。○有杜甫宅。少陵移居夔州郭內。詩。伏枕雲安縣。遷居白帝城。春知催柳別。江與放舡清。農事聞人說。山光見鳥情。禹功饒斷石。且就土微平。又入宅詩云。奔峭背亦甲。斷崖當白巖。客居愧遷次。春酒漸多添。花亞欲移竹。鳥窺新卷簾。衰年不敢根。勝概欲相兼。其二。亂後居難定。春歸客未還。水生魚復浦。雲暖麝香山。半頂梳頭白。過眉拄杖斑。相看多使者。一一問函關。其三。宋玉歸州宅。雲迪白帝城。吾人淹老病。旅食豈才名。峽東風常急。江流氣不平。祇應與兒子。飄轉任浮生。又西閣詩云。西閣百尋餘。中宵步綺疏。飛星過水白。落月動沙虛。擇木知幽鳥。潛波想巨魚。親朋滿天地。兵甲少來書。又西閣雨望詩。樓雨霑雲幔。山寒著水城。徑添沙面出。湍減石稜生。菊葉淒疎放。松林駐遠情。滂沱朱檻溼。萬慮傍簷楹。又夜宿西閣曉呈袁二十一曹長詩。城暗更籌急。樓高雨雪微。稍通綃幕霧。遠帶玉繩稀。門鷓晨光起。橋鳥宿處飛。寒江流甚細。有意待人歸。○輿地紀勝

云城東有東瀼水。公孫述於水濱墾稻田。因號東屯。東屯之田。可得百許頃。稻米爲蜀第一。郡給諸官俸。廩以高下爲差。帥曹月得九斗。故王龜齡詩云。少陵別業古東屯。一飯遺忠畎畝存。我輩月叨官九斗。須知粒粒是君恩。陸務觀高齋記云。少陵居夔。三徙居。皆名高齋。其詩次水門者。白帝城之高齋也。依藥餌者。瀼西之高齋也。見一川者。東屯之高齋也。又云。東屯李氏居已數世。上距少陵。纔三易主。唐大歷初。破券猶在。杜甫從瀼西移居屯東。詩云。白鹽危嶠北。赤甲古城東。平地一川穩。高山四面同。煙霜淒野日。統稻熟天風。人事傷蓬轉。吾將守桂叢。又東屯復瀼西。一種住青溪。來往皆茅屋。淹留爲稻畦。市喧宜近利。林僻此無蹊。若訪衰翁語。須令賸客迷。又道北逢都使。高齋見一川。子能渠細石。吾亦沼清泉。枕帶還相似。柴荆卽有焉。斫畚應費日。解纜不知年。又牢落西江外。參差北戶間。久遊巴子國。臥病楚人山。幽獨移佳景。清深隔遠關。寒空見鷓鴣。回首憶朝班。關着孫遊東屯詩。呼船渡西瀼。策馬行東屯。猶有竹下屋。依然柴作門。林深多鳥雀。山對有猿猿。世隔券猶在。堂非基自存。稼雲迷曠野。屏翠墮層軒。土厚疑吾里。溪清何處源。殖英金有種。飯粒玉爲根。蘆筍戀春渚。蕨芽蕃故園。山名竊諸葛。城傍爲公孫。雲雨峽前夢。琵琶山後村。留人惟野趣。隔市絕塵喧。白巽東屯行云。雨足稻畦新。水滿插秧未。半青短短。馬塵追逐下關頭。北望東屯。轉山坡。一川洗盡峽中想。遠浦疎林分氣象。溝塍漫漫堰源低。灘瀨泠泠石磯響。中田築塲亦有廬。壘飛夏屋何渠渠。李氏之子。今地主。少陵祠堂疑故居。○劉昉東屯祥雲寺行記云。紹興戊申正月。中澣。出郊勸耕。至東屯。因落少陵故居祠堂之成。聞祥雲寺後有瑞石。歸路就往觀之。策杖行山澗亂

石間踰里許。石果異也。事無大小。必先難而後獲。是日自東屯還。過瞿唐已將暮。任賓僚之去留。其屬至者。趙沂詠道。文定國公才。鄧高叔誼。王鼎子新。李驥元駿。家茂秀實。張聿述之。朱齊卿醇甫。李宗臣元慶。楊譽時美。真勝賞也。劉昉方明書。○辛毘曰。夔州百牢關。兵馬不可越。杜甫詩。中巴之東巴東山。江水開關流其間。白帝高爲三峽鎮。夔州險過百牢關。寰宇記云。三鉤鎮在州東三里。鐵鉤斷江山。橫江互張兩岸。造舟爲梁。施戰牀於上。以禦寇焉。鎮居數溪之會。故曰三鉤。唐武德二年廢。碑目云。鑲水記碑字。但紀官名。有都押衙金吾大將軍白元曜等字。後漢書。岑彭攻江關。偏將軍魯奇應募。直衝浮橋。攢柱有反把。鉤奇船不得去。皆殊死戰。因飛炬焚之。始得入關。五代史。後唐張武石照人。仕王建爲破浪都頭。大破高季興於夔。以功陞鎮武軍節度使。武帝作鐵鉤絕江中流。立於柵兩端。謂之鎖峽。宋史。太祖遣曹彬伐蜀。示以地圖。指鎖江曰。我軍泝流至此。慎勿以舟師爭勝。中興小歷云。景定五年。守將徐宗武於白帝城下。巖穴設欄江鎖七條。長二百七十七丈五尺。五千一十股。又有二鐵柱。各六尺四寸。刻徐宗武字。○志云。白帝城東十五里有勝己山。以高出衆山之上也。王十朋命名龜齡。四月二十一日。同連使周丈查丈行香報恩精舍。登佛牙樓。觀勝己山。望江流之險。飯蔬啜茗而還。因作詩云。籃輿拂曉出東關。鐘磬聲聞杳霭間。心欲報君頻入院。人逢勝己更觀山。竹香細細禪房靜。江水渾渾野渡閒。欲問漁人與與廢。黃鸝隔葉語綿蠻。劉儀鳳報恩寺詩序云。寺有唐立夫題字云。本晉鐵佛寺。有像。今徙他處。而碑記無存者。是日寺僧汲相國。泉烹香山茶甚新。因次韻奉呈。安撫待制詩云。晚途無力透空關。佛土維留草數間。決去已。

會盟白水。重游仍欲住青山。阜華詩句羞懷祿。儒帥封章屢乞閒。似我更宜歸計早。雨簑煙艇學漁蠻。碑目以夔州始興寺移鐵像記爲劉禹錫撰矣。唐文若報恩寺行記云。紹興丙子七月。峽中久不雨。秋暑熾盛。已已晦。連夕霪霪。水復大漲。余繫舟壩中。杖策同二子輅。軫來遊。道人定觀迎謁欣然。乃漢中舊識。憩食方丈。登佛牙閣。愛其江山鮮明。草木秀潤。頓失三峽之陋。寺本晉鐵佛院。距今八百禩。屢易而不廢。良有以也。○寺產香山茶。因名香山寺。黃魯直香山寺行記云。太守高仲本率南昌黃魯直。墊江譚處道。同來。遠水喬木。僧房高下。景物清絕。爲夔路第一。建中靖國元年二月庚申。微雨中來。庭壁書。○奉節。巫山之間。有天池。浸可千頃。杜甫天池詩云。天池馬不到。嵐壁鳥纔通。百頃青雲杪。層波白石中。鬱紆騰秀氣。蕭瑟浸寒空。直對巫山出。兼疑夏禹功。魚龍開闢有。菱芡古今同。聞道奔雷黑。初看浴日紅。飄零神女雨。斷續楚王風。欲問支機石。如臨獻寶宮。九秋鷺雁序。萬里狎漁翁。更是無人處。誅勞任薄躬。

# 蜀中名勝記卷之二十一

## 夔州府二

巫山縣

經云江水又東烏飛水注之。注云水出天門郡淩中縣界。北流逕建平郡沙渠縣南。又北流逕巫縣南。西北歷山道三百七十里。注于江。謂之烏飛口。本志云烏飛巖在西南四十里。與燕子坡相對。宋夔守王十朋詩燕子歸期近。吾今亦得歸。烏樓一枝穩。何必更高飛。自注云隔江有烏飛崖也。○經云江水又東逕巫縣故城南。註云縣故楚之巫郡也。秦省郡立縣。以隸南郡。吳孫休分爲建平郡。治巫城。城緣山爲墉。周二十二里。一百一十步。東西北三面皆帶傍深谷。南臨大江。故謂之夔國也。寰宇記云梁武帝廢建平郡。而縣存。隋加山字。縣本夔子熊摯所治。今多熊姓。西北五十步有陽雲臺。高一百二十丈。南枕長江。楚宋玉賦云遊陽雲之臺。望高唐之觀。晉孟康註曰言其高出雲之陽也。本志云陽臺山下有土主廟。其神卽唐張巡將雷萬春。縣之跳石人也。史載令狐潮益兵圍雍丘。巡使郎將雷萬春於城上與潮相問。語未絕。賊弩射之。而中六矢。而不動。潮疑其木人。使謀間之。乃驚遙謂巡曰。向見雷將軍。方知足下軍令矣。○陸游入蜀記云二十四日早抵巫山。縣在峽中。亦壯縣也。隔江南陵山極高大。有路如綫。盤屈至絕頂。謂之一百八盤。蓋施州正路。黃魯直詩云一百八盤擲手上。至今歸夢繞羊腸。又減字木蘭花調云春水茫茫欲

渡南陵更斷腸。今有南陵渡矣。志云：廢南陵縣與陽臺相對。晉置。劉宋廢。基址存。○碑目云：漢鹽鐵盆記。在巫山縣。黃太史石刻云：余弟嗣直來攝邑事。堂下有大鹽盆。有款識。蓋漢時物也。其末曰：永平二年。晉桓溫隸字碑。亦在巫山。嘉定癸未。漕使王觀之。併黃太史跋。俱徙置漕廩。王漕又作跋語。考其文爲晉周撫墓碑。今不存。○入蜀記云：日晚遊楚故離宮。俗謂之細腰宮。有一池。亦當時宮中燕遊之地。今湮沒略盡矣。本志曰：楚宮在女觀山西畔。小山頂三面皆荒山。南望江山奇麗。務觀云：又有將軍墓。東晉人也。一碑在墓後。跌宕入地。碑傾前欲壓。字纔半存。按此豈卽周益州墓耶。○戰國策：蔡靈侯飲茹溪。見莊辛幸。臣論：溪水流入城外五十步。東井志云：東井在北城外。茹溪俗名小溪也。○經云：江水又東。巫溪水注之。註云：溪水道源梁州晉興郡之宣漢縣。東入南逕建平郡泰昌縣南。又逕北井縣西。溪水又南。屈逕巫縣東。縣之東北三百步有聖泉。謂之孔子泉。其水飛清潔。石穴並高。泉下注溪水。溪水又南入于大江。王梅溪集云：縣東半里孔子泉。其旁民居童子亦能書。詩云：巫山亦有泉。可飲仍可祈。泉旁人幾家。聰慧多奇兒。○經云：江水又逕琵琶峽。本志云：琵琶峽下。女子皆善吹笛。嫁時羣女子治具吹笛。唱竹枝詞。送之。梁簡文帝琵琶峽詩：由來歷山川。此地獨迴澶。百嶺相迂蔽。千崖共隱天。橫峯時礙水。斷岸或通川。還瞻已迷向。直去復疑前。夕波照孤月。山枝斂夜烟。此時愁緒密。焚魂逝九遷。○入蜀記云：二十三夜泊清水洞。洞極深。後門自山背出色。懸閣水流其中。鮮能入者。歲旱祈雨。頗應。權知巫山縣左文林郎冉徽之尉右迪功郎文庶。幾來。志云：清溪在縣東十里。○經云：江水又東。逕巫峽。註云：杜宇所鑿。以通江水也。郭仲產云：

按地理志。巫山在縣西南。而今縣東有巫山。將郡縣居治無恆故耶。三峽七百里中。兩岸連山。略無闕處。重巖疊峯。隱天蔽日。自非亭午夜分。不見曦月。至於夏水襄陵。沿沂阻絕。王命急宣。有時朝發白帝。暮到江陵。其間千二百里。雖乘奔御風。不以疾也。春冬之時。則素湍淪淪。迴清倒影。絕巘多生。檉柏懸泉。瀑布飛湫。其間清榮峻茂。良多趣味。每至晴初霜旦。林寒澗肅。常有高猿長嘯。屢引凄異。空谷傳響。哀轉久絕。故漁者歌曰。巴東三峽。峽長猿鳴。三聲淚沾裳。○峽中有十二峯。曰望霞。翠屏。朝雲。松巒。集仙。聚鶴。淨壇。上昇。起雲。栖鳳。登龍。聖泉。其下卽神女廟。范成大吳船錄云。下巫山峽三十五里。至神女廟。廟前灘尤洶怒。十二峯俱在北岸。前後映帶。不能足其數。十二峯皆有名。不甚切。事不足錄。所謂陽臺。高唐觀。人云在來鶴峯上。亦未必是神女之事。據宋玉賦。本以諷襄王。後世不察一切。以兒女褻之。今廟中石刻引塘城記。瑤姬西王母之女。稱雲華夫人。助禹驅神鬼。斬石疏波有功。見紀。今封妙用真人廟。額曰凝真觀。入蜀記云。二十三日過巫山。凝真觀。謁妙用真人祠。真人卽世所謂巫山神女也。祠正對巫山峯巒。上入霄漢。山脚直插江中。讀者謂太華衛廬。皆無此奇。然十二峯者。不可悉見。所見八九峯。惟神女峯最爲纖麗。奇峭。宜爲仙真所託。祝史云。每八月十五夜月明時。有絲竹之音。往來峯頂上。峯頂上猿皆鳴。達旦方漸止。廟後山半有石壇。平曠。傳云。夏禹見神女授符書於此。壇上觀十二峯。宛如屏幃。是日天宇晴霽。四顧無纖翳。惟神女峯上有白雲數片。如鸞鶴翔舞。徘徊久之不散。亦可異也。祠舊有烏數百。送迎客舟。自唐幽州刺史李貽詩已云。羣烏幸昨餘矣。近乾道元年。忽不至。今絕無一鳥。不知其故。○經云。江水歷峽東。



逕新崩灘。註云。此山漢和帝永元十三年崩。晉太元二年又崩。當崩之日。水逆流百餘里。湧起數十丈。今灘上有石。或圓如蕈。或方似屋。若此者甚衆。皆崩崖所損。致怒湍流。故謂之新崩灘。其頽巖所餘。比之諸嶺。尙爲棘桀。吳船錄云。自神女廟二十里至東奔灘。高浪大渦。巨艦掀舞。不當一葉。或爲渦所使。如磨之旋。三者挽招竿。叫呼力爭。以出渦矣。○水經註云。新崩灘下十餘里有大巫山。非唯三峽所無。乃當抗峯岷嶽。偕嶺衡嶷。其翼附翠山。並縈青雲。更就霄漢。辨其優劣耳。神血涂所處。山海經曰。夏后啓之臣曰血涂。是司神於巴。巴人認於血涂之所。其衣有血者。執之。是謂生居山上。郭景純云。在丹山西。丹山在丹陽。屬巴丹山。西卽巫山者也。又帝女居焉。宋玉所謂天帝之季女。名曰瑤姬。未行而亡。封於巫山之臺。精魂爲草。實爲靈芝。所謂巫山之女。高唐之姬。且爲行雲。暮爲行雨。朝朝暮暮。陽臺之下。且早視之。果如其言。故爲立廟。號朝雲焉。其間首尾一百六十里。謂之巫峽。蓋因山爲名也。○金石古文云。巫山峯頂古篆。乃秦時物。邑人向萬云。尙存。集古錄云。神女廟。唐李吉甫詩一首。以貞元十四年刻。邱元素一首。無刻石年。月。李貽孫二首。會昌五年刻。敬齋一首。元和五年刻。沈幼真書。其他皆無書人名氏。可摸搨。○漢樂府。巫山高云。巫山高。高以大。淮水深。難以逝。我欲東歸。害梁不爲。我集無高。曳水何梁。湯湯回回。臨水遠望。泣下沾衣。遠道之人心。思歸。謂之何。齊王融。巫山高云。想像巫山高。薄暮陽臺曲。煙霞乍舒卷。蘅芳自斷續。彼美如可期。寤言紛在囑。慨然坐相思。秋風下庭綠。劉繪云。高唐與巫山。參差鬱相望。灼爍在雲間。氛氳出霞上。散雨收夕臺。行雲卷晨障。出沒不易期。嬋娟以惆悵。梁武帝云。張樂陽臺歌上調。如寢如興。芳曉

巖容光既黯復還沒。復還沒望不來。巫山高。心徘徊。元帝云。巫山高不窮。迴出荆門中。灘聲下澗石。猿鳴上逐風。樹雜山如畫。林暗澗疑空。無因謝神女。一爲出房櫺。簡文帝云。巫山七百里。巴水三迴曲。笛聲下復高。猿啼斷還續。梁沈約云。陽臺氤氳多異色。巫山高。高上無極。雲來雲去常不息。常不息。夢來遊。極萬世。度千秋。虞羲云。南國多奇山。荆巫獨靈異。雲雨麗以佳。陽臺千里思。勿言可再得。特美君王意。高唐一斷絕。光陰不可遲。費昶詩云。巫山光欲晚。陽臺色依依。彼美巖之曲。寧知心是非朝雲。觸石起。暮雨澗羅衣。願解千金佩。請逐大王歸。范雲云。巫山高不極。白日隱光輝。靄靄朝雲去。溟溟暮雨歸。巖懸獸無跡。林暗鳥驚飛。枕席竟誰薦。相望空依依。王泰云。迢遞巫山棟。遠天新霽時。樹交涼去遠。草合影開遲。谷深流響咽。峽近猿聲悲。只言雲雨狀。自有神仙期。陳後主云。巫山巫峽深。峭壁聳春林。風巖朝蕊落。霧嶺晚猿吟。雲來足薦枕。雨過非感琴。仙姬將夜月。度影自浮沈。蕭詮云。巫山映巫峽。高高殊未窮。猿聲不辨處。雨色詎分空。懸巖下桂月。深澗響松風。別有仙雲起。時向楚王宮。隋李孝真云。荆門對巫峽。雲夢遡陽臺。燎火如奔電。墜石似驚雷。天寒秋水急。風靜夜猿哀。枕席無由薦。朝雲徒去來。陵敬云。巫岫鬱迢嶢。高高入紫霄。白雲間抱石。元猿迴挂條。懸崖激巨浪。脆葉殞驚飈。別有陽臺處。風雨共飄飄。唐盧照隣云。巫山望不極。望望下朝氛。莫辨啼猿樹。徒看神女雲。驚濤亂水脈。驟雨暗峯文。沾裳卽此地。況復遠思君。劉方平云。楚國巫山秀。清猿日夜啼。萬重春樹合。十二碧峯齊。峽出朝雲下。江來暮雨西。陽臺歸路直。不畏向家迷。鄭世翼云。巫山凌太清。岩巖類削成。霏霏暮雨合。靄靄朝雲生。危峯入鳥道。深谷瀉猿聲。別有幽栖客。

淹留攀桂情。閣立本云。君不見巫山高。高半天起。絕壁千尋。畫相似。君不見巫山。磴而翠屏開。湘江碧水。遶山來。綠樹春嬌。明月峽。紅花朝覆。白雲臺。臺上朝雲無定所。此中窈窕神仙女。仙女盈盈仙骨飛。清谷出。沒有光輝。欲暮高唐行雨送。今宵定入荆王夢。荆王夢裏愛穠華。枕席初開紅帳遮。可憐欲曉啼猿處。說道巫山是妾家。喬知之云。巫山十二峯。參差互隱見。尋陽幾千里。周覽忽已遍。想像神女姿。摘芳共珍薦。楚雲何逶迤。紅樹日葱蒨。楚雲沒湘源。紅樹斷荆門。郢路不可見。況復夜聞猿。沈佺期云。巫山峯十二。合沓隱昭回。俯眺琵琶峽。平看雲雨臺。古槎天外倚。瀑水日邊來。何忍啼猿夜。荆王枕席開。張九齡云。巫山與天近。煙景常青燐。此中楚王夢。夢得神女靈。神女去已久。白雲空冥冥。唯有巴猿嘯。哀音不可聽。李白云。江行幾千里。海月十五圓。始經瞿塘峽。遂陟巫山巔。巫山高不窮。巴國盡所歷。日邊攀垂蘿。霞外倚危石。飛瀑凌絕頂。極目無纖煙。卻願失丹壑。仰觀臨青天。青天若可捫。銀漢去安在。望雲知蒼梧。記水辨瀛海。周遊孤光晚。歷覽幽意多。積雪照空谷。悲風鳴森柯。歸途行欲曠。佳趣尙未歇。江花早啼猿。松暝已吐月。月色何悠悠。清猿響啾啾。辭山不忍聽。揮策還孤舟。李端云。巫山十二峯。皆在碧虛中。迴合雲藏日。霏微雨帶風。猿聲寒過澗。樹色暮連空。愁向高唐去。清秋見楚宮。張循之云。巫山高不極。合沓奇狀新。暗谷疑風雨。幽崖若鬼神。月明三峽曙。潮滿二江春。爲問陽臺客。應知入夢人。李沈云。沒天心開地。脈浮動。凌霄拂藍碧。襄王端眸望不及。似睹瑤姬長嘆息。巫妝不治獨西望。暗泣紅蕉抱雲帳。君王妒妾夢荆宮。盧把金泥印仙掌。江濤迅激如相助。十二獐龍怒行雨。崑崙謾有通天路。九峯正在天低處。李賀云。巫山

叢碧高插天。巴江翻瀾神曳烟。楚魂尋夢風颺然。晚風飛雨生苔鏡。瑤姬一去一千年。丁香筍竹啼老猿。古祠近月蟾桂寒。椒花墜紅溼雲間。虛象云。高唐幾百里。雲樹接陽臺。晚見江山霽。宵聞風雨來。雷從三峽起。天向數峯開。靈境信難見。輕舟那可回。皇甫冉云。巫山見巴東。迢迢出半空。雲藏神女館。雨到楚王宮。朝暮泉聲落。寒暄樹色同。清猿不可聽。偏在九秋中。戴叔倫云。巫山峨峨高插天。危峯十二凌紫烟。瞿塘嘈嘈急如弦。洄波逆將覆船。雲梯豈可進。百丈那能牽。陸行巉崖水。不前洒淚向流水。淚歸東海邊。含愁對明月。明月空自圓。故鄉回首思綿綿。側身天地心茫然。孟郊云。巴江上峽重復重。陽臺碧削十二峯。荆王獵時逢暮雨。夜臥高邱夢神女。輕紅流烟溼豔姿。行雲飛去明星稀。目極魂斷望不見。猿啼三聲淚滴衣。陳陶云。玉峯青雲十二枝。金母和雲賜瑤姬。花宮磊珂楚宮外。列仙八面星斗垂。秀色無雙怨三峽。春風幾夢襄王獵。青鸞不在懶吹簫。斑竹題詩寄江妾。飄飄散絲巴子天。苔裳玉轡紅霞幃。歸時白帝掩青鎖。瓊枝草草遺湘烟。羅隱云。下壓重泉上千仞。香雲結夢西風緊。縱有精靈得往來。狄軛隨軒亦頗隕。風光淒淒雷隱隱。愁爲衣裳恨爲鬢。暮酒朝行何所之。江邊日月情無盡。珠零冷落丹墮楓。細腰長臉愁滿宮。人生對面猶異同。沉在千巖萬壑中。宋蘇軾云。瞿塘迤邐盡。巫峽崢嶸起。連峯稍可怪。石色變蒼翠。天工運神巧。漸欲作奇偉。塊扎勢方深。結構意未遂。旁觀不暇瞬。步步造幽邃。蒼崖忽相逼。絕壁凜可掣。仰觀八九頂。俊爽凌顛氣。晃蕩天宇高。崩騰江水沸。孤超死不讓。直拔勇無異。攀緣見神宇。憩坐就石位。巉巖隔江波。一一問廟吏。遙觀神女容。綽約誠有以。俯首見斜髮。拖霞弄修蛾。人心隨物變。遠覺含深

忌野老笑吾傍。少年嘗屢至。去隨猿獠上。反以繩索試。石筍倚孤峯。突兀殊不類。世人喜神怪。論說驚幼稚。楚賦亦虛傳。神女安有是。次問掃壇竹。云此今尙爾。枝葉紛下垂。婆娑綠鳳尾。風來自偃仰。若爲神女使。絕頂有三碑。詰曲古篆字。老人那解讀。偶見不能記。窮探到峯背。探斫黃楊子。黃楊生石上。堅瘦紋如綺。貪心去不顧。澗谷千尋絕。山高狼虎絕。深入坦無忌。洪濛草樹密。蔥蒨雲霞膩。石竇有洪泉。甘滑如流髓。終朝自盥漱。冷冽清心胃。洗衣掛樹梢。磨斧就石鼻。徘徊雲日晚。歸意念城市。不到今年。衰老筋力憊。當時伐殘木。牙檠已如臂。忽聞老人說。終日爲嘆喟。神仙固有之。難在忘勢利。貧賤爾何愛。棄去如脫屣。嗟爾若無還。絕纜應不死。王安石云。巫山高十二峯。上有往來飄忽之猿狖。下有出沒淺濶之蛟龍。中有倚薄縹緲之神宮。神人處子冰雪容。呼風吸露虛無中。千歲寂寞無人逢。邂逅乃與襄王通。丹巖碧嶂深重重。白月如日明房櫺。象牀玉几金芙蓉。陽臺美人多楚語。只有纖腰能楚舞。爭吹鳳管鳴鼉鼓。那知襄王夢裏事。但見朝朝暮暮長雲雨。范成大云。淫雲不收烟雨霏。峽船作灘梢廟碓。杜鵑無聲猿叫斷。惟有飢鴉迎客飛。西真功高佐禹跡。斧鑿鱗皴倚天壁。上有瑤簪十二尖。下有黃湍三百尺。蔓花蚪木風烟昏。薜璫翠微香火寒。靈游飄忽定何許。時有行人開廟門。楚客詞章元是諷。紛紛餘子空嘲弄。玉色頰顏不可干。人間錯說高唐夢。○唐王無兢巫山神女廟詩。神女向高唐。巫山下夕陽。徘徊作雲雨。婉孌逐荆王。電影江前落。雷聲峽外長。霧雲無處所。臺館晚蒼蒼。劉希夷云。巫山幽陰地。神女豔陽年。襄王伺容色。落日望悠然。歸來高唐夜。金缸焰青烟。頽想臥瑤席。夢魂何翩翩。搖落殊未已。榮華倏徂遷。愁思瀟湘浦。

悲涼雲夢田。猿啼秋風夜。雁飛明月天。巴歌不可聽。聽此益潺湲。張九齡云。庭樹日衰颯。風霜未云已。鴛  
言遣憂思。乘興求相似。楚國故故都。蘭臺有餘址。傳聞襄王世。仍立巫山祀。方此全盛時。豈無嬋娟子。色  
荒神女至。魂蕩宮觀啓。蔓草今如積。朝雲爲誰起。崔塗云。雙黛儼如嘯。應傷故園春。江山非舊主。雲雨是  
前身。夢覺傳詞客。靈猶福楚人。不知千載後。何處又爲神。溫庭筠云。黯黯閉宮殿。森森蔭薜蘿。曉峯眉上  
色。春水臉前波。古樹芳菲盡。扁舟離恨多。一叢斑竹夜。環珮響如何。張子容云。巫嶺召曉天。際重佳期宿  
昔願相從。朝雲暮雨連天暗。神女知來第幾峯。李羣玉云。寂寞高唐別楚君。玉人天上逐行雲。停舟十二  
峯巒下。幽佩仙香半夜聞。又云。廟閉春山曉月光。波聲四合樹蒼蒼。自從一別襄王夢。雲雨空飛巫峽長。  
王周云。廟前溪流潺湲。廟中修竹聲珊珊。襄王一夢杳難問。晚晴天氣歸雲閑。李商隱云。巫峽迢迢舊  
楚宮。至今雲雨暗丹楓。浮生盡戀人間樂。只有襄王憶夢中。又云。非關宋玉有微詞。自是襄王夢覺遲。一  
自高唐賦成後。楚天雲雨盡堪疑。胡曾云。楚國城池颯已空。陽臺雲雨過無蹤。何人更有襄王夢。寂寂巫  
山十二市。劉禹錫云。巫山十二鬱蒼蒼。片石亭亭號女郎。曉霧乍開疑卷幔。山花欲謝似殘妝。星河好夜  
聞清珮。雲雨歸時帶異香。何事神仙九天上。人間來就楚襄王。曹松云。巫山蒼翠夾通津。下有仙宮楚女  
眞。不逐綵雲歸碧落。卻爲暮雨撲行人。年年舊事音容在。日日誰家夢想頻。應是荆王留不住。至今猶得  
視芳塵。劉滄云。十二峯嵐挂夕暉。廟門深閉霧烟微。天高木落楚人思。山迴月殘神女歸。觸石晴雲凝翠  
鬢。渡江寒雨溼羅衣。嬋娟似恨襄王夢。猿叫斷巖秋籬稀。韋莊云。亂猿啼處訪高唐。路人烟霞草木香。山

色未飽忘宋玉。水聲猶似哭襄王。朝朝暮暮陽臺下。爲雨爲雲楚國亡。惆悵廟前無限柳。春江空鬪畫眉長。宋蘇軾云。大江從西來。上有千仞山。江山自環擁。恢詭富神姦。深淵鼉鼉橫。巨壑蛇龍頑。旌陽斬長蛟。雷雨移蒼灣。蜀守降老蹇。至今帶連環。縱橫若無主。蕩逸侵人寰。上帝降瑤姬。來處荆巫間。神容豈在猛。玉座幽且閒。飄簫駕風馭。弭節朝天關。倏忽巡四方。不知道里艱。古妝具法服。遶殿羅烟鬢。百神自奔走。雜沓來趨班。雲興靈怪聚。雲散鬼神還。茫茫夜潭靜。皎皎秋月彎。還應搖玉珮。來聽水潺潺。蘇轍云。山中廟堂古神女。楚巫婆娑歌舞。空山日落悲風吹。舉手睢盱道神語。神仙潔清非世人。瓦盎傾膠薦麤臚。子知神君竟何自。西方真人古王母。飄然乘風遊九州。竭渡西海薄中土。白雲爲車駕蒼虬。驂乘湘君虛妃御。天孫織綉素非素。衣裳飄飄薄烟霧。泊然沖虛自無營。朝飡屑玉嚙瓊乳。下視人世安可據。超江乘山去。無所巫山之下。江流清偶然愛之不能去。滯岸激作聲喧。白花翻翻龍正怒。堯使大禹導九川。石隕山墜幾折股。山前恐懼久無措。稽首山下苦求助。丹書玉笈世莫窺。指示文字相爾汝。壁山洩江幸無苦。庚辰虞余實相禹。功成事定世莫知。空山俄頃千萬古。廟中擊鼓吹長簫。採蘭爲殮蕙爲肴。玉缶薦羞香飄蕭。龍勺取酒注白茅。神來享之風飄飄。荒山長江何所有。豈有瓊玉薦次寥。神君聰明無我責。爲我驅獸攘龍蛟。乘船入楚沂巴蜀。潰澁深惡秋水高。歸來無恙無以報。山上麥熟可作饍。神君尊貴豈待我。再拜長跪神所多。范成大云。疑真宮前十二峯。兩峯娟妙翠插空。餘峯競秀尙多有。白壁蒼崖無數重。秋江漱石半山腹。倚天削鐵荒行蹤。造化鍾奇盪瑤巖。眞靈擇勝深珠宮。朝雲未罷暮雲起。陰晴竟日長溟

涼。瑤姬作意送歸客。一夜收潦乃回風。仰看館御飛轍過。回首已在虛無中。惟餘烏鴉作使者。迎船送船西復東。吳宗旦云。長江出蜀初入荆。巫山十二開翠屏。雲華夫人王母女。東朝海若窺滄溟。金銀宮闕照水府。瓊壁瑤檻伴帝庭。江靈河伯隨班立。龍女仙娥傍葦迎。眼看日卿出陽谷。身乘氣躡返金城。玉樓一似巫峯起。鸞輪略爲巫峯停。鴻濤沃天帝愛顧。重瞳殛鯀禹嗣興。悲風撼石從空落。蒼崖自裂無人擊。水工叫嘯愁白日。孤臣涕泣哀空山。兩山攢束一遇聖。心驚目駭遙乞靈。傳呼侍女詔侍從。指授神策驅神兵。黃魔披髮導狂騷。童律掉舌同虞庚。朝雲暮雨滿空碧。飛鶴游龍翔太清。卻疑魍魎逞妖怪。披文寶鼎防依憑。律前面對鬼神問。禹乃悟見虛空形。昔師三元授素書。今領元教居玉瑛。實號雲華上宮主。亦是西華少陰精。在入爲人人莫識。在物爲物物莫名。了知真仙次於聖。力披憫款祈扣肩。樓臺縹緲巖臺上。觀闕截翼飛瑤瓊。抱關師子虬綵髮。啓途天馬垂朱纓。靈官仙童澹容與。毒龍猛獸光晶瑩。瑤臺燕坐凝玉質。龍姿拂地傳真經。汝功汝能幸及物。曰希曰夷猶未聆。欲超大海鷗爲馭。欲度飛沙雲作駟。沙高無軌路。將絕海闊無馭空難騰。寶書吾來自寥廓。伏讀汝可叱幽冥。出入水火縛虎豹。倒插五星呼六丁。回眸笑指丹玉笈。素手捧出容華綾。水行乘舟山乘裸。巨石自壁川自平。龍蟠蛇結除毒螫。巢穿穴壘蘇黎蒸。山形半破餘斧迹。鬼工斲鑿非人程。元圭帝錫彰水德。真人號位居紫庭。重瞳薦天付大寶。上日若帝仍百齡。藤蘿歲長蔭古廟。梅梁晝飛塵鐵繩。峽洞萬里跨江漢。血食千秋如弟兄。遂封真人行極妙。遠配夏后功相仍。云何肯入楚王夢。作賦翻令宋玉矜。廣寒翠妃月色瑩。藐姑處子雪肌輕。月關嬋娟窺繡戶。



雪呈體態入疎櫺。身行天上渺無迹。夢到人間容有情。前賢樞實言語妙。今我復以歌詩鳴。晴嵐空翠不改色。迴流稽水長相縈。翦刀翳雲向空住。掃竹掃葉隨風零。仙人峩冠上玉砌。仙女舉帔搖金鈴。衆峯巖張浮翠葆。國手圖畫傳丹青。數從黃冠拜行殿。甫逐祝史祠郊坰。當街文石白珞珞。入門青蓋高亭亭。元臣授策功照耀。小儒學道心稱誠。願聞祕訣換凡骨。逕參律輩騎長鯨。唐相云。楚澤隱巫山。翠壁開鴻濛。萬流束長峽。怒浪日簸春。朝暉濟高唐。巖阿闔彤宮。罽散烟霞榮。光繞長虹。恭聞雲華君。少陰體冲融。受道紫清闕。飛化凌三空。徜徉江海。上。千騎馳蒼龍。羽節回天津。中央弭層臺。悽惻下土人。昏墊無所容。寶書授神禹。百靈倏奔從。蛟螭委鞭策。山川奠西東。九州免爲魚。遂成萬世功。嗟余晚聞道。蓬心蔽倥侗。維舟垂崖邊。再拜望遺蹤。麟岫山頭石。雲衣尙溶溶。縹緲玉瑛臺。如在指顧中。童律不可問。至言誰擊蒙。仰首天壇下。松檜回悲風。宋德之云。靈均媒處妃。喻意非法語。粵若古高辛。先禽委娥女。兩美冀必合。參差曾成阻。女生願有家。士仕期致主。德協斯服從。禮失那得取。弟子頗自異。昔契今齟齬。依然慚讒嫉。正爾困狎侮。逸探姑射機。轉弄離騷杼。冥心古先后。矯志雲外侶。上述懷世知。潔身幸親附。中言天淵互。廣遠萬物祖。矧茲德不逮。開聖足自輔。進犧來羨門。禱室界公聚。太一禮旣接。神人儻相遇。卒之志莫原。賴怒辭稱避。顛倒失所依。闇瞶不知處。忠賢代所昧。妙麗衆目覩。微辭屏王惑。說夢癡人誤。高真秉元化。昏墊閔下土。平成啓文命。臨降枉飛馭。在楚俗則然。恃秦良自喻。陳思懷抑鬱。敏識殆天付。感此致意深。濟洛獨擬賦。處妃泊重出。鑿枕猶妄語。騷詞信非經。傳者無寡趣。真游結習盡。體道棲純素。亟除魔魅想。毋

重龍鬼怒共罄拯民心。塗人可爲禹。范子長云。峽山多奇峯。擢秀推二六。雲谷盪天宇。岡脈蟠地軸。晨暾照粉黛。宿雨留膏沐。岷江寄徑外。一帶幾鑿曲。巖隈著叢祠。瑤席蔭嘉木。古初奉帝命。福地任司牧。疏鑿佐夏后。鬼神受要束。洪流建滄海。明德被金蜀。陋哉兒女見。幽獨在空谷。甚者雕蟲人。綺語誑流俗。女媧補天手。相望繼高躅。難以形色求。剗乃夢寐瀆。九章述明祀。千載起祇肅。若爲女岐事。天問綴篇牘。靈均尙好奇。何怪門人玉。杖藜款祠宮。采芹薦清馥。斐章固無取。聊以諗巫祝。何麒云。丹師告我巫山下。不見圖經聞古語。廟嘶白馬舞黔烏。壁掛朱猿穴蒼鼠。可憐巫子分毛鬣。豈有神仙飽葦茹。我然沈水薦寒泉。作送迎章沐雲雨。又云。玉虬旖旎懷全楚。羽帳淋漓笑神女。去去來來刺史詩。朝朝暮暮尚唐雨。塵埋薛濱塘城錄。斷石斑爛讀空廡。蕭然生敬攝邪心。云是瑤姬曾佐禹。冉居常云。朝雲夕雨自虛無。玉笈親昏塾初。夏后已通三峽水。巴人誰省九天霄。烟巒杳杳藏旌仗。江月沈沈想佩褱。千古文章愁宋玉。可無一字及其魚。○吳世延十二峯詩望霞峯云。披圖占勝謁雲華。初見靈峯冠綵霞。拂拭塵容開眼膜。舟人指點到仙家。翠屏峯云。四合藤蘿羽葆垂。遠烟蒙覆畫屏圍。青冥向上疑神望。似叩天關第二扉。朝雲峯云。清晨縹緲結層陰。掩映眞靈洞府深。不是名書丹玉笈。上清宮闕若相尋。松巒峯云。無名草木易凋零。獨立盤雲偃蓋青。任是雪霜深蔽翳。也應根柢有精靈。渠仙峯云。左鄰白帝右紅崖。中有瑤池阿母家。笑飲蟠桃丹樹下。一杯時與醉流霞。聚鶴峯云。方憐病羽困樊籠。仰見胎禽睽遠空。明月不知緱嶺夜。一聲聲入白雲中。淨壇峯云。巍巍盤石拔天成。拂拂脩篁助潔清。一息齋宮渾不寐。九霄聞徹步虛聲。上昇峯

云。蓬萊方丈閻滄溟。高揖松喬此得朋。白日青天殊不遠。瑤臺玉闕一層層。起雲峯云。油然膚寸起叢霄。變化須臾雨沆寥。舒卷無心神莫測。去來誰謂帝鄉遙。棲鳳峯云。碧梧脩竹翠微間。刷羽朝陽不可攀。寄跡雲林飛有處。會異阿閣邇天顏。登龍峯云。三分泉下九淵深。直上青螺碧玉林。怪得風雲長底護。有時飛作旱天霖。聖泉峯云。白厓一注瀉青雲。練帶縈迴玉溜奔。飀毒宴安人不覺。誰知此物養靈根。袁說友巫山十二峯云。平生磊塊山林姿。一邱一壑貪成癡。寸峯卷石嘗眼過。張皇攫覓惟憂遲。東南佳山多秀麗。就中所欠雄與奇。飽聞巫山冠巴峽。奇峯十二相參差。昔年圖畫嘗一見。欲見此山無路之。扁舟西泝上三峽。千巖萬壑爭追隨。終朝應接已不暇。心目洞駭俱忘疲。轟然鉦鼓高唐上。峯巒二六排旌旗。一峯霞綵烟在望。一峯展翠開屏帷。無心出岫雲吐色。偃蓋平巒松並枝。僊蹤鶴駕羽衣近。壇石瑤臺閭闔低。白雲一起鳳凰下。清泉四合蛟龍嬉。羣峯角立變態異。一一大巧乾坤爲。外堪擊拊試聲律。中含造化分四時。天下名山亦多矣。未有列岫奇如茲。閻伯敏十二峯詩。望霞峯云。東皇君來流曉霞。暮看西北王母家。雲華夫人王母女。肯爲廟食留三巴。翠屏峯云。秋山黃落春山青。不識仙家雲錦屏。六銖天衣下拂石。香風馥郁朝眞亭。朝雲峯云。山頭行雲自朝朝。陽臺暮色連雲霄。朝來暮去變雲雨。送老行客無回棹。松巒峯云。舟船搖搖大巫前。松間羅絲望纒綿。屏風角轉恰巾背。心在山頭人倚船。集仙峯云。綠蓑鞋繫青行纜。東嶺緇火開山田。雲間仰聽山佩響。蕊鬢拂掠燒畚烟。聚鶴峯云。望夫子女春復秋。巴歌楚舞隨遊頭。夜深九泉清唳響。仙禽亦替離人愁。淨壇峯云。山頭枝枝竹掃壇。舟子竹枝歌上灘。炷香上廟擲杯琰。

但乞如願舟平安。上昇峯云。黃麕白馬功告成。雲華夫人朝玉京。禹王夏后引音節。高低峽船搖櫓聲。起雲峯云。斂頭嫋娜山花枝。紺尾舊纈山麻衣。朝隨雲起采薪去。暮趁女伴穿雲歸。棲鳳峯云。山頭鳳鳴來。其鳳山前家家背鳳筐。竹花結實未忍食。刀耕火種五里香。登龍峯云。散而成章合爲龍。回風混合游鴻濛。舟人上下神女供。俗妝鉛粉騰脂紅。聖泉峯云。靈源一派瑤池分。灑落掉石隨東奔。楚人但愛香溪水。溪邊爲有昭君村。元趙孟頫十二峯詞。壘障千重碧。長江一帶清。瑤臺霞冷月朧明。欹枕若爲情。雲過船窗曉星移。宿霧晴。古今離恨撥難平。惆悵峽猿聲。右淨壇峯。片月生危岫。殘霞拂翠桐。登龍峯下楚王宮。千古感遺蹤。柳色眉邊綠。花明臉上紅。欲尋靈跡阻江風。離思杳無窮。右登龍峯。松鶴堆嵐講。陽臺枕水湄。風清月冷好花時。惆悵阻佳期。別夢遊蝴蝶。離歌怨竹枝。悠悠往事不勝悲。春恨入雙眉。右松鶴峯。雲裏高唐觀。江邊楚客舟。上昇峯月照。妝鏡離思兩悠悠。雲雨千重阻。長江一帶秋。歌聲頻唱引。離愁光景恨如流。右上昇峯。絕頂朝雲散。寒江暮雨頻。楚王宮殿已成塵。過客轉傷神。月是巫娥伴。花爲宋玉隣。一聽歌調一含嚔。哀怨竹枝春。右朝雲峯。雨過蘋汀遠。雲深水國遙。渡頭齊舉木蘭橈。織殺楚宮腰。映水勻紅臉。假花整翠翹。行人倚棹正無聊。一望一魂銷。右集仙峯。碧水鴛鴦浴。平沙荳蔻紅。望霞峯翠一重重。帆卸落花風。澹薄雲籠月。霏微雨灑篷。孤舟晚泊浪雲中。無處問音容。右望霞峯。芍藥虛投贈。丁香漫結愁。鳳棲愁去兩悠悠。新恨怯逢秋。山色驚心碧。江聲入夢流。何時絃管簇。歸舟蘭棹泊沙頭。右棲鳳峯。碧水澄青黛。危峯聳翠屏。竹枝歌怨月三更。別是斷腸聲。烟外黃牛峽。雲邊白帝城。扁舟清夜泊蘋汀。倚棹

不勝情。右翠屏峯。鶴信三山遠。羅裙片水深。高唐春夢杳。難尋惆悵至今。十二峯前月。三千里外心。紅  
巖錦字信。洗洗腸斷舊香衾。右聚鶴峯。曉色飄紅豆。平沙枕碧流。泉聲雲影弄新秋。觸處是離愁。臉淚橫  
波淡。眉撥片月收。佳人無笑口。難休。來整玉搔頭。右聖泉峯。曼娜江邊柳。飄飄嶺上雲。卸帆迴棹楚江濱。  
歸信夜來聞。欲拂珊瑚枕。先熏翡翠箔。江頭含笑去。迎君鸞鳳畫成羣。右起雲峯。○隋崔仲方夜宿巫山  
詩。荆門秋水急。巫峽斷雲輕。若爲教月夜。長短聽猿聲。楊炯過巫峽詩。三峽七百里。唯言巫峽長。重巖宵  
不極。疊障凌蒼蒼。絕壁橫天險。莓苔爛錦章。入夜分明見。無風波浪狂。又云。忠信吾所蹈。泛舟亦何傷。可  
以涉砥柱。可以浮呂梁。美人今何在。靈芝徒有芳。山空夜猿嘯。征客淚沾裳。洗怪期十三。四時嘗過巫峽。  
他日偶然有思。作小度巫山峽。荆南春欲分。使君灘上草。神女廟前雲。樹悉江中見。猿多天外聞。別來如  
夢裏。一想一氛氳。崔灝寄盧八象云。客從巴水渡。傳爾泝行舟。是日風波霽。高唐雨半收。青山滿蜀道。綠  
水向荊州。不作書相問。誰能慰別愁。李白宿巫山下云。昨夜巫山下。猿聲夢裏長。桃花飛綠水。三月下瞿  
唐。雨色風吹去。南行拂楚王。高邱懷宋玉。訪古一沾裳。岑參下峽舟懷終南舊居云。杉冷曉猿悲。楚客心  
欲絕。孤舟巴山雨。萬里陽臺月。水宿已淹時。蘆花白如雪。顏容老難顏。把鏡悲鬢髮。早年好金丹。方士傳  
口訣。敝廬終南下。久與真侶別。道書誰更開。藥竈烟遂滅。頃來厭塵網。安得有仙骨。巖壑歸去來。公卿是  
何物。皎然宿巴峽云。江聲五千里。瀉碧急於絃。不覺日又夜。爭教人少年。一汀巫峽月。兩岸子規天。山影  
似相伴。浪遙到曉船。李頻過巫峽云。櫓棹向驚湍。巫峯直上看。削成從水底。聳出在雲端。暮雨晴時少。啼

猿渴下難。一聞神女去。風竹掃空壇。崔塗巫山旅別云。五千里外三年客。十二峯前一望秋。無限別魂歸不得。夕陽西下水東流。盧綸巫山竹枝云。十二峯頭月欲低。空舂灘上子規啼。孤舟一夜東歸客。泣向春風憶建谿。徐凝荆巫夢思云。楚水白波風嫋嫋。荆門暮色雨瀟瀟。相思合眼夢何處。十二峯高巴字遙。陸龜蒙過巫峽云。巫峽七百里。巫山十二重。年年自雲雨。環珮竟誰逢。蘇軾出峽云。入峽喜巉巖。出峽愛平曠。吾心淡無累。遇境即安暢。東西徑千里。勝處頗屢訪。幽尋遠無厭。高絕每先上。前詩尙遺略。不錄久恐忘。憶從巫廟回。中路寒泉漲。汲歸真可愛。翠碧光滿盎。忽驚巫峽尾。巖腹有穿壙。仰見天蒼蒼。石室開南嚮。宣尼古廟宇。叢木作幃帳。鐵楯橫半空。俯瞰不計丈。古人誰架構。下有不測浪。石竇見天困。瓦棺悲古葬。新灘阻風雪。村落去攜杖。亦到龍馬溪。荊屋沾村釀。玉虛悔不至。實爲舟人誑。聞道石最奇。寤寐見怪狀。峽山富奇偉。得一知幾喪。苦恨不知名。歷歷但想像。今朝脫重險。楚水渺平蕩。魚多客庖足。風順行意王。追思偶成篇。聊助舟人唱。鄧諫從題巫山瞻華亭云。峻嶒玉削三千丈。翠潑嵐光冷相向。風含太古雲氣長。變化溟濛紛萬象。陰晴一日具四時。天籟壑深虛自響。神山娟妙擢羣參。錦繡鋪張獻奇狀。蟠根積鐵隴百川。龍矯蛟鬪饒跌宕。勢連三楚此開國。故壘荒宮帶溪瀆。樓臺井邑老風烟。環珮清聞駐仙仗。竹林風味便讀易。久與江山爲輩行。鳴絃餘暇豁心眼。戲著飛欄雲雨上。爽明自可達蕤蔽。野篔又何勞草創。政和民氣長似春。景迴心平過於掌。征鴻明滅志何杳。黃鶴追隨意尤放。當年李杜經行處。太史銀鈿刻青嶂。寶刀珠瑟出耕犁。曲水纒腰迷草莽。卒盈古隸雜秦篆。飛動閑辜永平樣。珊瑚交柯炯不蝕。髣髴

將軍勳業壯。英雄繁盛隨流水。時有竹枝賡牧唱。孔泉文物起騷經。國色明妃守孤尚。我家峨帽紫翠間。  
爲愛奇峯甘蒟醬。秋風野水憶絲葦。環汰夷猶理烟榜。李埴離巫山晚泊棹石灘下云。黃昏風雨阻江濱。  
翠館羣峯暮色勻。一夜子規啼到曉。孤舟愁殺未歸人。

蜀中名勝記卷之二十三

夔州府三

達州

州以元微之左遷司馬著名。方輿勝覽有勝江亭在州西三里。乃郡守王蕃讀白樂天寄微之詩云。達州猶似勝江州。因以名亭也。長慶集微之到通州日授館未安。塵壁間有數行字。乃是僕十五年前初及第時贈長安妓阿軟絕句。緬思往事杳若夢。中懷舊感今因詡。長句呈白居易詩云。十五年前似夢遊。曾將詩句結風流。昔教紅袖佳人唱。今遣青衫司馬愁。又見樂天詩云。通州到日日平西。江館無人虎印泥。忽向破簷殘漏處。見君詩在柱心題。其間酬唱甚多。未可殫述。○當時有李景信者自長安來訪。周旋少日而別焉。微之有李十一景信到詩云。何事相逢翻有淚。念君緣我到通州。留君曠住君須住。我不自由君自由。又有丁溪館別景信詩云。京城每與閑人別。猶自傷心欲白頭。今日別君心更苦。別君緣是在通州。○陳昇翠玉軒序。通川之境。東瀉巴渠。西峙鐵嶺。南對夏雲。北望鳳山。寰宇記云。巴渠江在石鼓縣南四十步。流入通州界。江中有南昌灘。元微之南昌灘詩云。渠江明淨峽逶迤。船到名灘拽筴遲。櫓竄動搖妨作夢。巴童指點笑吟詩。審餘宿麥黃山腹。日背殘花白水湄。物色可憐心莫恨。此行都是獨行時。○志云。鐵山在州西二十里。石色如鐵。上有獅子石。和尚巖諸勝。蓋迢遞白石城來者。山四面絕崖。西有一路登



頂寰宇記云。後魏廢帝二年。開拓山南。改宣漢爲石城。從山名也。○輿地紀勝去翠屏山橫列州南。元徽之建夏雲亭其上。山北又有流水寺。巨石刻成殿形。餘址蕪沒。惟佛像屹立江邊。○寰宇記云。鳳凰山在通川縣北五里。山形鳳翅。掩映州城。有梧桐坪。寶芝洞。諸勝。洞中石乳成峯。玲瓏如刻鏤。又有砥石縱橫丈餘。鑿爲曲道。可以流觴。志云。鳳山有呂公聖。相傳呂純陽幻形乞食。寺僧知而蹤跡之。逐雲影冉冉逝矣。○輿地碑曰。漢車騎將軍馮緄碑在永陸縣之西八十里。緄薨於桓帝之永康元年。文尙瞭然可讀。其父煥亦有兩碑。斷裂不全。僅存大概。又云。有漢廣漢蜀國侯李翊及蜀國侯夫人墓銘。翊以靈帝熹平二年卒。夫人不著姓氏。疑其爲臧字。首尾亦不刊缺。又云。書字巖碑。在巴渠縣西十里。多斷缺。不成文理。間存晉昌太守。字按晉。孝武方立晉昌郡。則此必東晉以後人碑耳。又云。唐處士墓碑在州城北十五里。楊斗壩馬腦鼻山下。乃唐景龍二年刻。字畫適媚如歐柳。可愛。又云。元稹告奮三陽神文。元和志載在通川縣之華陽觀。又云。廣福院修福殿記在永陸縣。卽唐禪田寺。有會昌三年王欽說修福殿記。又云。瀘潭院鐵佛記在通川縣東富教里岸側石上。乃唐人所鑄。傍有中和造像人姓名百餘。字多漫滅。又有黃山谷贈通川令韓廣叔碑文。廣叔赴通川日。魯直以言贈之曰。惟勤能辦公家。惟清能律貪吏。嚴而信。則吏不病民。簡而敏。則民多在野。又有趙節婦碑。節婦姓趙氏。養居。有兇人欲犯之。脅以白刃。節婦不爲動。旣而誘以百端。終不可。遂刺殺之。時皇祐二年。知州薛休懋其節爲之立碑於達州之西北山上。後邑令薛仲侃。叔祠繪像於中。

東鄉縣

治南有石鼓橫江上。爲石鼓鎮。楚春申君之花果園也。寰宇記云。唐析石鼓縣之西鄉地。在東關水北五十步。置巴渠縣。紀勝云。舊巴渠縣。後鹿子山。漢樊噲嘗屯兵于此。四夷述云。唐武德中。移東鄉縣治於今縣東一里安養故城。○寰宇記云。萬戶溪在巴渠縣東八十里。自開州萬壽縣界。北流來合縣。溉江水。又有成熱溪。亦自開州萬壽縣來合。文字溪。紀勝云。西北四十里。崖壁間懸二石。左類日。右類月。月中空隙有娑羅樹一株。

太平縣

舊明通縣地也。勝覽云。丙穴在明通縣井峽中。其穴凡十。其中皆產嘉魚。春社之前。魚卽出穴。秋社旋歸。其出也。止于巴渠龍脊灘。首有黑點。謂照映星象相感而成。長身細鱗。肉白如玉。其味自鹹。蓋食鹽泉也。○紀勝云。太平東七里有龍潭。羣峯環拱。凡七十二。浦會合。凡四十八。渚而匯。爲潭。廣餘百畝。其深叵測。實爲龍窟。又云。東北八十里。萬頃池。是春申君故居。旁有平田萬頃。鄰邑諸水源皆出于此。

新甯縣

寰宇記云。故新甯城在縣西北十里。後魏恭帝二年於此立縣。隋開皇三年廢。唐武德二年又置。後遷於賓城。通志云。宋更爲三岡縣。至道中。移治於新安市。元至元初復稱新甯矣。○紀勝云。新甯南十里有黃茅嶺。卽古詩所稱猿聲時下斷。月色好看看也。

梁山縣

邑名高粱。又曰都梁。皆因山也。寰宇記云。高粱大山在縣北四十里。尋江源記云。高梁山東尾跨江。西首劍閣。東西數千里。山嶺長峻。其巖崔嵬。於蜀市望之。若長雲垂天。一日行之。乃極其頂。俯視衆山。泯若平原。劍閣銘所謂巖巖梁山。積石峨峨者也。張文琮蜀道難詩。梁山鎮地險。積石阻雲端矣。輿地紀勝云。都梁又名高都。在縣治北十五里。舊有高都驛。乃天寶進荔枝之路也。山壤腴而黃。其民多業種薑。○寰宇記云。本漢胸臆地也。後魏廢帝分胸臆置魚泉縣。今縣卽魚泉縣。地以丙穴嘉魚爲名。尋江源記云。丙穴有嘉魚。其味甚美。水出柏枝山。在縣東南十五里是也。方輿勝覽云。五代僞蜀在今軍治置務曰石氏屯田務。宋開寶初。土豪石處質納庄田八所。遂廢田務移縣於此。因陞爲軍。劉煥題名序。稻田蕃廩。常多豐年矣。○紀勝云。垂霞樓在子城之北。左瞰萬石。右倚東山。景物奇麗。峽中未有。又有瑞豐亭。陸務觀詩。峽中地偏常苦貧。政令愈簡民愈淳。本來無事只畏擾。擾者才吏非庸人。都梁之人猶無苦。須晴得晴雨得雨。父老羅拜豐年賜。縱產芝房非上瑞。○勝覽云。峯門山在軍東十五里。其山高。大頂有寒泉。兩岸對峙如門也。○又云。蟠龍山在城東二十里。孤峙秀傑。突出衆山之上。下有二洞。洞有二石。龍狀。首尾相蟠。故名。旁曰噴霧巖。洞中之泉下注。垂崖約二百餘丈。噴薄如霧。張無盡留題云。水味甘腴。偏宜煮茗。非陸羽莫能辨。范石湖以爲天下瀑布第一。有飛練亭。與之相對。舊取徐凝詩句。東坡以爲惡。乃易名飛雪亭。取歐陽公所稱六月飛雪灑石缸矣。魏了翁飛雪亭詩云。自荆入蜀路險絕。黑猿聲中膽欲折。萬州江頭舍

舟楫。又趨擔簦窮岷嶽。危磴連雲如積鐵。亂石屹足十九跌。僕夫流汗馬止舌。遙望蟠龍掛天脇。懸瀑落巖噴霏屑。中間有亭曰飛雪。十里陰風寒入髮。人言此地無六月。呼取大斗酌甘潔。一飲令君消內熱。予以壬子歲再過此。作詩云。春水三年別。寒聲十里聞。鶯花流出洞。樹石掛成文。有意同高潔。無心作使君。前車行度險。予且坐斜曛。按蟠龍洞古碑云。張卞爲蜀將。先主攻固陵。諫不聽。乃入山修眞。遇樵叟。自稱鷓夷人。授之丹訣。得道矣。○碑目又云。舊梁山驛碑。在軍東四十里。蒼舊相傳。李唐時有白虎蛟龍爲民害。民至遷居以避。韓昌黎嘗按部經行。二害乃去。作碑識之。今名其地爲碑坳。碑猶存于溪側。字漫滅不可復識。又有唐碑題云。令長新誠之記。乃明皇御製。梁山令尹茂元得於萬州守河東。裴公而刻之。蓋大中十年也。嘉定丁卯。郡守李錫移於軍治。其詞云。我求令長。保父下民。民之不安。必有所因。侵漁寢廣。賦役不均。使夫離散。莫保其身。徵諸善理。寄爾良臣。與之革故。政在維新。調風變俗。背僞歸眞。教化爲先。惠卹於貧。無小無大。必躬必親。青旌勸農。孰不攸遵。曷云被之。我澤如春。此碑原在舊驛中。○勝覽云。書院峽在軍東五十里。峽石市之北。每風雨冥冥。如聞讀書聲。故其中有夫子崖。子貢壩。峽下有坐臥石塔。按夫子子貢韓退之皆未嘗至蜀。此必附會之說也。○勝覽云。寒泉洞在軍之西。龍鎮十里許。有洞曰寒泉。○紀勝云。軍西二十里。赤牛山覺林院之東。有一石龕。琢石爲大悲像。四十二手皆有所執。碑目云。赤牛城有石刻。淳祐二年。上元落成。週三百六十步。敵樓百四十三座。四門各有廢刻壇壝將臺。各基址猶存。○紀勝又云。縣西五十里多喜山。時有神光現。見之多獲喜事。故名。陳希夷會居此。丹爐石枕俱存。有雌

雄泉。春夏左盈右竭。秋冬左竭右盈。古志識云。東有飛龍。西有赤牛。文必拜相。武必封侯。按飛龍。卽蟠龍山。赤牛。卽牛頭寨也。宋張無盡拜相。漢張卞至唐時始封廣澤侯矣。○紀勝又云。金鳳山。距軍西五十里。楊市之北。其山之南。半崖有罅。然內皆洞明。其石上有若圖仙女狀。面貌儼然。時若動搖。迫而視之。則不見。○又云。軍西七十里。落雲潭。常有雲覆其上。他日漁者拋網。得一石老君。自此不復有雲氣。像在永安。市民冉氏園中。背有字。曰天漢二年刻也。○寰宇記云。石瓦山。在縣西百一十三里。山巔有古人礪刀。劍。亂石如積瓦焉。紀勝云。瓦城山。在軍西百二十里。圖經亦曰。石瓦山下。有古欄楯蹤迹。屈曲至于山上。其巔平坦。耕者往往得古銅片。○紀勝又云。軍西百四十里。筆山。卽白雲山也。奇峯如筆。故云。宋張無盡詩。白雲山上揖世尊。各以願力濟羣生。卽此。予以萬曆己酉歲。登峯上。卽別寄題詩云。似筆挺然秀。山川亦好文。宕渠花裏出。秦嶺竹間分。石臼生春水。香龕積暮雲。經過難久住。日後覺離羣。壬子歲。再過此。作詩云。霧到此中止。分明要客登。水田開四野。松石閉孤僧。步入禪鐘慣。詩題綵筆曾。稍紓行役苦。惟有勝緣能。○寰宇記有逢溪山。云在縣南八十步。水西南流入忠州桂溪縣界。○通川志云。浮蘭碑。載梁山軍忠州兩界。舊有漢刻石。署白虎夷王姓名。今其上刻漢時官屬。及白虎夷王及時民等姓名。尚有可考。碑目云。五大夫碑。在梁山軍界上。字雖漫滅。然乃漢隸也。○夷堅雜錄云。梁山有漢武帝祠。至今祭時。往往有一二百蝴蝶降祠。所享其食。近之不驚。微饌然後羣去。時謂武帝侍從捉之者。必致病。按常璩云。益州刺史毀蜀中山川神祠。取其松柏爲舟楫。惟不毀漢武帝祠。則蜀之祠武帝久矣。○紀勝云。梁山呂保

藏家高崖峭絕，半腹有一穴，漢赤眉之亂，邑人呂保藏家費巨萬，鑿石以居，寇不能近，後世家隱焉。宋紹熙中有樵夫得一券於崖側，非銅非鐵，其聲鏗然，上有古篆云：西漢之末，赤眉邂逅，黃金千兩，坑埋而走，羔豚十祭，其財自阜，今藏所猶存。

### 萬縣

華陽國志：巴東郡南浦縣在郡南三百里。晉初置主夷，又云：晉武帝平吳之後，巴東省羊渠置南浦。按南浦在縣南岸。蜀志：建安二十一年，先主分胸臆之東南界，立當縣，故其西四里天子城，相傳昭烈駐兵于此。常璩所云小石城是也。三面峭壁，惟山後長延一脊，容徑尺許，累石爲門矣。○羊渠，漢縣也。通志云：萬縣西五十里羊飛山，相傳有道人令童子牧羊，戒使勿放，一日童子放之，其羊冲天而去。按蜀鑿羊飛山下有羊渠縣，卽此。○縣南百二十里，又有廢武甯縣，後周建德所立，唐王周過武甯縣，詩云：行過武甯縣，初晴物景和，岸迴驚水急，山淺見天多，細草濃藍潑，輕烟匹練拖，晚來何處宿，一笛起漁歌。○輿地紀勝云：武甯縣西一里許旌陽舊宅，卽今之白鶴寺也。宋大章未嘗讀神仙傳，疑而不信，新都宰張澤語之曰：許遜本潭人，曾任蜀之旌陽令，雅願此山，因有別業，亦何疑乎？○一統志載萬縣西百里有木樨山，昔大禹治水過此，見衆山漂沒，惟此山木樨不動，故名。寰宇記云：在武甯縣東南十三里，山頂有池，淺深隨江水漲減，以地里合之，是矣。樂史又云：石筍山在縣東北三十五里，其狀如筍，舟過漕溪，灤塗之閒，見之恫目焉。○水經曰：江水又東，逕灤塗而歷胡灘，又東，逕界壇，註云：是地巴東之西界，益州之東界也。按灤塗

驛在當縣南六十里。江中有石似胡人，名曰胡灘。飛瀑湍流，其勢險急。杜少陵詩：不是怕胡灘者此矣。亦今上下川東之界也。○經云：江水又東南會北集渠。註云：二溪水涪陵縣界謂之于陽溪，北流逕巴東郡之南。浦僑縣西溪夾側，鹽井三口，相去各數十步，以木爲桶，徑五尺，修袤不絕。水北流注於江，謂之南集渠口，亦曰于陽溪口。北水出新浦縣北高梁山，分溪南水逕其縣西，又南一百里入胸臆縣，南入于江，謂之北集渠口，別名班口。又曰分水口。胸臆尉治此。按分水驛在當縣西南八十里，此水由天生橋而出，方輿勝覽云：天生橋在州西苧溪上，乃一巨石自然成橋，長與溪等，平闊如履平地，溪流出其下矣。○經云：江水又東逕石龍。註云：水至于博陽二村之間，有盤石廣四百丈，長六里而復殆于岨，塞江川。夏沒冬出，基互通落。按此縣西之盤龍嶺也。江岸中有黃金沱，蛾眉嶺，古練石，皆以形似得名。碑目云：隋朝寶像記在古練巖矣。○陳子昂萬州曉發放舟乘漲還寄蜀中親朋詩：空濛巖雨霽，爛漫曉雲歸。嘯旅乘明發，奔橈驚斷磯。蒼茫林岫轉，絡繹漲濤飛。遠岸孤烟出，遙峯曙日微。前瞻未能胸，坐望已相依。曲直多今古，經過失是非。還期方浩浩，征駟日騑騑。寄謝千金子，江海事多違。王周萬州公居詩：公居門館靜，旅寄萬州城。山共秋烟紫，霜并夜月清。無愁干酒律，有句入詩評。何必須林下，方馳吏隱名。劉長卿寄萬州崔使君令欽詩：時艱方用武，儒者任浮沈。搖落秋江暮，憐君巴峽深。王門多白首，蜀郡滿青襟。自解書生詠，愁猿莫夜吟。鄭谷寄南浦誦官詩：多才翻得罪，天末抱窮憂。白首爲遷客，青山遠萬州。醉疑梅嶂曉，歌壓竹枝秋。望闕懷鄉淚，荆江水共流。范成大萬州詩：晨炊維下巖，晚酌巖南浦。波心照州榜，雲腳響衙鼓。前山如

屏牆。得得正當戶。西江朝宗來。循屏復東去。官曹倚巖樓。市井喚船渡。瓦屋仄石磴。猿啼鬧人語。剔核杏餘酸。連枝茶贖苦。窮鄉固瘠薄。陋俗亦寒窶。營營謀食艱。寂寂懷輒訴。昔聞吏隱名。今識吏隱處。自注云。此萬州之實境。非親到者不知其語之工也。○紀勝云。縣西有太白巖。在西山上。卽絕塵龕也。碑曰云。絕塵龕三字。在西山石壁。字體清勁。類晉宋間人書。有唐人詩刻。相傳以太白讀書於此。巖下有池。宋郡守馬元穎。魯有開所鑿。廣一畝。植以芙渠。荔枝。雜果。凡三百本。有勒封院。黃魯直記云。庭堅蒙恩東歸。道出南浦。太守高仲本置酒西山。實與其從事譚處道俱來。西山者。由郡西渡大壑。稍陟山半。松柏蒼翳。水泉瀟瀟爲大湖。亭樹環之。有僧舍五區。其郤名曰勒封院。樓觀重複。出沒烟霏之間。而光影在水。邦之人歲修禊事於此。凡夔州一道。東望大壑。西盡郁郾。林泉之勝。莫與南浦爭長者也。寺僧文照喜事。作東西二堂於茂林脩竹之間。仲本以爲不奢不陋。冬煥而夏涼。宜於遊觀也。建中靖國元年二月辛酉。江西黃魯直題張俞宴萬州西山池亭柬魯使君詩。西嶺鬱盤紆。寒泉注原隰。下有乖龍池。何年此殊極。復爲鼉鼉據。亂我清泉色。松榦已交摧。石牙空鬪立。魯侯獨窮勝。無事日尋陟。蕩滌潢汙流。宛如疏鑿力。池光復涵澈。萬象皆鏡入。亭觀出浮雲。彤彤映邦城。左右浮屠宮。巋然爭巖岌。昔乃荆棘荒。今爲蕙蘭襲。密樹低華陰。嘉禽弄文翼。使君池上宴。何減襄陽習。又題西山臨江亭詩。南浦逢除日。天涯有去舟。蠻城和雨閉。峽水帶春流。不負新年感。惟多故國愁。甯無賀春酒。徒此事羈囚。○勝覽云。岑公洞在大江之南。廣六十餘丈。深四十餘丈。石巖盤結如華蓋。左右方池。有泉湧出。巖簷遇盛夏。注水如簾。松篁藤蘿。鬱蔥蒼翠。真神仙



窟也。圖經云。岑公名道願。本江陵人。隋末避地隱此巖下。百餘歲。肌膚若冰雪。積二十年。尸解去。碑曰云。岑先生銘。唐嚴挺之撰。開元二年立。又有段文昌銘。貞元三年四月十五日鵠。唐刺史馬冉詩云。南溪有仙洞。咫尺非人間。冷冷松風下。日暮空蒼山。未趙善贛詩。真人邈何之。恍惚不可見。洞居獨嵌空。壁溜明珠濺。藤蘿含溟濛。竹柏鬪蔥蒨。至幽合人心。遠翠落江面。野老乘籃輿。使君肆清燕。日影砌下倒。雲谷坐間變。大木巖欲傾。遼壑路微轉。崢嶸施屏風。點綴成彩綉。雖云急行樂。勝賞殆亦遍。欲歸重盤旋。拂石看古篆。郭印詩。岑公來避世。甲子十周年。夏屋虛巖豁。神芝結蕊惡。木喬從古種。香杳至今傳。學道能堅忍。何人不得仙。宋徽宗政和五年四月二十一日。幸徐常廬。因念逾期未歸。信筆立成一絕。可知常詳茲眷意。庶速西上也。詩云。人生何事厭羣塵。汎宅浮家冬復春。今日暫來猿鶴語。他年應召白雲人。黃庭堅建中靖國元年三月。萬守高仲本宿約遊岑公洞。夜雨達旦。戲贈二小詩。云。肩輿欲到岑公洞。正怯衝泥傍險行。應是岑公閱清境。春江一夜雨。運明。又蓬窗高枕雨如澗。恰似槽牀壓酒聲。今日岑公不能飲。吾儕強健可頻傾。范仲讎詩。石壁虛涵雲氣深。水簾蔌蔌墮瓊琳。客來但愛幽棲好。誰識岑公萬古心。趙希混詩。自有烟霞護石扉。更深曉色近清暉。巖前老檜吟風處。似請仙翁化鶴歸。○碑目云。萬州虛鑿真人贊朝請大夫知襄州軍州兼管內勸農事提舉房隨郢州兵馬巡檢公事柱國借紫岑象求撰文。陽翟李薦書。丹。南京進士戚達題額。奉議郎權知萬州軍州兼管內勸農事武騎尉賜緋借紫蓋休景立石于元符元年。又云。宣和中道君皇帝御書。萬州妙庭觀岑洞碑。紹興二十八年二月朔。右朝請大夫權發遣萬州

軍州主管學事兼管內勸農借紫臣李莘民述記。沖妙大師前敕差充萬州道正主管教門公事賜紫臣冉通明立石已上諸碑予以癸丑歲二月歸舟。遍訪而搗之。○圖經云。峽中漢刻少。今萬州報恩寺有碑高五尺。乃漢桓帝延熹間所刻石。凡百餘字。土人謂之宜子碑。○紀勝云。西南三里壽寧觀。有唐太宗明皇銅真像。治北集虛觀。有唐垂拱時碑。○碑目云。萬利廟碑。乾德乙丑。白廷誨爲刺史重修。距今二百三十餘年。漫滅不可讀。又云。白刺史題名記。開寶二年九月記。同時僚佐姓名在。州萬利廟。有碑。仆草莽中。考閱得之。字皆漫滅。獨白刺史名在。○碑目又云。大雲寺碑。有唐僧圓澤傳。及元和間萬州守李裁書聖業院碑。在周溪大江之濱。三生石旁。薜封。可見者。咸通三年壬子歲十一月。建十餘字耳。按周溪在縣東四十里。忠義傳載李源道人再生事。詩云。三生石上舊精魂。賞月吟風不要論。慚愧情人遠相訪。此身雖異性常存。又身前身後事茫茫。欲話因緣恐斷腸。吳越山川尋已遍。却迴烟樞上瞿塘。冷齋夜話云。此僧贊寧所記。東坡以爲卽圓澤也。○經云。江水又東。彭水注之。註云。水出巴渠郡獠中。東南流逕漢豐縣東。涪水注之。水道源出西北巴渠縣東北。巴嶺南獠中。卽巴渠水也。西南流至其縣。又西入峽檀井。溪水出焉。又西過山。至漢豐縣東。而西注彭溪。謂之清水口。彭溪又入逕胸。縣西六十里。南流至於江。謂之彭溪口。按在縣東八十里。巴陽驛。是俗名小江。舊小彭驛設焉。紀勝云。小彭驛邊有二石虎。高五尺。各有四翅。石刻詩云。巍巍二虎一塵埋。巨石鑄成尙有痕。只此也須防夜箭。瀟陵恐遇李將軍。蓋一尉題。俗稱石麒麟云。

雲陽縣

經云。江水又東。右逕胸臆縣故城南。註引常璩曰。縣在巴東郡西二百九十里。縣治故城跨其山阪。南臨大江之南岸。有方山。山形方峭。枕側江濱矣。輿地紀勝。胸臆城本漢縣。在萬戶城西。固陵集載李燾胸臆記云。余泊舟雲安之西三十里。萬戶驛下橫石灘上。土人云。今驛之左右。則胸臆故城也。仁父又有曲水留題云。或言雲安之西三十里許。有自然曲水。閏月甲午朔。泊舟橫石灘上。攜子屋。壘壁。壘及劉錡卞子道。子步訪之。水極湍急。不可流觴。巖巔有永和三年及六年刻字十五六行。剝落已不可讀。細辨其文。但昔人捐金以事仙佛。識金數於石耳。殆非禊飲處也。好事者因年號遂增飾之。當時必置屋廡像設。今變滅無餘。然水石要可喜。取酒酌其旁。賞晤良久乃去。輿地碑目云。夔州守楊輔去官。過萬戶驛。故胸臆縣治。泊舟游古書巖。見刻石滿其上。意當時或有像設屋室。蓋縣人常所往來之地。縣徙。歲月不復可考。而石刻亦漫闕就盡。說者但有臆創。乃屬雲安大夫劉甲徧募巖上下石刻。試考詳之。庶幾其猶有獲也。同來者雲安大夫鄭邦基。郝奚仲。從姪有聲。淳熙十五年八月十六日。按橫石灘。今之橫梁候館設焉。萬戶驛卽萬戶壩。去縣西四十里。○萬戶驛北有漢城山。乃漢扶嘉所居。按扶嘉。胸臆人也。初嘉母於湯溪側。遇龍後生嘉。巧發奇中。高祖爲漢王。與嘉相遇。獻定三秦策。高祖以其志在扶翊。賜姓扶氏。爲廷尉。臨終有言云。三牛對馬嶺。不出貴人出鹽井。按馬嶺在縣北三十里。三牛在縣北二十里。皆近鹽井。鹽矣。○經云。江水又逕魚復縣之故陵。註云。舊郡治故陵溪西二里之故陵村。溪卽永谷也。地多木瓜樹。有子

大如氈。白黃實甚芬香。爾雅之所謂櫛也。經云。江水又東爲落牛灘。逕故陵北。註云。江側有六大墳。庚仲雍曰。楚都丹陽。所葬亦猶枳之巴陵矣。故以故陵爲名也。有魚復尉戍。此江之左岸有巴鄉村。村人善釀。故俗稱巴鄉清郡出名酒。村側有溪。溪中多靈壽木。中有魚。其頭似羊。豐肉少骨。美於餘魚。溪水伏流。逕平頭山。內通南浦。故縣陂湖。其地平曠。有湖澤。中有菱芡鮑鴈。不異外江。凡此等物。入峽所無。按故陵者。卽古陵沱也。酈道元以爲舊郡治。今名舊縣壩矣。碑目云。漢處士金廣延母子碑。初無文字。但有人物。又有一碑。所勒皆車馬人物。或云。古者修車馬備器械之圖。此皆在舊雲安郡也。○寰宇記云。使君灘在軍東二里大江中。昔楊亮爲益州。至此舟覆。徵其波瀾。蜀人至今猶名之爲使君灘。一曰博望灘。荊州記云。張騫奉使西域。於此覆舟。亦名使君灘。乃在今縣之西矣。○江中又有龍脊灘。形如遊龍。歲人日。邑人遊於上。以雞子卜歲豐凶。古謠云。龍牀如拭。濟舟必吉。龍牀彷彿。濟舟必沒。宋馮時行龍脊灘留題云。建炎戊申正月上巳日。判官李造道。司戶趙執權。知縣母邱元望。縣尉馮當可。陪郡侯謁武烈公祠。遂泛江而下。散步此磧。老杜詩云。元日逢人日。未有不陰時。議者謂天寶之季。此詩盡之。今日天宇清明。江國熙然。太平之期。指日可俟。江獲與諸公偕遊。所謂人日也。馮當可書。○杜詩。東城抱春岑。江閣鄰石面。崔嵬巖雲白。朝旭射芳甸。唐詩有破斷見孤邑。江流照飛臺。暮色四山起。愁斷數猿聲。皆雲安景象。○元和志。那有鹽官橋官。今五峯驛前有橋官堂也。宋李廌雲安橋官堂記云。建炎中。改軍爲縣。隸于夔。猶存使名。官儀仍備太守之略。而時節得以奏章自達於朝。他邑莫比焉。治內有杜鵑亭。杜詩。雲安有杜鵑。名本於此。

杜詩又曰。峽裏雲安縣。江樓翼瓦齋。兩邊山水合。終日子規啼。按杜鵑子規共一鳥。蜀本紀以爲望帝所化。詳在方物中。予過雲陽。題杜鵑亭詩云。春林血淚染山青。羈客中宵忍淚聽。何處蜀山不啼遍。雲安偏有杜鵑亭。又過雲安絕句之三云。也是山青水碧時。客懷何事動深悲。春林三月無行迹。君未前來聽子規。蓋兩用之。○方輿勝覽云。飛鳳山與縣治相對。古刻鳳凰巖三字。瀑布泉出焉。注於白玉池。產太乙元精石。按張桓侯祠設在此山之脊。馮嘗可所稱武烈祠也。有石如杵。黝而澤。設在案前。卽元精石矣。○經云。江水又逕東陽灘。註云。江上有破石。故亦通謂破石灘。苟延光沒處也。常璩曰。水道有東陽下巽數灘。山有大小石城。靈壽木及橘圃也。水經註曰。江水過下巽灘。左則湯溪水注之。水源出縣北六百餘里。上庸界。南流歷縣。翼帶鹽井一百所。巴川資以自給。粒大者方寸。中央隆起。形如張傘。故名之曰傘子鹽。有不成者。形亦必方。異於常鹽。王隱晉書地道記曰。入湯口四十三里。有石叢以爲鹽。大者如升。小者如拳。煮之。水竭鹽成。蓋蜀火井之倫。水火相得乃佳耳。湯溪下與檀溪水合。上承巴渠水。巴渠南歷檀井。檀井入湯水。湯水又南入於江。名曰湯口也。○唐商眞君飛昇記云。雲安風俗淳厚。陶染眞風。如霍法言。楊雲外之徒。繼出。故琳宮祕館。獨盛他處。輿地紀勝云。棲霞觀舊名昇雲宮。在縣北一十里。宮據山絕頂。下瞰翠峯。培塿可數。唐霍法言於此修煉。白日仙去。巨柏參天。皆二仙手植。殿左有五龍池。能興雲致雨。碑目云。唐雲外尊師碑在雲昇宮。杜光庭文見九域志。今名棲霞宮。又曰。縣西四十里集靈觀。有碑云。象山福地。玉華仙館。唐商眞君飛昇之所。○又曰。縣西百里有上下巖。黃魯直云。唐末有劉道者。聞道於雲

居膺禪師。爲開巖第一祖。法號道微。自鑿石龕曰。死便藏龕中。不用日時。門人奉其命。二百年來。遊者題時不可勝讀。莫能起此開巖者。故予作詩表見之云。空巖靜發鐘磬響。古木倒掛藤蘿昏。莫道蒼苔鎖靈骨。時應持鉢到諸村。又云。寺古松楠老。巖虛塔廟開。僧緣蠶麥去。官數荔枝來。石室無心骨。金鋪稱意苔。若爲劉道者。拽得鼻頭回。自註云。其一用楊子安韻。一用王定國韻也。按下巖卽燕子龕。見郭信可詩矣。王維贈燕子龕禪師云。山中燕子龕。路劇羊腸惡。裂地競盤屈。插天多峭崿。瀑泉吼而噴。怪石看欲落。伯禹訪未知。五丁愁不鑿。上人無生緣。生長居紫閣。六時自撻磬。一飲尙帶索。種田燒白雲。斫漆響丹壑。行隨拾栗猿。歸對巢松鶴。時許山神請。偶逢洞仙博。救世多慈悲。卽心無行作。周商倦積阻。蜀物多淹泊。巖腹乍旁穿。澗脣時外拓。橋因倒樹架。柵值垂藤縛。鳥道悉已平。龍宮爲之涸。跳波誰揭厲。絕壁免捫摸。山木日陰陰。結跏歸舊林。一向石門裏。任君春草深。郭印題雲安下巖云。地涉雲安境。山名燕子龕。簾垂看急溜。蓋偃得修楠。牢落前賢蹟。光明有佛龕。幽禽知客至。一一解元談。趙抃過雲安。軍下巖僧舍。幽寺倚巖阿。雲扉掩薜蘿。老僧中燕息。誰問世風波。喻汝礪雲安下巖次。浩翁韻云。徑向山腰轉。門從水面開。片雲巖下宿。一鉢朔方來。落日鳥衝樹。輕陰花覆苔。惟應荔枝熟。時躡白雲回。又路暗松杉密。天空霧雨開。山容依檻轉。鳥影度江來。汲水僧歸寺。銜花鹿印苔。年年蠶麥熟。貧道輟齋回。宋肇題下巖云。古寺依叢壑。雲深暗薜蘿。山僧眉睫異。林鳥語聲和。絕壁疑無路。長江忽自波。暫來還趣駕。衰早倦經過。又下巖逢雨云。地險重樓仄。巖虛古殿開。泉鳴風處瀨。石暗雨邊苔。黃葉會攀柳。青梢未折梅。居僧因解笑。歲晚

尙西來。又嵐光分碧瓦。江影動丹扉。林鳥拳晴竹。沙鷗印夕霏。風幡空自舞。雲岫幾時歸。石室君無問。塵埃萬事非。又盡把蕭疎髮。難勝浩蕩愁。西風吹落日。小雨弄殘秋。壩沒千山瘴。掀騰萬壑流。宦途如客路。吾意轉悠悠。黃人傑題云。十月水痕瘦。維舟過下巖。鷗行沙作路。龍像石爲龕。風定煙光合。霜迴日色酣。賦詩無好語。聊用志瞿曇。李燾和黃錄章韻云。山與蜀江並。巖從天漢開。禪僧若箇住。詩客疑人來。金闕掛白練。石龕封綠苔。攜家便堪隱。歸櫂重徘徊。宋永孚詩云。江漲桃花後。風熏荔子前。來瞻千億佛。去此十三年。巖溜翠常滴。林花紅欲然。因知山與石。本性亦虛圓。又兩山中斷曉天開。萬頃無波浸綠醅。巖外水簾垂到地。坐看煙雨過江來。楊邁下巖詩云。竹樹藤蘿密復疎。路迴崖斷見精廬。龕藏衲子千年骨。神護涪翁半壁書。落日紅光浮戶牖。曉雲空翠滴衣裾。塵勞獨愧山僧靜。一飯跏趺不願餘。又下巖避暑云。古寺從來與轉添。舟中中暑正炎炎。野僧引客登山閣。稚子穿雲放水簾。熱得清涼身暫健。懶使閑靜意難厭。人間劫火方撩亂。法雨何如爲普沾。令狐慶譽詩云。地遠塵寰不染埃。懸崖屈曲寄層臺。山頭玉溜隨簷滴。巖下金容就石開。寺影不妨流水過。松香常逐好風來。徧遊未盡無窮景。爲報舟人且莫催。杜東之詩云。濤江翻雪捲胡灘。晚泊巖扉暫解顏。夙有靜緣逢寺喜。老無生理伴僧閑。殘雲已斷獨飛雨。落日將沈卻照山。半夜秋聲驚客夢。一簾珠貝冷珊瑚。閩人朱煥下巖次韻云。勝地都無一點埃。倚倚野竹映樓臺。僧同巢鳥林端見。佛顯靈光石面開。道者已隨鸞鶴去。世人特爲水雲來。登臨清興無窮盡。一下層巒暮色催。○予以萬歷壬子暮春過此作詩云。病中入寺情相得。雨後看山興轉添。片石僧寮無結構。一

春巖溜自垂簾。題名刻像成今古。背路臨江恰見潛。我已忘機來此地。白雲溪鳥莫猜嫌。因遍訪諸石刻。其可見者游仲鴻游季祥未遊。時段謙仲適尉此邑。遊巖中酌酒共坐而去。淳熙乙巳四月十四日也。○軍守張吉監井史澤判官陳夔以嘉祐六年五月二十一日至寺下。偶新蓬州司理向宣顏偕遊。○資郡張良能少穎解褐西泝。艤舟來調。尊者拜三先生遺像。紹定庚寅仲春念一日。男遠卿侍。○杜世東就銓西歸。謾書絕句。往年題柱記行色。今日支筇還獨來。道者相看定相笑。若爲牽得鼻頭回。○樂溫尉鍾涪陵尉鄭階平。治平乙未六月五日同遊。住持本院主僧法能刻石。

開縣

舊漢豐縣也。華陽國志云。漢豐縣建安二十一年置。在巴東郡西北彭溪源。寰宇記云。後周改漢豐縣爲永寧縣。今州西四十九里。濁水故城是也。志云。縣南四十里墊江。一名濁水。源出梁山縣之高梁山。春夏泛漲。人多墊溺。流至渠口鋪入開江。又云。清水源出萬歲縣之石塔山。西南流經石門山。又西南流經巴渠故城東。輿地紀勝云。巴渠縣劉宋所置。宇文氏改爲萬歲縣。以縣北有萬歲谷也。舊址在今縣東北五十里。卽宋之清水縣矣。○縣西北一里有盛山。以唐刺史韋處厚著名。韓愈作盛山十二詩序云。韋侯昔以考功副郎守盛山。人謂韋侯美士。考功顯曹。盛山僻郡。奪所宜處。納之惡地。以枉其才。韋侯將怨且不釋矣。或曰不然。得利則躍躍以喜。不得利則戚戚以泣。若不可生者。豈韋侯之謂哉。韋侯讀六藝之文。以探周公孔子之意。又妙能爲辭章。可謂儒者。夫儒者之於患難。苟非其自取之。其拒而不受於懷也。若築



河隄以障屋雷。其容而消之也。若水之於海。冰之於夏日。其翫而忘之。以文辭也。若奏金石以破蟋蟀之鳴。蟲飛之聲。況一不快於考功盛山。一出入息之間哉。未幾。果有以章侯十二詩遺余者。方且以入谿谷。上巖石。逐追雲月。不足日爲事。讀而詠歌之。令人欲棄百事。往而與之遊。不知其出於巴東。以屬胸臆也。於時。應而知者凡十人。及此年。章侯爲中書舍人。侍講六經。禁中侯名處厚。和者通州元司馬名稹。爲宰相。洋州許使君名康佐。爲京兆。忠州白使君居易。爲中書舍人。李使君景儉。爲諫議大夫。黔府。嚴中丞。武爲祕書少監。溫司馬。造爲起居舍人。皆集闕下。於是盛山十二詩。與其和者。大行於時。聯爲大卷。家有之焉。慕而爲者。將日益多。則分爲別卷。章侯俾余題其首云。○章處厚詩。激曲縈飛箭。浮溝泛滿卮。將來山太守。莫向習家池。右流杯渠。不資冬日秀。爲作暑天寒。先集誠非鳳。來翔定是鸞。右竹巖。曉巖雪中。嶠磊落。標方峭。勿謂枕蒼山。遠當礎清廟。右繡衣石榻。註爲溫侍御。置雨合飛砌。天開卷曉窗。齋平聯。郭柳帶。纒抱城江。右宿雲亭。夾岸凝輕素。交枝漾淺淪。味調方薦實。臘近又先春。右梅谿。噴日舒紅錦。通隄茂綠陰。終期王母摘。不羨武陵深。右桃塢。疏鑿徒爲巧。圓窪自可澄。倒花紛錯繡。鑿月靜涵冰。右蒟蘆沼。顧渚吳商絕。蒙山蜀信稀。千叢因此始。含霧紫英肥。右茶嶺。繚繞綠雲上。璘玢瑩玉聯。高高層幾折。極目瞰秋茂。右盤石磴。褊地堆層疊。因崖遂削成。淺深嵐障色。盡向此中呈。右琵琶臺。綆汲豈無井。顛崖愧深濼。願灑塵垢餘。一雨根莖潤。右土瓶泉。註爲柳律師置。初映鉤如線。終銜鏡似鉤。遠澄秋水色。高倚曉河流。右懸月鉤。張籍和云。獨入千竿裏。綠巖踏石層。筍頭齊欲出。更不許人登。右竹巖。曲沼春流滿。新蒲映

呼鶴。聞齋朝飯後。拄杖繞行多。右葫蘆沼。月出深峯裏。清涼夏亦寒。每嫌西落疾。不得到明看。右隱月岫。臺上綠蘿春。閑登不見人。每當休暇日。著屐戴絃巾。右琵琶臺。清淨當深處。虛明向遠開。捲簾無俗客。應只見雲來。右宿雲亭。自愛新梅好。行尋一徑斜。不教人掃石。恐損落來花。右梅谿。山城無別味。藥草兼魚果。時有緇衣人。同來石上坐。右繡衣石榻。紫芽連白蕊。初向嶺頭生。自看家人摘。尋常觸露行。右茶嶺。階上一眼泉。四邊青石盤。惟有護淨僧。添瓶將盥漱。右土瓶泉。綠酒盈白杯。隨流去復回。似知人把處。各向面前來。右流杯渠。累石盤空遠。層層勢不危。不知行幾里。得到上頭時。右盤石磴。春塢桃花發。多將野客遊。日西殊未散。看望酒缸頭。右桃塢。○此方洞壑聯屬。而溫湯洞爲最。杜光庭錄異記云。開州後倚。盛山東枕。清水沂江而北三十餘里。至溫湯井。井有湯泉。在北山上。麟德年。因雷雨震霹。山腳摧裂。洞門自開。當門有石鐘。自然成形。如數千斤鐘大。懸身去地二尺許。外象鐘而中實扣之無聲。門兩壁有石如金剛力士之形者數人。鐘旁有小徑。高六尺已來。行二三丈。稍闊有石碑。巨龜負之。自然而成。但無文字而已。碑側有巨屏。上與頂相連。下有一穴。側身可入一二尺許。自是廣闊。中有路徑。平坦與常無異。路之左右滴乳爲石。羅列衆形。龍鱗。鸞鶴。頽雲。巍山。如林如柱。似動似躍。乍飛乍顧。千形萬態。不可殫紀。僅一里許。傍疎蓮臺。周迴數步。高三四丈。層巒重疊。皆可攀躋。旋生石乳。如臂如指者。以燭照之。通透瑩徹。隨折脆斷。及出洞門外。得風皆爲白石矣。自臺側三四十步。有蓮花羅布於地旁。有甘泉水色溫白。遊者烹茗於此。前有橫溪。湍波甚急。其聲喧洶。流出洞外。溪上有橋。長二三丈。闊一丈許。非石非土。功甚宏壯。過橋

得黃土坡高四五丈。道徑險滑。行者累息。方至其頂。坡上有巨堂。四壁平淨。中高數丈。壁上皆有遊山之入。累月之後。出於巫山洞中。自後無復敢入者。

大寧縣

水經註。巫溪水又逕北井縣。西東轉。歷其縣。北井南有鹽井。井在縣北。故縣名北井。建平一郡之所資也。鹽水不通。巫溪溪水是兼鹽水之稱矣。○勝覽云。寶山在大寧監北十七里。半山有穴如瀑泉。卽鹽泉也。山有牡丹芍藥蘭蕙雜花卉。圖經云。一泉之利。足以奔走四方者此矣。知監正子申大寧志序云。一溪前陳。可濯可沿。衆峯巖絕。如削如畫。亦峽郡之桃源也。○紀勝云。觀音巖在監治東鳳凰山。郡守張孝芳愛其類湘中山水。暇日窮討。得月窟雲巖釣雪玉環浮玉寶華之勝。又云。距城二里。兩江合處。中有石巖峙如門。高二三丈。溪流噴如瀑布。謂之南澗。鹽官孔嗣宗春日與客泛舟飲於綠陰下。商民鼓吹隨之。其樂不減於蠶市矣。○志云。二仙洞去鹽場二里。一名王子洞。山高百餘丈。上下皆削壁。惟一徑寬二尺。長四五丈許。始達中可丈許。凡遊者不敢下視。洞口寬高十餘丈。深不可測。巖上石文生成千字。水出石筍。四時不絕。相傳昔有王子採樵。見二人圍棋於此。局未終而斧柯已爛。其人仰壁留題而去。詩曰。仙人洞裏無春秋。白雲深處心悠悠。爛柯樵子半途客。安得乘風駕玉虬。千年勝事今朝說。一一重重心練結。從來流水與高山。更有清風共明月。王子後不知所終。但傳說仙骨長丈餘。○碑目。丁晉公謂夔州移城記云。

開寶伐蜀，師分劍巫而入。時蠻瀕激射樓，戰艦難進易退。步騎自襄州西山裹糧兼行，林麓無際，澗壑相接，不知道路之所從。得蜀民詣王師獻書，由大寧路直取夔州。平蜀之師，實取道於此也。景德三年記。

### 大昌縣

水經註云：巫溪水源出宜漢縣，南逕建平郡之泰昌縣南，即大昌也。○寰宇記云：千頃池在縣西三百六十里，波瀾浩渺，莫知涯際，分爲三道。一道東流當縣，爲井源；一道西流，爲雲安縣陽溪；一道南流，爲奉節縣西滾水。○杜甫西閣三度期，大昌嚴明府同宿，不到詩云：問子能來宿，今疑索故要。匣琴虛夜夜，手板自朝朝。金吼霜鐘徹，花催蠟炬銷。早晷江檻底，雙影謾飄飄。

### 建始縣

三國時屬吳之建平郡。隋開皇爲業州。今縣東三十五里有州基山，是其處。○黃山谷馬山口號呈建始李令云：驛亭新似眼，波明箒路開如掌。樣平誰與長官歌，美政風搖松竹是歡聲。志云：縣西三里有石通洞，壁刻涪翁二字。蓋山谷曾來遊也。○志又云：縣西五十里石乳山，山石層疊，多生石乳，其上置石乳關。



# 蜀中名勝記卷之二十四

## 川北道

保甯府一 閬中縣附郭

閬中本秦舊縣。張儀伐蜀所置。通志云。張儀城在城東二十里。郡志云。閬中縣中二十里白沙鎮是舊縣治。○國初徙入城。按此則張儀城即舊縣矣。通志云。本府城漢末劉璋所築。蜀漢巴西守張飛治此。增修國初千戶滕貴拓之。甃以石。是前郡縣不同城也。寰宇記云。張飛冢在刺史大廳東二十步。高一丈九尺。碑曰。閬中有張桓侯。與張遼書石刻。漢文八分書。○方輿勝覽云。唐魯王靈夔。滕王元嬰。皆鎮是州。以衛宇卑陋。遂修飾宏大之。擬於宮苑。謂之隆苑。其後避明皇諱。改曰閬苑。又云。或謂閬苑仙有五城十二樓。向但有五城而樓尙闕。宋德之爲守。乃建碧玉樓於衙城之西南隅。亦名十二樓。以成閬苑之勝。按杜甫詩。嘉陵江色何所似。石黛碧玉相因依。樓名取此。○通志云。東樓跨府城上。形製尙古。杜詩層城有高樓。制古丹雘存。迢迢百餘尺。豁達開四門。○勝覽云。閬州江山奇秀。聞天下。直前據其會。曰南樓。唐滕王元嬰所建也。宋太守李獻卿詩云。三面江抱光城郭。四圍山勢領烟霞。馬鞍嶺上。渾如錦繡。蓋門前半是花。○通志云。曾經樓在府治將相坊。按華陽國志云。巴有將。蜀有相。後因有閬苑三學士。錦屏三狀元之盛。故以將相名之。樓元祐中建。置經史子集三萬餘卷。蘇軾題額。蒲宗孟記。○勝覽云。整暇堂在府治。黃魯

直記又云。治平園宋治平初太守朱壽昌築於牙城東。文與可嘗爲賦十絕。其錦屏閣詩云。茂林斑若錦。秀巖矗如屏。底處供登覽。闌干在杳冥。清風臺云。無時來見襲。有地更臨高。坐客清談起。紛紛落塵毛。四照亭云。畫箔褰何礙。珍叢發已圓。願公皆遍賞。莫爲一隅偏。柳橋云。接風誇晚態。垂雨怯春寒。爲問題芳意。同誰倚畫欄。曲池云。水似珠璣入。池如玉磬開。臨流唯自適。魚鳥莫相猜。明月臺云。微稜生海角。圓魄到天心。其上惟佳客。無容照俗襟。三角亭云。合棟交生角。迴欄互引牙。由來因地勢。不是故尖斜。花塢云。繚繞穿紅萼。爛斑踏紫苔。誰將錦步障。端爲使君開。藥欄云。玉筍齊抽日。金缸競列時。自然俱可愛。莫放畫簾垂。郎中菴云。已築環爲堵。仍裁月作牀。公來時隱几。身世在羲皇。按通志名宦載壽昌治園有異政。○寰宇記云。園中山其山四合於郡。故曰園中。名山志云。園中山多仙聖遊集之所。志云。卽錦屏山。在城外嘉陵江南。與郡治相對。兩峯壁立如屏。又名寶鞍山。方輿云。山上有瑪瑙寺。羅漢畫錦。西橋三院。後又築閼峯亭以眺望焉。宋陸游詩。城中飛閣連危亭。處處開窗對錦屏。涉江親到錦屏上。卻對城郭如丹青。喻汝礪詩。暝色輕烟罩郡城。漁舟燈火倒觀星。寒山遠水江村暮。自在妝成水墨屏。按古咸安志。火井令袁天綱題云。此山磨滅英靈乃絕。其下爲海棠溪。多海棠。唐張元寶詩。寒食清明倍惘然。海棠風落小花鈿。如今獨有孤魂在。半落嘉陵半錦川。○李膺益州記云。園中盤龍山南有一石長四十丈。高五尺。當中有一戶。有門。若人之掩閉。古老以爲玉女房。通志云。在城東三里。望如蟠龍之狀。後魏盤龍郡以此山名。唐貞觀中。候氣者言西南千里外有王氣。太宗令人入蜀。次園中。果見山氣葱蔚。後鑿破山脈。水流如血。今

號鑿山。咸亨初曾徙閩中縣於此。卽今之鑿山關也。志又云。蟠龍山前袁天綱嘗築臺於此。以占天象。○寰宇記云。仙穴山在縣東北十里。周地圖云。靈山峯多雜樹。昔蜀王鼈靈登此。因名靈山。山東南偶有玉女擣練石。頂有泉。常清冽。洞穴懸絕。微有一小徑通。天寶六年勅改爲仙穴山。志云。一峯峭拔。介宋江嘉陵之間。上有鼈靈臺。元稹八月六日與僧如展。前松滋主簿韋戴同游碧澗寺。賦得扉字。引云。寺臨蜀江。內有碧澗穿注兩廊。又有龍女洞。能興雲雨。詩中噴字以平聲韻。詩云。空闔長江礙鐵圍。高低行樹倚巖扉。穿廊玉澗噴紅旭。湧塔金輪接翠微。草引風輕馴虎睡。洞驅雲入毒龍歸。他生莫忘靈山別。滿壁人名後會稀。○玉臺山在城北七里。杜詩閩州城北玉臺山。有滕王亭。杜詩。君王臺榭枕巴山。萬丈仙梯尙可攀。卽此地。後有滕王臺。古碑云。閩之第四景爲頤神石洞。洞虛雙拱。密邇玉臺。昔滕王建亭於此。古人詩文隱隱可辨。○勝覽云。東巖在城東。有寺。鑿山爲巖。○西巖在城西。有奪錦亭。與錦屏山相對。陸務觀詩。奮錦軒中醉倚欄。錦屏蒼翠插雲端。平生不喜言爭奪。付與遊人自在看。○南巖在城南。有大像山。乃唐高士安隱居之所。志云。一名台星巖。陳堯叟兄弟讀書於此。有捧研亭。輿地碑目云。天聖九年本路運使司馬池來遊。子光侍末云。君實捧硯。勾龍竇請以捧研名亭。○北巖在城北。有徽蓋山。高僧宣什住持。乃城中開元寺柄也。謂之東寺。卽元稹題樂天詩於壁。及文同寄詠澤師竹軒處矣。什公博通經典。魯王出鎮表而異之。後居繖子山。山上無水。以杖叩巖。浩然泉湧。今爲卓錫泉。○喻汝礪漱玉巖記云。自古常言。天不負人。吾初不甚信。纔游太學。不啻六千三百日。知古所謂屈原賈誼。揚雄。韓愈。柳宗元輩。亦頗識其



面目及得一第。則枯冷羞澁。幾笑破人口。比來閩中。持手板謁上官。奔走匍匐。作主簿少府模樣。燕居作樂。則搖口吻。弄語言。以佞貴人。而覓所謂舉狀者。嗟乎。其局促如此。則天果不負人邪。然飽聞閩奇山川。而賢士大夫最多。亦復把酒自慰。一日登錦屏。拏舟嘉陵江。步至占星巖。徘徊縱觀。倚老松。臥怪石。往往摩腹一笑。然是三境之遊。須廢吾一日糧。吾不得與女旦暮相從也。惟毋丘氏漱玉巖近在牆壁外。乘興步履。從小奚奴直謁主人。脫衣散髮。坐巖腹。酌酒賦詩。相與作物外笑樂。酒醉發狂。即呼天大叫曰。天乎。真不負喻汝礪矣。吾常謂富貴之士不能放意於江山松竹之樂。而山川怪奇。烟雲竹石。詩酒風月。唯遺逸未遇之人始得兼而有之。故天地間雄偉不凡之處。天所以資賢人而舒其憂愁之思者也。吾零落荒山。鬱鬱無聊。賴有錦屏嘉陵之雄偉。占星漱玉之勝槩。所謂閩之四奇者。吾皆得而有之。他日解官。視吾破囊。無復新井縣一物。驅老驄。獨負四物以歸。朋游故舊。從吾覓閩中土物。吾則與之飲酒。取吾詩而歌之。則是四境者。不移足而在几席間矣。○通志云。文城山在城東三十里。峯巒聳列。林木葱蒨。一峯拔出。名元都壇。張道陵授符籙之所。○寰宇記云。天目山在治東界。一名天溪洞。葛仙公修道之所。亦烏七年勅置集靈觀。先天二年改名天目觀。中和二年改名福唐觀。郡志云。天目山在城東五十里。唐杜光庭詩。盤空躡翠到山巔。竹殿雲樓勢逼天。古洞草深微有路。舊碑文滅不知年。八州物象通簷外。萬里烟霞在目前。自是人間輕舉地。何須蓬島訪真仙。又云。曾集雲水此山遊。行盡層峯更上樓。九日登臨須有意。七年岐路亦堪愁。樹紅樹碧高低影。烟淡烟濃遠近秋。暫爇爐香不須去。佇陪天仗入神州。○寰宇記云。嘉

陵水一名西漢水。又名閬中水。周地圖云。水源出秦州嘉陵。因名嘉陵。經閬中。即閬中水。又云。閬中水亦曰渝水。譙周三巴記云。閬中有渝水。寶銳氣。喜舞。漢高祖樂其猛銳。數觀其舞。使樂人習之。所謂巴渝舞也。路史云。太昊伏羲氏母華胥。居於華胥之渚。孕十有二歲而降神。生於仇夷。長於起城。註云。所都國有華胥之淵。乃閬中渝水地也。○通志云。宋江源出漢中府舊廉縣。經蒼溪縣。東流入嘉陵。有白水源出階州亂山中。至昭化縣北。合嘉陵。唐鄭谷詩。蒼蒼白水下嘉陵。是也。漢地里志。縣有彭道將池。東西二里。南北約五里。文緯書識云。巴西郡治有彭池大澤。四夷述云。城西南十里有郭池。周約五十畝。勝覽云。彭池。卽今之南池也。郭池。卽魚池也。二池與漢志相符。遁甲開山圖註云。仇夷山四面絕立。與彭池。成紀皆西土。是伏羲生處。仇夷。卽仇池。成起卽成紀。二字通用。○南池有漢高祖廟。杜詩。崢嶸巴閬間。所向盡山谷。安知有蒼池。萬頃浸坤軸。劍南詩稿云。唐長慶中南池新亭碑在漢高祖廟側。○寰宇記云。零星池在縣西北四里。益部耆舊傳。趙瑤爲閬中令。時西州遭旱。瑤率掾吏齋戒於零星池。歸咎自責。稽首流血。應時大雨。○侯鯖錄云。閬州有三雅池。昔有人於此池得三銅器。狀如杯盞。上各有篆字。一曰伯雅。二曰仲雅。三曰季雅。按魏文典論云。靈帝末。斗酒直萬金。劉表一子好飲。乃製三爵。大曰伯雅。注一斗。次曰仲雅。注七升。小曰季雅。注五升。今池所得。乃劉氏酒器也。○通志云。城東百廿里有譙元廟。漢書元字君黃。閬中人。少好學。能談春秋。成帝時拜議郎。歷奉谷令。後舉緇衣使者。王莽居攝。易姓名竄歸。公孫述僭號。連聘不起。予毒藥。將服之。其子瑛盡捐家貲。贖。建武十一年卒。光武勅所在還元家。以策詔本郡祠以中牟。

○古碑云。汝南令神道闕在閬中縣。未嘗人代郡守。張晦辨云。於東面得隸字十有二。缺不可識有七。○輿地紀勝云。唐貞觀碑在閬州太霄觀。其石光瑩。前後可鑿。號透明碑。○本志。唐漢州刺史房瑄墓碑在縣城外。杜詩。他鄉復行役。駐馬別孤墳。近溟無乾土。低空有斷雲。○碑目云。唐道襲墓碑在城中報恩寺。按蜀檇王。建以道襲爲閬中刺史。改其鄉爲烈士鄉。○又云。崔善德政碑在衙門東。按善武成中爲刺史。有惠政。民人懷之。

蒼溪縣

蒼溪於閬中爲上游。卽臨嘉陵水也。江岸有放船亭。杜詩。送客蒼溪縣。山寒雨不開。只愁騎馬滑。故作放船回。後人因以名亭。○元稹蒼溪縣寄揚州兄弟詩。蒼溪縣下嘉陵水。入峽穿江到海流。憑仗鯉魚將遠信。雁回時節到揚州。劉滄宿蒼谿館詩。孤館門開對碧岑。竹窗燈下聽猿吟。巴山夜雨別離夢。秦塞舊山迢遞心。滿地菴苔生近水。幾株楊柳自成陰。空思知己隔雲嶺。鄉路獨歸春草深。文同少泊蒼溪山寺詩。正午風色高。遂泊蒼溪縣。層崖抱林木。有寺藏蔥蒨。出船步危磴。蔭密頗繁轉。上到金僊家。綠空列臺殿。修篁掛縣溜。坐覺炎暑變。老僧晚經論。言語何貫穿。引我上高閣。闌干俯江面。寥寥百里內。山水盡奇觀。誰謂羈旅中。所見皆所願。汀洲白鳥聚。井邑清烟散。樂此暮忘歸。疎鐘起巖畔。徙倚下松門。尙怪舟人喚。○舊治在曲肘川。去縣一里。後周所設也。源出玉女。出東南流入嘉陵江。曲折如肘。○其近山有小錦屏。與錦屏相似。其稍遠者縣南三十里爲大筵山。天池浸其中。宋江環遶其下。石城四周。淳祐間余玠徙閬

州治於此。又遠之東八十五里有方山。遠望如几案。古方州城也。宋嚴大猷居此。因以方山名集矣。○其著者東南三十五里有雲臺山。寰宇記云。一名天柱山。高四百丈。上方百里。有魚池。宜五穀。無惡毒。可度災。周地圖云。漢末張道陵在此學道。使弟子王長。趙昇。投身絕壑。以取仙桃。長等七試已訖。九丹遂成。郡國志曰。雲臺山天柱巖下有一桃樹。高五尺。皮是桃。心肉似柏。張道陵與王長。趙昇。試法於此樹。四百餘年不朽。小碑記之。志云。山有洞四。曰麻姑。芙蓉。平仙。峻仙。巖二。曰松根。蟠桃。池二。曰浴丹。玉魚。山多榕。柏。大者空中可坐數人。道經云。永壽二年重九日。道陵將諸品祕籙。斬邪二劍。玉冊。玉印。授其長子衡。乃與夫人雍氏登峯絕頂。白日昇天。時百二十三歲。晉顧長康畫雲臺山記。見畫苑。碑目云。唐元稹謫通州司馬。曾遊雲臺山。書行記於山之鐘樓。枋上宋之問送田道士使蜀投龍詩云。風馭忽冷然。雲臺路幾千。蜀門峯勢斷。巴字水形連。人隔壺中地。龍遊洞裏天。願言迴馭日。圖畫彼山川。馬戴寄雲臺觀田秀才云。雪壓松枝拂石窗。幽人獨坐鶴成雙。晚來漱齒敲冰渚。閒讀僊書倚翠幢。宋祁西州狼麋云。予昔遊雲臺觀。謁希夷先生陳搏洞室。緬想其人。今追作此詩。仙館三峯下。年華百歲中。夢休孤蝶往。蛻在一蟬空。葉笈微言祕。霄晨浩氣通。丹遺嘒後鼎。林遣御餘風。市霧沈荒白。餐霞委暗紅。岷峨有歸約。飛步與誰同。元廖寥獨望詩。雲臺突出衆山低。小徑縈紆上石梯。古寺獨存人寂寂。斷碑惟覆草萋萋。滿空香散春蘭綻。萬壑烟生曉樹迷。爲愛其間風景好。登臨幾度杖青藜。○志云。蒼溪簿金極治道。得石冢遺骸。尚存。有石銘云。歲月不須論。車塵擁石門。若逢金主簿。移我上高原。迺改葬之。相沿爲金主簿墓。不著年代。

南部縣

南部本充國地。漢末徙巴西郡於阆中。有充國城在焉。寰宇記云。即今新井縣東北二十八里充國故城是也。李雄亂後荒廢。○唐書趙彥昭舉進士。少豪邁。風骨秀爽。嘗調南部尉。與郭元振薛稷善。往來吟詠不絕。○新井。西水二廢縣。皆接阆中。通志云。西水河在南部三十五里。源出龍州。後周西水縣以此名也。○勝覽云。蘭登山。在新井縣東二十里。相傳嚴君平隱居於此。有朝遊蓬漢暮宿蘭登之句。三面峻絕。俯臨西江。○本志。唐開元中。何渙爲殿中侍御史。知名。家於西水。明皇賜其鄉爲柏臺鄉。○又云。新井縣有二龍里。唐任曉。任曉之所居也。姚合送任曉及第歸蜀詩。子規啼欲死。君聽固無愁。闕下聲名出。鄉中意氣遊。東川橫劍閣。南斗近刀州。神聖題前字。千人看不休。○有巖曰靈雲。唐蒲景珣家於此。巖前爲居室。至者不知其爲巖也。在蟠龍山下。有洞。人入之。履地作鐘聲。李暹詩云。路轉層岡十里餘。武陵傳者亦難如。昔年煉藥仙人室。今日鑿霞道士居。洞外蟠桃開錦繡。巖前石溜漱瓊琚。猗與靈氣爲時雨。可惜闔經闕不書。○有樓曰清風。宋蒲宗孟左丞建。其家多書。剏此樓以貯之。嘗作訓戒子弟曰。寒可無衣。饑可無食。書不可一日失。○有院曰慈光。寇平仲過新井慈光院看海棠詩云。暄風花雜滿欄香。盡日幽吟歎異常。翻笑牡丹虛得地。玉階開落對君王。○縣東南與蓬州相接三十里。爲禹跡山。志云。禹治水所經也。山頂平衍。有小石泉。鑿石爲像。層樓覆之。宋紹興間。何汝賢有禹跡山院記。○五十里爲離堆山。即古新政縣地。蜀三離堆之一也。唐顏真卿論蓬州長史來遊。作磨崖記。謂此山斗入嘉陵江。直上數百尺。形勝絕

臨。上崢嶸而下洄洑。不與衆山相聯屬。故曰離堆。志云。東西有石堂。故京兆尹鮮于仲通與弟叔明所鑿。堂北有盤石。石上有九曲流杯池。○歐陽修集古錄云。新政縣磨崖記。唐顏真卿撰併書。以寶應年立碑。有魯公祠。宋馬存記云。上元中顏真卿爲蓬州長史。過新政作離堆記四百餘言。書而刻之石壁上。字徑三寸。雖崩壞剝裂之餘。而典刑具在。使人凜然。元符三年。余友強叔來尹是邑。始爲公作祠堂於其側。求余文以爲記。○輿地紀勝云。新政縣大歷碑在江岸之次。顏魯公書碑傍有佛老孔子像。像傍又有二小記。皆大歷中物。按此所謂三教院也。碑目云。鮮於氏兩神道碑。一在三教院厓上。一在墓田。其文與書皆出顏魯公。又有獎諭仲通碑。亦在墓田。○志云。新政縣十里對江報本院。鮮于仲通叔明兄弟葬。其傍有韓雲卿所撰墓碑。猶存。其字儼然。無剝落。○按鮮于之後。宋時皆家于此。景祐間鮮于侁登第。爲轉運判官。值行新法而民不擾。司馬溫公稱之曰。子駿福星也。又有十世孫元卿。同知縣。范百祿州掾。任昱觀魯公刻題名。○其與離堆相近。曰仙鳳山。志云。在縣南五十里。上有七曲臺。始落成時。地上土痕成仙鳳二字。大數丈。○碑目云。宋新政令裴迪。唐丞相晉公之後也。因家于此。尙收得晉公像及累任告身。自撰真贊。並存。○

### 廣元縣

廣元。蜀口古今所必爭之地。宋寧武軍志云。前接關表。後據劍門。烏奴山祠堂記云。郡壤故錯羌氏。與上庸百濮。微髡。彭盧。俱實一大都會也。元改爲廣元。路碑云。在易曰。廣大配天地。在春秋謂一爲元。以示張

大之意。○縣治在烏奴山東。晉壽綿谷二縣皆其處。志云。烏奴山一名烏龍山。在廣元西二里嘉陵江岸。峭壁如削。有洞不可上。昔李烏奴于此修寺。因名。○按北史王元邁傳。亡命李烏奴作亂。梁部陷白馬戍。元邁率東從七八百人討之。不克。慮不自保。乃使人僞降烏奴。告之曰。王使君兵衆羸弱。棄伎妾於城內。攜愛妾二人去。已數日矣。烏奴喜。輕兵襲州城。元邁設仗擊破之。烏奴挺身走。太祖聞之曰。元邁果不負吾意遇也。此烏奴之始矣。○今之臨清門川主廟。卽唐皇澤寺也。九域志云。利州都督武士護生武后于此。因賜寺刻其眞容。李商隱利州江潭詩。註感孕金輪。乃武則天事也。詩云。神劍飛來不是鎗。碧潭珍重駐蘭橈。自攜明月移燈疾。欲就行雲散錦遙。河伯軒臆通貝闕。水宮帷箔卷冰綃。他時燕脯無人寄。雨滿空城蕪葉彫。蓋后母感漑龍而有孕也。○縣北卽黎州城。梁大同置。後魏之益州。隋之義成郡。皆理於此。宋唐庚詩。黎州酒貴無金汁。解盡寒衣總一吸。○南有刀環山。益州記曰。葭萌縣南十里有刀環山。赤銅水出焉。○東卽望鄉臺。去縣三里。武元衡送柳郎中詩。望鄉臺下秦人去矣。○其見諸經傳者曰。嶓冢山。原爲漾水。卽西漢水也。曰潛水。出綿谷之龍門山。禹貢岷嶓既藝。沱潛既道。漢書注云。潛水從漢中沔陽縣南流。至梓潼漢壽縣入穴。中通岡山下。西南潛出。今名複水。舊說卽禹貢潛水也。○曰允山。爲平蜀廢縣。卽利州衛治。史記尤侯爵允山。出舞衣。○曰丙穴。地在沔水之南。出魚肥美。詩疏云。沔南丙穴是也。○其見諸雜記者曰。白馬山。寰宇記云。張平子仕漢爲侍中。少時學業于此。○曰明月峽。晏殊類要云。三峽謂巫峽。巴峽。明月峽也。惟明月峽乃在此郡界。○曰潞溪。事林廣記云。天下十二溪。有上眞廟爲聖眞居。

之。滌溪其一也。在利州。又云。漢江水帝廟爲真龍宮。在漢坪石。○其驛路有曰問津。志云。昔孔明行師于此問津。故名。按卽古嘉陵驛也。在治西一里。後魏嘉川縣設焉。唐姚鵠嘉川驛樓晚望詩。樓壓寒江上。開簾對翠微。斜陽諸嶺暮。古渡一僧歸。窗迴雲衝起。汀遙鳥背飛。誰言坐多倦。目極自忘機。文同嘉川道中寄周正孺詩云。草木春深處。山川雨過時。清佳常滿目。衰倦敢忘詩。好尙舊若此。飄零今比誰。如畫堂上。日日聽新詞。又嘉川驛詩云。嘉川之西過新棧。幾里朱欄繞青壁。我行落月尙在水。水影照人襟袖白。繁英雜綴修葛上。綠錦纈帶垂百尺。清香滿馬去未休。賴爾春風慰行客。○鮮于侁爲利州轉運使。文與可有寄子駿運使詩云。西鄉巴嶺下。險道入孱顏。使騎到荒驛。野禽啼亂山。問民青靄裏。訪古白雲間。幾日南城路。新詩滿軸還。有靈溪寺在嘉川縣中。碑曰。黃山谷紀行碑在嘉川縣靈溪寺。是矣。運使子駿題以五言曰。桐軒。竹軒。柏軒。巽堂。山齋。燕閒亭。會景堂。寶峯亭。凡八景。其詩略云。金城環雉堞。雲屋瞰閭闔。雙林聳江右。九隴視天外。按金城者。縣北四里金山是也。滌溪環其右。九隴者。去邑西二十里。山環九十九峯。如劍戟之排列。昔漢祖駐蹕于此。有漢王寨。其時司馬君實。范景仁。文與可。蘇子由。皆有詩。溫公年譜隨其父利州轉運使遊此。有洞在焉。○南去有望喜驛。今廢。元稹詩云。滿眼文書堆案邊。眼昏侵得暫時眠。子規驚覺燈又滅。一道月光橫枕邊。李義山詩云。嘉陵江水此東流。望喜樓中憶閬州。若到閬州還赴海。閬州應更有高樓。其二云。千里嘉陵江水色。含烟帶月碧於藍。今朝相送東流後。猶自驅車更向南。○北爲棧閣道。劉禹錫山南西道新修驛路記云。我之提封。距右扶風觸劍關。千一百里。自散關抵褒



城次舍十有五。自襄而南。踰利州。至于劍門。十有七。道塗次舍。可見于此。又云。棧閣凌虛下臨。谷呀層崖。峭絕。朽木頹鐵。因而廣之。限以鉤闕。狹。經深。陁。從而拓之。方駕從容。棧閣之制。亦可想也。歐陽詹棧道銘。斜根玉壘。旁綴青泥。總唐蜀之道塗。統岐雍之康莊。○其最險者爲石欄橋。方輿云。自城北至大安界。管橋欄閣共萬五千三百六十一間。惟石欄。龍洞二閣著名。馮鈐幹田云。其他閣道雖險。然在山腰。亦微有徑。可以增置閣道。獨惟此閣。石壁斗立。虛鑿石竅。而架木其上。比他處極險。沈佺期過蜀龍門閣詩。龍門非禹鑿。詭怪乃天功。西南出巴峽。不與衆山同。長竇互五里。宛轉復嵌空。伏湍照潛石。瀑水生輪風。流水無晝夜。噴薄龍門中。潭河勢不測。藻葩垂彩虹。我行當季月。烟景共春融。江關勤亦甚。巘嶸意難窮。誓將息機事。煉藥此山東。岑參赴犍爲經龍閣道詩。側逕轉月壁。危梁透滄波。汗流出鳥道。膽碎窺龍窩。驟雨暗溪谷。歸雲網松蘿。屢聞羌兒笛。厭聽巴童歌。江路險復永。夢魂愁更多。聖主幸典郡。不敢嫌岷峩。杜甫龍門閣詩。清江下龍門。絕壁無尺土。長風駕高浪。浩浩自太古。危塗中綦盤。仰望垂線縷。滑石欹誰鑿。浮梁曩相拄。目眩隕雜花。頭風吹過雨。百年不敢料。一墜那得取。本志。北十里千佛崖。卽古龍門閣。先是縣崖架木作棧而行。後鑿石爲千佛像。成道衢矣。○唐蘇頌利州北題佛龕記云。吾見夫山。逶岷。嶓。水合江。沱。山兮水兮。路窮險鬱。南望兮此情多。吾又見像法住世于巖之阿。百千萬億兮相觀我。載琢載追兮吾匪他。伊古昔兮。焦呂不懼。必忠信兮。艱危若何。故吾因空而卽有。孰不迴向以檀那。行矣些。陽景頽兮。翠改色。陰風起兮。自增波。○小許公利州北佛龕前重于去歲題處作詩云。重巖載看美。分塔起層樓。蜀

守經塗處。巴人作禮朝。地疑三界出。空是六塵銷。臥石銷蒼蘚。行厓覆綠條。歲年書有記。非爲學題橋。○按龍門山亦云。葱嶺山梁州記云。葱嶺有石穴高數十丈。其狀如門。號爲龍門。又云。山東南有玉女山。山上有一石穴。中若房宇。有玉女八人不出。穴前修竹。下有石壇。風來動竹。掃壇如箒。又云。山北有燕子谷。中有好磬石。卽志所稱石燕山。○又北三十里有大小漫天嶺。極高峻。羅隱詩云。西去休言蜀道難。此中危險已多端。到頭未會蒼蒼色。爭得禁他兩度漫。高駢詩云。萬水千山音信稀。空勞魂夢到京畿。漫天嶺上頻回首。不見虞封淚滿衣。嶺上有寺。元稹題漫天嶺智藏師蘭若云。僧臨大道閱浮生。來往憧憧利與名。二十八年何限客。不曾聞見一人行。又漫天嶺贈僧詩云。五上兩漫天。因師懺業緣。漫天無盡日。浮世有窮年。○又北五十里爲朝天嶺。路徑險絕。方輿云。舊路在朝天峽棧閣。後開此路。人甚便之。文與可朝天嶺詩。嶺若畫屏隨峽勢。水如衣帶轉巖陰。按今設有沙河驛。亦沿江行。其曰朝天者。水驛也。○四十里爲潭毒關。志云。潭下淵底有一鐵索。見則兵動。向有御前軍屯此。以捍蜀口。○又二十里爲神宣驛。卽古箒筆驛也。相傳武侯出師駐此。唐杜牧詩。永安宮受詔。箒筆驛沈思。李義山詩。魚鳥猶疑畏簡書。風雲長爲護儲符是也。神宣驛者。世傳二郎神持劍逐蹇龍過此。因名。○又八十里爲九井驛。志云。琳瑯九井。以琳瑯山出泉九處。濺石若琳瑯也。碑云。九井灘舊時有蝦蟆。青牛。青犛。三巨石。伏水爲舟楫。害。渣。閭。間。利。路。提。刑。張。龔。容。募。降。人。再。得。者。治。械。如。桔。槔。狀。治。鐵。爲。杵。重。千。五。百。斤。拋。擲。半。空。而。下。三。石。俱。碎。化。險。爲。夷。有。碑。刻。剝。落。其。上。爲。七。盤。關。乃。秦。蜀。分。界。處。唐。沈。佺。期。詩。獨。遊。千。里。外。高。臥。七。盤。西。山。月。臨。窗。近。天。河。

入戶低。後人因立爲天河關。顧非熊天河關卽事云。萬壑襄中路。何層不架虛。徑雲和巖起。樵徑帶畚餘。巖旒牽垂果。湍禽接躡魚。相逢雜艇處。塢裏有人居。

昭化縣

葭萌地入廣元。而其縣理在漢爲漢壽。晉爲晉壽者。則屬昭化。本志云。縣北百八十里施店驛。卽古葭萌驛。驛卽古縣址也。未通保甯路時。自秦入蜀。罔有不由昭化者。唐張說再使蜀道詩云。渺渺葭萌道。蒼蒼褒斜谷。烟霞爭晦深。雲山共重複。古來風塵子。同眩望鄉日。芸閣有儒生。輶車倦馳逐。青春客岷嶺。白露搖江服。歲月鎮尋孤。山川俄反覆。魚游巖深水。鳥遷巖喬木。如何別親愛。坐去文章國。蟋蟀鳴戶庭。蠶娟網琴筑。○北接廣元。則龍門石櫃白水。景谷之地。彼此參錯。海內東經云。白水出蜀。而東南注江。郭景純註。水微白濁。今在梓潼白水縣。源從臨洮之西。傾來經沓中。東流通陰平。至漢壽縣入潛。梁州記云。城西南百八十里白水關。卽李固解印綬處也。蜀志先主斬楊懷。高沛于此。○元和郡國志云。景谷縣西南二十五里有白馬山。孔明造木牛流馬處。○南接劍門。則有大劍城。元和志云。卽秦張儀司馬錯伐蜀所由路。又謂之石牛道。有小劍城。注水經云。小劍城去大劍城三十里。連山絕險。飛閣通衢。故謂之劍閣也。是唐益昌縣地矣。又有小劍故城。在益昌縣西南五十里。其山截野橫天。奔峯倒地。挾楚包漢。呀秦擁蜀。劉先主以關道至險。又置閣尉焉。岑參和杜相公發益昌詩云。相國臨戎別帝京。擁麾持節遠橫行。朝登劍閣雲隨馬。夜渡巴江雨洗兵。山花高朵迎征蓋。川柳千條拂去旌。暫到蜀城應計日。須知明主獨持衡。○

利州淳化帖跋云。慶元中四川總領權安節以淳化戲魚帖并釋文重刻石于此寺內。石今已不存。權繼江州德安人。其家猶有當時墨本甚多。釋文字畫較臨江帖爲稍大云。○劍領中有馬鳴閣。蜀志云。先主使陳戒絕馬鳴閣。魏武聞之喜曰。此關過漢中之陰平。乃咽喉之要路。○又有白衛嶺。唐明皇幸蜀過此。見元元皇帝騎白衛而下。示取祿山之兆。遂封嶺神白衛公。唐詩紀事載明皇幸蜀。登白衛嶺。眺覽良久。歌李嶠山川滿目淚沾衣。富貴榮華能幾時。不見只今汾水上。惟有年年秋雁飛。詩曰。李嶠真才子也。○有桔柏潭。今柏林驛是。驛有古柏。土人呼爲桔柏。故以名潭。志云。桔柏渡舊傳其津有二。魚負舟往往沈溺。一道士求渡。操舟者難之。道人云。吾乃葛仙翁。命取石書符令。舟人佩之。至中流。二魚果出。擲符水中。少頃。浪息。次日二魚死于龍爪灘下。按唐書元宗幸蜀。次益昌縣。渡桔柏江。雙魚夾舟而迎。從臣以爲龍也。杜甫桔柏渡詩云。青冥寒江渡。駕竹爲長橋。竿溼烟漠漠。江水風瀟瀟。連窄動嫋娜。征衣颯飄飄。急流搗鷓散。絕岸竈盪漾。西轅自茲異。東逝不可要。高通荆門路。闊會滄海潮。孤光隱顧盼。遊子悵寂寥。無以洗心胸。前登但山椒。



# 蜀中名勝記卷之二十五

## 保甯府二

巴州

山曰大巴。小巴。世所稱九十巴山也。志云。大巴之險。過子棧道。下逼漢中。又云。小巴之南。即古巴國。繫年錄云。巴之北境。即米倉山。下視口元出兵之孔道。即今關堡相望矣。○輿地廣記云。巴江源出大巴山。至當州東南。分爲三流。而中央橫貫。勢若巴字。通志云。清江源出廣元縣前通平鎮。歷舊恩陽縣。至州。與巴江合。寰宇記云。清水一名白石水。即向白石縣之所理也。李白巴水歌云。巴水急如箭。巴船去若飛。十日三十里。郎行幾口歸。嚴武巴江喜雨詩云。連夕霧霽。類建瓴。送將涼意滿郊坰。江邊萬口大半綠。天外一峯無限青。卻信神龍元解事。豈容旱魃更爭靈。從今懷抱如冰釋。閉閣燒香伴六經。鄭谷巴江避亂詩云。亂來奔走巴江濱。愁客多於江徼人。朝醉暮醉。雪開簪一枝。兩枝梅探春。詔書罪己方哀痛。鄉縣徵兵尙苦辛。鬢禿又驚逢獻歲。眼前渾不見交親。○華陽國志。鄉末劉璋以墊江以上爲巴郡。江州至臨江爲永甯郡。胸臆至固陵爲巴東郡。而巴遂分矣。志云。此居其中爲中巴。宋洪邁丹梯書院記云。今之巴。非昔之巴也。本志。忠義廟祀漢嚴顏。張飛。名宦。載王濬。恐但沿巴之名。然按碑目。嚴將軍廟記。在巴州城西門內。唐貞元元年。韋曾文。則祀之。亦非一日矣。惟嚴武。薛逢爲巴州守。則今之巴也。○杜甫寄馬巴州詩云。勳

業終歸馬伏波。功曹非復漢蕭何。扁舟繫纜沙邊久。南國浮雲水上多。獨把魚竿終遠去。難隨鳥翼一相過。知君未愛春湖色。與在驪駒白玉珂。嚴武巴嶺答杜二見憶云。臥向巴山落月時。兩鄉千里夢相思。可但步兵偏愛酒。也知光祿最能詩。江頭赤葉楓愁客。籬外黃花菊對誰。跋馬望君非一度。冷猿秋雁不勝悲。鄭谷巴賓旅寓寄朝中從叔云。驚秋思浩然。信美向巴天。獨倚臨江樹。初聞落日蟬。衰榮悲往事。漂泊念多年。未便甘休去。吾宗盡見憐。王周和杜運使巴峽地。暖節物與中土異。黯然有感詩云。垂柳參差破綠芽。此中依約欲飛花。春光處處傷離思。何況歸期未有涯。其二云。始看菊蕊開籬下。又見梅花寄嶺頭。攪轡巴西官局冷。幾憑春酒沃鄉愁。張禕巴州寒食晚眺云。東望青天周與秦。杏花榆葉故園春。野寺一傾寒食酒。晚來風景重愁人。任約和巴州羊刺史韻云。鄉關日斷隔咸秦。又向巴江度一春。可惜清明好時節。看花空憶洛陽人。○治內有春風樓。秦坦記云。奇峯森列。躍入青漢。高下眩轉。隔闔風雨。又有擊甌樓。唐張禕詩。駐旌元帥遣風在。擊缶高人逸興酣。水轉巴文清溜急。山連蒙岫翠光涵。宋馮介詩。坐上擊甌清似玉者此也。碑目云。擊甌樓。唐中和四年尙書右丞相戶部張禕記賦。在樓下。按擊甌樓賦。實張曙作也。序略云。宋玉九辨。悼余生之不時也。甲申竄身巴南。避許潰師。郡刺史甚懼。接眷一日。登郡南樓。下臨巴江。饌酒簇樂。以相爲娛言。間有馬處士擲善擊甌者。至請卽清譚。爰聘妙絕。處士審音以知聲。余審樂以知化。斯可以抑揚放淫。頓挫匏竹。運動節奏。出鬼入神。太守請余賦之。余曰。不圖爲樂之至於斯。酒酣。珥筆乃爲賦云爾。宋皇祐初。知軍事馬預作記。以爲廳壁。有唐御史裴禕會昌四年記。宋庶子創建東

樓。此其事也。○碑目云。州內有紫極宮。天王堂。俱唐大中元年軍事判官進士蕭珣記。有折柳亭。宋嘉祐五年太守鄭淵賦折柳詩十絕句刻石。有巴南十七景詩。宋知閬州軍蘇欽以閬中望江南十首記郡景。別駕彭永仍賦巴南十七景答之。○碑目又云。唐會昌四年。巴州刺史裴禕修摩宇記。巴南新置屋宇什物石記。俱在郡廳。○城外東龕。在字江東岸巾子山下。卽唐兜率寺。寺廢碑存。○西龕有古墨巖。在懸崖上。有壯觀二大字云。是李太白筆。有流觴亭在西龕寺。碑目云。唐乾元戊戌嚴鄭公武所創。大歷間盜起。地遂廢。開成丙辰。刺史唐元封復修。蓋取羊士諤流杯十四詠以自序爲證。又云。有嚴侍御暮春五言刻亦在寺內。有唐人題西龕櫻桃。其名磨滅。按州志城北三十里鼓樓山之旁。有玲瓏山。山頂有泉。出小石如櫻桃。自然有竅。可以穿縷。村兒女以爲瓔珞。名曰櫻桃珠。如此則西龕所詠。爲石爲果。未可知也。○巖武題龍日寺西龕石壁詩云。聖澤久潤物。皇明常燭幽。恩從祥風翺。德與和氣遊。報國建香刹。開巖臨僻州。天長而綠水。地迴起朱樓。尋異遍衆壑。坐禪逢一丘。永懷根本妙。誓以身心修。奇色豔草滿。珍名嘉樹稠。遠江崩濤喧。複澗微雨休。嘹唳猿響谷。參差峯入流。碧煙曳篁徑。白日懸沙洲。泛海謝安石。吟詩王子猷。揚雄愛清靜。山簡多優游。性分固有適。蒼龜何足求。神閒孤臺月。目送千里舟。攜手逸羣品。浩歌逸悠悠。山情慕禽尚。詩格警曹劉。旌能舉滯時。選異拔奇秋。鼎食當自致。巖棲難久留。嗟余參符守。漢主遠分憂。往往行春到。開鐘散客愁。○朱尹游西龕詩。朝出城南門。循溪陟西嶺。西嶺鬱岩峽。均隱金僊境。懸崖古墨存。白日蛇龍髯。嵐霏溼空濛。泉澗咽清冷。汲之淪山茗。數啜心醒醒。城郭瞰在襟。三墩聯九井。四野



各嬉煦。犬鼠亦無警。豈曰予所能。帝德實網領。獲茲簿書餘。怡情對斯景。○任約題西龕詩。門徑森寒柏。小橋穿竹溪。澄江朱檻北。晚照碧巖西。修竹清泉逗。高楠邃閣齊。虛廊面青壁。危棧跨丹梯。絕頂舒平席。遙峯出半圭。軒窗俯星斗。襟袖拂雲霓。甘露春膏浹。濃嵐晝靄迷。嶺猿悲夜嘯。谷鳥響晴啼。唐寺南龕近。巴城東郭低。杯流故池水。崖刻古人題。酷暑不能到。清風如鎮攜。何年脫鞶鎖。來此養真棲。自註。今歲甘露降于龕前松柏也。○南龕有廣福寺志云。唐時建有乾元年間契書碑。碑目云。唐古佛龕石刻。在城南二里。大書乾元三年山南西道嚴武奏。臣頃牧巴州。其州南二里有古佛龕。舊有鐫佛五百餘。伏望特賜洪名。敕以光福爲額。唐詩紀事載嚴武史俊楠木唱和詩。碑目云。刻在南龕。又云。鄒昂陪嚴使君暮春五言二首。在南龕。詩甚壯麗。又云。南龕題詩石刻。在州南二里之廣福寺。自唐迄今。名公題詠皆存。又云。南山記。唐中和四年尚書右丞相戶部張禕題。圖經云。定僧在南龕上。以漆漆其真身。龕置石壁。不知何時人。惟嚴武奏乞山南寺額表云。願度有道行僧。永以住持。俾其修習。意亦唐以前人也。本州志云。丹梯書院在南龕山。因其山重疊聳秀。有若丹梯而名。舊志載杜甫曾讀書于此。而建後經兵燹。宋紹興二年。知州趙彥戒重建。元季復燬。惟古碑尚存。唐進士楊興義有和杜甫詩云。莫嫌袍紫歸家阻。且慶豐年雅俗安。又題秋風詩云。霜風一夜將紅葉。換盡江頭萬木青。通志云。南龕有雲間閣。杜甫寄嚴侍御詩。遙知簇鞍馬。回首雲間閣者此也。○宋權維重修雲間閣記云。閣在南龕絕頂。寂自李唐。歲久敝壞。寺僧請易而新之。不閱月間。碧瓦朱甍。雕梁畫楹。突然聳出于羣山之表。暇日置觴倚檻周覽。巖壑萬狀。雲煙出沒。朝暮

變態會無窮已。則昔之隱伏晦藏而不見者。今若神驅而出之。皆離潛出幽吐奇露彩。章章于目前也。○羊士謬遊南岳詩云。物外真何事。幽廊步不窮。一燈心法在。三世影堂空。山果青苔上。寒蟬落影中。歸來還閉閣。棠樹幾春風。趙公頌和郭使君題南龕韻云。南龕幾百年。古木闌雲崦。崖傾千仞垂。路懸一線險。飛狖喜層巔。羸駉怯虛壘。楓葉紅爛斑。松蓋翠搖颺。石鏡風雨剝。殿古丹青儼。拂拭坐空巖。摩挲觀翠珠。江勢從何來。斗起不以漸。憑危意欲飛。眺遠目驚覩。鳥鳴山更幽。綠淨衣好染。煙際漾漁舸。風前亂霜縷。縱賞有餘歡。高懷無一慊。尺璧非所寶。白圭焉受玷。入蜀真可念。得郡亦云忝。雖遠長安日。猶勝陽山貶。平生足疎曠。寧復事拘檢。佳時方一來。薄日已半掩。雨餘煙草深。月墮山樓懸。珍重詩律高。詞獲神光閃。民樂樂時康。吾憂憂歲歉。殷勤謝吳霜。歸鬢不堪點。○相連有美農臺志云。在治南二里。高如一小阜。唐史高宗上元二年。桓宣於此勸農而築。今廢址不存。○有唐太子賢墓志云。在治南二里。高如一小阜。唐史高宗上元二年。夏四月。立雍王賢爲太子。永隆元年八月。廢爲庶人。開耀元年冬十一月。徙於巴州。中宗嗣聖元年。太后殺故太子賢。太子嘗作黃瓜臺辭云。種瓜黃臺下。瓜熟子離離。一摘使瓜好。再摘令瓜稀。三摘尙云可。四摘抱蔓歸。當時有銘其墓者云。斷一指得天下。凡人不可爲。殺愛子。竊帝位。武后行之。噫嘻。賢之遺隧。萬世之元龜。○北龕志云。在北山一里有白馬泉。九州要記云。卽黃牛山有穴。白馬奔出。故名。碑目云。王望山舊名北山。山半石壁隱出老君像。唐人爲賦。北山老君影迹詩。圖經云。王望。字子濛。開元初。嘗與元宗遇。俗傳爲晉時人。且跨白驢入長安市。暮復回。勝覽云。王望山在江之北岸。自郡城絕江而登山。高二里許。

巖徑極險。占一郡之勝。相傳王真人得道此山。真人名蒙。故名王蒙山。舊志云。唐玄宗控白驢至此山。望見京闕。曰。此去京師不遠。故名王望。志云。龍洞在王蒙山巖腹間。楊義仲記云。左曰東洞。門如鑿鑿。高幾三百尺。巖若太儀之甍。兜率之宮。又百餘步。則空穴開明。有琉璃洞及釋迦像。石犬石鳥。凡石之詭形怪狀。莫不畢獻。又六七里。適後山之根。右曰西洞。其奇怪亦亞于東洞。楊虞仲遊王望山詩云。白雲環其巔。流水遶其趾。古木與雲齊。偃蹇龍蛇似。飛仙渺何許。風馭難莫企。手種空流傳。歲月尙誰記。化鶴空歸來。某樹還可指。仙凡隔咫尺。世人謬千里。丹竈空伏火。河車爭挽水。學仙仙益遠。槁死空山裏。我欲問真訣。豈憚航一葦。便當捐冠簪。超然謝塵滓。仙人拍手笑。外物儻來耳。○有君子泉。宋黃麟則銘云。有冽者泉。達於泉南。浩然天中。其流無窮。於暑而涼。於冬而溫。豈其矯耶。有變者存。州志云。未詳所在。惟治東四十里。廢會口縣。西朝陽巖有之。其泉自巖石流中。清冽無比。上鑄有君子泉三字。宋人來官多遊於此。石刻具存。今附錄于後。○嘉定壬申夏五月朔。邑令會稽宋拱國尉錦屏解于永清避暑來集。拂巖雲。弄泉玉。倍有山水之樂。所謂意不在酒也。○銅梁曹閔龍。馮伯規。何孚望。古邨李忠父同遊此。汎舟酌巖下。日西乃歸。淳熙己酉閏月十有二日。○巴州都監權縣尉義渠毛仲子中。通江會口縣巡檢陸峒王願天啓。通江縣尉長安永延年仁叔。淳熙八年十月二十一日。同遊朝陽巖。○邑宰蓬池何渙之亨通。邑尉漢中李天竦子莊。以閏正月下澣日遊會口。故縣基野。飲于修篁古木之下。絕江少西。息朝陽巖。酌君子泉。流連至暝而歸。昔乾道九年也。○有凡水方輿云。水形如几。奇章縣臨之。志云。舊奇章縣在州東八十里。陸游

過奇章僧刹詩。轉盡窮山入翠微。松陰拂拂冷侵衣。長天秋水自一色。斷岫孤雲空四飛。客路何年閑馬足。蟠溪平昔負漁磯。僧窗不得吟清晝。又擁籃輿到夕暉。○有平梁城。宋澹祐都統張實創築。取掃平梁州之義也。下有平梁洞。妙通居士羅南仲所居。有石牀石竈。按舊城記云。平梁山頂有地數十畝。居民數戶在上。住種納稅矣。志云。在州西二十里。○有化成縣。輿地紀勝。化成縣。鳳谷山之上。有要羊觀。熙寧中。通守楊黃中記云。唐明皇與葉法靜神遊於羊蒙山。忽思參羊山靈。遽以羊進。詔于其地立觀。今名廣福。志云。在州西四里。唐喬琳巴州化成縣新移文宣王廟。頌云。殷之系聖。周之斯文。生我夫子。世教之君。周徵唐興。千祀于茲。春秋祭菜。俎豆其時。維巴之南。亦揭其宇。盧公宰邑。人之父母。假我升堂。陋彼環堵。爰就爽塏。長松之下。公之志思。人亦勤止。變此夷俗。參乎孔里。學者行之。造次于是矣。○有恩陽縣。碑目云。唐貞元石刻。在恩陽縣南渡江。登石梯數百級。上義陽舊縣治。石梯之側。懸崖上有刻字云。唐貞元四年十月二十日。再修此路。餘皆磨滅不可辨。又云。大曆初。韋應物送令狐岫宰恩陽詩。亦刻石于縣之驛亭。○小說。撫遺云。古靜州知州王鷲子。讀書于義陽山。忽一女子前。自稱爲張笑桃。題紅梅詩于壁。墨跡未乾。遂不見。人疑爲梅仙。以山屬平梁。故志於此。詩云。南枝向暖北枝寒。一種春風有兩般。頻上高樓莫吹笛。大家留取倚欄杆。按恩陽卽義陽也。詳見通釋。○又北面百里有大牟縣。碑目云。在恩陽縣西北百里。有斷碑刻云。南隆州大牟縣界十里。北集州難江縣界五里。縣令李昱立。○按會口。奇章化成。恩陽俱梁普通年置。大牟。唐武德置。屬集州矣。

通江縣

治在古壁州壁州者以城西南壁山爲名。志云壁山在縣南一里有嘉祐寺。唐節度使鄭畋建。至今人呼爲鄭公山寺。碑曰云。通江縣一里龍興寺碑。唐壁州刺史鄭凝績之父鄭畋作。乾符中凝績侍養其父畋于壁也。又云壁州山寺記。大唐中和歲次癸卯。丞相鄭畋撰略云。壁山境勝之所。鬱密喬樹。葱蒨景態。元月澄日。搜索奇秘。得泉洞于西南。維鑿石架篁。繚繞登降。高懸旗旛。疏爲泓沼。峭壁危棧。遂來商旅。乃于舊亭東隅。建構佛宇。召僧匡信主其事。多出私財以益之。爲堂三間。徘徊爲門。爲廊二十六間。高下還合。壘飛鱗次。廊外爲僧房。庖廚數十間。又立真室文之高界。爲左右翼。愚與凝績泊猶子昭允俱寫形于方丈中。負山面江。雄壓勝地。日月先照。風雨所交。鐘梵松篁。鏗鏘滿聽。千家臺棟。歷歷在眼。晨烟夕豔。耀燦戶庭。鷗鷺篙榜。以資景物于時。行朝卿士。或寄寓於諸州。給事中孫君儲。秋曹正郎鄭君損。皆柅車此地。適以同筵。書琴棋畫。隨後間作。自仲春至于維夏也。本志又載其碑陰云。僕至郡觀。舊碑三埋于戟扉前之泥中。遂飭役兵出而滌之。其一斷而磨滅者。乃唐鄭公台文。修山寺記也。始讀之。文多訛缺。及其完處。令人愛歎之不已。而又得公進退之詳。按僖宗紀并公傳。各亦舛略。此公文是可信者矣。惜其湮沒。遂命筆正訛補缺。離句綴意。解凡六十七字。斬石命僧守丕書之。刻而立于州學。庶幾永永。記成于唐中和甲辰孟秋二十有三日。重刻於大宋之嘉祐癸卯孟秋中澣。凡三甲子云。太常博士俞斌君玉序。按此則嘉祐寺以重修得名者。原名爲龍興也。○本志又載鄭相遺踪在壁山下石澗中。梯石齒。披煙蘿。入幽巖。苔

犇間有字云。檢校司徒守太子太保鄭畋門吏給事中賜紫金飛魚袋孫儲。尚書刑部郎中賜紫金緋魚袋鄭損。中和三年十二月八日。收訪泉石。偶題于此。僧匡信看題榜。又刻有畋明年孟秋念七日與姪昭允至此訪別一段。是其碎金斷壁。尚有可尋者。○碑目云。辟使君布政碑。唐乾符年間。璧州刺史裴真辭作。乾符間立。又云。璧州神廟石刻。在今通江縣北四十步。有元光三年制書。本志云。元妙觀右星精石。唐人刻篆甚多。民間琢毀其半。俱在治內。唐推官鄭損星精亭詩云。星沈萬古痕。孤絕勢無鄰。地窄少留竹。空多厭占雲。釣鐘和雨看。樵斧帶霜聞。莫惜尋常到。清風不負人。○方輿云。歌籟山與璧山相對。上有石鼓。聲聞數里。連聲卽雨。通志云。通江縣南有秋錦山。隔江望之如錦。與璧山相連也。○璧山之上。有玉鞭池。志云。昔有人拾玉鞭於此池內。因名。按朱慶餘送璧州劉使君詩。江分入峽路。山見採鞭人。卽詠此事。有鳴鹿祠。五代史王建爲璧州刺史。後僭位。永平三年。麟見於璧山。二鹿隨之。此立祠之始也。宋皇祐初。太守胡俛記其事云。朝廷有大詔令。官屬有遷罷。鹿必鳴。鳴於山陽爲福。鳴於山陰爲禍。靈驗如符。山下枕諾水。諾水卽宕水所激。聲若呼諾。後魏諾水縣。以此得名也。○志云。縣東南隅有公山。喘江形如公字。舊傳張道陵七世孫刺集州。於此上昇。絕頂有張康侯廟。○舊志載孫思邈濯藥於縣東十里石澗之畔。名爲孫氏池。亭。石窳丹白尙存。按碑目云。孫氏園在通江縣二十里龍灘之側。唐末監察御史盧重阜率璧州刺史辛巢父等六人分詠賦詩。有石刻存。宋米仲賢孫氏池亭詩云。密林抱清溪。微徑入煙靄。亂流縈石轉。浩浩兼萬派。披蘿出潭上。結字在竹外。坐嘯孤雲還。開軒遙相待。崩崖臨絕壑。幽趣驚盼睐。滄浦

滯其餘。下注陰壑瀨。道情留霜簡。詩興延皂蓋。賞逐景物偏。心期臨仙槩。日低迴岡後。鳥入寒林內。暝色交殘光。明滅郡木態。後之視今日。猶今視千載。永懷滄洲人。功成身將退。符陽縣令陸干城和云。斷崖青松林。林下翫輝草。一徑捫綠蘿。數里尋芳藂。巖開野人屋。結構憑孤島。石斷寒泉流。亭幽翠巘繞。櫻拳龍虎狀。宛若鬼神造。隔崖聞湍聲。當窗見夕照。巴南絕境處。勝似東溪好。萬籟清心胸。孤雲豁煩惱。罇邀聽馬客。寫物窮探討。琴匣閒時開。柴門不須鎖。孰云造化工。永與天地保。長揖謝王侯。塵紛徒浩渺。○本志又云。西十里有古佛龕。唐人題詠。風雨剝蝕。惟一碑粗可識。乃龍朔中壁州參軍蔡洪瓶。又一碑乃阿彌陀佛龕也。○縣之洞有二。一曰龍洞。志云。在西二百里。吳璣鄉洞。周圍二十餘丈。高三丈。深七尺。內有池殿。積瑩湛然。一曰蛇洞。志云。在北四百里。南壩寺。唐建也。每歲端陽前後。有蛇自柱礎間出。沿階滿室。大。小顏色非一種。然不爲害。昔人傳三萬四千尾。不可數也。按此卽巴蛇洞云。○礫有二。三。曰仙人礫。志云。在東三百里有石竇。可容百人。崖上刻公孫秀才讀書處。年代不可考。有山茶高數丈。相傳是唐時樹。一曰牛角礫。志云。在縣西三百里。金溪有石室。可容千人。石筍數十。自崖頂下綴。望之稜稜如牛角。俗呼爲牛角礫。按說文。礫。礪石也。此以形似得名。○古墓有二。一曰吳將軍甘寧墓。志云。在縣西百里。通志云。在通江縣西。露浴溪上。謂之甘谷。一曰向侖墓。志云。東六十里。大鐘山。獨起萬山中。如覆鐘。其下卽向侖墓。左龍池山。峭立插漢。蒼松偃蹇。有石池。龍漱注之。○古城關二。一曰得漢城。縣志云。東北百里。萬山中。崛起巖崖。四面峭絕。獨西南二徑。凌險轉折而上。誠一夫當關之勢。斷崖多前代遺蹤。可識。舊志載漢帝

據此以通餉道。石壁刻云。宋淳祐己酉季冬。大使余學士親臨得漢城山。視其形勢。而授都督制張實躬率將士。因險形壘。儲糧建邑。爲恢復舊疆之規。分任責者。總管王昌。金之福。鈐路張虎臣。司整杜淮。王安。杜時順。徐斯。李成。劉文德。劉清。梁福。陳寶。賀山進。李崇。制領郭俊。杜成。周仙周。○一曰桐柏關志云。在東北八十里。與樛林關相對。有關羽廟。相傳神曾守此。畊者往往得箭鏃。

### 南江縣

寰宇記云。難江縣後周天和五年置。以江水難涉爲名。通志云。國初始易爲南江也。南江出米倉山。經當縣前。下與巴江合。○碑目云。唐難江公山威惠廟記。天寶改元。田彥識撰。神乃漢張魯後。又云。唐李繼顏詩詞刻于郡廳。光化三年。中書舍人錢翊行撰。有城牙樓記。圖經以爲李楫文。有舊碑二。其一僞蜀廣政己未之記。其一天聖乙丑之記。○碑目又云。集州兩角山記。唐集州刺史楊師謀書。今在難江縣志云。南三里孤雲。兩角二山。王子韶詩。孤雲兩角。去天一握。有石刻。蕭何追韓信處。下有溪。是名韓溪。按孤雲兩角山及截賢嶺。俱在棧道。去縣二百餘里。其碑刻則移近縣耳。又有宋集州刺史張龜年回車院記。道士蒲善從勒石。○縣之勝者有潭。曰放生石。刻放生潭三字。水落方見。意亦唐刻也。其上鑄七佛龜。圖經云。乃唐張禕扈從僖宗入蜀時。經此所鑄。○有峽曰石鼓。碑目云。趙寅爲集州刺史。有石鼓峽記。在難江縣。○有石曰探梅志云。縣東北五里探梅石。亂石中有刻云。宋人少華陳祉。介卿浚儀。潘士政執禮。厭次來。高元敷攜樽探梅。靖康丙午閏四月歲望。○有渡曰莎鼻。碑目云。在難江縣。有唐集州刺史蘇味道題字。



○有灘曰洋灘。志云：縣北洋灘楊侍郎墓碑，字多蝕，碑座是菜玉，見存，但不知何代人。○有澗曰菑蒲。碑目云：菑蒲澗記。唐開成四年，集州刺史蘇味道題跡。志云：菑蒲澗在縣北一里，縣崖峻壁，石室空曠，有唐宋諸賢石刻云：自潭北入澗，行經此新開路，東不啻三百步，其間巨石壘倚，嘉木交映，空森復發，奇勢異狀，綠苔青蒲，印模履蹤，捫手探足，無非蒼翠幽禽，皓皓飛泉，渥渥若有異人，仙客鼓瑟吹簫於洞穴之中，使人心逸神暢，恍然忘歸。斯實方外之佳賞也。噫！自有此澗，杳無人蹤，豈異夫浮世之事，通塞有時耶？今鑿崖爲路，梯石爲徑，連延抵於碧崖盤石之東，窅其澗分之所，開成四年十月二十三日，武功男子記。僧宏真尋澗之迹，藏諸山房。○古碑刻云：有宋改元政和清明後一日，權縣事長安杜德機元發訪菑蒲之溪，薄尋其源，言探其樂，轉步而返，則樞衣碧巖，屏石而坐，解帶古牀，幄雲而息，然後歸，頗恨得此之晚。○大宋改元政和辛卯歲仲春月清明日，縣吏馮子茂典職長楊子山，邀同局中李二都、王四都、楊工四沿澗究菑蒲碑文，兩日方返，故題於碧巖三月十四日。楊嵩岳山書記。○廣都蔣城吳大年，古郫李椿，秦亭權師雄，大梁趙恂，閬中馮時周，谷米居，約以紹興十八年九月十有四日，訪古菑蒲澗，觀唐人武功子石刻，置酒碧巖溪，效柳子序飲，積其籌爲一題名，投之澗，或洄，或止，或沈，皆賞，惟直前無互滯，則免。坐客率三四十飲，笑歌諧嬉，日晡乃罷。畢成記。○紹興庚辰上巳，游菑蒲澗，飲於碧巖，效晉人祓禊故事，穎昌王芹，若渠韓慶孫，開封喬嘉，成都周瑞行，男夏卿，凡五人。○李異，李國用，楊義仲，勾成允，唐棟，淳熙甲辰正月晦，來時春日融明，熏風和暢，爲蘭亭之飲以歸。○嘉定壬申仲春，三城郭仲深攝事集山，清明後一日

遊菖蒲澗。扳尋古巖。眉山屠才叔小益劉溫叔。潼上楊珍父同來。○有山曰十二峯。方輿勝覽云。十二峯在難江縣四十里馬盤灣。巉巖聳秀。最爲奇觀。有客題詩曰。插立翠屏峯十二。爲君喚作小巫山。○有水曰明水。寰宇記云。明水在難江縣北五十餘里。水出硯屏林木山川之形隱於石間。○有古城曰平梁志云。平梁城遺址在縣西三百里。上有古寺龍池。淳祐間都統制張實遵。大使余龍學。指授規畫。率諸軍剏平梁山城。云取掃平梁州之義。坐據要地。壁立萬仞。天人助順。漢中在掌握矣。刻於石。○有橋曰五馬志云。李虎仙者。往來難江。通江二縣。縣人修五馬橋。工匠數十。虎仙於皮袋中出小釜。可容三升。以米麵食物納其中。炊之。以飼人人皆飽。○有寺曰柏院志云。縣南六十里柏院寺。唐高宗末年建。相傳爲章懷太子修行之所。有碑文剝蝕。○有宮曰紫微志云。唐賈真人居難江縣之紫微宮。白晝登仙。留詩壁間云。此後不知誰有分。壁間畱得上天梯。○有觀曰銅人志云。縣南隔江銅人觀。唐開元集州刺史李成裕奏設。肖像皆銅。初名紫極宮。有殘碑數行。開元二年兵部尙書牛仙客文。宋集州守楊方平重立石。又有碑刻載黃蓬石事略云。黃蓬石乃大蓬之仙者。性顛蒙。唯充薪水。偶汲於寺。見金瓶貯水。乃飲水而置瓶。是夕勞困臥。藩籬間醒。忽穎悟。能詩。蓬之名士無能出其右者。頃乃隱於大蓬。人不之見。○按玉堂閒話云。興元之南有大竹路。通于巴州。其路則深谿峭巖。捫蘿摸石。一上三日而達于山。行人止宿。則以緼葛繫腰繫樹而寢。不然則墮於深澗。若沈黃泉也。復登措大嶺。蓋有稍平處。除步而進。若儒之布武也。其絕頂謂之狐雲。兩角。彼中諺云。狐雲兩角。去天一握。淮陰侯廟在焉。昔漢祖不用韓信。信遁歸西楚。蕭相國追

之。及于茲山，故立廟貌。王仁裕嘗佐夏梁帥王思同南伐巴人，往返登陟，留憩於淮陰祠，曰：「握塞天古木深，路人猶說漢淮陰。孤雲不掩興亡策，兩角曾懸去住心。不是冕旒輕布素，豈勞丞相遠追尋。當時若放還西楚，尺寸中華未可侵。若其崎嶇險峻之狀，未可殫言也。」

# 蜀中名勝記卷之二十六

## 保寧府三

劍州

漢陽山州之主山也。武功康海德涵劍州重陽亭記所云。頽枕開溪。前對漢陽是矣。○碑目云。劍州石柱文。晉太元十八年刻。東園聞泉賦。唐貞元中蘇洪之刻。開元寺重修中和極樂院銘。大順三年劉崇望記。宣詔亭碑。蜀天成四年四月一日記。宋高宗籙田手詔碑。皆治內之琳琅云。○碑目又云。唐大中八年太守蔣公侑始建李商隱序而銘之。石刻在郡東山之陽。志云。東南一里東山。又名鶴鳴山。上有磨崖。顏書元結中與頤。蔣有重陽亭在焉。李義山記略。侯講天子意。三年大理。乃大鑿險道。緹石見土。其平可容考工車四軌。建爲南北亭。以便勞餽。又亭東山號曰重陽。以醉風日。南北經貫。若出平地。無有噫嘻。侯姓蔣氏。名侑。銘曰。仁之爲道。隆磊英傑。天簡其勞。羨以事物。惟君之缺。撮取不窮。有如武庫。蔣之有世。以仁爲歸。伯氏之宜。仲氏之思。厥弟承之。純而不紕。以令爲口。天子之德。汝侯爲理。劍有寅旻。君南臣北。父坐子伏。飲牛瀝菅。田訟以直。市正獄清。謁歸告休。朝雨滂滂。濕其幘頭。民樂以康。頤有顯庸。侯作南亭。北亭是雙。至於東山。乃三其功。摧險爲夷。大石是扛。亦旣三年。民走乞留。伯氏南梁。重弓二矛。古有魯衛。惟我之曹。惟仁之歸。有世在下。其摠其超。尾鬣缺馬。惟蔣之融。由唐龐叡。惟是亭銘。得其麤且大。中八年九月一

日本學博士河內李商隱撰。○宋閩州通判吳師孟記略。東山一峯。特竦千仞。衆小山迤邐卑附。初奔走如侍從。茂林蒼崖。煙靄叢密。有一亭焉。冠於山椒。碧瓦鱗差。朱欄霞明。長溪清潯。流影不去。乃唐刺史蔣侑所建。重陽亭。李商隱序而銘之者也。權知州軍郭子皋題其碑後曰。李義山記重陽亭曰。作亭東山。以醉風日。而不記名亭之因。予讀張平子西京賦。有云。集重陽之清澄。釋云。上爲陽。下爲陰。清澄亦爲陰。則斯亭也。上據高巖。下瞰澄溪。蔣公名亭之意。其得之於此耶。釋碑以告來者。元豐六年題。又康德涵記以爲亭畔有石刻古重陽亭四字。宋張琬筆。○安東山。卽臥龍山。寰宇記。臥龍山在縣東二里。盤園州市。高百丈。其上爲九龍山。高三百丈。唐天寶六年。敕改龍祠山。山上曾置九龍祠也。○州北爲故壘山。益州記云。山有姜維拒鍾會故壘。其山峭壁。俯臨絕澗。○又二十里卽劍門關。棧閣相望。顏師古曰。棧卽閣也。按史記。蔡澤謂范雎曰。今君相秦。計不下席。坐制諸侯。棧道千里。通於蜀漢。華陽國志云。諸葛亮相蜀。鑿石架空。始爲飛閣。以通行道。如此。則棧閣爲二矣。蜀漢以前曰石牛道。史記。秦欲伐蜀而不知道。乃作五石牛。以金置尾下。言能糞金。以遺蜀。蜀王負力而貪。使五丁開道引之。秦因使張儀可馬。尋路滅蜀。○唐李遠五丁力士開蜀門賦云。在昔褻斜。未通荒蕪。異域物產難究。封疆罕測。秦王將欲廣其南。寇其北。張儀於是度其勢。量其力。假牛之計。斯設。饋女之功。是克。蜀王乃命力士。闢高山。貪功饕餮。忘情險難。捫峯。櫛於日側。扶虺馘於雲間。將以砥嶄。碎。等躋。攀。俄而白日蕩搖。元天忽霍。鬼哭神怨。風號霧廓。怒髮森植。雄心震躍。濕珍汗以電散。瞪星眸而電落。將欲斷煙靄。排岳嶂。謂巨靈之所拓。蹂重林。迴絕壑。擬夏后之。

所鑿。吁。可畏哉。江標峻棧之形。呀然地裂。闕關高峯之色。騁若天開。已而後患方啓。前心莫遂。道路無阻。關梁僻備。五丁死而蠻黨移。一逕通而秦人至也。○輿地廣記曰。石牛道者。山有小石門。穿山通道。六丈餘。漢永平中。司隸楊厥又鑿而廣之。諸葛孔明以大劍至此。有隘束之稱。乃立劍門縣。復於關道置尉以守之。常璩云。關道三十里至險。有關尉。桑下兵民也。晉書李特入蜀。至劍閣。顧盼險阻。曰。劉禪有此地而面縛於人。豈非庸才耶。○隋置關之地。皆有官。而於劍閣獨未置關。至唐始置。劍門關後又置大劍戍。小劍戍。五代董璋遣兵扼劍門關。又爲七砦。按圖經云。關官許令直受頒降詔。赦亦許直行。申發文字。聖節月旦。亦有表疏。異時訓飭關吏。至親酒宸翰。所以重設險也。○周地圖云。大劍山亦曰梁山。山海經。高梁之山。其上多聖。其下多砥礪。其木多桃枝。鉤端有草焉。狀如葵而赤。華實白。跗可以走馬。王隱晉書。張載隨父收入蜀。作劍閣銘。益州刺史張敏見其文。乃表天子。刻石於劍閣焉。又有小劍山。在西北三十里。故此爲大劍。崔鴻十六國春秋。苻堅使楊安伐蜀。其將徐成破二劍是也。東連莎鼻。西接綿州。凡二百三十一里。故左太冲云。緣以劍閣矣。○碑目云。劍閣有魏太尉鄧公神廟記。唐劍州刺史邢冊題。又鄧衛聖侯碑。唐刺史郭淮立石。又有唐李復撰劍閣碑。唐魯叔明劍門記。貞元二年張允書。唐劍門制置記。廣明元年立。俱在棄繻亭南百步。○寰宇記云。隋始州銘。在劍門縣二十里許。有古州基。自縣至彼。攀木緣壁。至此稍平。一豐碑。字名磨滅。開皇三年李德林文。土人謂之劍門縣。蓋隋時以此爲始州也。○唐書。元和元年。令狐楚賀收劍門表云。臣得上都進奏院官高振報。嚴礪下告。捷官嚴公貺奏。正月二十三日收復。

劍門。破賊五千。斬僞授劍州刺史武德昭訖。○碑目云。唐章表微劍閣銘。在報國寺靈泉側。昔唐僖宗巡幸至此。有微恙。飲其泉自愈。因名爲報國靈泉。今有石刻存焉。○又云。唐清義何氏古碑。在劍門縣登高臺光宅中建。所載有名幕者。生四子。孝弟義遜。家八十口不異居。儀鳳二年。敕賜清義門。○又云。劍門有修關石刻。天成五年立。又有五代敕牒甚多。皆天成成長興廣政間刻。○方輿勝覽云。有玉女臺在大劍絕頂。峭壁千仞。下瞰古道。行人如蟻。有小石刻云。玉女煉丹之所。○又有仙女觀圖經云。在北崖頂。唐先天二年置。去觀一里。渡仙女橋。有煉丹臺。巖畔有仙女影。近代以來改爲禪院。○有誌公殿。劉焯記云。劍閣之下有壽聖寺。在石壁之西偏。由益昌道中望之。隱隱如行僧頂伽帽。每秋時出。或見光景。陸游劍南詩集云。劍門東石壁間。影有若僧負杖者。杖端彷彿有刀尺拂子狀。○有梁山寺產茶。亦爲蜀中奇品。東坡南行錄詩。有飛簷如劍寺之句。其註云。出劍門東望有一寺。山巔樓閣。隱隱可見。有一二碑。皆磨滅。故唐碑也。○有龍巖洞穴幽邃。雨雪塗。小說云。王建爲盜。朝廷捕之急。逃於劍門巨石穴中。卽此。洞口宋人隸書龍巖二字。○有思賢樓在水門上。晝張孟陽。李太白。杜子美。柳子厚像。○有文焰堂。本記云。按劍門題詩以太白。子美爲重。而世未有並祠之者。會從李參預壁所得。所賜阜陵御書蜀道難。又從李左史得趙忠定汝愚大書劍門詩。因建祠刻二詩於側。榜其堂曰文焰。取韓退之詩語也。○按晉張載劍閣銘云。巖巖梁山。積石峨峨。遠屬荆衡。近綴岷嶓。南通邛笮。北達褒斜。狹過彭碣。高踰嵩華。惟蜀之門。作同作鎮。是曰劍閣。壁立千仞。窮地之險。極路之峻。世濁則逆。道清斯順。閉由往漢。開自有晉。秦得百二。并吞諸侯。齊

得十二田生獻壽。矧茲狹隘。士之外區。一人荷戟。萬夫趨起。形勝之地。匪親勿居。昔在武侯。中流而喜。山河之固。見屈吳起。興實在德。險亦難恃。洞庭孟門。二國不祀。自古迄今。天命不易。憑阻作昏。鮮不敗績。公孫既沒。李氏銜璧。覆車之軌。無或重跡。勒銘山阿。敢告梁益。○柳宗元劍閣銘曰。并絡坤垠。時以饒足。滌血哲士。元機在握。分命貔貅。陳爲犄角。右逾岷山。左直劍門。攻出九地。上披重雲。攀天蹈空。夷視阻巖。破裂層壘。殄戮羣頑。內獲固圉。外臨平原。天兵徐驅。卒乘暉暉。大憝囚戮。戎夏咸歡。帝圖厥功。惟梁是先。開國進位。南服於藩。邦之清夷。人以完安。銘功鑒亂。永代是觀。○歐陽詹劍門棧道銘云。天覆地幃。本亦備設。大象難全。或漏或缺。損多益寡。聖賢代工。被雖有缺。與無缺同。惟北曰秦。惟南則蜀。地缺其間。紳維不續。斗起斷岸。屹爲兩區。秦人路絕。蜀火煙孤。天實不通。賢斯有造。鑿堅刻勁。無蹊以道。若川匪舟。若陸非車。緣危轉虛。步驟交如。構雖在功。存亦由德。項佛劉怒。從完以陪。隋落我榮。自頰而顯。地非革勢。材不易林。陪植之致。惠怨之心。勿謂斯道不常。勿謂斯道可久。禮不以禮可有而無。恭不以恭可無而有。創之。意如彼。固之之理若茲。彼知不易。茲而易知。勒銘道左。共同我思。○李文饒集劍門銘註云。劍門當中有。一岑峻嶺。橫峙。望若蕭屏。此一岑最奇。而說者未嘗及也。故銘云。羣山西來。波積雲屯。地險所會。斯爲蜀門。層岑峻壁。森若戈戟。萬壑奔東。雙飛高闕。翠嶺中橫。黯然黛色。樹若雄屏。以衛王國。○梁張儵蜀道難詩云。梁山鎮地險。積石阻雲端。深谷下寥廓。層巖上鬱盤。飛梁駕絕嶺。棧道接危巒。攬轡獨長息。方知斯路難。唐元宗巡狩言歸駐蹕劍門詩云。劍閣橫空峻。鸞輿出狩回。翠屏千仞合。丹嶂五丁開。灌木縈旗轉。



仙雲拂馬來。乘時方在德。嗟爾勒銘才。王勃普安建陰題壁云。江漢深無極。梁岷不可攀。山川雲霧裏。遊子幾時還。盧照鄰大劍送別劉右史云。金碧禹山遠。關梁蜀道難。相逢屬晚歲。相送動征鞍。地咽綿州冷。雲凝劍閣寒。倘逢忠孝所。爲道憶長安。李頎送張諤入蜀云。出門使爲客。惘然悲徒御。四海維一身。茫茫欲何去。經山復歷水。百恨將千慮。劍閣望梁州。是君斷腸處。孤雲傷客心。落日感君深。夢裏兼葭渚。天邊橘柚林。蜀江流不測。蜀路險難尋。木有相思號。猿多愁苦音。莫向禹山隱。禹山地非近。故鄉可歸來。眼見芳菲盡。岑參入劍門寄杜楊二郎中云。不知造化初。此山誰開坼。雙崖倚天立。萬仞從地劈。雲飛不到頂。鳥去難過壁。速駕畏巖傾。單行愁路窄。平明地仍黑。停午日暫赤。凜凜三伏寒。嶢嶢五丁迹。與時忽開閉。作固或順逆。磅礴跨岷峨。巍蹕限蠻貊。星當觜參分。地處西南僻。蹉覺煙景殊。杳將華夏隔。劉氏昔顛覆。公孫曾敗績。始知德不修。恃此險何益。相公總師旅。遠近罷金革。杜母來何遲。蜀人應更惜。暫回丹靑慮。少用開濟策。二友華省郎。俱爲幕中客。良籌佐戎律。精理皆傾畫。高文出詩騷。與學窮討贖。聖朝無外戶。寰宇被德澤。四海今一家。徒然劍門石。杜甫劍門詩云。惟天有設險。劍門天下壯。連山抱西南。石角皆北向。兩崖崇墉倚。刻畫城郭狀。一夫怒臨關。百萬未可傍。珠玉走中原。岷峨氣悽愴。三皇五帝前。雞犬莫相放。後王尚柔遠。職貢道已喪。至今英雄人。高視見霸王。并吞與割據。極力不相讓。吾將罪真宰。意欲鏟疊障。恐此復偶然。臨風默惆悵。王維送崔五太守云。長安廐吏來到門。朱文露網動行軒。黃花縣西九折坂。玉樹宮南五丈原。褒斜谷中不容臆。唯有白雲當露冕。子午山裏杜鵑啼。嘉陵水頭行客飯。劍門忽斷蜀

川門萬井雙流滿。眼來霧中遠。樹刀州出。天際澄江巴字迴。使君年紀三十餘。少年白晝專城居。欲持畫省郎官筆。回與臨邛父老書。李白蜀道難云。噫吁戲。危乎高哉。蜀道之難難於上青天。蠶叢及魚鼈。開國何茫然。爾來四萬八千歲。不與秦塞通人煙。西當太白有鳥道。可以橫絕峨眉巔。地崩山摧壯士死。然後天梯石棧相鉤連。上有六龍回日之高標。下有衝波逆折之迴川。黃鶴之飛。尙不得過。猿狖欲度愁攀緣。青泥何盤盤。百步九折巖巖巒。捫參歷井仰脅息。以手撫膺坐長嘆。問君西遊何時還。畏途巖巖不可攀。但見悲鳥號古木。雄飛雌從繞林間。又聞子規啼夜月。愁空山。蜀道之難難於上青天。使人聽此彫朱顏。連峯去天不盈尺。枯松倒挂倚絕壁。飛湍瀑流爭喧豕。崩崖轉石萬壑雷。其險也如此。嗟爾遠道之人。胡爲乎來哉。劍閣崢嶸而崔嵬。一夫當關。萬夫莫開。所守或匪親。化爲狼與豺。朝避猛虎。夕避長蛇。磨牙吮血。殺人如麻。錦城雖云樂。不如早還家。蜀道之難難於上青天。側身西望長咨嗟。孫逖送靳十五侍御使蜀云。天使出霜臺。行人擇吏才。傳車春色送。離與夕陽催。驛遶巴江轉。關迎劍道開。西南一何幸。前後二龍來。張喬送蜀客云。劍閣緣空去。西南第幾州。丹霄行客語。明月杜鵑愁。露帶山花落。雲隨野水流。相如曾醉地。莫滯少年遊。李端送鄭宥入蜀迎親云。寧親西陟險。君去異王陽。在世誰非客。還家即是鄉。劍門千轉盡。巴字一支長。請語愁猿道。無煩促淚行。李德裕題劍門云。奇峯百仞懸。清眺出嵐煙。迴若戈回日。高疑劍倚天。參差霞壁聳。合沓翠屏連。想是三刀夢。森然在目前。戎昱入劍門云。劍門兵革後。萬事盡堪悲。鳥鼠無巢穴。兒童話別離。山川同昔日。荆棘是今時。征戰何年定。家家有畫旗。許棠送張員外西川從

事云。爲郎不入朝。自是赴嘉招。豸角初離首。金章已在腰。劍橫陰綠野。棧響近丹霄。迎駟應相續。懸愁去路遙。願非熊送李。廊侍御赴劍南云。鳥道見狼煙。元戎正急賢。圖書借朋友。吟詠入戈鋌。山色城池近。江聲鼓角連。不應誇戰勝。知在檄蠻篇。李商隱題劍門寄上西蜀司徒杜公云。峭壁橫空限一隅。劃開元氣建洪樞。梯航百貨通邦計。鏡閉諸蠻屏帝都。西蹙犬戎威北狄。南吞荆郢制東吳。千年管鑰誰銘範。只自先天造化爐。楊凝送客入蜀云。劍閣迢迢夢想間。行人歸路繞梁山。明朝騎馬搖鞭去。秋雨槐花子午關。于邵送穆司法赴劍亭序云。洪曹棧穆侯理行歸於劍。十月寒矣。艱哉是行。休於嘉陵之陽。日與樵牧爲伍。而吾子言涉江水。至於室廬告輟之期。不遠千里。然則取諸羽翮。擊波風水。時之來也。鳴可驚人。而愛親之道。敬養爲切。安得擇仕而以三語爲屈哉。東江劍門。又足助興。地氣初閉。河風稍嚴。青冥爲空。黃落向盡。感物論別者。庶存乎歌詩。其二云。人謂穆子通於理者也。裒然作掾。榮問所致。故隴之下。清風可挹。人能盡驪。邵真知勉矣。頃以令弟仕於劍。太夫人就養。適乎遠。雖迫王事。心馳倚閭。朝辭府庭。夕次郊郭。不俟高駕。拂衣而南。羣公錫類。詎敢留心。各以壺酒垂楊好。陰金秋始交。火雲猶赫。指日獻壽。在原增光。送君遂行千萬無盡也。○劍門東南有七盤嶺。以山曲折而七盤也。方輿云。武連縣在七盤山上。按武連縣舊爲武功縣。故郭璞識云。縣路翠。武功貴。縣路青。武功榮。其後青城何琰宰是邑。遂刻石於縣門。志云。逍遙樓廢址。在武連舊縣。唐顏真卿書扁三大字。碑刻在焉。元改武連縣。學爲魏公書院。以唐魏徵所生之地也。學正王惠爲之記。○有靈泉劍南詩藁云。過武連縣安國院有二泉。傳云。唐僖宗幸蜀至此。飲之。

而甘。賜名靈泉。其詩云。滴瀝珠璣翠壁間。異時曾得奉龍顏。卽此。○有都竹水。寰宇記都竹水從武連縣流入普安縣。南流至掌天山。下入閬州。益州記云。掌天山在臨津縣。山多柘。堪爲良弓。雖粟絲燕角。不能勝也。志云。柘溪水出柘谷山。多生柘木。○有下辯城。寰宇記廢下辯城。卽臨小潼水。李膺益州記云。宋元嘉二十九年。以武都流入於下辯縣安置。大明二年改爲武連縣。寰宇記小潼津。發源京兆山分水嶺。謂之京兆水也。○本志云。武連縣九龍山有洞。石壁如屋。內有九井。○又云。羣仙洞在武連縣。洞中無他物。惟石窟數間如堂宇。有水自西向東。不知所來。山下長老云。曾有數人耘苗。見洞中聲樂嘹亮。密覘於洞口。見列坐如天人狀。奏樂者無數。欲進前觀之。卽不見。自後人數見焉。因名爲羣仙洞。按武連。下辯二縣。皆因秦人僑置者。○劍之西南有黃安縣。晉置。宋改爲普成縣。縣在跨鶴山。一名駕空山。山腹有紫霄觀。崖上有僧懷素草書。多缺落。不可辨。跋云。右懷素草字。絳臺潘氏載入法帖。誤綴張長史書末。今潘氏墨本不可多得。因刊於駕空山崖石。與伯英草聖並列。共傳永久。隆興元年癸未季冬。濃洄野叟識。○志云。城南百二十里有漢王潭。在黃安縣之東。境上有漢王廟。○又云。普成縣南一里紫霄觀。舊名普成。晉宋間有李隱君名普成者。煉形其間。與莫弟普露。普濟。白日昇去。是普成縣以仙名也。縣傍有石麒麟。每天旱。土人諷經。取水洗之。卽雨。○又南八十里有義津。卽古臨津縣地。碑目唐盧照鄰悟本寺記。在故臨津縣悟本寺內。

### 梓潼縣

水經曰。梓潼水出其縣北界。西南入于涪。註云。故廣漢郡也。公孫述改爲梓潼郡。劉備嘉霍峻守葭萌之功。又分廣漢以北別爲梓潼郡。以峻爲守焉。王勃梓潼南江泛舟序云。咸亨二年六月癸巳。梓潼縣令韋君。以清堪幽凝。鎮流靖俗。境內無事。艤舟於江潭。縱觀於丘壑。渺然有山林陂澤之思。遂長懷悠想。周覽極睇。思其。則呂望藉茅於磻溪之陰。屈平製芰於潯陽之浦。覺瀛洲方丈。森然在目。於是聞以投壺。繼以妙論。亦有嘉餽。旨酒。鳴絃朗笛。以補尋幽之致焉。預於斯者若干人。○唐書天寶之亂。左拾遺房瑁獨馳蜀路。至普安郡。謁見元宗與語。大悅之。即日拜文部尙書門下平章事。復次梓潼。寰宇記云。明皇過梓潼。望見山上有一窟。近臣奏云。漢司馬相如讀書之窟。遂勅名爲長卿山。○志云。山上有長卿寺。下有漢侍御史李業石闕舊經云。前漢侍御史李業葬此。遭赤眉亂。二闕以臨關俱破壞。志又云。縣東北有二石闕。其一題曰漢沛國相范伯友墓。其一題曰漢趙相國雍輔君之墓。○宋周必大曰。予得光武時梓潼扈君墓。先敍所歷之官。末云千秋之闕。模脫隸書。而非鐫也。○搜神記云。有神姓張名亞。道術顯著。廟在梓潼。元宗幸蜀。著靈。追封左丞相。唐書廣明二年。僖宗幸蜀。神又見於利州桔柏津。封爲濟順王。親幸其廟。解劍以贈神也。郡國志云。濟順王本張亞子。戰死而廟存。昔亞子西至長安。見姚萇。謂曰。卻後九年。君當入蜀。若幸梓潼。七曲山。幸當見。尋至建元十二年。萇隨楊安南伐。將至七曲。迷道。遊騎賈君蒙忽見一鹿。馳去。遂至廟門。鹿自死。追騎共刺之。有頃。萇至。悟曰。此是張君爲我設主客之禮。烹食而去。按此卽世所奉祀梓潼帝君也。唐判度支蕭遇和王鐸作張亞子廟詩云。青骨祀吳誰讓德。紫華居越亦知名。未聞

一劍傳唐主長擲千山作蜀城斬馬威稜應掃蕩截蛟鋒刀俟昇平薊侯爲國新簫鼓堂上神籌吏布兵文同丹淵集出守陵州有祭梓潼神文。○梓潼又有百神廟在縣南四里咸通十一年盧耽除西川節度時蠻寇圍成都大將軍吳行魯統師過此見斷碑皆古卿相之名默致禱焉。旣而王師大捷乾符三年行魯除東川節度遂於路側置百神之廟景福大順間廟遭兵火王氏僭號夢神人求詞宇稱是梓潼百神因重興置。○又有五婦山在縣北十二里高四百二十丈按蜀記云梓潼縣有五婦山秦王遣蜀王美女五人蜀王遣五丁迎女幸梓潼五丁踴地大呼驚五女並化爲石蜀王築臺而望之不來因名爲五婦侯臺漢書地理志云梓潼五婦山碑誌存有五婦神廟李膺又云梓潼有鳴湍折碑祠西臨潼水湍迅激流俗呼張湍祠亦呼爲石碑祠。○又有隱劍泉在五丁力士廟西一十步古老云五丁開劍路迎秦女拔她山摧五丁與秦女俱斃於此餘劍隱在路傍忽生一泉又云此劍每庚申日現。○又有蛟龍神祠在縣東十九里兜鑿山俗呼爲兜鑿神古老相傳此神昔用生人祭之不則瘴疾水潦爲害張道陵戒之遂絕。○又有葛山志云梓潼縣西南二十里葛山又名臥龍相傳武侯伐魏駐兵於此見虎豹蛇蟲勢惡自臥草中獸皆俯伏有古碑在此山之景福院。



# 蜀中名勝記卷之二十七

## 順慶府一 南充縣附郭

嘉陵江既遶當郡流。則將匯巴宕之水而下墊江矣。華陽國志云。劉璋分墊江以上爲巴西郡者此也。寰宇記云。嘉陵江在州東二百步。自相如縣界流入南充。按十道記云。果州左濱西漢水。叢薄蔚然。有相如琴臺。觀此。則嘉陵江之爲西漢水益明矣。○韋應物聽嘉陵江水寄深上人詩。水性自云靜。石中本無聲。如何兩相激。電轉空山驚。按長慶集云。韋貫之坐考策。收直言者出爲果州刺史。今嘉陵驛設於此。○著舊錄云。自漢紀信以下三十六人。並見學錄。蒲士龍所編著舊。而趙嗣業。趙昌藻。游問爲之贊。此外隱逸王公字以下十四人。併繪像於郡之鄉賢堂。又復搜訪王綰以下二十餘士。悉繫於左。○郡志云。譙周墓在治後。有碑。今闕。○碑目云。唐王維送楊長史赴果州詩。刻在郡治。其中聯云。官橋祭酒客。山木女郎祠。唐詩三體注云。漢法。祭酒上客之稱。女郎祠以謝自然。上昇於果山。按常璩云。張魯以鬼道立教。後乃爲祭酒。巴漢夷民多便之。則祭酒稱上客。是矣。謝自然昇仙。乃貞元間事。在右丞後。不應引此官橋者。志云。郡西三十五里有西橋。舊名官橋也。按女郎亦張魯女。感孕而生龍者。祠在漢中。○碑目又云。唐移縣碑。在南充縣門。大中年立。文字磨滅。不可詳辨。二良牧碑。馬肩孟撰。載唐二刺史事。碑在郡治醋庫之側。永興節度使王彥超重建。行成思堂石刻詩。不著其姓。今附見云。作堂在姑孰。把麾來果山。男子四方志。萬



里如目前。振振佳公子。性行純如天。既知仁有本。自應枝葉繁。宣尼語參考。推廣十八篇。君能擴充之。九思極其全。道行身亦立。揚名顯其先。回觀廬墓人。卑卑何足言。方輿記云。有仙鶴樓在郡城後子城上。下瞰大江。宋邵博詩。春去秋來好風月。鶴樓端勝庾公樓。○郡之東南有開漢樓。郡守楊濟記云。聖朝褒綸。有實開漢業之語。因摘二字以名是樓。按開漢樓詩序。嘉陵大江襟帶於左。金泉栖樂諸山。雄峙於右。宋忠祐廟誥詞云。以忠殉國。代君任患。實開漢業。使後世知君爲重。身爲輕。雖糜捐不避者。俟有力焉之謂也。○有清居山。勝覽云。在南充縣南。唐姚昂詩。天設兩峯南北峭。地盤一水古今流。內有四亭。曰白雲。光相吸江。五友。按五友亭。宋游炳題。明月清風爲道友。古典今文爲義友。孤雲野鶴爲自在友。怪石流水爲娛樂友。山果芋栗爲相保友。是五友者。無須與不在此間也。總志云。金樓在清居山。高與山等。亭亭如浮圖。常有光焰出焉。○有清泉山。方輿云。城南十里有古剎。下瞰龍門諸山。寰宇記云。龍城山盤屈若龍。絕壁如城。蜀志補遺。卽龍角山。道經以爲福地。○有朱鳳山。寰宇記。在州南十里。高百七十二丈。周迴二十里。昔有鳳凰集於此。因置鳳山觀。方輿云。乃爾朱仙李滄風養煉之地。迴視郡城。如在掌握。碑目云。唐朱鳳山觀銘。長史袁玘文。○有漢充國城。志云。在府南三十五里。按充國。漢永元二年分閬中置。巴記曰。初平四年。復分爲南充國也。邵博詩云。山圍翠合水連雲。萬室樓臺照眼明。勝地風流眞樂國。四州惟說好充城。○有畫卦石。志云。在治東四十里。其石平如砥。上有八卦。相傳周柱下史以足畫之。足跡尙存。○有大斗溪。志云。在治東八十里。源出老君山。與嘉陵江合。傍有大石如斗。○有都尉壩。嘉陵志。郡南五十里。

有都尉墓。俗云都尉娘。西充女子也。代父戍。以功授都尉。歸爲嫂氏所嘲。乃剖腹。見肝腎以死。葬鳳了山。有豐碑社。祀今廢。其年代姓氏無考。墓前翁仲猶存。或云卽陳壽妻。壽嘗爲騎都尉。故人以稱其妻。○西北有果山。寰宇記在州西八里。層參秀起。松柏生焉。方輿云。果山郡以得名。陳壽隱居於此。有祠。志云。陳壽有萬卷樓在山之麓。邵伯溫果山卽事詩。果山仙果秀天香。處處圓金樹樹芳。謂黃柑也。志云。果山書院在城北五里。蜀譙周建。後郡人邊速達以祕書監致仕。歸隱於此。藏書四千二百七十一冊。碑刻爲至正八年。○又云。治北五里。有譙周觀星臺。一云是其故宅。有碑存。按華陽國志云。譙侯修文於前。陳君煥炳於後。則此山之靈秀有自來矣。○有金泉山。方輿云。在城西果山之足。唐書貞元十年。謝真人名自然。於縣界金泉紫極宮。白日上昇。郡郭是夕有虹霓雲氣。萬目所共覩焉。有清霞觀及真人祠。韓愈詩。果州南充縣。寒女謝自然。童騃無所識。但聞有神仙。輕生學其術。乃在金泉山。一朝坐空室。雲霧生其間。須臾自輕舉。飄若風中煙。入門無所見。冠履同蛻蟬。施肩吾謝自然昇仙詩。分明得道謝自然。古來漫說尸解仙。如花年少一女子。身騎白鶴遊青天。有步虛臺。宋鄭芳庭詩云。平山酷好退之詩。謝女仙踪頗自疑。不到步虛臺下看。瓊笙玉佩有誰知。有靈泉院。碑目云。謝真人父諱寰。所居名謝寰山。山有院。名靈泉。一唐碑。字多訛缺。通志云。靈泉卽金泉也。唐李涪風於此。藏金化爲泉。宋江萬里書金泉二字於崖上。碑目云。唐金泉山仙居。述太和五年。果州刺史韋公肅文。唐鄭餘慶詩刻。唐誥刻。僞蜀刺史徐光溥詩刻。俱在金泉山。李宏遊金泉觀詩云。昔時謝女昇天處。此日遺蹤尙宛然。蟬蛻舊衣留石室。龍飛勝地湧金泉。碑書

故事封蒼薛。殿寫真容。鑿翠煙。薄暮松巔聽鶴淚。猶疑彷彿下神仙。○有寶臺山。在城西。與金泉對峙。有覽秀亭。呂好問覽秀亭記。思史竇之遺風。弔譙陳之舊蹟。想程謝之仙踪。慕張閻之英躡。謂史謙恕竇泌譙周。陳壽。程太虛。謝自然。張巖。閻續也。○有舞鳳山。志云。西北八里。舞鳳山三字。乃宋人隸刻石。○有栖樂山。志云。在西十里。相傳謝自然昇天之日。仙樂振響峯頂。故名。有栖樂池。在山頂。鑿之以石。泉水清潔。與嘉陵江相通。○有安漢城。志云。在府城北三十五里。漢地里志云。有魚池。在南莽。曰安新矣。劉宋於此置宕渠郡。又云。宕渠城在府城北四十里。卽石苟壩城也。○有大方山。方輿云。城北十五里。通志云。城西三十里。又有小方山。千峯萬嶺。儼若洞天。其上有滴乳泉。道士何志全飲此水。年老面如桃紅。樊汝賢詩。雲液落山腹。脈與崑崙通。云何山中叟。八十桃顏紅。卽今之乳泉舖也。○有崑井。益州記云。南充縣西六十里。有大崑井。卽古之鹽井。○有大航山。與小航山相對。志云。西百里。大航山。隋楊航修道於此。因名。○名賢馬鬣有晉譙秀墓。按秀譙周之孫。隱居不仕。躬耕山藪。李雄徵之。不應。晉王逸少書云。聞譙周有孫。其人高尚不仕。可得見否。唐李商隱詩。欲向巴西覓譙秀。巴西惟是有寒蕪。○有馮休墓。方輿云。南充人。真宗朝不應辟召。歸山著書。○有何涉墓。志云。在琉璃山下。按涉讀書博古著作甚富。明道雜志載其爲司馬溫公所推重。○有游仲鴻墓。後漢劉光祖表其道曰。於乎慶元黨人游公之墓。○有趙夫子墓。在據德里。鄉人稱趙巽也。○予遍閱唐人集。元稹嘉陵江詩。秦人惟識秦中水。長想吳江與蜀江。今日嘉川驛樓下。可憐明練繞明窗。其二云。千里嘉陵江水深。何年重繞此江行。只應添得清宵夢。時見滿江秋月明。

微之又宿嘉陵驛詩。嘉陵驛上空牀客。一夜嘉陵江水聲。仍對牆南滿山樹。野花撩亂月朧明。其二云。牆外花枝壓短牆。月明還照半張牀。無人會得此時意。一夜獨眠西畔廊。白居易嘉陵夜有懷詩。露濕牆花春意深。西廊月上半牀陰。憐君獨臥無言語。惟我知君此夜心。其二云。不明不暗朦朧月。非暖非寒慢慢風。獨臥空牀好天氣。平明閑事到心中。武元衡題嘉陵驛詩。悠悠風旆繞山川。山驛空濛雨似烟。路半嘉陵頭已白。蜀門西更上青天。歐陽詹聞嘉陵越鳥聲呈林蘊詩。正是閩中越鳥聲。幾回留聽暗絳纓。傷心激念君深淺。共有離鄉萬里情。陸龜蒙宿嘉陵館樓詩。離思茫茫偏值夜。每因風景却生愁。今宵難作刀州夢。月色江聲共一樓。李洞將之蜀別友人詩。嘉陵雨色清澹別酌參苓。到蜀高諸岳。窺天合四溟。書來應隔雪。夢覺已無星。若遇多吟友。何妨勸坐經。薛能嘉陵驛詩。江濤千疊閣千層。銜尾相隨盡室登。稠樹蔽山聞杜宇。午烟熏日食嘉陵。頻題石上程多緩。暫歇泉邊起不能。如此幸非名利切。益州來日合攜僧。劉滄春日遊嘉陵江詩。獨泛扁舟映綠楊。嘉陵江水色蒼蒼。行看芳草故鄉遠。坐對落花春日長。曲岸危橋移渡影。暮天栖鳥入山光。今來誰識東歸意。把酒閑吟思洛陽。右嘉陵水。閩中廣元皆得稱之。雖不知所指。然今驛設在果州故井及之。

### 西充縣

始折南充後。乃併流溪而有之。仙踪古跡。特著其大。陵鎮則有扶龍山志。在高陽之扶龍村。蓋紀信此縣人。祠在紫崖。其小陵鎮則有肖巖石竇空潤。泉水清潔矣。唐盧藏用弔紀信文曰。皇網圯兮帝紐頽。王風

悲兮霸道衰。天運促兮周以覆。秦德棄兮漢業開。何項王之最愚。作驅除於雲雷。豈淵海之飛盪。資拔山之偉才。於是左契歸楚。羣雄奉職。皇矣漢祖。獨負其直。矧滎陽之圍城兮。旣孤而迫。偉將軍之天誘兮。矯奪其誠。彼見危而授命兮。亦各有時。考振古以爲觀兮。罔恢帝基。感將軍之墳隧兮。壯大義之在茲。仰前修以砥節。顧車迴而馬遲。嗚呼。身旣焚兮業旣昌。楚歌絕兮漢道光。君不旌兮史不揚。功不錄兮歿不傷。奄孤墳以載葬。抑千祀而爲荒。皇周歎訓兮。澤及枯齒。伊予寡德兮。忝宰茲地。奉宣嘉猷兮。懼尸厥位。思將軍兮。允忠且義。託神交於萬古兮。實獲心志。乃斲石於他山兮。式幽墳以昭賁。詞曰。攝提貞歲兮。奉揚仁風。跋涉草莽兮。祠弔紀公。善彼勇兮。殺身爲忠。九原不作兮。予將焉同。金石刻名兮。千萬歲。魂魄光烈兮。爲鬼雄。○南岷山則有九井十三峯。漢何岷之所隱也。隋程太虛嘗修煉於此。志云。太虛自幼好道。精修勤苦。隱居南岷山。絕粒有二虎侍左右。九井十三峯。皆其修煉處。一夕大風雨。砌下得碧玉印。居人每乞符祈年。印以授之。輒獲豐稔。唐元和中。解體。後遷神於元宮。容貌不變。宣宗命人求之。使者過南山。宿逆旅。踰險。有居第如公館。青童引見。一道士自稱程太虛。祖居西充。且囑曰。明歲君自蜀入南岷山。無忘我。及至蜀。熟視畫像。與前見者無異。宋賜號道濟太師。碑目云。唐程仙師。蟬蛻。偶阜莢碑。唐仙林觀碑。中書侍郎趙彥昭撰。俱在本山之降真觀。○流溪縣則有鐵冠仙人鈴記云。大洲連小洲。此地出公侯。○有漢車騎崖石刻。郡國志云。後漢車騎將軍馮緄於此鑿崖刻石十有餘處。寰宇記云。在流溪縣。按金石錄云。右漢車騎將軍馮緄碑。以范曄後漢書考之。史云。字鴻卿。而碑云。皇卿。史云。初舉孝廉。七遷至廣漢。

國都尉。拜御史中丞。順帝末持節揚州諸軍事。與中郎將滕撫擊破羣賊。今據碑。自舉孝廉至爲廣漢屬國都尉。凡十一遷。而爲中丞與都使徐揚二州討賊。皆在爲都尉前。碑云。討賊時坐迫州縣正法。而史不載。又云。爲隴西太守。坐問吏辜。旬不分。去官。以羌駭動。爲四府所表。復家。拜隴西太守。而史但言遷隴西太守。史云。爲遼東太守。徵拜京兆尹。轉司隸校尉。遷廷尉太常。拜車騎將軍。以碑考之。緄爲遼東太守。以前嘗爲治書侍御史。遷尙書。遂爲廷尉。未嘗拜京兆尹及司隸也。史云。振旅還京師。監軍使者張敞承宣者旨。奏緄會長沙賊復起。攻桂陽武陵。緄以軍還。盜賊復發。策免。而碑云。臨當受封。以謠言奏河內太守中常侍左悺弟。坐遜位。史云。復拜廷尉。時山陽太守單遷以罪繫獄。緄拷致其死。遷故車騎將軍超之弟。中官相黨。遂共誹章誣緄。坐輸左校。而碑云。表荊州刺史李隗。南陽太守成晉。太原太守劉瓛。不宜以重論坐法。作左校。亦皆不合。史又云。爲河南尹。時上言。舊典中官子弟不得爲牧人職。帝不納。拜屯騎將軍。復爲廷尉。卒於官。而碑云。復廷尉奏。中官子弟不宜典牧州郡。獲過左右。遜位。永康元年薨。亦當以碑爲正。碑又云。緄諡曰桓。而史亦不載。余嘗謂石刻當時所書。其名字官爵不應差誤。可信無疑。至於善惡大節。則當以史氏爲據。今此傳首尾頗倒錯謬如此。然則史之所載。是非褒貶失其實者多矣。果可盡信耶。○又云。右漢馮使君墓闕銘云。故尙書侍郎河南京令豫州刺史馮使君神道。按後漢書馮緄父煥。安帝時爲幽州刺史。而緄碑亦云。幽州君之元子。此字在宕渠緄墓前甕石闕上。知其爲煥闕也。



# 蜀中名勝記卷之二十八

## 順慶府二

廣安州

治有秀屏樓。霄漢閣。皆顏魯公書。擬峴亭。南峯寺。皆張商英詠。○圖經云。右倚秀屏。左瞰渠水。志云。秀屏山昔有石土地像。宋太祖以筆點此山立軍治。其像因自墜。今郡治卽石土地所在。○通志張無盡題擬峴亭詩。英雄往事堪歎息。闕于徒倚情何極。學取山公醉似泥。不同羊祜謀人國。又題南澤寺詩。孤雲飛遠岫。落日滿平川。寺據南山頂。僧傳北祖禪。○碑目云。大唐三聖碑。睿宗御製文。俱在州學內。道德經碑。在城北紫極觀。唐咸通中州刺史程壽立。公府建置碑。宋開寶三年張琪記。乾德六年許允修創也。○州立於濃洞鎮。濃洞二水名。寰宇記云。濃水出龍扶速山。東流入渠江。洞水卽渠水。鑿洞爲潭者耳。按唐地里志。岳池有龍扶速山。環水出焉。非濃水也。州志云。濃水卽西溪水。水色常不澄。故曰濃。發源距州治百二十里。蓬州之綿渠。流至椽樹渠。二溪相合。經龍扶速山下。龍棲灘。與環水合。又至城南五里。東折入渠江。與洞水合。是龍扶速山乃三溪有流處。非源也。○渠江有三十六灘。水之灌輸其間者。渦濤渠。別莫知其几。中兩渠相距二尺。廣深半之。可受流觴。天巧致然。非人力疏鑿。○碑目云。篆水在州東北五里。渠江曲尺灘下。石磧平坦。冬月水涸。磧露。仲春水生。磧沒。深不盈尺。日光照映。金波透徹。其年若登。則紋宛



成篆籀。灤澗波面。其見不常。邦人以此卜歲云。○宋石刻故事。以三月三日。至河曲。過渠江流杯。大觀。乾道。淳熙。紹興。嘉定。間。知軍宇文能。承務郎張廷堅。德州參軍李陶。桃彥遠。何溫叔。游伯良。何宋卿。楊次皋。安康民。各同時髦游賞。其中有連游二三日者。如崇慶。杜鵬舉。奉翹。挈家來遊。○有龍鏡潭。水圓如鏡。宋刻龍鏡二字於石。有琉璃淵。兩水相映。其一紫碧。痕如羅帶。其一深清。淵如琉璃。俱在篆水左右。○江中沱碛。有若鷗鷺。若龜蛇。若繁縵。若張繖。有如明月之團圓。有如神仙之遊戲。皆以形似得名。名賢韻士。每過其處。爲之流連題詠。唐元稹詩云。渠江明淨峽逶迤。船到名灘拽筴遲。櫓窾動搖妨作夢。巴童指點笑吟詩。俞餘宿麥黃山腹。日背殘花白水湄。物色可憐心莫恨。此行都是獨行時。宋張無盡詩。灤澗江水瀉高灘。中有神龍久屈蟠。衆樂妙音時響亮。雙娃長袖忽爛珊。世間變化無非幻。閣上登臨正好歡。觀幻見眞真亦幻。谷花巖草謾凭欄。何行中宕渠廣安駐泊記。南連巴徼。北接通川。複嶺東橫。清江西下。林深箬密。巖穴幽邃。信爲奇觀也。○其有姜山。則以伯約屯兵而名。山有姜山寺。唐僖宗時建。下有飛泉二字。僧可徹書。志云。在州東二十里。○晶然山。則以晶然山龍祠之神得名。碑目云。勅賜孚惠靈公廟碑。在晶然山。有晉太康八年碑文。志云。在州東南四十里。按安子文有晶然集。指此。○子仙山。則以神仙馮勝得名。志云。馮緄有子修煉於岳門山。一日辭父母。謂當仙去。以來晨白鶴飛翔爲候。緄登此山望之。已而果然。又名望子山。吳薦廣安志曰。子仙觀。在州治西二十里。子仙山上。五代時居人將軍馮勝之子修煉於此。一日仙去。將軍立堂數楹於得仙處。則所謂將軍者。馮勝也。非漢車騎將軍馮緄也。緄傳子鸞。舉孝廉爲

郎中並無得仙之事。○鶴棲山。則以謝自然得名。碑目云。鶴棲山。在冀都鎮。有古碑。字雖漫滅。尙髣髴可認。其略云。唐貞元十年。歲在甲戌。果州女子謝自然。白日昇仙。刺史李堅。以狀聞。又爲之傳。於時先有雙鶴棲宿此山。然後飛迎。自然駕之而去。自是俗呼爲鶴棲山。按自然昇仙。在果州金泉山。李堅上其事。唐德宗賜詔。今刻於金泉。年月日與此碑所載不差。通志云。在州東之新明鎮西南十里。○故宕渠城。古之寶國郡也。晉中興書曰。寶者。廩君之苗裔。巴氏之子務相乘土船而浮。衆異之。立爲廩君。子孫布列於巴中。秦并天下。以爲黔中郡。薄其賦稅。人出錢四十。巴人謂賦爲寶。因名。○大小良城。石崖四絕。天險之地。宋史。淳祐四年。制置使余玠移渠州治於此。已上二則。志云。俱在州東北五六十里。○其爲名寶芳躅。則有孝義臺。通志云。唐陳子昂之後。有遷居於此者。七世同居。唐旌表之。宋時臺尙存。○故縣鎮。顏魯公碑。碑目云。舊傳邑宰有姓顏者。魯公之先。魯公之刺湖州也。過道院。因有碑銘。今碑磨滅。存命除湖州刺史。顏真卿勒銘於道院。凡十四字。乾道中。移置軍城。○有張唐英墓志云。在州西三十里。按唐英新津人。慶歷三年。進士。歷官殿中侍御史。卒。葬雙流之三珠里。紹聖三年。其子庭玉徙居廣安。故葬於岳門山東南峯下。其弟商英往來常居於此。山水名勝。多所品題。○有安丙墓志云。在州南五十里。宋史。吳曦僭叛。丙矯密詔誅之。除四川安撫使。○有張庭堅墓志云。在州北。宋史。庭堅。廣安人。元祐進士。爲右正言。逾月。數上封事。訟司馬光。呂公著之寃。疏蔡京章惇之罪。○有黎錞鄉志云。渠江人。任直講。宋英宗以蜀士問歐陽修。對曰。文行蘇洵。經術黎錞也。

岳池縣

寰宇記云。岳池山在縣東三十五里。高六百丈。岳池之水出焉。上有音聲鳥也。○唐何少卿讀書在龍穴山。方輿云。岳池之封山也。去縣五里。宋元豐間。張諫議廷堅讀書在羊角竹洞。志云。北三十里。梁天監中有講道德經者。感二羊跪聽。故名。慶歷間。狀元蒲信讀書在金隴山。志云。碑見存。○碑目云。龜山碑在岳池縣東六十里。鑿地得斷碑。乃唐人經行所記。又云。杜甫岷山寺詩。刻在縣北三十里。岷山上有象王。獅石。左右龍洞。書巖四景。又云。老君山。舊碑載。唐天祐間。有道士乘馬至此。馬化爲石。道士亦不見。○其寺名之佳者。志云。西三十里。西溪源自蒼縣流入。平灘有西溪寺。○又云。西二十里。鴨山。昔人見雙鴨飛入山池。化爲石。因名。上有鴨山寺。唐乾元中建。○又云。南二十里。雲鉤寺。唐貞觀建。每晨有白雲鉤。其棟宇舊名毗盧也。然予過縣。西千佛崖古觀寺。峻級長林。煙蘿下垂。拂人車馬。致可憐耳。按畫苑以爲唐開元僧元應鑄。舊額栖巖寺。

渠縣

周書曰。渠州言鳳凰降於楓樹。百鳥列侍。志云。東北百里。鳳凰山。梓潼化書之第五十二。鳳山化也。今爲鳳來里。有清河寺。古清河縣學。基有二石柱。刻蟠龍甚工。○華陽國志。秦始皇時。有長人二十五丈。見宕渠。太史胡毋敬曰。是後五百年外。必有異人爲大人者。及李雄之王。祖世出自宕渠。識者以爲應之。○寰宇記云。宕渠山一名大青山。圖經云。在州東五十里。其山東西兩門。延連相接。山澗長狹。有似溝渠。蜀郡

賦外負銅梁而宕渠也。碑目云。有石刻宕渠及花果園大字。○志云。渠水有三源。一出達州明通鎮。一出巴山。一出羅娛山。至三會鎮。過宕渠山。會潛水。至縣北。會渝水。經廣安南渠口。會嘉陵江。至合州。會涪水。入江。按潛水亦發源於宕渠山麓。鄺道元謂宕渠縣有大穴。潛水出焉。通置山下而南入於江是也。○寰宇記云。渝水。卽流江也。夾水上下皆寶民所居。華陽國志。宕渠。故寶國。今有寶城。盧城。碑目引九域志云。流江古寶城。有古碑。文字磨滅。唐鄭谷渠江旅思詩云。流落復蹉跎。交親半逝波。謀身非不切。言命欲如何。故楚青田廢。窮巴瘴雨多。引人鄉泪盡。夜夜竹枝歌。○天甯寺記曰。宕渠古郡。依山爲城。自珠嶺東下。至石門。伏而特起。隱隱隆隆。由郡北直南而下。爲馬鞍。爲登高。爲西巖。擁蔽坤維。升虛降原。始得郡治。岡分嶺別。俛首東向。爲袁氏之巖。迤邐南轉。爲瞿氏之山下。瞰巴江。舒翼展脛。直趨水濱而後已。由瞿山之北。袁巖以南。川原開曠。形勢之勝。與郡治相埒。是爲天甯寺。按賀知章題袁氏別業云。主人不相識。偶坐爲林泉。莫澁愁沽酒。囊中自有錢。卽袁氏巖也。志亦收之。○隋書地理志。通川宕渠。其地皆接連漢中。有八濛山。寰宇云。在縣北七里。起伏八處。有水環之。不市者一里。常有煙霧濛其上。故名。三國志。張郃自漢中進軍宕渠之蒙頭盪石。與張飛相拒五十餘日。飛率精兵萬餘人。從他道邀郃軍交戰。山道狹。前後不得救。飛遂破郃。巴士乃安。志云。上有張飛廟。碑目有流江縣題名云。漢將張飛率精卒萬人。大破賊首張郃於八濛。立馬勒石。○碑目又云。唐末中原爲黃賊扇亂。前進士崔塗避地於渠州。春日獨遊沖相寺。由此登眺。翌日北歸。題名於石。按沖相寺距城四十里。乃定光佛道場也。崔塗本集詩云。水流花謝本無情。

送靈春風過楚城。蝴蝶夢中家萬里。杜鵑枝上月三更。故園書動經年絕。華髮春催滿鏡生。自是不歸歸便得。五湖煙景有誰爭。○方輿又載鄧谷渠州。浙江寺詩云。起居瀟灑寄禪關。高掛朝簪淨室間。孤島暫留鸞鶴歇。五雲爭放二龍閒。輕舟共泛花邊水。野屐同登竹外山。仙署金闈虛位久。夜清應夢近天顏。按古浙江寺在縣東。起文崇下。宋改爲祥符寺矣。他若山中之沼。四時常綠。洲上之魚。肖像皆黃。亦勝與境會云。

隣水縣

寰宇記云。隣水出隣山南。流中有大磧。懸流十丈。奔急若驚湍。電瀉。又云。龍穴在隣山之金盤山。下入龍門。鎮有瀑布百八十尺。號爲散水也。此山出鐵。隣比相次。華陽國志云。宕渠郡治有鐵官。石蜜山圖所采耳。○志云。杜工部寓居此縣之善慶里。昔建有書院。巖上大鑄少陵二字。○又云。郭璞游此遺碣云。日出照華山。金銀對馬鞍。鴛鴦池裏宿。石版響三漉。蓋天池山下溪河中有石一方。每擊則響聲三應。今謂之響石板也。

大竹縣

昔治在鳳來鄉。接渠縣界。今治在木門鎮。志云。縣東門城內二小岡。上有兩木對生交合。形如關門。元徒縣治於此。二岡雖連。土色則迥別矣。○傳記所稱九盤七石。昭其數也。榮城充谷。別其象也。巴河漢墓。記其跡也。馮碑沈闕。銘其助也。○九盤者。治西十里。有山高峻。盤旋九折。行者憚之。○七石者。雁平里有七

石參差並立若碑林然。○築城者仙門里有築城四圍險峻高阜寬平宋鮮史君呂保相禦元兵之所。○充谷者編戶西里有充谷石長數丈高五尺厥形若鱗。○巴河者築安鄉有巴王河相傳巴王經此今爲鎮。○漢墓者平池里有王平墓土人掘得銅香爐安漢侯銀牌等器有漢王將軍字額。○馮碑者廷尉馮緄此縣人墓在縣北古寶城雙石闕西南闕高二尺額篆云漢車騎將軍馮公之銘文作隸書字猶可辨。○沈闕者亦雙石闕在縣北一里其一鐫云漢謁者北屯司馬左都侯沈府君其一鐫云漢新豐令交趾都尉府君其闕上各鐫出屋宇禽獸飛走之像又有單石闕二相去雙石闕一里其上鐫雕物像與此同。

### 蓬州

圖經環蓬皆山而北山爲之主溪壑奇秀兩蓬高峙屹然雲霄多神仙隱士又多崇蘭黃花每春秋開時清香滿山谷間。○方輿云大蓬山在州東南七十里狀若海中蓬萊因以爲名小蓬山一名秀立與大蓬對峙相去二里綏山卽大蓬之始號也按列仙傳云葛由者蜀之羌人周成王時刻木爲羊賣之一旦乘木羊入蜀蜀中王侯賓之追上綏山山在安固縣東三十里隨之者皆得仙術本志云宋元符進士何格非遊大蓬山詩註引葛仙翁云茲山狀類海中之山是蓬山名由此而改。○山有透明巖孔穴相連宛如穿鑿之狀方輿云亦名棲真巖在大蓬山前俯瞰縣郭天氣清明渠達諸山隱隱可數碑目云透明巖下有爾朱真人書隔凡石三大字又云唐人知事任惠琳所書透明崖三大字橫直各二尺餘楷法逾勁石

刻宛然。○志云。隋爾朱真人修煉於透明巖。成道。唐懿僖間。抵蓬州。客安漢館。張氏十二年。州守以爲惑衆。沉於江。二漁者得之。釋其縛。三人白日昇天。○有仙閣巖。夜出聖燈。志云。聖燈現處凡五。北山。鳳凰山。連翹山。大蓬山。小蓬山。其在大蓬者尤靈異。○有降香碑。志云。宋元豐間。此州陳才人宋充媛爲皇子公主祈福。立降香碑。在大蓬山。邑人元祐進士雍沿蓬州十三景詩有云。元豐天子太平時。宮掖賢明有二姬。能就此山燕龍炷。至誠爲國長金枝。○小蓬山下有仙女墳。志云。元時普安里民家女及笄。一日父母他出。有道士叩門求火。女不啓戶。道士大書閉門不納四字而去。女手擦之不去。舌舐之乃滅。因感而娠。父母疑而責之。不自白。遂投江死。其屍逆流。親戚相與撈葬之。忽自腹中裂出肉印。方驚駭間。水暴漲。湧沙成一大墳於江中。水左右夾流。若神力焉。今名仙女墳。○舊縣以相如名。嘉陵江遠之周地圖記云。司馬相如故宅在縣南二里。本地有相如坪。相傳云。相如別業在此西。濱漢水。藜薄鬱然。其基亦名琴臺。高六尺。周四十四步。碑目云。相如故宅碑在相如縣西南光聖寺。漫滅不可讀。陳子昂文。○又云。唐相如縣石龕佛像記。在縣治。縣令陳子良撰。按子良伯玉之兄也。今州有相如祠。宋王儁以舊本長卿像圖於祠壁。祠成爲記。略云。伏念長卿傑出於西京。文章極盛之際。至今薄海內外人。無賢愚皆知有長卿。言語之妙。若揭日月。儻嘗過縣之琴臺。乃圖經所謂長卿故宅者。一時遺跡。彷彿尙在。又謂縣雖僻左。而江山風物可樂也。從其人遊。皆好學。能文章。亦有所自來矣。今之從政者。祖律令所有乃敢知。至於風化。謝非已事。否則日不暇也。鄧侯獨以自任不辭。其爲政知所先務矣。按元時祠圯。延祐四年驛丞苗成者重建。○

志云嘉陵江畔有石佛寺。建於晉魏間。有一僧以解龍困。獲寶盆。弟子爭之。龍取盆去。元喬西雪歌詳其事。今有驛名龍溪。或取此志又云。嘉陵江有龍宮。昔有鮮于氏子。見人從雲霧中引入龍宮。覽諸怪異。歸述家人云云。志又載鮮于氏之子。遊學錦官。偶老翁丐通一家信。道次石門。取書置石上。忽有人引生前。行見一王侯曰。荷君寄音。乃以藥數粒授生。後生壽至百歲。按石門在治北六十里。右乃梁橫臥嘉陵江中。甚險。元至正壬午。龍斷其梁。水由中行。下有深潭。魚龍之巢穴也。○酈道元注水經云。縣有漢車騎將軍馮緄。桂陽太守李溫冢。二子之靈。常以二月還。則漢水暴長。郡俗於水上祭之。○有雞卸神祠。益州記云。雞卸祠在相如縣。以神在雞卸溪側。故爲祠號。○有芳溪館。元稹感夢詩云。蓬州三十里。有館名芳溪。已上三則。俱在水傍。○若夫巖峙東西之勝。泉分金玉之形。樓著文明之盛。宮開紫極之祥。守以真卿。始爲勝地。禪因宗密。大振家風。皆可述焉。○方輿云。東巖在龍章山。俯瞰大溪。前眺歌陽安。固諸山。歷歷可攷。西巖在報恩寺西南隅。前有閣曰松風。謾謾來吹人。○本志云。咸安郡西資聖院。金錢井。每月明。輒有金錢影浮水上。又云。州治內有玉環井。形如玉環也。○文明樓額。志云。郡人何弱翁建。臨邛魏了翁書。里豪藏之家。爲雷所擊。移之書院。雷復擊之。凡三震而木不傷。今懸在北門外樓上。按弱翁。宋進士也。了翁。卽魏華父丞相。○志云。紫極宮在州南泮宮之側。東巖中峯。巍然峙起。後殿上有金鑄元宗像。宮中老君殿。題字乃蜀王建永平年號。○顏魯公本傳。唐上元元年。李輔國遷明皇於西宮。真卿率百僚上表。請問起居。輔國惡之。貶蓬州長史。宋唐子西贈杜守詩云。去天一尺古蓬州。除守年來得勝流。○志云。圭峯



禪師名宗密相傳州之鷲鷲山有井井側有巨人跡師母履之而孕已婉師以爲不祥棄之野牛馬避弗踐鷲鷲羽覆之母乃收撫及長出家於青蓮山講經地湧青蓮八龍聽講今有八龍池

營山縣

咸安在蓬州曰郡在營山曰縣若大蓬山則兼得而有之州之北山卽縣之南山也說者以爲大蓬之秀士巖飛仙巖朝陽洞魯公祠皆營縣界○按秀士巖乃李特讀書處俗名天子讀書臺巖下石室刻雲屋二字○志云登封縣令應真人諱靖唐僖宗時爲登封令後棄官學道得仙紹興中何格非見之於大蓬飛仙巖東自是數至格非第○又云大蓬山有朝陽洞空闊可容數百人封塞已久萬歷中重開○續碑目云營山縣顏祠有米元章書仙真事石刻乃近日南充王隆吉得於費縣草莽中者翻刻於此○其東四十里則青羊山有青羊宮元人建真武古像碑刻存焉鳳院山頂有鳳凰臺相傳鳳凰會棲其上有龍馬槽石形隱隱如龍鱗之狀宋郡守吳幾復詩蒼石皺紋龍跡在清泉涵泳海源通○西南六十里則披衣山天將雨山上雲霧馳曳如披衣焉山上有雲山寺寺中有池去果州嘉陵江三十里江水或淺其池亦淺江水或漲其池亦漲號天生池其山又有清溪之水出焉○北百二十里則孔雀洞洞門如圭竇其中宏敞左右有石床洞盡處有石孔雀水出喙中

儀隴縣

石銘儀隴洞勒金堆乃晉張英遇仙處也石門雙扇痕迹宛然事詳神仙記中○古方州置在方城山下

今縣之主山也。爲抱朴子結菴之處。有抱朴菴三字刻諸石壁。圖經葛洪詩云。酒盡君莫沽。壺傾我嘗發。城市與罽塵。空山弄明月。卽此山作矣。○志云古伏虞縣置在伏虞山下。宋僧道澄結菴於此。孫謬贈以詩曰。聞說虞山有道澄。白雲深處不開扃。自言古佛何爲者。只是無心一老僧。刻石於本山之奉國寺。○若夫龍車之穴。四時花發。六澗之水。相扶合流。火井天寒。焰從地出。龍蛟聖水。浴蠶倍利。則皆以秀特聞矣。



# 蜀中名勝記卷之二十九

## 潼川州一

漢鄠縣。三國志云。先主入蜀。攻劉璋。遣諸葛亮等分定州郡。略地至鄠。百姓以牛酒犒師於會軍堂山。卽此地東。廣漢郡後主置也。十道記云。廣漢之地有鹽井。銅山之富。蔬食果實之饒。宋劉甲人物志序。唐以前凡稱梓潼者。卽今之隆慶。稱涪者。卽今之綿州。惟稱鄠及廣漢縣。乃潼川也。○楊炯送梓州周司功詩。御溝一相送。征馬屢盤桓。言笑方無日。離憂獨水寬。舉杯聊破涕。暫爲歡。別後風清夜。思君蜀路難。盧照鄰送梓州高參軍還京詩。京洛風塵遠。裴斜烟霧深。北遊君似智。南飛我異禽。別路琴聲斷。秋山猿鳥吟。一乖青巖酌。空佇白雲心。王維送梓州李使君詩。萬壑樹參天。千山響杜鵑。山中一夜雨。樹杪百重泉。漢女輸檀布。巴人認芋田。文翁翻教授。不敢倚先賢。司空曙送崔校書赴梓幕詩。碧峯天柱下。鼓角鎮南軍。管記催飛檄。蓬萊輟校文。棧霜朝似雪。江霧晚成雲。想出襄中望。巴庸方路分。李洞送東川高僕射詩。油幢影裏拜清風。十里貔貅一片雄。三印鎖開霜滿地。四門關定月當空。泉浮山葉人家過。詔惹爐香鳥道通。新起畫樓攜客上。絃歌筵內海榴紅。李義山梓州罷吟寄同舍詩。不揀花朝與雪朝。五年從事霍嫖姚。君緣接座交珠履。我爲分行近翠翘。楚雨含情皆有託。漳濱多病竟無憍。長吟遠下燕臺去。惟有衣香染未銷。元稹詩序。元和四年三月七日。予以監察御史使東川。往來鞍馬間。賦詩凡三十二章。祕書省

校書郎白行簡爲予手寫爲東川卷云。○唐梓州參軍蘇榮丞相味道之父到職。授書鄉人曰。頃注吏部州參子。號縣帶。鄴名由來。不涉老身。併是婦兒官職。孫光憲北夢瑣言云。西川人言梓州者。我東門之草市也。柳仲郢爲東川節度使。美績流聞。嘗語人曰。吾仕朝廷三十年。清華備歷。今日始與西川作市令耶。人皆以爲善謔。○州治名世堂。畫司馬相如。王褒。揚雄。嚴君平。屈原。陳子昂。李太白。蘇子瞻八人。皆蜀產。而祇歸在蜀漢時爲建平郡。故三閩得兼收之。東坡送周正孺知東川詩。爲公掃棠溪。畫像或相繼。自注云。蜀中太守賢者無不畫像矣。○元和郡國志。州城宋元嘉中築。舊潼川志云。州之子城上紅樓。董璋時建。碑目云。後唐武信軍軍衙記。廣政間歐陽炯撰。蓮花滿天。聖中燕肅爲守日置。以候昏曉。仍自爲記也。○杜甫春日梓州登城樓詩。行路難如此。登樓望欲迷。身無卻少壯。迹有但羈棲。江水流城郭。春風入鼓鞀。雙雙新燕子。依舊已銜泥。孫樵梓潼移江記云。涪獠于鄴。迫城如蟻。淫漲秋狂。突堤蕩廬。榮陽公始至。則思所以洗民患。乃鑿江東壩地。別爲新江。東北注流。使水道與城相遠。百姓利賴之。魏了翁潼川府新城銘云。嘉定中永嘉曹君奉使按刑。乃建治城隍。且包牛峯。移西溪。爲久遠之計矣。○通典云。左帶涪水。右挾中江。水經涪水出廣漢涪縣西北。南至小廣魏。與梓潼水合。注云。小廣魏。卽廣漢縣地。王莽更名曰廣信也。經又云。梓潼水出其縣北界。西南入于涪。又西南至小廣魏南。入于墊江。註云。昔岑彭與臧宮伐公孫述。從涪水而上。卽此。亦謂之內水也。鄭谷東蜀春晚詩。如此浮生更別離。可堪長勸送春歸。潼江水。上楊花雪。剛逐孤舟綠縹飛。○方輿勝覽云。城東三里有東山寺。一名普惠寺。寺有蘇公泉。臨川門下瞰。

涪江志云。隔江修阜如長城。有蘇公泉暨石塔在焉。杜甫陪章梓州王闔州蘇蓬州李果州四使君登普惠寺詩。春日無人境。虛空不住天。鶯花隨世界。樓閣倚山巔。遲暮身何得。登臨意惘然。誰能解金印。瀟灑共安禪。魏了翁臨發潼上許侍郎奕提刑餞於東山賦詩留別云。人生出處亦何常。又到涪江江上鄉。山色如逢故人語。松聲仍作去年香。紅裳大舶滿清鏡。翠激白沙明夕陽。未省此權何日更。擬邀明月照昏黃。○李膺益州記云。桃花溪在東三十里。從涪城縣南流入涪水也。○本志云。西郊有亭。宋蒲規記以爲蜀相高平公所建。杜甫有鄴城西原送李判官兄武判官弟赴成都詩。○寰宇記云。牛頭山在鄴縣西南二里。高一里。形似牛頭。四面孤絕。俯臨州郭。上有長樂寺。樓閣烟花。爲一方之勝概。方輿勝覽云。鄴江源出銅山縣赤岸溪。遶牛頭山足。入涪水。亦謂之中江水也。又云。石谷溪源出當州杜山下。亦遶牛頭而入中水。○九州要記云。牛頭山。葛仙翁多遊於此。今立寺與白獸山相連。秦時有白獸爲害。夷人射之。因刻石於此山。今遺像尙存。圖經云。牛頭山。永福寺據其巔。廣化寺據其岡。羅漢院據其麓。本志云。永福寺梁武賜名長樂。唐名靈瑞。宋名永福也。杜甫上半頭寺詩。青山意不盡。滾滾上牛頭。無復能拘礙。真成浪出遊。花濃春寺靜。竹細野池幽。何處啼鶯切。移時獨未休。李洞秋宿牛頭寺詩。月去簷三尺。川雲入寺樓。靈山頓離衆。列宿不多稠。象字焚初缺。翻經誦若流。窗閒二江冷。簾捲半空秋。話散松梢別。碁終竹節收。靜增雙闕念。高並五翁遊。鶴夢生紅日。雲門鎖梓州。望空工部眼。搔亂廣文頭。石室僧調馬。銀河客問牛。曉樓歸下界。大地一浮漚。柳公綽題牛頭寺云。一出西城第二橋。兩邊山木晚蕭蕭。井花淨洗行人耳。留聽

溪聲入夜潮。○按靈瑞寺有浮圖。隨開皇建。王勃碑略云。牛頭山者。廣漢之名峯也。圓窗幾乎數里。直上逾乎百仞。蒼岑隱嶙。旁分玉砌之階。碧洞逶迤。下趣金陵之苑。因危立戶。跨險分榮。又于山頂別立浮圖。每至南江春返。四野晴初。山川霽而風景涼。林鹵清而雲霧絕。賞因時并。筆爲神驅。有情君子。誰爲捨乎。○神僧傳云。牛頭山。半有洞。人傳八百里。與眉州通。曾有避罪者匿其中。後於青神中巖見之。碑曰云。洞門寺。一名天甯。在牛頭山麓。舊鑄洞門字于巖側。○本志云。西五里三臺山下。有魯交洞。交讀書於此。卽宋仁宗手錄其清夜吟者。○盧照鄰集云。梓州城南池亭者。長史張公聽訟之別所也。觀其巖障迴。復川流澑注。雲窗綺閣。負繡堞之逶迤。澗戶山樓。帶金隍之繚繞。信巴蜀之奇制矣。圓潭寫鏡。光浮落日之津。雜樹開帷。彩綴飛烟之路。藤蘿杳鬱。挂疎陰以送秋。鳧雁參差。結流音而將夕。百年之懽。不再千里之會。何常。下客悽惶。暫停歸轡。高人賞玩。豈輟斯文。咸請賦詩。六韻成章云爾。照鄰得池字詩曰。二條開勝跡。大隱叶冲規。亭閣分危岫。樓臺遠曲池。長薄秋烟起。飛梁古蔓垂。水鳥翻荷葉。山蟲咬桂枝。遊人惜將晚。公子愛忘疲。願得迴三舍。琴樽長若斯。杜甫宴章梓州水亭詩云。城晚通雲霧。亭深到芰荷。吏人橋外少。秋水席邊多。近屬淮王至。高門荀子過。荊州愛山簡。吾醉亦長歌。○覽勝云。兜率寺在南山。一名門壽。亦隨開皇建。卽東坡詩所稱牛頭與兜率。雲木蔚堆壘也。林泉糾合之勢。山川表裏之形。抽紫巖而四絕。疊丹峯而萬變。運溪拒壑。所以控引太虛。蒸雲駕雨。所以盪洩元氣。此見諸王勃本寺浮圖碑矣。杜甫上兜率寺詩云。兜率知名寺。眞如會法堂。江山有巴蜀。棟宇自齊梁。庾信哀雖久。何顛好不忘。白牛車遠近。且

欲上慈航。文同題兜率寺云。籀領迷人喜暫閒。聊尋古寺陟孤巒。柏歲一徑中間窄。雲斂千峯四面寬。遠目已將飛鳥過。寸心更乞老僧安。若爲借得禪房宿。臥看龕燈一點殘。○寺內有文冢銘云。文冢者。長沙劉蛻復恐爲文。不忍棄其草。聚而封之也。蛻愚而不銳。於百工之技。天不工蛻也。而獨文蛻焉。故飲食不忘於文。晦冥不忘於文。悲感怨憤。疾病嬉遊。羣居行役。未嘗不以文之爲懷也。適當無事。而天下將以文爲貴。號文明。代生植。明晦皆效文用。故日月星辰。文乎旂常。魚蟲鳥獸。文乎彝器。徐方之士。文於侯社。夏翟之羽。文於旗旄。登龍於章。升玉於藻。百工婦人。雕鑿染練。以供宗廟祭祀之用。豈獨蛻也。生知效用。不及時文哉。然而意嘗獲助於天。不獲助於人。故其窮雖窮無憾也。當動意之時。不敢噫。不敢咳。不敢唾。不敢跛倚。嗜欲躁競。忘之於心。其祇祇畏。如臨上帝。故有粲如星光。如貝氣。如蛟宮之水。又有黯如屯雲。如久陰。如枯腐。熬燥之色。則有如春陽。如華川。逶迤迤迤。則有如運海。如震怒。動盪怪異。夫十爲文不得十如意。少如意則豈非天助乎。常欲使天下聞之。而必行勸之。而必蹈散之。茫洋以爲道。演之浸潤。以及物。然後爲農文之。使風雨以時。兵文之。使戎虜以順。文於野。文於市。使得其所。幽隱之士。以出口者。使之言材者。使之用。然而自振者無力。終知者甚稀。豈非不獲於人助乎。嗚呼。十五年矣。實得一千一百八十紙。有塗者。乙者。有注楷者。有覆背者。有珠墨圍者。於是以周易筮之。遇復之同人。筮者曰。鳴於地中。殷殷隆隆。七日不復。復來其天下昭融乎。它日更召龜而令之。將聽蓍吉。卜於火如秦兆。惟曰不吉。卜於水不成乎河洛。兆則亦惟曰不吉。卜於木而閭闕。土叶吉。蠱蠱爲冢。則汲之兆乎。峭峭爲壁。則魯之兆乎。且其



占曰。土之文爲阿山。爲華英。將不崩不竭。爲滋味而傳乎。結爲丘陵。爲其設險乎。融爲川瀆。率其朝宗乎。華爲百穀。以潔祭祀之粢盛乎。不然。使其速磨爲墟壤。生芻藁以食牛羊乎。化爲泥塗甄陶以作器乎。將魂爲五色。而分封茅社乎。流爲樂。爲土鼓。爲木槌。以泄其和聲乎。夷爲郡邑。以興宮廟。坎爲洿池。以澤生植乎。祀爲壇。竈乎。歛爲井墓乎。吾皆不得而知也。嘗旣不得爲吾用。惟速化爲百工之用。慎毋朽爲芝菌。以怪人自媚。慎毋堅爲金鐵。以作貨起爭。慎毋滴爲醴泉。以味乎詔口。慎毋禱爲城社。以狐鼠憑妖。慎毋登爲良材。以雕斲傷性。慎毋萌爲茵茵。以佩服見褻。嗚呼。介而爲石。使之服言。舒而爲蟪。使之飲泉。旣而他年遊魂之未返者。亦命巫以巾三招之。號曰在魯閣而來歸。今視不汝醜。在口吻而來歸。今几不汝久噫。筆絕之年。而麟見祟。文其無崇乎。陰非珠玉。斂無裙襦。後世詩禮之儒。無驚吾之幽墟。其家也在莽蒼之野。大塊之丘。時大唐大中之丁卯。而戊辰之季秋。銘云。文乎文乎。有鬼神乎。風水維貞。將利其子孫乎。按峽字復愚。唐懿宗朝爲左拾遺。上書言令狐綯之子濤不宜爲言官。貶山陽令。後寓居潼川。又北夢瑣言云。劉蛻桐廬人。早以文學進士。其父嘗戒之曰。任汝舉進取。窮之與達。不望於汝。吾沒後。慎勿祭祀。乃乘扁舟以漁釣自娛。竟不知其所適。蛻後登華貫。出典商於霜露之思。於是乎止。臨終亦戒其子如先考之命。蜀禮部尙書纂卽其息也。常爲同列言之。益部談資云。文家庭前。古柏數百株。皆虬枝而龍幹矣。○通志云。州南五里印臺山。趾方而頂圓。故名。其右三四里有落馬崖。昔有易元子乘馬至此。馬化爲龍。躍入江。○輿地紀勝云。州南七里有鶴林寺。杜詩。牛頭望鶴林。梯徑透幽深。春色浮山外。天河宿殿陰。傳燈

無白日。布地有黃金。休作狂歌客。回看不住心。○碑目云。王勃庾信護聖寺碑。在城北本寺內。又云。唐護聖寺鐘銘。龍紀二年節度使顧彥暉鑄。有銘。又云。護聖寺水陸浮屠巖北有甘泉亭碑。李潮八分書。又云。甘泉寺誓犀碑。李雍書。又云。護聖寺彌勒崖佛頌。唐大中年東川判官李商隱文。○高僧傳云。梓州城北有白門蘭若。在長平山。即北山也。山長而平。故名。碑目云。梓州官僚磨崖贊。唐武后時司法參軍楊炯。在北崖。字十六。七磨滅不可讀。炯又爲北山惠義寺銘曰。長平山。今建重閣。上穹隆。今下磅礴。紛被麗兮。駢交錯。儼靈相兮。冲寂寞。誰所爲兮。天匠作。杜甫惠義寺送王少尹赴成都分得峯字詩云。冉冉谷中寺。娟娟林表峯。闌干上處遠。結構坐來重。騎馬行春徑。衣冠起晚鐘。雲門春寂寂。此別惜相從。

#### 射洪縣

李膺益州記云。婁僂灘東六里有射江。土人語訛。以江爲洪。後周從俗。因改射洪矣。注水經云。涪江水又東南合射江。志云。縣東十五里射江源。自劍州歷梓至獨坐山下。與涪江合流也。○楊用修雜字韻寶云。洪。大壑也。俗省作洪。川中之射洪。徐州之呂梁洪。義皆取此。其言不知何據。然按寰宇記云。萬頃澤田在通泉縣東北二十二里。澤內方萬頃。則亦與大壑之義近矣。通泉。今併當縣。○陳子昂故宅在東武山下。本集云。子昂四世祖陳方慶好道隱於此。有唐朝道觀址。而真諦寺在其左。有暉上人者。子昂與之往還。本集酬暉上人夏日林泉詩云。聞道白雲居。窈窕青蓮宇。巖泉流雜樹。石室千年古。林臥對軒窗。山陰滿庭戶。方釋塵勞事。從君襲蘭社。又酬暉上人秋夜山亭有贈詩云。皎皎白林秋。微微翠山靜。禪居感物變。

獨坐開軒屏。風泉夜聲絕。月露宵光冷。多謝忘懷人。塵憂未能整。又酬暉上人。獨坐山亭有贈詩云。鐘梵經行罷。香牀坐入禪。巖庭交雜樹。石瀨瀉鳴泉。水月心方寂。雲霞思獨元。甯知人世裏。疲病苦攀緣。又暉上人房餞齊少府使入京府序云。永淳二年四月孟夏。東海齊子宦于此州。雖黃綬位輕。而青雲器重。故能委邦君而坐嘯。屈刺史而知名。屬乎變駕。巡方。諸侯納貢。將欲對揚天子。命我行人。執玉帛而當朝。擁騶駢而戒道。指途河渭。發引岷嶓。粵以丙丁之日。次於暉公別舍。蓋言離也。爾其巖泉列坐。竹樹交筵。吐青藜於軒窗。栖白雲於左右。參差油樹。亂山水之清陰。繚繞階庭。雜峯崖之異勢。入禪林而避暑。肅風景於中庭。開水殿而追涼。徹氛埃於戶外。瑤琴合奏。翠學時行。譚竊窺於天人。極留連於暑刻。旣而歡樂極良晨。征攀白日而不迴。唱浮雲而告別。山光黯黯。凝綠樹之將曛。嵐氣沈沈。結蒼雲而遂晚。雖同交未阻。風月可留。岐路方乖。關山咸恨。嗟乎朝廷子入。期富貴於崇朝。林嶺吾棲。學神仙而未畢。青霞路絕。朱紱途遙。言此會之何時。願相逢而誰代。永懷千古。豈知仁者之交。凡我三人。蓋崇不朽之迹。斯文未喪。題之此山。同疏六韻云爾。○碑目云。陳拾遺故宅有趙彥昭。郭元振題壁。杜甫過陳拾遺故宅詩云。拾遺平昔居。大屋尙修椽。悠揚荒山日。慘淡故園烟。位下曷足傷。所貴者聖賢。有才繼騷雅。哲匠不比肩。公生揚馬後。名與日月懸。同遊英俊人。多乘輔佐權。彥昭超玉價。郭振起通泉。到今素壁滑。灑翰銀鈎連。盛事會一時。此堂豈千年。終古立忠義。感遇有遺編。圖經載陳拾遺建德碑。大歷六年趙僧代梓州鮮于刺史作。于過縣之東門閭中。榜曰唐拾遺陳公宗祠。想必其後遷徙入城者。○子昂讀書。在金華山志云。上佛霄

漢下瞰涪江。有玉京觀在本山上。方輿云。東晉陳勳學道山中。白日仙去。梁天監中建。觀有唐明皇所鑄老君像。陳拾遺祠中有盧藏用祭文。陸魯望云。枝峯臺。整秀氣。磅礴不啻神仙登臨也。觀至有宋治平二年。賜號玉京。延祐元年。道士陳若海重修。二年。歲次乙卯。九月丙午朔。重九日甲寅。前渠州學正杜文炳記。本集。春日登金華觀詩云。白玉仙臺古。丹丘別望遙。山川亂雲日。樓榭入烟霄。鶴舞千年樹。虹飛百尺橋。還疑赤松子。天路坐相邀。杜甫冬到金華山觀。因得故拾遺陳公學堂遺跡云。涪右泉山內。金華紫崔嵬。上有蔚藍天。垂光抱瓊臺。繫舟接絕壁。杖策窮縈迴。四顧俯層巔。澹然川谷開。雲嶺日色死。霜鴻有餘哀。焚香玉女跪。霧裏仙人來。陳公讀書堂。石柱仄青苔。悲風爲我起。激烈傷雅材。盧藏用贊曰。岷山導江。回薄萬里。浩瀚鴻溶。東注滄海。靈氛氤。上薄紫雲。其瑰寶所育。則生異人。於戲。才可兼濟。屈而不伸。行通神明。困於庸豎。子曰。道之將喪也。命矣夫。○其相近者爲黃溪。志云。在縣北一里。卽黃初平叱石成羊處。○爲上方寺。志云。北關外。唐有釋氏文公知名。杜甫贈之詩云。野寺隱喬木。山僧高下居。俯視萬家邑。烟塵對階除。吾師雨花外。不下十年餘。長者自布金。禪龕只晏如。○爲石鏡寺。志云。在縣北二里。金華山之側。盧照鄰詩。古臺芙蓉塔。神銘松柏烟。鸞沈仙鏡底。花沒梵輪前。餘衣千古佛。寶月兩重圓。隱隱香塵夜。鐘聲徹九天。按寺宋淳熙間復建。國朝成化三年。僧繼圓於草莽中得古碑。字漫滅不可攷。惟存一詩云。昔日朱輪守。經過野寺家。柱間留墨跡。泉下隔年華。雲去空雕檻。風來捲碧沙。江山雖似畫。每到動吁嗟。繼圓因遺址重修。○其稍遠者。益部資談云。射洪北三十里。山巖迴合。梯磴透迤。谷口石刻風磴雲門。

四字。乃唐何將軍山林也。杜少陵與鄭廣文同遊處矣。○少陵早發射洪縣南詩。寒日出霧遲。清江轉山急。蓋指通泉路也。○子昂之墓在獨坐山。寰宇記云。山在縣東南二十五里。周迴一里。高一百丈。卓然孤峻。南枕涪梓二水。志云。此山似人巍然獨坐。故名。在縣南十五里。盧藏用題曰。道喪千載。而得陳君子昂。郭廷謂詩。魂逐東流水。墳依獨坐山。○按此山東北有公成山。唐時梓潼官吏掘得石甕。中有尊像一。真人六。獅子昆侖各二。于時王維爲留司表賀略云。是聖祖見於萬春鄉。語絳都人。而指其處也。周流六虛。言於晉而驗於蜀。混成一氣。出於有而入於無。未達齋心。初迷三里之霧。旣符真氣。俄成五色之雲。山腹洞開。仙容儼若。萬物今覩。千劫未逢矣。○其近者爲懸巖山。寰宇記云。在縣南一十五里。遠望懸崖。皎如白雪。舊名白崖山。天寶三年。敕改梓州志。白崖卽玉屏山下。有陸使君祠。使君諱弼。梁代譙瀘州刺史。卒於官。榭過射洪之玉屏山。而舟覆。瀘人哀之。爲立廟於此。土人呼曰白崖廟。宋世賜號顯惠。梁書有傳。卽陸放翁所云。以杜詩爲籤譜。往往有驗者。詳見詩話中。○爲龍門洞。志云。在臥龍山右里許。宋良菴先生隱處。紫巖張公嘗訪之。大書龍門二字。左有紫巖叟圖書。又其下頰云。淳熙戊申仲冬十三日。秦國張煜自翠麓縱步良菴龍門。獲觀先公太師魏國忠獻遺跡。江山增重矣。煜敬拂塵。不勝感慨。○爲全真觀。志云。縣南二十五里。全真觀。有古柏形如臥龍。又名木龍觀。○遠之爲乾明寺。志云。治南五十里。唐貞觀間。僧慧悟開山。宋熙甯中。僧居信建。王安石贈以詩云。如今別我去成都。始覺吾師道更殊。坐看空中雲與雁。五湖明月一輪孤。寺中有御書閣。其下爲堂。庭可容百人。柱皆連抱。兩山盤礴。檜柏森然。此知軍州事。

陳鵬所記矣。已上是通泉西界。○高僧傳云。通泉縣西山有大佛像。高百三十尺。兩邊泉流。唐貞觀。慧震所鑄也。○有歸雲洞。志云。在縣南五十里。洞深四丈五尺。廣八尺餘。其高如廣之度。中有石榻二。石竈二。茶竈石碁局各一。宋岑象求先生讀書處。按象求通志。稱中江人。第進士官至侍講。出將指使。入侍經筵。存心制行。爲士所矜式也。○又遠之百里。則洗水出焉。爲昔通泉縣治矣。黃潛名川。大浸名寺。皆取流泉。交注之義也。寰宇記云。洗水在通泉縣北。卽漢臧宮破公孫述將延岑處。又云。通泉山在縣西北二十里。東臨涪江。絕壁二百餘丈。水從山頂湧出。下注涪江。湧泉郡。故城在此。老杜通泉驛詩。驛樓衰柳側。縣郭輕烟畔。一川何綺麗。盡日窮壯觀。楊天惠連。龍閣記。通泉爲梓名邑。江山秀潤。土田平夷。蓋俱詠嘆其美也。○碑目云。晉雲南太守段宗仲德政碑。在通泉縣。碑在墓下。又云。唐薛稷書慧普寺三字。方徑三尺。筆畫雄勁。在通泉壽聖寺聚古堂。按慧普寺。梁大同中建。初造彌勒下生一座。相好端足。唐貞觀年。放光戶。牀皆明燭。人稱異焉。王勃頌曰。長江舊域。廣漠遺區。川分潼峽。塞接岷渝。閭閻四會。亭障咸紓。爰開寶地。實控名都。霞牕百雉。雲臺四注。紫闕尋烟。頰樓結霧。波流虹起。雷奔蠖步。網罩星鶉。璫栖月兔。靈機藻粹。禪室安閒。瑠金匏玉。翠翠浮丹。神功不夜。虛室長寒。光超有色。脫出無端。清露花徑。飛泉葉戶。礪綠苔秋。山蒼樹古。茫茫庶類。巍巍淨土。鶯鷺同歸。華夷共聚。第一義諦。寥廓法門。迹離生滅。思舉乾坤。情迷則復。道在爲尊。唯名與器。萬古長存。○張彥遠名畫記云。薛稷畫鶴。在通泉縣署屋壁後。老杜詩。薛公十一鶴。皆寫青田真。卽此處也。唐詩紀事。郭分振神龍間尉通泉。任俠使氣。不事小節。武后召。欲詰問。旣與語。奇。

之。索所爲文章。上寶劍篇。后覽之。嘉歎。杜甫過代公宅詩。豪傑初未遇。其跡或脫略。代公尉通泉。放意何自若。及夫登袞冕。直氣森帷薄。磊落見異人。豈伊常情度。我行得遺跡。池館皆疏鑿。高詠寶劍篇。神交付冥漠。志云。郭代公墓在通泉縣東。按慧普寺南園。有代公姬薛氏殯地。陳子昂爲誌銘矣。○予觀李知幾義家偈。信達者之言也。併錄之。偈云。佛子初出母胎時云。何便有人我。相布施慳貪。分兩種是義。不義相對治。恩怨一墮於有情。親愛路人。生異見。我今施汝大屋宅。與汝普儀諸有情。同舟越遇黑風。忽然得此大洲島。熙熙于于相勞問。笑語相接如一寮。佛子便當具正見。此本無情而相聚。不作思惟能相忘。此義廣大無情故。彈指贊歎諸佛子。願如流水大池魚。同日上生忉利天。受諸天子大快樂。長者亦以無情施。是故不名爲義者。淳熙二年九月己卯朔朝散郎前成都府路轉運判官李石撰。○右方舟先生所述射洪雍氏義家記。邑士高君喻持以相示。乃爲記曰。骨肉斃於下陰。爲野土。其氣發揚於上。爲昭明。此神之著也。夫生於土。歸於土。雖物理之常。要其死而不忘者。其神存也。若專冥漠之中。輪轉且久。一旦得塊土掩骼。所託何厚。若猶有知而不昧歸趣。吾將以觀其復。而爲生生化化之候。淳熙丙申甲寅迪功郎潼川府射洪縣主簿管學事韓南杞謹跋。

# 蜀中名勝記卷之三十

## 潼川州二

蓬溪縣

縣有三輿之號。晉爲晉輿。又爲巴輿。唐爲唐輿也。有赤城山。神君之跡著焉。有青石山。鄧芝之墓存焉。有長江。賈島之祠設焉。○按赤城山在治東一里。中峯蔚然。左右環拱。上有七曲老人祠。高臺五層。山皆赤土。張神君解道德經于此。產九節菖蒲也。蓬萊溪。遠其下。流入涪江。縣以溪名。唐天寶年置。舊爲唐輿矣。○青石山。昔置青石縣。卽晉輿縣也。有洞甚巖。九州要記云。天下青石無加於此。可爲鐘磬。華陽國志曰。鄧芝征涪陵。見元猿緣其山。芝性好弩。手自射猿中之猿。子拔其箭。捲木葉塞其創。芝嘆曰。吾傷物之性。其將死矣。見此山之美。後遂葬焉。李膺益州記云。青石嶺有九折。亦名九節嶺。九嶺之溪水出焉。碑目云。青石縣九節鎮金地院。有孝童孝女碑。志云。九節鎮在縣東南百里。與合州聯界。○長江後魏置縣。卽巴輿縣也。賈島送僧詩云。久住巴輿寺。如今始拂衣。欲臨秋水別。不向故園歸。島蓋主簿。是縣者。寄令狐相公云。策杖馳山驛。逢人問梓州。長江那可到。行客替生愁。有明月山在縣西南二里。島詩云。言心俱好靜。廡署落暉空。歸吏封宵鑰。行蛇入古桐。長江微雨後。明月衆星中。若任遷人去。西溪與剡通。○志云。浪仙有墓在焉。杜荀鶴詩。謫宦自麻衣。銜冤至死時。山根三尺墓。人口數聯詩。仙桂終無分。皇天似有私。暗松



風雨夜。空使老猿悲。唐安錡詩。倚恃才難斷。昂藏貌不恭。騎驢衝大尹。奪卷誤宣宗。馳譽超先輩。吟詩下我儂。司倉舊曹署。一見一心忡。曹松詩。先生不折桂。謫去抱何冤。已葬離燕骨。難招入劍魂。旅墳低却草。稚子哭勝猿。冥漠如搜句。宜邀賀監諡。薛能詩云。賈子命堪悲。唐人獨解詩。左遷今已矣。清絕更無之。畢竟吾猶許。商量衆莫疑。嘉陵四十字。一一是天資。李洞詩。第一人皆得。先生豈不銷。位卑終蜀土。詩絕占唐朝。旅葬新墳小。魂歸故國遙。我來因奠酒。立石用爲標。李頻詩。秦樓苦吟夜。南望只悲君。一宦終遐徼。千年隔旅墳。恨聲流蜀魄。冤氣入湘雲。無限風騷句。時來月下聞。宏秀詩。燕生松雪地。蜀死葬山根。詩僻降今古。官卑誤子孫。冢闌寒月色。人哭苦吟魂。暮雨滴碑字。年年添薜痕。崔塗詩云。雕琢文章字字精。我經此處倍傷情。身從謫宦方沾祿。才破椎埋更有聲。過縣已無曾識吏。到廳空見舊題名。長江一曲年年水。應爲先生萬古清。劉滄詩云。塵室寒窗我獨看。別來人事幾凋殘。晝空蕭寺一僧去。雪滿巴山孤客寒。落葉墮巢禽自出。蒼苔封砌竹成竿。碧雲迢遞長江遠。向夕苦吟歸思難。鄭谷詩云。水遠荒墳縣路斜。耕人訝我久咨嗟。重來兼恐無尋處。日落風吹鼓子花。黃滔詩云。曾搜景象恐通神。地下還應有主人。若把長江比湘浦。離魂不合自靈均。張贛詩云。生爲明代苦吟身。死作長江一逐臣。可是當時少知己。不知知己是何人。○宋襄鼎賈浪仙祠堂記云。唐韓退之善爲歌詩。導性情。一時相從者如孟郊、張籍、最號友善。而浪仙學詩于劉叉。晚得偕與二子游。頗以才調相推高。雖然。觀其風致清澹。得之自然。誠亦郊籍之儔。故後世學者語騷雅之流裔。孰敢外三子焉。浪仙由長江徙官安岳。而卒于會昌三年。凡爲編次其詩者。

二人許彬者謂之小集。而天仙寺浮屠無可謂之天仙集。當時之人有可名者。烏俱請之讚。天仙集傳之既久。反以讚爲退之之辭。然退之前後二集皆所不載。及得李洞句圖序實之。然後信其非也。浪仙于舊史無傳。邇來朝廷新其書。遂得附名于退之後。而頃歲居官者署祠堂于蜀土神廟廡之次。今伯氏實佐令長于是邑。嘗議其堂雜與神居。非所宜也。而尉有西圃者。在唐爲主簿之廨址。誠得遷其舊構。更以繪像。無構邑人於義何有。既遂。經畫而就之。其屋不華而完。其地不與而清。兩傍封植。筠柏鬱然。嗚呼。浪仙沒。距今二百二十餘歲矣。名始著于史策。而其遺貌又得宅于故處。迺知士之能蹈善。雖日用之遠。必有爲黼黻其迹者。今幸爾副其身後之所待。措之無窮。宜不復恨矣。而伯氏遠以書諭。俾文其實。且使後人知改作之有由也。○碑目云。招隱洞在長江縣南二十里。內有唐員半千題字。可楊。舊長江縣南二十里有唐磨崖金剛經圖。○又云。長江覺苑寺有唐元和十二年遂州刺史張九宗撰鑄鐘記。併書。○異物記云。遂溪西北長江縣界。古有珠玉村。其下爲珠玉溪。又有火井。在長江縣客館鎮之北二里。伏龍山下。地窪若池。以火引之。則有聲隱隱。然發于池中。少頃熾炎。夏月積雨停水。則焰生水上。水爲之沸。而寒如故。水涸。則土上有焰。觀者至焚其衣襟也。○舊唐興縣客館設于此。杜甫記云。中興之四年。王潛爲唐興宰。修厥政事。始自鰥寡。憫獨。而和其封內。非侮循循。不畏險巖而行。而壹咨于官屬。于羣吏。于衆庶。曰。邑中之政。庶幾繕完矣。惟賓館上滯下溼。吾人猶不堪其居。以容四方賓。賓其謂我何。改之重勞。我其謂人何。咸曰。誕事至濟。厥載則達。觀于大壯。作之閉闕。作之堂構。以永令圖。崇高廣大。踰越傳舍。通梁直走。崑將

墜壓素柱上承安若泰山。兩序旁開。發洩霜露。潛觀深矣。步欄復靈。萬瓦在後。匪丹雘爲。霄疎達爲。迴廊南注。又爲覆廊。以容介行人。亦如正館。制度少劣。直左階而東。封殖修竹茂樹。挾右階而南。環廊又注。亦可以行步。風雨不易。謀而集事。邑無妨工。亦無匿財。人不待子來。定不待方中。宿息并樹。或相爲賓。或與之毛。天子之使至。則曰有人焉。某無以栗階。州長之使至。則曰某非敢賓也。子無所用俎。四方之使至。則曰子貺某多矣。敢辭贊。或曰明府君之侈也。何以爲人。皆曰我公之爲人也。何以侈。子徒見賓館之近夫。厚。不知其私室之甚薄。器物未備。力取諸私室。人民不知賦斂。乃至館之醴醢。闕出于私廚。使之乘駟。闕辦于私廩。君豈爲亭長乎。是躬親也。若館宇不修。而觀臺樹是好。賓至無所納其車。我浩蕩無所措手。足。窳高枕乎。其誰不病吾人矣。玃瑕忽生。何以爲之。是道也。施舍。不幾乎先覺矣。杖之朋友。嘆曰。美哉。是館也。成而人不知。人不怒。靡署之福也。府君之德也。府君曰。古有之也。非吾有也。余何能爲。是亦前州府君崔公之命也。余何能爲。是日辛丑歲秋分。大餘二。小餘二千一百八十八。杜氏之老記已。

中江縣

眉山程建用與蘇子瞻書云。中江於東蜀號爲劇邑。以衰拙臨之。始至若無暇。泊半年而滯獄清。期年而庶事稍就。乃謀葺亭臺池館之舊。則西園之勝。有環翠亭焉。亭面北而枕南。相傳以辟公田所建也。亭前兩株桐。挺直無節目。高二丈餘。枝葉扶疎。亭後甃石爲山。傍植紅蕉。三面控掩。以牆。牆間列詩碑。皆辟公與其子球任本路憲日。并歷政諸公之所作也。袤百有五十丈。曰養閑亭。亭之後爲頤正堂。夾堂植花。

果堂之東爲潛閣。閣之前牡丹數叢。深紫色。此蜀花之鮮有也。閣後懸窗。窗外竹百餘本。紫如菴。織如筍。森如束。高出簷際。皆廖公子孟創植。文公同爲之記。其亭雄壯冠於邑。居西有臺。高丈餘。榜曰觀風。登臺倚欄。其南北與西境。山川歷歷可觀。惟東則爲亭屋。縣樓之所蔽。西有棲妙山。山有洞。田真人所名也。今爲集虛觀。古記云。此地雖多惡蟲蛇。唐廣德中。真人自南陽來。卜居其地。遂絕此患。南江自綿之神泉。縣來。衝山足。已而東走百五十里。至郡城下。合涪江。東江來自涪城。歷馬橋鎮。過五成山。至元武山下。入於南江。二江之水。冬或可涉。夏秋積雨。往往漲至數丈。爲墊溺之患。歷政禦以隄防。惟廖公有碑。亦與可之文也。五成在邑之艮地。山頭有二圓崖。高徑各丈餘。俗號挺眼。以邑民多頑悍。稟賦於是。前令修堤。命匠者塊之。以爲堤址。今無矣。觀山之壯而詳其名。則五成者。取爲壇五成之義。今以成爲城。蓋誤也。元武在邑東。其山周回三里。六屈三起。有龜蛇之象。昔之邑名與山皆取於此。僧寺枕其麓。榜以大雄。而元武之象實寓其中。其下有淵。淵前後石大如拳。小如彈。連延五七里。有龜甲之文者。近年又有蛇蟠之形者。濱江之民三四琢之。以售於好事者。此物理之不可考也。觀風臺之南有一亭。亭壁塑亂山。榜曰栩栩巖。取夢蝶之義。昔官於此者。或譏其晝寢。彼固以此爲名。建用因而廣之。以塑我眉而致其意焉。建用昔寓我眉。六七年。歸吾鄉。而卜居於北郊。則又遠與之相直。每春晴秋暉。則夫蒼翠嶺。巍然當吾廬之門。自從官於茲。別是山也。不爲不久。而歸遊未有期。故形於塑。塑匠邑民也。亡慮百餘人。凡兩川釋宮老廟之象。與夫豪貴之家。欲狀山川禽獸草木之類。莫不出於邑匠。選其匠之尤者而指示以圖。於是曲盡其妙。自

公之暇。近而觀之。由其足而循之。以至於頂。磴道橋閣相屬如線。僧寺山洞皆如其地。蟄雷之穴。光相之巖。枯木飛瀑。鮮不悉備。恍然以爲昔年之旅寓也。遠而觀之。瑣碎不能分。而大勢橫抹天半。忽然以爲出吾廬而倚衡門也。嗟夫。玩其塑以爲真。其迷可笑。然窮其真。亦何異於塑。而玩之者未能離形骸之內。則真與塑。何所往而非迷。沉區區之迹。旅寓之年。與夫去北郊之居。逾二紀矣。淒然傷齒髮之暮。而彼崔嵬者不失其故。不知冥冥中去者。彼亦不得而遞。此于道未明者之所爲。豈可以累於通人哉。建用欲易栩栩之名。而記其所以塑壁之意。恨才力之不逮。故舉一邑之大槩。以似明公雖蕞爾之地。不足以掛文翰。亦願明公命一名。撰一記。使不才之人得以附諸末幸也。東坡答書云。軾啓。自別永久。多難流落。百事廢弛。不復通問。獨吾兄不忘疇昔。時枉遠書。感忭不可言。讀別紙所記。山水園亭之勝。廢卷閉目。如到其間。所要亭記。豈敢於吾兄有所惜。但多難畏人。不復作文字。惟時作僧佛語。斗千萬體。察非推辭也。遠書不欲盡言。所示自是一篇高文。大似把飯叫饑。聊發千里一笑。會合無期。臨書悽然。○文同中江縣新堤記云。縣爲江所環。故名之。按縣東南有二橋。河水所經。西橋河自縣州來者。逕羅江縣。至此始可舟。古巴歌云。豆子山。打瓦鼓。陽平山。撒白雨。下雨。取龍女。織得絹。二丈五。一半屬羅江。一半屬元武。卽此水也。○志云。西橋河邊有洗墨池。水色如墨。唐文如海註南華經於此。○碑目云。游僊觀老君碑。田真人履記。俱在中江縣西。集虛觀蜀廣政六年立。志云。昔南陽田真人寓栖妙山。修煉每江漲。往來水上。如履平地。廣德中於市南石橋上輕舉矣。集虛觀在縣西一里。宋縣尉車彥遠有記。杜甫詩。凱州城下湍水流。凱州城

隅多古丘。集虛道人。不復見。白雲西北多悠悠。○方輿勝覽云。勾溪廟。卽天齊王祠。蘇子瞻詩。遙知勾溪路。老稚相扶擁。看畫古叢祠。百怪朝幽拱。通志云。勾溪廟在中江治西。祀隋凱州守李直之。按直之字正叟。本長安人。刺史凱州。與學設教。化行俗美。未年上疏乞骸骨。隱銅官山。童稚歌曰。我知古凱州。今日得李侯。李侯切莫去。此地可無憂。○東橋河自涪城來者。卽中江也。李膺益州記云。蜀漢五城縣立此水濱。在三隄山之東。華陽國志云。郡東南有水通于巴漢。時置五倉。發五縣民。尉部主之。後因以爲縣。注水經云。涪水又南。枝水出焉。西逕廣漢五城縣。爲五城水是矣。○本志云。城東甯國寺。在廢五城縣側。隋大夫趙才。司功卒。德建。宋祕書丞。萬嘗世記。併贊存焉。○東西二水。至元武山下合。而東南流。九州要記云。元武山一名赤雀山。一名宜君山。山有麀尾入貢。又華陽國志云。元武山一名三峒山。在縣東二里。其山六屈三起。出龍骨。傳云。龍升其山。值天門閉不達。死於此。後沒地中。民掘取其骨入藥。○唐詩紀事。王勃。盧照鄰。邵大震。九月九日登元武山旅眺。倡和絕句。詳見詩話中。盧照鄰宿元武山詩云。方池開曉色。圓月下清陰。已乘千里興。還撫一絃琴。杜甫題元武禪師屋壁詩。何年顧虎頭。粉壁畫蒼洲。赤日石林氣。青天江海流。錫飛常近鶴。杯渡不驚鷗。恍若廬山路。真隨惠遠遊。本志云。元武山。卽大雄山也。聖泉水出焉。王勃集謂元武山有聖泉焉。浸淫歷數百千年。乘巖泌湧。接磴分流。下瞰長江。沙堤石岸。咸古人遺跡也。茲乃青蘋綠芰。紫苔蒼蘚。遂使江湖思遠。寤寐寄託。旣而崇巒左披。石壑前縈。丹嶠萬尋。碧潭千頃。松風唱響。竹露霏空。瀟瀟乎人間之難遇也。方欲以林壑爲天。厲琴樽爲日用。嗟乎。古今不改。方深川上之悲少。

長同遊。且盡山陰之樂。盡題芳什。共寫高情。得泉字詩曰。披襟乘石磴。別藉宴深泉。蘭氣薰山酌。松聲韻野絃。響飄垂葉外。香度落花前。興盡林塘晚。重巖起夕煙。○子安又有題元武山道君廟詩序云。吾之有生二十載矣。雅厭城闕。酷嗜江海。嘗學仙經。博涉道記。知軒冕可以埋隔。鸞鳳可以徇待。而事親多衣食之虞。登朝有聲利之迫。清議滯於煩城。仙骨擢於俗境。嗚呼。阮籍意疏。嵇康體放。有自來矣。常恐運促。風火身非。金石遂令林壑交喪。烟籟板蕩。此僕所以懷泉塗而揣恐。臨山河而歎息者也。粵以勝友良暇。相與遊於元武西山廟。蓋蜀郡三靈峯也。山東有道君廟。古者相傳以名焉。爾其丹壑藂倚。元崖糾合。俯臨萬仞。平視重元。乘杳冥之絕境。屬芬芳之暮節。玉房跨霄而懸居。瑤臺出雲而高峙。亦有野獸羣狎。山鶯互囀。崇松埒巨柏。爭陰積瀨。與幽湍合響。眇眇焉。逸逸焉。王孫何以不歸。羽人何以長往。其元都紫微之事耶。方斂手鐘鼎。息肩巖石。絕視聽於寰中。置形骸於度外。不其然乎。時預乎斯者。濟陰鹿宏胤。安陽邵令遠耳。盡詩以言志。不以韻數裁焉。詩曰。源水終無路。山阿若有人。驅羊前動石。走兔欲投巾。洞晚秋泉冷。巖朝古樹新。斜崖連鳥翅。疊磴上魚鱗。化鶴千齡早。元龜六代春。浮雲今可駕。滄海遂成塵。其二云。振鬪疲霜冷。征月侍天淨。回鑪凌翠壑。飛軫控青岑。巖荒靈竈沒。澗毀石渠沈。宮闕雲間近。江山物外臨。玉壘棲暮液。珠洞給秋陰。瀟瀟離俗影。擾擾望鄉心。誰憶山遊好。徒傷人事侵。又有遊廟山賦序云。元武山西有廟。山東有道君廟。蓋幽人之別府也。長蘿巨樹。捎翳雲日。王子馭風而遊。冷然而喜。益懷霄漢之舉。而忘城闕之戀矣。思欲攀洪崖於煙道。邀羨門於天路。仙師不存。壯志徒爾。俄而泉石移景。秋陰方積。松

柏翠吟。悲聲四起。背鄉關者。無復四時之策焉。嗚呼。有其志。無其時。則知林泉有窮路之嗟。烟霞多後時之歎。不其悲乎。遂作賦曰。陟彼山阿。積石峨峨。亭皋千里。傷如之何。啓松崖之密蔭。攀桂岳之崇柯。隔浮埃於地絡。披顯氣於天羅。爾其綠巖分徑。蒼岑對室。菌軒丹紉。芝場翠密。俯石泉之清冷。臨風颺之瑟瑟。仰紺臺而攜手。望元都而容膝。躡霞岡於玉砌。步雲岳於金壇。懷妙童於真女。想青螭及碧鸞。情恍恍而將逸。心迴迴而未安。見丹房之晚晦。知紫洞之宵寒。旣而霧昏千嶂。烟浮四野。恨流俗之情多。痛飛仙之術寡。願逸思於方外。踴高情於天下。使蓬瀛可得而宅焉。何必懷此郤也。亂曰。已矣哉。吾誰欺。林壑逢地。烟霞失時。託宇宙兮無日。俟鸞虬兮未期。他鄉山川。祇令人悲。○去縣五里內。則爲火烽山。通志云。諸葛武侯嘗於此置烽火。十里內則爲犁刃山。李膺益州記云。山長八里。高出衆峯。形如鐮刀。○爲牟谷。宋史牟煥。中江人。隱居讀書。躬耕而食。人勸之仕。不可。嘗有詩云。日中還有景。月盈還有缺。我心比日月。晝夜常皎潔。鑿石龕藏書。銘之曰。龕虛其中。惟書之容。忍枵爾腹。萬卷而足。此山峩峩。人龕相磨。書傳世久。永親以壽。至今名其地曰牟谷。○一舍內則爲覆船山。十道錄云。堯時洪水。州人維舟泊此。覆於樹下。因名覆船山。又名泊山。益州記云。覆船山中十五里。有七里坂。一名羊腹坂。屈曲壁立。難昇之路。○百里內則爲銅山。昔漢文帝時。鄧通采鑄之所。後立銅官。大鳥山。小鳥山。大鄴水。小鄴水。皆出於其處也。○寰宇記云。大飛鳥山。高二里。周迴二里。又有小飛鳥山。高一里。周迴二里。重巒峻削。兩山相向。如飛鳥之狀。隋唐飛鳥縣鎮。皆以此名。又云。鄴江源出銅山赤岸。即故鄴王城也。流至飛鳥。合衆流入江。小鄴江源出蓮池。



鄉小山下東流六七十里合鄰江。王勃飛鳥縣白鶴寺碑云。白鶴寺者。蓋菩提寺之遺址。梁武皇之所建也。憑絕磴以圖規。俯長溪而作固。神明使宅。駕日月以長驅。鸞鳳知歸。撫雲霓而上出矣。

遂寧縣

德陽舊墨石山名區。初由縣而郡。後乃以節餼雄矣。英華所。載岑文本冊遂州。都督彭王元則文使持節督遂。普果合四州諸軍事。兼遂州刺史衙也。白居易訂刺史李繁制云。遂居蜀之腴。劉儀鳳南樓記。平原沃野。貫以涪江。氣象寬舒。爲東蜀之都。會李石賦云。山維東蜀。如連如伏。此貞觀之所以建督府。而我宋之所以壯龍邸也。水控內道。或正或譌。此劉裕之所以策譙。魯奇之所以抗閩孟也。○按五代史。孟知祥兵圍東川。唐節度使夏魯奇死守。檄諸道文。有城如斗。有壁如金。此之謂也。知遂州軍事李嗣忠節廟記略云。方董孟運衙稱兵十萬。突次明月池。而公以騎卒二千。勢不相軋。乃堅壁清野。坐困強敵。始自戊寅。迄於己巳。不幸食盡。勢窮。義不苟生。背裂血面。竟以死謝。騎守是邦。追維前烈。遂度地於東城之隅。建廟。請額。刻之堅珉。以風來世。本志稱遂寧治。後有忠井。即故節度夏公魯奇死所。每晴明霞彩上浮。○陳子昂遂州南江別諸親故詩。楚江復爲容。征棹方悠悠。故人憫。追送置酒此南洲。平生亦何恨。夙昔在林邱。遠此鄉山別。長謠去國愁。賈島廬州使君改任遂州。因寄贈云。庭樹幾株陰入戶。主人何在客聞蟬。鑰關原上高樓鎖。瓶汲池東古井泉。趁靜野禽會後到。休吟鄰叟始安眠。仙都山水誰能憶。西去風濤書滿船。鄭谷將之瀘郡。旅次遂州。遇裴晤。調居於此。話舊淒涼。因寄二首云。誰解登高問上元。謫仙何事謫詩

仙雲遮列宿離華省。樹蔭澄江入野船。黃鳥晚啼愁瘴雨。青梅早發中鬱烟。不知幾首南行曲。留與巴兒萬古傳。又昔年共照松溪影。松折溪荒僧已無。今日同思錦城事。雪鋪花謝夢何殊。亂離未定身俱老。騷雅全休道甚孤。我拜師門更南去。荔枝春熟回渝瀘。范成大遂寧府始見平川喜成短歌云。峽之西遂之東。更無平地二千里。惟有高山三萬重。不知誰人鑿混沌。獨此融結何其工。我本吳江弄水月。忽來踏徧西南峯。不知塵界在何許。但怪星辰浮半空。直疑飛入蝶夢境。此豈應有行人蹤。今朝半遠見城郭。云是東川軍府雄。原田坦若看掌上。沙路淨如行鏡中。芋區粟壠潤含雨。楮林行徑涼生風。將士驩呼馬蹄快。康莊直與錦里通。半年崎嶇得夷路。一笑未暇憐飄蓬。○松柏之石。昔著貞堅。桃李之村。今猶爛漫。按輿地紀勝云。宋建炎間。轉運使銜後園有松石。外猶松柏而中化爲石。又云。近郭東北有村三十里許。彌望皆桃李。春時盛開。爛漫如錦綺。郡守春日講出郊故事於此。○碑目云。蜀安國寺有碑。在遂州羅城外。永平二年立石。○志云。城南報恩寺前有白塔一名白塔院。舊傳隋煬帝公主隨夫謫蜀而建此塔。中藏舍利一粒。大如櫻桃。今寺廢塔存。歲有鶴來巢其頂。宋改今名。○寰宇記云。梵雲山者。三面懸絕。東臨涪江。西枕落星池。志云。在縣南三里。○又云。東二里雲靈山。與尋香山相連。有飛來石二。挺立巖隙。有唐人呂巖。張九宗詩。按尋香山本名血腥山。唐刺史白子防改今名。○碑目云。縣東七里靈泉山。壁間鑿七泉二字。東坡筆王象之云。隋開皇中。靈泉山大霧晦冥。三日始散。忽有釋迦石像立其所。遂建聖佛寺。卽資聖院也。方輿云。資聖院在小溪。靈泉山孫諤詩。四山藏一寺。方丈壓諸峯。回首坐禪處。白雲深幾重。○紀勝

云廣利寺在縣西五里巖壑之勝。甲於一方。雲廚之供。香閣隔宿。唐建中初。建爲善濟院。天祐改元。爲再興寺。宋乾寧爲廣利寺。國朝爲廣德寺。開山克幽禪師。詳見高僧傳中。本志云。宋釋者文易壁。山人惟靖。閩中人。俱入廣利浮屠說法。爲第三第四禪師矣。○予以壬子歲過之。遍摹碑刻。有唐觀察使朝議郎檢校尚書工部員外郎兼侍御史柱國賜緋李仁表撰勅賜遂州再興禪林寺記。天祐改元甲子。特進榮祿大夫禮部侍郎同平章丞相事侍御史柱國賜紫鄭繁行牒。○宋元祐五年守普州知安岳縣事趙嗣業撰。大唐克幽禪師塔記併書篆。○元豐八年乙丑金陵清谿達叟李回爲廣利寺文易記碑。○紹聖元年七月辛亥同真淨禪師表若此上。南昌黃庭堅題。○尙書省牒奉敕賜善濟塔。崇寧二年癸未敕戶部尙書右僕射蔡京行牒。○提舉榮州軍事推官馮世雄撰。遂州廣利禪寺善濟塔碑。瀘州防禦推官知湖州武康縣事充轉運司管勾帳司張康時書篆。梓州路轉運司管勾文字賜緋孫詔通判遂州軍州兼管內勸農事權勾軍州事武騎尉賜緋何修輔梓州路轉運判官飛騎尉賜緋許安石梓州路轉運判官兼提舉學事飛騎尉謝璋。崇寧二年癸未立石。○尙書省牒奉敕宜賜圓覺慧應慈感大師牒至準敕故牒參知政事鄭均。右丞相缺。乾道九年十二月御寶。○又有崇寧甲申大師忠惠秦國公河東劉懷遠詩云。大士難知何代人。克幽開創實艱辛。細思筋骨相連理。元是金剛不壞身。廣利月華千古皎。補陀潮水四時新。可能得悟如來意。使我靈臺不染塵。慶元丙辰二年中書省參知政事何澹題云。王事勤勞來去忙。征鞍暫歇叩禪房。幾經劫火福田固。一入禪林地地涼。塔下久藏金鎖骨。嶺前長放玉毫光。石頭路滑入難

到。我欲趨參問大方。寶慶丙戌僧隆榮。廣云。繞過溪橋眼力忙。重重樓閣擁僧房。千巖秀色諸緣斷。一井清泉萬劫涼。山上玉毫朝現瑞。塔中金鎖夜垂光。補陀殊勝歸南海。誰信飛來墮此方。慶元四年戊午四川都大茶馬官丁逢題云。出城數里卽青山。路入蒼松白石間。只合步行尋曲徑。不宜呵喝入松關。○碑目云。縣西長慶院有浮螺亭。又有卡高五十六體篆字碑。○志云。眞如院在東南十五里。唐咸通中建石壇上。有大寶幢高二丈餘。刻西方神咒。又倚山起屋。鑄石爲佛。凡佛龕一百。儀仗三千。○又云。北二十五里蓮華寺。一名崇善院。隋袁使君別業也。其相近法寶寺。一名妙臺。宋陳志剛文彥修遊此。有碑云。自城中來。飲切虛堂。歲晚江寒。極目烟靄。罷倦欲登妙臺。更索照上座茗椀乃去。○寰宇記云。龍頭山在州東五十里。山有石。勢如龍頭。唐乾元二年。秦置龍歸寺。○又云。龍池寺故老相傳。池側有柳樹。大十圍。周武帝天和初。有龍自樹下升天。士女共觀之。自龍升後。其樹乃枯。池亦淺竭。○志云。南五十里有花板寺。元憲宗入蜀。在此寺中生一子。名辨都。尋卒於此。後每遇天雨陰晦。見太子著赤袍行水上。鄉人以爲神。遂刻像立祠祀之。○志又云。大佛寺在縣南一百里。卽古定明院。在下遂寧縣南。唐咸通中建。前依巖石。宋治平間。賜額定明。其崖上有石佛首。靖康丙午。道者王了知命工展開身像。高八十尺。下俯江流。寺前有石壁立。色如黃羅。故俗名黃羅帳。其左有石磴。緣巖人撫掌則鳴。其聲如琴。又有合掌石。石左右向宛有指爪。介於湍流中。○方輿記云。東蜀道院。在郡治內。鬼子西爲記。碑目云。唐張九宗題記。在城東崇元觀。其字圓勁。有虞褚風骨。○本志云。東十里嵩山觀。有唐品巖詩云。兩日行山與尙稠。塵緣未斷且回頭。一

天風雨吹涼閣。四面藤蘿伴客留。著眼盡難爲業障。平生無過是浮漚。何須底死言名利。尋得清閒即便休。○寰宇記云。鶴鳴山在城東北二十里。上有古觀。松上嘗有鶴唳。○志云。集虛觀在城北二十里。廣山山極孤峭。斗入江心。涪江鄴水會其下。下有龍潭。山常動搖。有銅鑄明皇像。殿柱上有葛瓚題字。削之愈明。絕頂有葛仙洞。碑目云。遂寧廣山葛仙翁洞。上有殘碑。紀詩云。几字江頭鎖翠烟。一峯插立已參天。我來直上無人識。贏得清巖盡日眠。一云。城東八十里。有崇真觀。在白鷺山巖腹。乃周隋間葛仙翁煉丹之所。○輿地紀勝云。遂寧有上清觀。祀董上仙像。上仙唐小溪縣民女也。神姿雅異。一日紫雲垂布於庭。天樂青童引之上升。父母號泣呼之復下。開元中詔迎入關。乞還。未久竟仙去。詔置像于上清觀。志云。又于此地建唐興館。今唐興觀是也。入蓬溪界。已。上山川俱見寺觀中。

鹽亭縣

趙徵君蕤。此縣人。習術數之學。隱居不仕。著長短經。李太白往訪之。縣有濯筆溪。云太白從徵君習書處也。廢永泰縣。文同與可生于其鄉。丹淵集有北橋記。自敘邑令郭君經。請于其邑。人文同者。又有永泰劉令清隱亭詩云。木杪照初日。捲簾知曉晴。軒窗無限思。圖史有餘清。露下漾花重。風來泛竹輕。何須嫌五斗。持此謝淵明。○興可有夏日閒書墨。君堂壁詩云。先人有弊廬。涪水之東邊。我罷漢中守。歸此聊息焉。是時五六月。赤日烘遙天。山川盡慘燥。草木皆焦燃。塵襟旣暫解。勝境乃獨專。高林抱深麓。清陰密石綿。層巖敞戶外。淺瀨流窗前。邀客上素琴。留僧酌寒泉。竹簟白石枕。穩處只屢遷。忽時乘高風。遠望立雲煙。

野與極浩蕩。俗慮無一緣。氣爽神自樂。世故便可捐。卻憶爲吏時。荷重常滿肩。几案堆簿書。區處忘食眠。冠帶坐大暑。額汗常涓涓。每懼蒙深責。取適敢自便。安閒獲在茲。恍若夢游仙。行將佩守符。復爾趨洋川。山中豈不戀。事有勢外牽。尙子願未畢。安能賦歸田。其二。歸來山中住。便作山中人。冠帶亦自閒。累月不著身。散髮層巖阿。濯足清澗濱。石磴黏簡册。松風墮衣巾。鄉里多舊遊。不厭過從頻。山肴與野饌。待我如佳賓。有召卽走赴。愛其愛我眞。常恐禮數乖。取問吾交親。正此一夏樂。忽茲遘蕭辰。遺愧擁千騎。又走西道塵。此蓋石室先生所居處也。○杜甫行次鹽亭詩云。馬首見鹽亭。高山擁縣青。雲谿花淡淡。春郭水泠泠。丹澗集云。縣旣官於羣山。其修隴茂麓。逶迤曼衍。元勢而住。爭會于左。鯨偃鼈臥。尾吻相屬。谿溝澗谷。蟠縮破斷。蓋荒源野溜。漢湧深激。夏淙秋潦。相倚爲暴。故郊圻之地。少夷陸矣。○志云。西負戴山。則臨梓潼水。從劍門來者。隋張峻夫祠在焉。東潺亭山。則臨鹽亭水。從蘭州來者。隋董叔祠在焉。○寰宇記云。負戴山。一名高山。廢高渠郡城也。其山龍盤虎踞。由劍門入營縣。起伏四百餘里。至此而蹲。山有飛龍泉噴下。南流入梓潼。江水色清冷。其味甘美。時以爲瓊漿水也。嚴氏功德碑云。山南西道節度使移與元尹震。震弟山南西道。移東川節度使礪。二墓但在負戴山下。○神異記云。隋張峻夫遊蜀。至鹽亭。遇一老嫗。泣問之。嫗曰。地有井。每歲祭以男女。方汲。今輪次當以某男女祭。峻夫聞之愕然。許以除害。次日縛男女致祭。蟒從井出。將噬峻夫。卽杖劍投之。蟒遁山洞滅迹。峻夫登山洞口。封以巨石。書紫微仙洞四字。蟒害遂除。上帝命主此山爲神。至今血食。○寰宇記云。董叔山在縣東九十步。高一里。隔瀾江水。孤峯絕島。峭

壁千仞。舊名滌亭山。隋開元四年。縣令董叔封嘗遊宴於此。後人思其德政。號曰董叔山。十道記曰。董政山。隋開皇中。縣令董叔封。高雅之士。去官之後。民咸思其德。因指此爲董政山。○寰宇記云。鹽亭水。源出閬州西水縣。西南流入當縣鹽亭井。故名。鹽亭水去合梓潼水也。○碑目云。李義府碑。在永泰縣北。寰宇記云。義府本此郡人。武后時爲中書令。後人立碑以旌餘烈。真德秀云。李義府。奸臣也。其子湛以忠義聞。若湛者可謂能蓋父之愆矣。

安岳縣

寰宇記。梁普通中。義州刺史臨汝侯賜。羣獮金券。鏤書其文。云。今文汝置普慈郡。可率屬子弟。奉官租。以時輸送。此立郡縣之始也。○普州三亭。文同皆有詩。一曰均逸亭。詩云。亭宇跨城端。新苔磴道盤。風光晴水石。烟景暮林巒。簿領仍多暇。賓從每盡歡。何由掉塵鞅。聊問借闌干。一曰東溪亭。詩云。短笻逶迤渡。高欄天矯洗。波光環堵淨。日色綵梁深。萍苒翻金鮒。蘭茗起翠禽。主人公事簡。事此照清襟。一曰碧厓亭。詩云。斷巘綠溪邊。危亭翠壁前。軒窗誰是客。詩酒自稱仙。遠壑春藏雨。長波晝起烟。吏人休報事。高興正陶然。閩經云。城東南大成山。世傳孔子經宿于此。有古碑。又云。安岳城南樓。杜老教授其上。所爲南樓絃誦聲者也。○唐蘇絳賈島墓銘序云。島字浪仙。范陽人。長材間氣。超卓挺生。屬思五言。孤絕之句。記在人口。罹謗責。授遂州長江主簿。自長江簿。遷司倉參軍。又遷普州戶參軍。終焉。有祠在城南三里。碑目云。此碑以會昌四年立。馮賢書又云。唐宣宗大中八年。賜浪仙墓表曰。於戲。有唐詩流賈君之墓。志云。賈島墓在

城南三里安泉山。卽田家嘴也。○集古錄云。唐紫極宮碑。樂崗撰。賈島書。樂彥融篆額。元元皇帝祠也。碑以會昌元年立。在普州。○又云。唐西巖禪師受戒序。普州刺史韋忠開元十年建。又云。唐棲巖山寺贊銘。開元戊辰前刺史宏農見碑。開元三十九年岳陽郡奉敕建。大宋淳化二年重鑄。又云。唐棲巖山寺贊銘。開元戊辰前刺史宏農楊珪。博陵崔克讓書。刺史房公刻於山之石壁。下半已剝落。○志云。鐵山者。縣治之所枕也。一名鳳凰山。後二里曰大雲山。方輿云。鳳凰山在郡治後。形如飛鳳。福濟寺居其頂。舞鳳亭當其味。州治據其脊。左爲慈氏院。右爲白馬廟。延袤數里。氣象雄勝。唐獨孤及詩云。雁陣起秋雲。雞聲滿林屋。客思不可禁。鐵峯駐雕轂者。此也。方輿云。鐵山神姓姚。諱葺。字景徹。隋文帝時。普昌瀘三州夷作亂。帝命神爲都統。將兵討平之。卒葬韓朋鎮石城山。後人爲立廟。嘉定己卯。紅巾作亂於益昌。遂入普。屯于廟山。是夕暴風雷雨。掀揭寨舍。渠魁莫簡。見空中神異。謁廟謝過。探鐵得擒賊先擒王之句。已而就擒。志云。有司每以十月十七致祭。其誕日也。○方輿云。大雲山在鐵峯門外二里。有棲巖寺。卽李洞讀易處。洞。雍州人。避朱泚之難。入蜀。於大雲山鑿石爲洞。讀易其中。嘗師事賈島。鄭谷哭進士李洞詩。自聞東蜀病。唯我獨關情。若近長江死。想君勝在生。瘴蒸丹旆溼。燈隔素帷情。冢樹僧栽後。新蟬一兩聲。○方輿云。岳陽溪在安岳縣。天聖中。郡守彭乘鑿石爲曲水。後名翰林灘。每歲修禊事于此。雙溪在郡西七里。與岳陽溪合而東。按乘。益州華陽人。爲漢陽軍判官。顧望鄉閭。悵然曰。親老矣。乞歸侍養。寇準薦之。召爲集賢校理。求便親。得知普州。舊制蜀人不許赴蜀官。特恩自乘始。慶歷中。與歐陽文忠。宋景文。張文定。同在翰林。今東溪上曰翰林灘者。公



遺跡也。○志云。岳陽溪即青竹溪。又云。南二里響水潭爲岳陽溪上流。上下皆石。水觸之聲如金鼓。其洩如倒其澄如沚。○本志云。破石井在城西。其水清冽。乃一巨石鑿開而得水云。陳搏相地所開。按李宗諤圖經。謂陳搏字希夷。普州崇龕人。旣長。辭父母。去學道。或居毫。爲毫人。或居洛中。爲洛人。或居華山。爲華山人。舊普慈志云。鐵山峯崇龕梨天池。藕三者皆希夷所種也。○方輿云。良巖在岳之清流鎮。杜孝嚴嘗書良卦象辭其上。又作杜氏寶田銘云。昔我皇祖節範處士。實居谿上。題於石壁云。忠孝二字。吾家之田。爲我子孫。留此基銘。舊屋改矣。谿山自如。面溪背山。新構吾廬。山巖石壁。可以大書。乃作斯銘。毋忘厥初。銘曰。忠孝之寶。出爾天性。忠不待貴。養有尊。孝不待富。菽水盡歡。苟能保此。旣美且安。經史之田。在爾菑畚。稷稷是格。稂莠是除。苦心立志。斯爲良圖。雖有饑饉。必有豐餘。光明之山。韞玉初露。卜築山根。寶田所富。此山不磨。世寶長明。此山不滅。此田長畊。環培旣新。勒山爲銘。子子孫孫。生生成成。按杜孝嚴官試禮部尙書。史稱安岳杜孟游大學。見童蔡用事。翻然引歸。所謂節範處士也。○志云。馮公墓碑在棲巖山。字多剝落。名不可攷。按諸馮自唐馮宿之後。爲彰明令。因家于蜀。在普有南宗北宗之別。南宗有馮如晦。能辨范純仁之誣獄。馮宋與陳東同伏闕上書。北宗則有馮光猷。能戒大將楊瓊之殺降。馮澣之忤蔡京。遭貶。皆著名當世。

樂至縣


樂至池。卽治內池也。寇萊公爲縣令。嘗讀書于此。又有蓮池。一名洗馬池。舊傳勾侍郎所鑿。○治南有洞。

石刻小盤谷三字見存。而龍洞、龍潭皆可以禱雨。此通志所載。

# 跋

右蜀中名勝記三十卷。明曹學佺撰。學佺字能始。侯官人。萬歷乙未進士。官至陝西副使。天啓中除名爲民。崇禎初復官。不赴。唐王起閩中。進尙書太子太保。殉節死。事蹟具明史本傳。能始嘗官蜀中。著有蜀中廣記一百八卷。凡分十三門。後福清林茂之乃摘其廣記中名勝一門。改名蜀中名勝志。四庫提要已深詆之。惟是蜀中廣記。近已刊傳。而此書所載皆勝蹟名區。多足供詞人采摭。故雖未得爲全豹。而藝林傳誦。亦不能廢焉。其中博引繁徵。極爲該備。然亦時小有舛誤者。如蜀有數離堆。向來莽如聚訟。今於灌縣下引范石湖離堆詩。序嘉定州下又引紀勝云。烏尤山一名離堆山。已覺混淆。而灌縣下別引古今集記云。李冰鑿離堆山以避洩水之害。是以嘉定之離堆移爲灌縣之離堆。益舛誤矣。郫縣下云。山濤治郫。以筍釀醪酒。旬日香聞百步。按山濤足迹未嘗至蜀中。此第志乘無稽之說。而能始輒濫收之。未免無識。嘉定州凌雲山註。雅臺乃隄爲文學舍人注爾雅之地。近人吳白華侍郎考之甚詳。俗儒不知有舍人。注乃移之。郭璞并僞撰。璞有移水記。此書雖疑璞記爲增會。而不能明指註雅者何人。亦爲失考。眉山下稱有三蘇祠。在紗線街。卽蘇氏故宅。按。傅藻東坡紀年錄云。十二月十九日卯時。公生於眉山縣紗線街私第。至今紗線街尙存。此云紗線街。疑屬筆誤。成都下雪錦樓。本以杜詩雪嶺界天白。錦城曠日黃得名。此書不載其命名之義。以上數條。均屬千慮之一失。要其詳贍典雅。固足與益部談資。全蜀藝文志等書

並傳也。能始在明季與謝在杭、徐與公輩齊名。才藻甚富。而且致命遂志。大節凜然。雖隻字單詞。悉堪寶貴。況此裒然鉅著耶。爰亟加校錄。以付梓人。光緒乙亥小滿前二日南海伍紹棠謹跋。



中華民國二十六年三月初版

(96522)

國學基  
本叢書  
蜀中名勝記二册

每部實價國幣肆角

外埠酌加運費匯費

著者 曹學俚

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

(本書校對者 楊蔭深 林仁之 徐鼎銘  
董文澗 章德宣 朱廣福)

五六一六二八平

張

55072

